

ভারতের সাধক

শঙ্করনাথ রায়

কুন্ডু ব্যক্তিগত পাঠাগার



www.Banglaclassicbooks.blogspot.in

আমার কথা

বাংলা বইয়ের স্বর্ণখনি আমার সংগ্রহে আছে। যে বইগুলো আমার পছন্দ এবং ইতিমধ্যে ইন্টারনেটে পাওয়া যায়, সেগুলো মতুন করে স্ক্যান না করে পুরনোগুলো বা এডিট করে মতুন ভাবে দেবো। যেগুলো পাওয়া যাবেনা, সেগুলো স্ক্যান করে উপহার দেবো। আমার উদ্দেশ্য ব্যবসায়িক নয়। শুধুই বৃহত্তর পাঠকের কাছে বই পড়ার অভ্যাস ধরে রাখা। আমার অগ্রণী বইয়ের সাইট সৃষ্টিকর্তাদের অগ্রিম ধন্যবাদ জানাচ্ছি যাদের বই আমি শেয়ার করব। ধন্যবাদ জানাচ্ছি বন্ধু অন্তিমাস প্রাইম ও পি. ব্যাডস কে - যারা আমাকে এডিট করা লামা ভাবে শিখিয়েছেন। আমাদের আর একটি প্রয়াস পুরনো বিস্মৃত পত্রিকা মতুন ভাবে ফিরিয়ে আনা। আগ্রহীরা দেখতে পাবেন www.dhulokhela.blogspot.in সাইটটি।

আপনাদের কাছে যদি এমন কোনো বইয়ের কপি থাকে এবং তা শেয়ার করতে চান - যোগাযোগ করুন -

subhajit819@gmail.com.

PDF বই কখনই মূল বইয়ের বিক্রয় হতে পারে না। যদি এই বইটি আপনার ভালো লাগে থাকে, এবং বাজারে হার্ড কপি পাওয়া যায় - তাহলে যত দ্রুত সম্ভব মূল বইটি সংগ্রহ করার অনুরোধ রইল। হার্ড কপি হাতে নেওয়ার মজা, সুবিধে আমরা মানি। PDF করার উদ্দেশ্য বিরল যে কোন বই সংরক্ষণ এবং দূর দূরান্তের সকল পাঠকের কাছে পৌঁছে দেওয়া। মূল বই কিনুন। লেখক এবং প্রকাশকদের উৎসাহিত করুন।

There is no wealth like knowledge,

No poverty like ignorance

SUBHAJIT KUNDU



ଢାଘାଢ଼ର ଶାସିକ

ଅଥମ ଧଣ୍ଡ

ଶଞ୍ଜରନାଥ ରାୟ

କରୁଣା ଅକାଶନୀ । କଲକାତା-୨

প্রথম প্রকাশ ভাদ্র ১৩৫৫



প্রকাশক

বামাচরণ মুখোপাধ্যায়

১৮এ, টেমার লেন

কলকাতা-১

মুদ্রাকর

অনিলকুমার ঘোষ

দি অশোক প্রিন্টিং ওয়ার্কস

২০৯এ, বিধান সরণী

কলকাতা-৬

প্রচ্ছদশিল্পী

সুপ্রকাশ সেন

সূচীপত্র

শ্রী ত্রৈলোক্যস্বামী

যোগীরাজ শ্রী শ্যামাচরণ লাহিড়ী

যোগীবর গম্ভীরনাথজী

স্বামী ভাস্করানন্দ সরস্বতী

শ্রী রামদাস কাঠিয়াবাবা

বামা ক্ষ্যাপা

বালানন্দ ব্রহ্মচারী

স্বামী নিগমানন্দ

শ্রীত্রৈলোক্যধামী

বাবাগমীর আকাশগানে প্রভাতের আলোকচ্ছটা সবেমাত্র ফুটিয়া উঠিতেছে। বিশ্বনাথ-মন্দিরে মঙ্গলাবতি শুক হওয়াব আব বেশী দেবী নাই। শঙ্খ ঘণ্টাব দবে পথঘাট মুখরিত। দিকে দিকে শোনা যাইতেছে শিব-শান্তো-শঙ্কর-হব-মহাদেও ধ্বনি।

গৌমাধবের ঋজাব নিকটেই পঞ্চগঙ্গাব প্রাচীন ঘাট। পাথরের সোপ নতুলি ধানে ধাপে নীচে বহুদূরে নামিয়া গিয়াছে। সম্মুখে অন্ধচন্দ্রাকারে প্রসাবিতা বহিয়াছেন পুণ্যতোষা জাহুবী।

ভক্ত মুমুক্শু নর-নারী বোজই দলে দলে স্নানান্তে এ ঘাটের উপরে উঠিয়া আসে। মহাকায উলঙ্গ সন্ন্যাসীর চরণে নিবেদন করে তাহাদের প্রণাম ‘হব হব বম্ বম্’ শব্দে পরম শ্রদ্ধাভবে শিবের তাঁহার গঙ্গাবাবি, পুষ্প ও বিল্বপত্র ঢালিয়া দেয়।

নির্বিকার, ধ্যানগম্ভীর যোগীর কিন্তু কোনদিকে ভ্রক্ষেপ নাই।

সচল বিশ্বনাথানে ভক্তের দল প্রতিদিন এমনি কবিয়া এই মহাপুরুষকে দর্শন করিতে আসে, সমাধি-মগ্ন নিষ্পন্দ দেহে অর্পণ করে শ্রদ্ধা দ্য। কৃতার্থ হইয়া তাহারা স্বর্গহে ফিবিয়া যায়।

কাশীধামের আবাল-বৃদ্ধ-বনিতাব কাছে এই মানব-বিগ্রহ ত্রৈলোক্য মহাবাজ নামে পরিচিত। প্রায় দেড়শত বৎসর ধরিয়া এই শিবপুৰীতে তিনি বিবাজমান। যোগেশ্বর মহাপুরুষ বলিয়া লোকে যেমন তাঁহাকে শ্রদ্ধা ও বিশ্বাসের চোখে দেখে, তেমনি জানে পবন আত্মজনকপে। আপদ বিপদ ও সঙ্কটের দিনে এই মহাত্মারই পবমাশ্রয়ে তাহারা দিনের পর দিন ছুটিয়া আসে।

গঙ্গার ঘাটে যে ভক্ত নর-নারী একান্ত নিষ্ঠায় আজ যোগীবরকে অর্ঘ্য প্রদান করিয়া গেল, খোঁজ করিলে জানা যাইবে তাহাদের পিতা, পিতামহ ও প্রপিতামহও এমনভাবে এই দেবদুর্লভ পুরুষের সান্নিধ্যলাভে একদিন ধন্য হইয়াছে।

প্রায় আড়াইশত বৎসরের সুদীর্ঘ জীবনে কঠোর তপশ্চর্যার ফলে ত্রৈলোক্যস্বামী অর্জন করেন অপরিমেয় যোগবিভূতি। কিন্তু এই পরম সম্পদের অধিকারী হইয়া জনসমাজ হইতে তিনি দূরে সরিয়া থাকেন নাই, মুক্তিকামী আত্ম মানবের কল্যাণে জীবন-পথের দুই পাশে ইহা অবলীলায় ছড়াইয়া দিয়া যান।

স্বামীজী ছিলেন যোগসাধনার প্রদীপ্ত ভাস্কর। এই জ্যোতিষ্মান মহাপুরুষের চরণতলে বসিয়া সাধক ও দর্শনাখ্যার দল দিনের পর দিন আলোকস্নান করিয়াছে, জীবন তাহাদের সার্থক হইয়াছে। কিন্তু মহাযোগীর প্রকৃত স্বরূপ কি তাহারা উপলব্ধি করিতে পারিয়াছে? কে-ই বা জানিয়াছে এই নিগূঢ় অধ্যাত্মজীবনের মহিমা? এই করুণাঘন 'সচল বিশ্বনাথের' দিব্য স্পর্শে কত জীব যে শিবত্ব প্রাপ্ত হইয়াছে, সে সন্ধানই বা কয়জন রাখে?

বাণসীর মহাতীর্থে ভক্ত সাধকদের সংখ্যা নিতান্ত কম নয়। প্রায় দেড়শত বৎসরকাল ব্যাপিয়া স্বামীজীর উপদেশ ও আশীর্বাদ তাহাদের অনেকে লাভ করিয়াছেন, নিজ নিজ সাধনজীবনকে করিয়া তুলিয়াছেন উজ্জলতর।

সপ্তদশ শতাব্দীর দ্বিতীয় পাদের কথা। অন্ধদেশের ভিজিয়ানাগ্রাম অঞ্চলে হোলিয়া নামক এক জনপদ তখনকার দিনে বর্তমান ছিল। নরসিং রাও এখানকার এক ভূম্যধিকারী। সৎ ও ধর্মপরায়ণ বলিয়া সকলে তাঁহাকে সম্মান করিত। ভক্ত সাধিকা বলিয়া তাঁহার পত্নী বিচাবতীর সুনামও ছিল যথেষ্ট। স্বামী-স্ত্রী উভয়ে মিলিয়া সদাই দেবপূজা, ব্রাহ্মণসেবা ও নানাবিধ ধর্ম্যচরণে রত থাকিতেন।

শ্রীত্ৰৈলোক্যস্বামী

দীর্ঘকাল অতিবাহিত হইলেও রাও-দম্পতির কোন সন্তান জন্মে নাই। বংশরক্ষার জন্ত নরসিংহ তাই উৎকণ্ঠিত হইয়া উঠেন। অবশেষে বাধ্য হইয়া আবার তাঁহাকে আর একটি বিবাহ করিতে হয়।

গৃহে বহুদিন যাবৎ শিবলিঙ্গ প্রতিষ্ঠিত রহিয়াছে। এবার হইতে এই দেববিগ্রহের সেবা-পূজাতেই বিদ্যাবতী বেশীর ভাগ সময় কাটাইয়া দিতে থাকেন।

দেবাদিদেবের কৃপা অবশেষে একদিন নামিয়া আসে, বিদ্যাবতী একটি সুলক্ষণযুক্ত পুত্রসন্তান লাভ করেন। নরসিংহের গৃহ আনন্দ-কলরবে ভরিয়া উঠে।

শিবের করুণায় জন্ম—তাই শিশুর নামকরণ করা হয় শিবরাম। এই শিবরামই উত্তরকালে ভারতের অধ্যাত্ম-গগনে আবির্ভূত হন মহাযোগী ত্রৈলোক্যস্বামীরূপে।

শিবরামের জন্মের কিছুকাল পরে নরসিংহের অপর স্ত্রীর গর্ভেও এক পুত্রসন্তান জন্মে। তাব নাম রাখা হয়, শ্রীধর।

বিদ্যাবতী সেদিন শিবজীর ধ্যানে মগ্ন রহিয়াছেন। শিশু শিবরাম নিকটে বসিয়া আপন মনে খেলাধুলা করিতেছিল, তারপর শান্ত হইয়া কখন যে সে ঘুমাইয়া পড়িয়াছে, মা তাহা লক্ষ্য করেন নাই। পূজা শেষ হইবার পর হঠাৎ এক অলৌকিক দৃশ্য দেখিয়া তিনি স্তম্ভিত হইয়া গেলেন। দেখিলেন, শিব-বিগ্রহ হইতে নির্গত হইতেছে একটি অলৌকিক জ্যোতির ধারা। সারা গর্ভ-মন্দির ইহার ফলে আলোকিত হইয়া উঠিয়াছে। ক্ষণকাল পরেই এই জ্যোতি ভূতলে শায়িত শিশুর দেহে বিলীন হইয়া গেল।

একি অদ্ভুত কাণ্ড! বিদ্যাবতীর মনে জাগিল অজানা আশঙ্কা, অস্তব্যস্তে পুত্রকে কোলে নিয়া নিজের ঘরে প্রবেশ করিলেন তিনি।

নরসিংহের নিকট এ ঘটনাটি বিবৃত করা হইল। সমস্ত কিছু শুনিয়া সহধর্মিণীকে তিনি সান্ত্বনা দিলেন, “ওগো, তুমি মিছে ভেব না।

“এতে ভয় পাবার কিছুই নেই। এ সন্তান তুমি লাভ করেছ শিবজীর কৃপায়। এ তোমার দীর্ঘ আরাধনার ফল। প্রভু দেবাদিদেব আজ এ ইঙ্গিতই তোমায় দিয়ে গেলেন।”

বালক শিবরাম বড় স্বভাবগম্ভীর। সে যেন শিশুরাজ্যের এক ব্যতিক্রম। খেলাধুলায় তাহার কোন আসক্তি নাই। চঞ্চল, আনন্দমুখর সঙ্গীদের মধ্যে দাঁড়াইয়া নিজেকে সে বড় বিব্রত বোধ করে। শুধু বাল্যকালে বা কিশোর বয়সেই নয়, যৌবনের উন্মেষেও এই উদাসীন মনোভাব তাহার বাড়িয়া উঠিতে থাকে।

পুত্রের বৈরাগ্য ও বিষয়বিরক্তি ছিল সহজাত। কিন্তু সাধিকা জননীর কল্যাণ-ছায়াতেই গোড়ার দিকে সে তাহার বিধিনির্দিষ্ট জীবন-পথটি খুঁজিয়া পায়। এতদিনের শিবারাধনার ফলে সাধ্বী বিদ্যাবতী যাহা কিছু সাধনসম্পদ লাভ করিয়াছেন, পুত্রের জীবনে তিনি তাহা অকুপণভাবে ঢালিয়া দেন। অধ্যাত্মজীবনের প্রথম পদক্ষেপের কালে জননীই হন শিবরামের শিক্ষয়িত্রী। তাঁহারই নির্দেশিত পথে তরুণ সাধক অগ্রসর হইয়া চলেন।

পুত্রের চালচলন, তাহার এই বৈরাগ্য নরসিংহ রাওকে চঞ্চল না করিয়া পারে নাই। শিবরাম এখন যুবক। তাছাড়া, বংশের সে জ্যেষ্ঠ পুত্র। তাই পিতা স্বভাবতঃই তাহার বিবাহের জন্ত ব্যস্ত হইয়া পড়িয়াছেন। কিন্তু বিবাহ করাইবেন কাহাকে? তরুণ পুত্রের মানসপটে ইতিমধ্যেই ফুটিয়া উঠিয়াছে সংসারের অনিত্যতাবোধ। চিরকুমার থাকিয়া নিরুপদ্রবে তিনি সাধন-ভজন করিতে চান। পিতার প্রস্তাবে তাই তাঁঁর অসম্মতি জানাইয়া বসিলেন।

সর্ব্বাপেক্ষা বিশ্বয়ের কথা, শিবরামের মাতা বিদ্যাবতী নিজেই ছেলের এ মতকে সমর্থন করিয়া বসেন। নরসিংহকে বুঝাইয়া বলেন, “শিবরাম সংসার করতে চায় না। চিরকুমার থেকে সাধন-ভজন করবে, ভগবান লাভ করবে—এই সঙ্কল্পই সে করেছে। বেশ তো। এ রকম

শ্রীকৃষ্ণস্বামী

সাধু সঙ্কল্পে তাকে এমন করে বাধা দেওয়া কেন ? আমি বলি কি, শ্রীধর-দর্শন করে সে বংশের মুখ উজ্জ্বল করুক। ঘর-সংসার করবার জন্তে তো শ্রীধরই রয়েছে।”

মহীয়সী জননী এই কথায় সবাই সেদিন বিস্মিত হয়, মুগ্ধ হয়। অতঃপর নরসিংহ আর বড় ছেলের বিবাহের প্রস্তাব নিয়া পীড়াপীড়ি করেন নাই।

শিবরামের সাধন-জীবনের প্রথম বাধাটি সেদিন মায়ের প্রভাবে এমনি করিয়া অপসারিত হইয়া যায়।

বৃদ্ধ নরসিংহ রাও-এর জীবনের দ্বাবে হঠাৎ একদিন পরলোকের ডাক আসিয়া গেল। শিবরামের বয়স তখন চল্লিশ বৎসরের বেশী নয়। ইহার প্রায় বার বৎসর পরে বিজ্ঞাবতী দেবীও একদিন আত্মপরিজনের মায়া কাটাইয়া সাধনোচিত ধামে প্রস্থান করিলেন। পিতৃপ্রয়াণে শিবরামের সংসাববন্ধন শিথিল হইয়াছিল, এবার জননীবিয়োগে সে বন্ধন একেবারে ছিন্ন হইয়া গেল।

গ্রামের শ্মশানের একপ্রান্তে একটি পর্ণকুটির বাঁধিয়া তিনি অধ্যাত্ম-সাধনায় নিমগ্ন হইলেন। কনিষ্ঠ ভ্রাতা শ্রীধরের অশ্রুজল, আত্মীয় ও বন্ধুবান্ধবদের অনুনয়, কোন কিছুই সেদিন তাঁহাকে সঙ্কল্প হইতে বিচ্যুত করিতে পারে নাই। পৈত্রিক বিষয়-সম্পত্তি সব শ্রীধরকে দান করিয়া সংসারের সমস্ত বন্ধন তিনি ছিন্ন করিলেন।

সাধনকুটিরের একদিকে রহিয়াছে চিতাভস্মপূর্ণ মহাশ্মশান, আর এক দিকে কাল্মালিনী তটিনী। জীবন-মরণের এই পটভূমিকায় বসিয়া ছুজের মহাসত্যকে শিবরাম উপলব্ধি করিতে চান। একান্তে ও পরম নিষ্ঠায় তাঁহার সাধনা অগ্রসব হইয়া চলে। দীর্ঘ বিশ বৎসর কাল এখানে একই স্থানে বসিয়া তিনি কাটাইয়া দেন।

ত্যাগ-তিতিক্ষা ও কুচুসাধনের ফল অবশেষে ফলিয়া যায়। কোন্ এক অদৃশ্য শক্তির ইঙ্গিতে শ্মশানক্ষেত্রের ঐ পর্ণ-কুটিরটিতে

যেদিন পদার্পণ করেন ভগীরথস্বামী সরস্বতী । পাঞ্জাবের বাস্তুর গ্রামে ছিল এই শক্তিমান সাধকের আদি বাস । ইনিই শিবরামের ঈশ্বর-নির্দিষ্ট পথপ্রদর্শক—চিহ্নিত যোগীগুরু ।

ভগীরথস্বামীর ইচ্ছিতে শিবরাম এবার চিরতরে হোলিয়া গ্রাম ত্যাগ করেন । তারপর দক্ষিণ ও উত্তর ভারতের নানা তীর্থ পর্যটনের পর উভয়ে পুষ্করে আসিয়া উপস্থিত হন । এই পবিত্র তীর্থে সাধক শিবরাম স্বামীজীর নিকট হইতে সন্ন্যাস গ্রহণ করেন । এ সময়ে তাঁহার বয়স প্রায় আটাত্তর বৎসর । সন্ন্যাসাশ্রমে তাঁহার নূতন নামকরণ হয়—গণপতি সরস্বতী । কিন্তু তেলঙ্গ দেশ হইতে আগত সন্ন্যাসী বলিয়া উত্তরকালে কাশীর জনসাধারণ তাঁহাকে ত্রৈলোক্যস্বামী নামেই অভিহিত করিত ।

দীক্ষা গ্রহণের পর হইতেই শিবরাম সাধনার গভীরে নিমজ্জিত হইয়া যান । গুরু ভগীরথস্বামীজী পুষ্করতীর্থেই মরলীলা সম্বরণ করেন । তারপর এই পবিত্র ক্ষেত্রে প্রায় দশ বৎসর কঠোর যোগ সাধনার পর ত্রৈলোক্যস্বামীজী ভারতের কতকগুলি প্রসিদ্ধ তীর্থের পরিক্রমায় বহির্গত হন । এ সময়ে তাঁহার বয়স ছিল অষ্টাশী বৎসর । কিন্তু এই বৃদ্ধ বয়সেও জরাবার্দ্ধিক্যমুক্ত এই সিদ্ধ-যোগীর স্তুতি দেহ লোকের মনে বিস্ময় জাগাইয়া তুলিত ।

কয়েক বৎসর পরের কথা । স্বামীজী তাঁহার পর্যটনের পথে সেবার সেতুবন্ধ রামেশ্বরধামে উপনীত হইয়াছেন । মহা সমারোহে সেখানে এক বৃহৎ মেলা অনুষ্ঠিত হইতেছে । দরিদ্র, ব্যাধিগ্রস্ত এক ব্রাহ্মণতনয় এ সময়ে এই তীর্থক্ষেত্রে অকস্মাৎ প্রাণত্যাগ করিলেন । মৃতদেহ সংকারের আয়োজনে সকলে ব্যস্ত, মৃতের আত্ম-পরিজনের বিলাপ ও আর্তনাদে এক করুণ দৃশ্যের অবতারণা হইয়াছে ।

প্রশান্তবদন বিরাটকায় এক সন্ন্যাসী দণ্ডকমণ্ডলু হস্তে ঐ স্থান অতিক্রম করিতেছিলেন । বিলাপ ও কান্নার করুণ ধ্বনি তাঁহার কর্ণে

শ্রীত্ৰৈলোক্যস্বামী

প্রবেশ করিল, অন্তরে জাগিল আলোড়ন। কমণ্ডলু হইতে কিছুটা জল নিয়া মহাপুরুষ অশ্রুটস্থরে কি এক মন্তোচ্চারণ করিলেন।

ঐ জল মৃতের দেহে ছড়াইয়া দিবামাত্র এক অলৌকিক কাণ্ড ঘটিয়া যায়। সহস্র সহস্র মানুষের দৃষ্টির সম্মুখে ব্রাহ্মণকুমারটি ধীরে ধীরে চক্ষু উন্মীলন করে। দেখা যায়, মহাত্মার যোগ-বিভূতির বলে শবদেহে প্রাণ সঞ্চারিত হইয়াছে।

যোগীপুরুষ কিন্তু জনতার ভীড় এড়ানর জন্ত ইতিমধ্যে কোথায় অদৃশ্য হইয়া গিয়াছেন।

মেলায় একদল সিদ্ধ মহাপুরুষের নিকট এই শক্তিধর সন্ন্যাসীর পরিচয় সেদিন গোপন থাকে নাই। তাঁহাদের কাছে শোনা গেল, ইনি মহাযোগী ভগীবথজীর সার্থকনামা শিষ্য, গণপতিস্বামী। উত্তর-কালে এই সন্ন্যাসীই প্রসিদ্ধিলাভ করেন ত্রৈলোক্য মহারাজ নামে।

ইতিমধ্যে আরও বহু বৎসর কাটিয়া গিয়াছে। স্বামীজী মহারাজ নানা দুর্গম তীর্থ পরিক্রম করিতে করিতে এক সময়ে নেপালে আসিয়া উপস্থিত হন। সেখানকার গভীর অরণ্যে এ সময়ে কিছুকালের জন্ত তিনি কঠোর তপস্যা শুরু করেন।

নেপালের এক রাণা সেদিন শিকারের উদ্দেশ্যে সদলবলে গহন বনের মধ্যে ঢুকিয়া গিয়াছেন। অনেক খোঁজাখুঁজির পর বাঘের সন্ধান পাওয়া গেল। কয়েকটি গুলীও তিনি নিক্ষেপ করিলেন, কিন্তু বার বারই হইল লক্ষ্যভ্রষ্ট।

রাণার ছেদ চাপিয়া গেল। সঙ্গীদের ফেলিয়া দ্রুতবেগে তিনি শিকারের পশ্চাদ্ধাবন করিলেন। খানিক পরেই যে দৃশ্য সম্মুখে উদ্ঘাটিত হইল, তাহাতে বিশ্বয়ের সীমা রহিল না। দেখিলেন, বিরাটকায় এক যোগী অদূরে বৃক্ষমূলে সমাসীন রহিয়াছেন, আর পলায়মান সেই বাঘটি গর্জন করিতে করিতে তাঁহার আসনের সম্মুখে আসিয়া লুটাইয়া পড়িয়াছে। যোগীবর আদর করিয়া ঐ শরণাগত

ব্যাঘ্রের দেহে ধীরে ধীরে হাত বুলাইতেছেন। তাঁহার কাছে এটি ঘেন এক পোষা মার্জ্জার।

রাণা ও তাঁহার অনুচরগণ তো বিস্ময়ে হতবাক্ ! দূরে দাঁড়াইয়া তাঁহারা নির্নিমেষে এ অদ্ভুত দৃশ্য দেখিতেছেন। এমন সময় হস্ত সঞ্চালন করিয়া যোগী রাণাকে অভয় দিলেন, নিকটে ডাকিলেন।

প্রণাম করিয়া উঠিয়া দাঁড়াইতেই রাণাকে সন্মুখে তিনি কহিলেন, “দেখো বেটা, ইহা কোই ডরকা কারণ নহি হয়। তেরা মনুসে হিংসা হটা দো, ইয়ে শের তুমকো কুছ্ বিগাড়নে নহি সকেগা। সবকোই জীব তো একহি ভগবানকো সৃষ্টি হয়—উস কি প্রেম দো, উয়ো ভি জরুর তুমকো প্রেম দেগা। ইয়ে বাত্ ঠিক্‌সে ইয়াদ্ রাখ্‌না”—অর্থাৎ, দেখ বাবা, আমার এখানে তোমার কোন ভয়ের কারণ নেই। তোমার মন থেকে হিংসা দূর করে দাও, তাহলে বাঘ কখনো তোমার অনিষ্ট সাধনে সক্ষম হবে না। সব জীবই তো ঈশ্বরের সৃষ্টি—সব জীবকেই তুমি সত্যকার প্রেম দাও তাহাও তোমাকে এ প্রেম ফিরিয়ে দেবে।

রাণা সাহেব সেদিন কাঠমাণ্ডুতে ফিরিয়া গিয়া নেপালের প্রধান মন্ত্রীর কাছে এই অদ্ভুতকৰ্ম্মা মহাযোগীর কাহিনী বিবৃত করেন। শ্রদ্ধার্ঘ্যস্বরূপ ভেট নিয়া প্রধানমন্ত্রী ত্রৈলোক্যস্বামীসহিত সাক্ষাৎ করেন তাঁহার আশীর্ব্বাদ পাইয়া ধন্য হন।

যোগীবরের অলৌকিক কাহিনীর কথা লোকমুখে ক্রমে প্রচারিত হয়, অরণ্যমধ্যে প্রচুর জনসমাগম হইতে থাকে। বাধ্য হইয়া স্বামীজীকে এই বনাঞ্চল ত্যাগ করিতে হয়।

স্বামীজীর বিভূতিলীলা এই সময় হইতে নানাস্থানে প্রকটিত হইতে থাকে। শোক, তাপ ও ব্যাধি জর্জরিত মানবের দুঃখমোচনের জন্য আগাইয়া আসিয়া যোগবিভূতির এই লীলা আত্মপ্রকাশ করে করুণালীলা রূপে। আপনভোলা শক্তিধর সন্ন্যাসীর মন্থকেন্দ্রে যাহারই

আৰ্ত্ত আবেদন কোনমতে একবার পৌঁছিতে পারিয়াছে, কুপার ধীরে তখনি সে হইয়াছে অভিষিক্ত ।

নেপাল ত্যাগের পর তিব্বত ও মানস-সরোবর ঘুরিয়া স্বামীজী সেবার হিমালয় হইতে নীচে অবতরণ করিতেছেন । পথে হঠাৎ একদিন দেখিলেন, গ্রামবাসীদের প্রচণ্ড ভীড় জমিয়া গিয়াছে । ভূমিতে উপবিষ্ট এক বিধবা স্ত্রীলোক । সাত বৎসর বয়স্ক একটি বালকের মৃতদেহ কোলে করিয়া সে উচ্চস্বরে কাঁদিতেছে । এই বালকই ছিল তাহার জীবনের একমাত্র অবলম্বন, নয়নের মণি । তাহাকে হারাইয়া অভাগিনীর হৃদয়ে শোক সাগর উথলিয়া উঠিয়াছে, কাহারো প্রবোধবাক্য সে কানে তুলিতেছে না ।

সঙ্গীরা শব-সংকারের জন্ত প্রস্তুত হইয়াছে, এমন সময় স্বামীজী ধীর পদবিক্ষেপে সম্মুখে আসিয়া দাঁড়াইলেন ।

তেজঃপূজকলেবর কে এই বিবাটকায় সন্ন্যাসী ? তাহাকে দর্শন করামাত্র পুত্রশোকাতুরা মাতার অধীরতা কেন যেন হঠাৎ ধামিয়া গেল । তবে কি তাহারই বিপদোদ্ধারের জন্ত, এই শিশুকে বাঁচানর জন্ত এ মহাপুরুষের আবির্ভাব ? ইনি কি দৈব-প্রেরিত ? শোকাকুলা জননী তখনি মৃত বালকটিকে কোল হইতে নামাইয়া সন্ন্যাসীর পদতলে শোয়াইয়া দিলেন ।

রমণীর ক্রন্দন ও মিনতিতে যোগীবরের দুই চোখ করুণায় ছল্ ছল্ করিয়া উঠিল । প্রশান্ত বদনে মৃতদেহের দিকে তিনি আগাইয়া আসিলেন । দিব্য করস্পর্শে শবের মধ্যে দেখা গেল প্রাণের স্পন্দন । একি বিস্ময়কর কাণ্ড ! জননী ও আত্মজনেরা বালকটিকে ফিরিয়া পাইয়া আনন্দে উন্মত্ত হইয়া উঠিল ।

কিছুক্ষণ বাদেই অদ্ভুতকৰ্ম্মা সন্ন্যাসীর খোঁজ পড়িল । কিন্তু তিনি কোথায় ? তাহাকে তো পাওয়া যাইতেছে না । সবার দৃষ্টি এড়াইয়া খেয়ালী সন্ন্যাসী অদূরস্থ কোন্ গিরিকন্দরে অদৃশ্য হইয়া গিয়াছেন তাহা কেহ লক্ষ্য করে নাই ।

শঙ্করাচার্য হইতে অবতরণ করার পর ত্রৈলোক্যস্বামী নর্মদাতীরে আসিয়া উপস্থিত হন। সর্বজনবন্দিতা এই শ্রোতস্বিনীর তটে রহিয়াছে পুরাণ-বিশ্রুত মার্কণ্ডেয় ঋষির আশ্রম। কয়েকটি বিশিষ্ট সাধু মহাত্মা সে সময় এই পবিত্রস্থানে বসিয়া তপস্যা করিতেছেন। আশ্রমের এক কোণে নিজের আসনটি স্থাপন করিয়া ত্রৈলোক্য মহারাজও কিছুকালের জন্য ধ্যান ধারণায় রত হইলেন।

খাকীবাবা নামে এক মহাপুরুষ দীর্ঘদিন যাবৎ এখানে অবস্থান করিতেছিলেন। এ অঞ্চলে তাঁহার যোগ-সিদ্ধির খ্যাতিও ছিল যথেষ্ট। একদিন শেষরাত্রে খাকীবাবা নর্মদার তীরে বসিয়া সাধনক্রিয়া করিতেছেন, হঠাৎ নর্মদার জলধারার দিকে তাঁহার দৃষ্টি নিবদ্ধ হইল। অদূরে দেখিলেন এক অদ্ভুত দৃশ্য!—নর্মদার জলশ্রোত শুভ্র ছুঙ্কধারায় রূপান্তরিত হইয়া কুলুকুলু শব্দে বহিয়া যাইতেছে, আর শ্রোতোমধ্যে দণ্ডায়মান ত্রৈলোক্যস্বামী এই ছুঙ্কধারা বারবাব অঞ্জলি পুরিয়া পান করিতেছেন।

মহাপুরুষ খাকীবাবার বৃদ্ধিতে বাকী রহিল না, নবাগত সন্ন্যাসী ত্রৈলোক্যস্বামীর শক্তিবলেই এমন বিস্ময়কর কাণ্ড সম্ভব হইয়াছে। কোন এক আত্মবিস্মৃত মুহূর্ত্তে মহাযোগীর হৃদয়ে জাগিয়া উঠিয়াছিল নর্মদা-মার্গের স্তম্ভধারা পান করার অভিলাষ, ব্রহ্মজ্ঞ পুরুষের সেই অভিলাষই হইয়াছে অমোঘ। তাই সে পীযুষধারাকে আজ এমন করিয়া আকর্ষণ করিয়া আনিয়াছে?

বড় অভাবনীয় নর্মদার এই পরিবর্তন। অলৌকিক শক্তি হইতে উদ্ভূত ঐ ছুঙ্কধারা পানের জন্য খাকীবাবা উৎসুক হইয়া উঠিলেন। কিন্তু কি আশ্চর্য! তিনি উহা স্পর্শ করামাত্রই সেই মুহূর্ত্তে নদীর জল পূর্ববাবস্থা ধারণ করিয়া বসিল। বিস্ময়-বিহ্বল খাকীবাবা বহুক্ষণ নদীতীরে নিশ্চল হইয়া দাঁড়াইয়া রহিলেন।

মার্কণ্ডেয় আশ্রমের সন্ন্যাসীরা সকলেই ত্রৈলোক্যস্বামীজীকে শ্রদ্ধা করিতেন ও ভালবাসিতেন। মহাত্মা খাকীবাবার মুখে এ অদ্ভুত

শ্রীত্রেলঙ্গস্বামী

অভিজ্ঞতার কাহিনী শুনিয়া সকলেই বুঝিলেন, সাধনার সূমেরুশিখরে আরোহিত এই নবাগত যোগীর শক্তি পরিমাপ করিতে অনেকেরই কল্পনা স্তম্ভিত হইবে।

নন্দাদাতটে এ আশ্রমে আট বৎসর অবস্থানের পর ত্রেলঙ্গস্বামী প্রয়াগে আসিয়া উপনীত হন।

সেদিন ত্রিবেণীসঙ্গমের ঘাটে স্বামীজী বসিয়া আছেন। গ্রীষ্মকাল, আকাশে মেঘের বড় ঘনঘটা। কালো কালো মেঘের বুক চিরিয়া মাঝে মাঝে বিদ্যুৎ ঝলকিয়া উঠিতেছে। আসন্ন ঝড়ের আশঙ্কায় স্থানটি তখন প্রায় জনশূন্য।

রামতারণ ভট্টাচার্য্য নামে এক ব্রাহ্মণ ত্রেলঙ্গস্বামীকে অত্যন্ত ভক্তি করিতেন। নদীতীরে আসিয়া যোগীবরের দিকে তাঁহার দৃষ্টি পড়িল। ব্রাহ্মণ বড় চিন্তিত হইলেন। এ সময়ে বাবা এখানে বসিয়া? ঝড় বাদলে যে তাঁহার মহা কষ্ট হইবে।

নিকটে আসিয়া কহিলেন, “বাবা, এখনি ঝড় উঠছে। আপনি নদীতীরে বসে অনর্থক কেন কষ্ট পাবেন? কাছেই লোকালয় রয়েছে, সেখানে এসে বসুন।”

স্বামীজী প্রশান্ত কণ্ঠে কহিলেন, “হمارে লিয়ে ফিকির মং করো, হমারা কোই কষ্ট নই হোগা। লেकिन ওয়ে নাওকা যাত্রীয়েঁকো তো রকুসা কর্‌নে পড়েগা।” অর্থাৎ, আমার জন্ত কোন দুশ্চিন্তার কারণ নেই। কোন কিছুতেই আমার বিপদ হয় না, কষ্ট হয় না, কিন্তু ঐ নৌকার আরোহীদের তো বাঁচাতে হবে।

স্বামীজীর অঙ্গুলি-সঙ্কেত অনুসরণ করিয়া রামতারণ লক্ষ্য করিলেন, দূরে একটি নৌকা তরঙ্গবিক্ষুব্ধ নদীর সহিত যুঝিতেছে। কয়েকজন আরোহী উহাতে দণ্ডায়মান। সঙ্গমঘাট লক্ষ্য করিয়া নৌকা অতি কষ্টে আগাইয়া আসিতেছে। কিন্তু একি দুর্দৈব! প্রচণ্ড ঝড়ের তাড়নায় হঠাৎ কখন উহা নদীগর্ভে তলাইয়া গেল।

এ দৃশ্য বড় মৰ্মান্তিক ! রামতারণ আত্মস্বরে কাঁদিয়া উঠিলেন । স্বামীজী তাঁহার পাশেই উপবিষ্ট, তাঁহার দিকে দৃষ্টি ফিরাইতে গিয়া বিস্ময় চরমে উঠিল । আসনখানি শূণ্য । মুহূর্ত্তমধ্যে তিনি কোথায় অন্তর্হিত হইয়া গেলেন !

নদীর দিকে দৃষ্টি ফিরাইতেই রামতারণবাবুকে একেবারে হতবুদ্ধি হইতে হইল । একি ! নিমজ্জিত নৌকাটি আবার কোন্ ইন্দ্রজালবলে ভাসিয়া উঠিয়াছে ?

আরোহী কয়টিকে নিয়া নৌকা যখন তীরে পৌঁছিল ভট্টাচার্য্য মহাশয়ের তখন বাক্‌স্মৃতি হইতেছে না । দেখিলেন, স্বামীজীও অন্যান্য আরোহীদের সঙ্গে ঘাটে অবতরণ করিতেছেন । কোথা হইতে, কখন যে উলঙ্গ সন্ন্যাসী নৌকায় চড়িয়া বসিলেন মাঝি-মাল্লা ও আরোহীবা তখন অবধি সে রহস্য ভেদ করিতে পারে নাই ।

ঝড়ের বেগ তখনো একেবারে প্রশমিত হয় নাই । স্নানের ঘাট প্রায় জনশূন্যই রহিয়াছে । রামতারণ স্বামীজীকে সাষ্টাঙ্গ প্রণাম করিলেন । তারপর ভক্তি গদগদকণ্ঠে কহিলেন, “বাবা, যে অপূর্ব বিভূতিলীলা আপনার রূপায় আজ নিজের চোখে দেখলাম, তাতে থ বনে গিয়েছি । এ অলৌকিক শক্তি কি করে মানুষ লাভ কবে, তা আজ আমায় খুলে বলতে হবে ।”

পথ চলিতে চলিতে স্বামীজী স্মিতহাস্তে বলিলেন, “রামতারণ, এতে কিন্তু অবাক হবার কিছুই নেই । ঐশী শক্তি সমস্ত মানবের মধ্যেই স্তূপ রয়েছে । বেটা, তাকে জাগ্রত করে নিতে পারলেই তো সবকিছু সম্ভবপর হয় ! এ মোটেই অস্বাভাবিক কিছু নয় । সত্যি কথা বলতে গেলে, প্রকৃত স্বভাব থেকে বিচ্যুত হয়েই মানুষ বরং আজ অস্বাভাবিক হয়ে গিয়েছে । তাই যা তার অতি স্বাভাবিক শক্তি, তাকে অলৌকিক ও অদ্ভুত মনে করে সে চমকে ওঠে ।”

এই ঘটনার পর ত্রৈলোক্যস্বামীজী বারাণসীধামে উপনীত হন ।

১১৪৪ সালের মাঘ মাস। শীতের প্রচণ্ড প্রকোপ চলিতেছে। এই সময়ে একদিন প্রত্যুষে অসিঘাটে ঘটে এই মহাকায় উলঙ্গ সন্ন্যাসীর আবির্ভাব। কাশীধামের জনজীবনে অচিরে এ আবির্ভাব এক আলোড়ন জাগাইয়া তোলে।

সুদীর্ঘ দেড়শত বৎসর ব্যাপিয়া ত্রেলঙ্গস্বামীর যোগৈশ্বর্য-লীলা একটির পর একটি এই পুণ্যতীর্থে প্রকটিত হইতে থাকে। শিবপুরী কাশীধামে তিনি আখ্যাত হন 'সচল বিশ্বনাথ' নামে, এদেশের সাধক-সমাজে লাভ করেন অভূতপূর্ব মর্যাদা।

ভারতের দিগদিগন্ত হইতে বৎসরের পর বৎসর অগণিত তীর্থকামী মানুষ বারাণসীতে উপস্থিত হয়। বিশ্বনাথ, অন্নপূর্ণা, দশাশ্রমেধ ও মণিকর্ণিকা ঘাট দর্শনের পরই সকলে ছোট্টে ত্রেলঙ্গস্বামীজীর দর্শনের জন্ত। এই বহুকীর্তিত মহাযোগীর আশীর্ব্বাদ না নিয়া কেহ সহজে কাশীধাম ত্যাগ করিতে চায় না।

প্রথমে স্বামীজী অসিঘাটে তুলসীদাসের বাগানে বাস করিতে থাকেন। আপনভোলা মহাপুরুষ একদিন ধীর পদে হেলিতে ছলিতে লোমার্ককুণ্ডে আসিয়া পৌছিয়াছেন। সামনেই এক দুর্ভাগা রাস্তার ধারে বসিয়া বোগযন্ত্রণায় ক্রন্দন করিতেছে।

লোকটি জন্মবধির, তছপরি কুষ্ঠরোগে একেবারে পঙ্গু হইয়া পড়িয়াছে। নাম তাহার ব্রহ্মসিংহ, বাড়ী আজমীড় দেশে। এই বিকটদর্শন রোগী ও তাহার কাতর কণ্ঠ ত্রেলঙ্গ মহারাজের অন্তরে করুণা জাগাইয়া তুলিল। ধীর পদক্ষেপে সর্বজনপরিত্যক্ত লোকটির সম্মুখে গিয়া তিনি দাঁড়াইলেন।

মহাযোগীর দর্শনমাত্র ব্রহ্মসিংহের রোগযন্ত্রণা নিমেষে অন্তর্হিত হইয়া গেল। শিবপ্রতিম এই মহাপুরুষের স্তুতির জন্ত তাহার কণ্ঠ হইতে নিঃসৃত হইতে লাগিল শিবারাধনার স্তোত্ররাশি।

অপূর্ব্ব এ স্তববন্দনা আর্ত ভক্তের। মহাযোগীর আনন এক প্রসন্ন মধুর হাসিতে উদ্ভাসিত হইয়া উঠিল। তখনি সন্মুখে একটি বিশ্বপত্র

ব্রহ্মসিংহের সম্মুখে তুলিয়া ধরিলেন। বলিলেন, “বাবা, তোমার চিন্তা নেই, লোলার্ককুণ্ডে এখনি স্নান সমাপন করে এস। তারপর এই বেলপাতাটি তুমি শিরে ধারণ কর, অচিরে হবে রোগমুক্ত।”

ব্রহ্মসিংহের উৎকট ব্যাধি অতঃপর সম্পূর্ণরূপে সারিয়া যায় এবং স্বামীজীর একনিষ্ঠ ভক্তরূপে সে গণ্য হয়।

ইহার পর স্বামীজী কিছুকাল বেদব্যাস আশ্রমে অবস্থান করিতে থাকেন। একদিন ঘুরিতে ঘুরিতে তিনি গঙ্গার ঘাটে গিয়াছেন। সম্মুখে জনতার ভীড়। আগাইয়া দেখিলেন, এক বৃদ্ধ ব্রাহ্মণ সেখানে মৃতকল্প হইয়া পড়িয়া আছেন।

এ ভদ্রলোকের নাম সীতানাথ বন্দ্যোপাধ্যায়। যক্ষ্মাবোগে ভুগিয়া ভুগিয়া একেবারে অস্থিচর্শ্মসার হইয়াছেন। আজ গঙ্গাস্নানে আসিয়া রোগযন্ত্রণায় হঠাৎ তিনি অচেতন হইয়া পড়েন। স্নানার্থীদের কয়েকজন তাঁহার শুশ্রুষায় ব্যস্ত। এ মর্মান্তিক দৃশ্য দেখিয়া ঘাটের অনেকেই ‘হায় হায়’ করিতেছে।

ত্রৈলোক্যস্বামী থমকিয়া দাঁড়াইলেন। কি জানি কেন, মৃত্যুপথযাত্রী এই রোগী মহাযোগীকে চঞ্চল করিয়া তুলিল।

সম্মুখে আসিয়া কৃপাভরে অঙ্গুলিদ্বারা তিনি সীতানাথের বক্ষ স্পর্শ করিলেন। নিম্পন্দ দেহে দেখা দিল প্রাণের লক্ষণ, লুপ্ত চেতনা ধীরে ধীরে ফিরিয়া আসিতে লাগিল। এ যেন তাহার পুনর্জীবন। চক্ষু উন্মীলন করিয়া দেখিলেন, বিরাটকায় এক যোগী সম্মুখে দণ্ডায়মান।

আর্ত ব্রাহ্মণ করজোড়ে তাঁহার ছুরারোগ্য ব্যাধির কথা নিবেদন করিতেছেন, আর দুই গণ্ড বহিয়া অশ্রু ঝরিতেছে। স্বামীজী তাঁহাকে অভয় দিলেন, আর দিলেন ঔষধরূপে কিঞ্চিৎ গঙ্গামৃত্তিকা। নির্দেশ রহিল—গঙ্গাস্নানের পর প্রতিদিন তাঁহাকে উহা সেবন করিতে হইবে। বন্দ্যোপাধ্যায় মহাশয় এবার ঐ রোগ হইতে মুক্ত হন। ত্রৈলোক্য মহারাজের করুণালীলার এক প্রত্যক্ষ নিদর্শনরূপে দীর্ঘদিন তিনি কাশীতে বিচরণ করিয়া গিয়াছেন।

শ্রীত্রেলঙ্গস্বামী

স্বামীজী হনুমানঘাটে বাস করার সময়ও এক বিচিত্র ঘটনা ঘটে। এ অঞ্চলের একটি সম্ভ্রান্ত মহারাষ্ট্রীয় মহিলা রোজই বিশ্বনাথের পূজা দিতে যাইতেন। পূজা-উপচারাди নিয়া সেদিনও তিনি মন্দিরের দিকে চলিয়াছেন, হঠাৎ দেখিতে পাইলেন—অপরিসর রাস্তাটি জুড়িয়া বিপরীত দিক হইতে আগাইয়া আসিতেছেন ভীমকায় উলঙ্গ সন্ন্যাসী, ত্রেলঙ্গস্বামী।

ভয়ে সঙ্কোচে মহিলাটি এক পাশে সরিয়া দাঁড়ান। স্বামীজীকে উদ্দেশ্য করিয়া এ সময়ে নানা কটুক্তি করিতেও তিনি ছাড়েন না।—সন্ন্যাসী হইয়া যদি উলঙ্গই থাকিব, তবে বনে-জঙ্গলে গেলেই তো হয়! জনাকীর্ণ তীর্থস্থানে পড়িয়া থাকার দরকার কি? শ্লেষপূর্ণ তিরস্কার ও ঝিকার বাববার বর্ষিত হইতে লাগিল। কিন্তু যাহাকে বলি হইতেছে তিনি একেবারে নির্বিকার। বীতরাগভয়ক্রোধ মহাযোগী প্রশান্তচিত্তে আপন গন্তব্য পথে চলিয়া গেলেন।

যথারীতি বিশ্বনাথজীর পূজা-ধ্যান সারিয়া মহিলাটি গৃহে ফিরিয়াছেন। সেইদিন রাত্রেই তিনি কিন্তু এক চাঞ্চল্যকর স্বপ্ন দেখিলেন।—বিশ্বনাথ স্বয়ং তাঁহার সম্মুখে আবির্ভূত হইয়া সক্রোধে বলিতেছেন, “দুঃখ, যে সঙ্কল্প নিয়ে তুই রোজ আমার পূজা দিচ্ছিস্ তা তো আমাদ্বারা সিদ্ধ হবে না। উলঙ্গ মহাযোগীকে তুই আজ পথের মাঝে অপমান করেছিস। কিন্তু জেনে রাখিস, শুধু তাঁর কৃপায়ই তোর মনস্কামনা সফল হতে পারে, অন্য কোন উপায় নেই।”

মহিলার স্বামীর উদরে হইয়াছে মারাত্মক ঘা। জীবন রক্ষার কোন আশাই তাঁহার নাই। স্বামীর রোগমুক্তির সঙ্কল্প নিয়াই তিনি কয়েকদিন যাবৎ বিশ্বনাথের পূজা দিতেছিলেন।

আজিকার এই স্বপ্নদর্শনে তিনি শিহরিয়া উঠিলেন। না জানিয়া কি কুক্ষেণে শক্তিদর সন্ন্যাসীকে অপমান করিয়াছেন। মহাপুরুষ কি আর তাঁহাকে ক্ষমা করিবেন? স্বামীকে কি আর বাঁচান যাইবে? আবার ভাবিতে লাগিলেন—নির্বিকার যোগীবর তাঁহার তিরস্কারে

তো কর্ণপাত করেন নাই। ভাবতন্ময় অবস্থায় আপন মনেই পথ চলিতেছিলেন। নিশ্চয় তাঁহার কৃপা মিলিবে।

পরদিনই মহিলাটি ব্যাকুল হইয়া স্বামীজী মহারাজের পদতলে গিয়া পড়িলেন। বারবার চাহিলেন ক্ষমা, আর চাহিলেন মৃতকল্প স্বামীর প্রাণভিক্ষা।

কৃপা মিলিতে কিন্তু দেরী হয় নাই। ত্রৈলোক্য মহারাজ এক মুষ্টি ভস্ম তাঁহার দিকে আগাইয়া দেন, আর ইহা দেহে লেপন করিয়াই তাঁহার স্বামী ব্যাধির কবল হইতে মুক্তিলাভ করেন।

সেবার একজন দেশীয় নৃপতি সপরিবাবে কাশীতে তীর্থ করিতে আসিয়াছেন। সেদিন এক মহা পুণ্যযোগ। দশাশ্বমেধ ঘাটে রাণী ও পরিজনবর্গসহ তিনি স্নান করিবেন, তাহারই তোড়জোড় চলিতেছে।

রাজপ্রাসাদ এই ঘাটেরই সন্নিকটে। পুরমহিলারা রক্ষণশীল তাই তাঁদের স্নানের জন্ত এক বস্ত্রবেষ্টনী প্রস্তুত করা হইয়াছে— প্রাসাদ হইতে দশাশ্বমেধ ঘাট অবধি তাহা প্রসারিত।

রাজা ও রাণী এই বেষ্টনীর মধ্যে স্নান করিতে নামিয়াছেন। এমন সময় সেখানে এক অদ্ভুত কাণ্ড ঘটিয়া গেল। সিপাই-শাস্ত্রীদের কড়া পাহারা এড়াইয়া কোন্ ফাঁকে এক মহাকায় উলঙ্গ সন্ন্যাসী তাঁহাদের সম্মুখে আসিয়া দাঁড়াইয়াছেন। রাণী ভীত সন্ত্রস্ত হইয়া তাড়াতাড়ি একপাশে সরিয়া গেলেন। হাঁক-ডাকের ফলে অনুচরগণ ছুটিয়া আসিয়া সন্ন্যাসীকে ঘিরিয়া ফেলিল।

রাজা বাহ্যিকর তো ক্রোধে অধীর। এ কোন্ কাণ্ডজ্ঞানহীন সন্ন্যাসী? উপযুক্ত শাস্তি না দিয়া কিছুতেই তিনি ইঁহাকে ছাড়িবেন না। পাহারাধীনে সন্ন্যাসীকে প্রাসাদে লইয়া যাওয়া হইল।

দশাশ্বমেধ ঘাটের জনতার নিকট এ সন্ন্যাসীর পরিচয় অজানা নয়। তখনি সর্বত্র সংবাদ রটিয়া গেল, ত্রৈলোক্যস্বামীকে রাজপ্রাসাদে ধরিয়া নিয়া যাওয়া হইয়াছে।

শ্রীত্রেলঙ্গস্বামী

তখনি কয়েকজন বিশিষ্ট ভক্ত রাজার কাছে গিয়া উপস্থিত হন। স্বামীজীর মাহাত্ম্য ও পরিচয় তাঁহাকে জানাইয়া দেন।

ত্রেলঙ্গস্বামীকে মুক্তি দেওয়া হয়। কিন্তু রাজার কয়েকটি অত্যাংসাহী অনুচর প্রাসাদের বাহিরে তাঁহাকে অপমানিত করে।

সেইদিনই রাত্রে রাজাবাহাহুর এক আতঙ্ককর স্বপ্ন দেখিয়া চিৎকার করিয়া উঠেন।—জটাজুটধারী ব্যাঘ্রচর্ম পরিহিত এক পুরুষ সক্রোধে ত্রিশূল আন্দোলিত করিতেছেন আর রোষকষায়িতনেত্রে বাজার দিকে তাকাইয়া কহিতেছেন, “তোমার এতবড় স্পর্ধা! তুমি ত্রেলঙ্গস্বামীজীর পরিচয় জেনেছিস, কিন্তু তারপরও তোমার অনুচরেরা তাঁকে অপমান করার সাহস পেলো। তোমার মত ছুরাচার এ শিবধামে থাকবার উপযুক্ত নয়। আজই তুমি এখান থেকে দূর হ।”

রাজার ভয়ান্ত চিৎকারে প্রাসাদের লোক-লস্কর সবাই জাগিয়া উঠিল। সারা রাত কাটিয়া গেল আতঙ্ক ও উদ্বেজনায়া। পরদিন ভোর হইতে না হইতেই রাজা নগ্ন সন্ন্যাসীর চরণতলে গিয়া পতিত হন। ত্রেলঙ্গস্বামী পরম কৃপালু, সদানন্দময় মহাযোগী। অনুতপ্ত রাজাকে তিনি ক্ষমা ভিক্ষা দেন, আশীর্বাদ জানান।

স্বামীজী মহারাজ মহাশক্তিধর যোগী, তত্পরি তিনি পরম কারুণিক—কাশীর জনসাধারণের মধ্যে কাহারও একথা অজানা নাই। রাস্তা ঘাটে বাহির হইলেই আধি-ব্যাধিক্রিষ্ট লোক দলে দলে তাঁহার অনুসরণ করিতে থাকে। তাই মহাপুরুষের প্রধান আশ্রয়স্থল হয় তাঁহার গঙ্গামার্গ। গঙ্গার এক একটি ঘাটে আসিয়া তিনি উপবেশন করেন ও ধ্যানাবিষ্ট হন। সেখানে মানুষের ভীড় জমিতে শুরু হইলেই দুই হাত প্রসারিত করিয়া গঙ্গাগর্ভে দেন ঝাঁপ।

ঘণ্টার পর ঘণ্টা অতিকায় দেহটি নিয়া অবলীলায় তাঁহাকে জলবিহার করিতে দেখা যায়। ঘাটের নর-নারী নির্নিমেষ নয়নে এই স্বেচ্ছাময় মহাপুরুষের দিকে তাকাইয়া থাকে।

গঙ্গার প্রতি বরাবরই স্বামীজীর অনুরাগ বড় প্রবল ছিল। সুযোগ পাইলেই পরম আনন্দে এই পুণ্যতোয়া তটিনীর বক্ষে তিনি বিচরণ করিতেন। অনেকে বলিত, গঙ্গাপুত্র ভীষ্মই এ যুগে আবার মর্ত্যলোকে অবতরণ করিয়াছেন। স্বামীজীর শিষ্য, শ্রীউমাপদ মুখোপাধ্যায় গুরুর গঙ্গাবিহারের বিবরণ দিতে গিয়া লিখিয়াছেন—

“...উভয়ে স্নান করিবার জন্ত জলে নামিলাম। তিনি নিস্তব্ধ হইয়া কিছুক্ষণ জলের উপর চিৎ হইয়া ভাসিতে লাগিলেন। তাহার পর কোন অঙ্গ সঞ্চালন না করিয়া শ্রোতের বিপরীত দিকে ভাসিয়া যাইতে লাগিলেন। এইভাবে কিছুদূর যাইয়া জলে মগ্ন হইয়া কোথায় যে অদৃশ্য হইলেন আর দেখিতে পাইলাম না। প্রায় দুই ঘণ্টা পরে আমার নিকটেই ভাসিয়া উঠিলেন। পরে জল হইতে সিঁড়ির উপর উপবেশন করিলে, আমি তাঁহার অঙ্গ মুছাইয়া দিলাম এবং উভয়ে আশ্রমে গমন করিলাম।”

গঙ্গার শ্রোতে ভাসমান থাকার কালে স্বামীজী বালকবৎ নানা আচরণ করিতেন। দিগম্বর, আত্মভোলা ব্রহ্মজপুরুষের এই নদী-বিহারের সহিত কাশীর সকলেই সে সময়ে পরিচিত ছিল।

সেবার উজ্জয়িনীর মহারাজা কাশীধামে আসিয়াছেন। একদিন ব্যাসকাশী ও রামনগর দর্শন করিয়া তিনি নৌকাযোগে এপারে ফিরিতেছেন, সহসা দেখা গেল, জাহ্নবীর শ্রোতে এক বিশালবপু পুরুষ ভাসমান। নৌকারোহীদের মধ্যে কেহ কেহ ত্রৈলোক্যস্বামীকে চিনিভেন। রাজার নিকট তাঁহারা এই মহাযোগীর পরিচয় জ্ঞাপন করিলেন।

অল্পকাল পরেই দেখা গেল, স্বামীজী মনের আনন্দে সন্তরণ করিয়া ঐ নৌকার দিকেই আগাইয়া আসিতেছেন। নিকটে আসিলে সকলে সসম্মুখে ধরাধরি করিয়া তাঁহাকে নৌকায় তুলিয়া লইলেন।

মহারাজ ও তাঁহার পার্শ্বদেৱা স্বামীজীকে প্রণাম করিলেন। মৌনী

শ্রীবৈষ্ণবস্বামী

যোগীবরকে ধিরিয়া সকলে কোতুহলী হইয়া বসিয়া আছেন, এমন সময় তিনি এক খামখেয়ালী শিশুর গায় আচরণ করিয়া বসিলেন । উজ্জয়িনীরাজের কটিদেশে ঝুলান রহিয়াছে এক তরবারি 'সেদিকে তাঁহার দৃষ্টি আকৃষ্ট হইল ।

তরবারিটি চাহিয়া নিয়া, খানিকক্ষণ নাড়িয়া চাড়িয়া স্বামীজী হঠাৎ উহা গঙ্গাগর্ভে নিক্ষেপ করিলেন । সকলে স্তম্ভিত হইয়া উঠিলে কি হয়, স্বামীজী খল্ খল্ করিয়া বালকের গায় হাসিতেছেন—এ যেন নিতান্তই এক মজার খেলা !

এই তরবারিটি মহারাজা তাঁহার মর্যাদার স্বীকৃতিস্বরূপ ইংরাজ সরকার হইতে পাইয়াছেন । তাঁহার কাছে এটি মহা মূল্যবান । তাই তাঁহার ক্ষোভ ও ক্রোধের সীমা রহিল না । উন্নত সন্ন্যাসীকে কঠোর শাস্তি দিবেন বলিয়া বারবার শাসাইতে লাগিলেন ।

নৌকায় দুই-একজন স্থানীয় সম্ভ্রান্ত ব্যক্তি রহিয়াছেন যাহারা বৈষ্ণবস্বামীজীকে যথেষ্ট শ্রদ্ধা করেন ।

তাঁহারা আশ্বাস দিয়া কহিলেন, “মহারাজ, আপনি মোটেই অধীর হবেন না, ডুবুরির সাহায্যে ঐ তরবারি উদ্ধার করা যাবে । স্বামীজী মহাব্রহ্মজ্ঞ পুরুষ । স্বেচ্ছাময় হলেও, কারুর কোন ক্ষতি তাঁর দ্বারা কখনো হতে দেখিনি । আপনি শান্ত হোন ।”

নৌকা বাঁশীর ঘাটে অসিয়া লাগিল । মহারাজ কিন্তু চটিয়াই আছেন, নগ্ন সন্ন্যাসীকে তিনি ছাড়িয়া দিতে রাজী নন । এ হঠকারিতার শাস্তি দিতেই হইবে ।

স্বামীজী এতক্ষণ নীরবে সব শুনিয়া যাইতেছেন । এবার মুচকি হাসিয়া হাতটি গঙ্গাগর্ভে ডুবাইলেন ।

একি অদ্ভুত ব্যাপার ! সকলে বিস্ময়বিম্বিত নয়নে দেখিলেন, জল হইতে তাঁহার হাতে উঠিয়া আসিয়াছে দুইটি উজ্জল তরবারি ! গঙ্গায় যেটি ফেলিয়াছেন ঠিক উহারই অনুরূপ ।

যোগীবর রাজাকে তাঁহার নিজস্ব তরবারিটি চিনিয়া লইতে ইঙ্গিত

করিতেছেন, আর রাজা হইয়া গিয়াছেন একেবারে হতবুদ্ধি। কোনটি সত্যি নিবেন? ছুইটিই যে দেখিতে ছবছ এক।

স্বামীজী এবার তাঁহার মৌন ভঙ্গ করিলেন। মহারাজকে তিরস্কার করিয়া কহিলেন, “মূর্থ! তুমি নিজের জিনিস বলে যে বস্তু দাবী করছ, তা কিছুতেই চিনে নিতে পারলে না? আমি দেখতে পাচ্ছি, তোমার ভেতরটা পূর্ণ রয়েছে শুধু মোহ, দম্ব আর অজ্ঞানে। জেনে রেখো, ইহকাল পরকালে যা মানুষের নিত্যসঙ্গী, তাই শুধু তার নিজস্ব বস্তু! মৃত্যুর পর এ তলোয়ার নিশ্চয়ই তোমার সঙ্গে যাবে না। যা সঙ্গে যাবার নয়, যা এপারে ফেলে যেতে হবে, তা তোমার জিনিস কি করে হাল বলতে পার? যে বস্তু নিজের নয়, তার জন্যে কি এত দম্ব, এত ক্রোধ করা সাজে?”

এবার ভীত বিস্থিত মহারাজের সম্মুখে তাঁহার ভরবারিটি ফেলিয়া রাখিয়া অপরটি স্বামীজী গঙ্গাগর্ভে নিক্ষেপ করিলেন।

আপন মৃত্যু তা মহারাজা ইতিমধ্যে উপলব্ধি করিয়াছেন। এবার স্বামীজীর চরণ তলে পড়িয়া কাতরকণ্ঠে ক্ষমা চাহিতে লাগিলেন।

ক্ষমা প্রদর্শনে দেরী হইল না। তারপর স্বেচ্ছাবিহারী যোগী আবার ধীরে ধীরে গঙ্গাপ্রান্তে গা ভাসাইয়া দিলেন।

অসিঘাটের সম্মুখ দিয়া ত্রৈলোক্যস্বামী সেদিন পথ চলিতেছেন। হঠাৎ চোখে পড়িল এক হৃদয়বিদারক দৃশ্য। মৃত পতিকে জড়াইয়া ধরিয়া এক সদ্য-বিধবা উন্মাদিনীর মত চিৎকার করিতেছে।

পূর্ববরাতে স্বামীটি সর্পাঘাতে প্রাণত্যাগ করিয়াছে। সর্পদষ্ট ব্যক্তির দেহ দাহ করা হয় না, প্রচলিত প্রথামত জলে ভাসাইয়া দেওয়া হয়। মৃতের আত্মজনেরা তাই উহা গঙ্গায় ফেলিতে আসিয়াছে। কিন্তু তরুণীর অবস্থা দেখিয়া কাহারও মুখে কথা সরিতেছে না।

স্বামীজী এ সময়ে সেখান দিয়া আগাইয়া চলিয়াছেন। আত্মভোলা তপস্বীর মনের ছয়ার কোন এক মুহূর্তে হঠাৎ উন্মুক্ত হইয়া যায়।

শ্রীত্রেলঙ্গস্বামী

পতি-বিয়োগবিধুরা রমণীর করুণ ক্রন্দন তাঁহার মর্ম্মতলে গিয়া
বিঁধে। যোগেশ্বর মহাপুরুষের হৃদয় মথিত হইয়া উঠে, ঐশী কৃপার
ধারা নামিয়া আসে মর্ত্যের ধূলিতে। দয়াল স্বামীজী নদীতীর হইতে
খানিকটা গঙ্গামৃত্তিকা নিয়া মৃতের ক্ষতস্থানে লেপন করেন, তারপর
পরমানন্দে ঝাঁপ দিয়া পড়েন গঙ্গাগর্ভে।

অল্পকাল পরেই মৃত ব্যক্তিটি ধীরে ধীরে নয়ন উন্মীলন করে,
চেতনা তাহার ফিরিয়া আসে। নিজের এ বন্ধনদশা দেখিয়া সে তো
অবাক! ইতিমধ্যে ঘাটে এক বিরাট জনসমাগম হইয়াছে। এতক্ষণ
সবাই উৎসুক নয়নে স্বামীজীর কার্যকলাপ লক্ষ্য করিতেছিল। এবার
মৃতদেহে প্রাণ সঞ্চারের পর তাহাদের মধ্যে মহা হৈ-চৈ ও আনন্দ
কলরব পড়িয়া গেল।

দুই-চারজন ইংরেজ রাজকার্য্য উপলক্ষে বারাণসীতে বাস করেন।
মাঝে মাঝে কৌতূহলী দর্শক ও ভ্রমণকারী হিসাবেও সাহেব-মেমদের
এখানে দেখা যায়। যোগীবর ত্রেলঙ্গ মহারাজ প্রায়ই থাকেন আপন
খেয়াল-খুশিতে, নগ্ন অবস্থায় যত্রতত্র ঘুরিয়া বেড়ান। ইউরোপীয়দের
চোখে কিন্তু এ দৃশ্য খুব দৃষ্টিকটু লাগে। বিশেষতঃ মেমসাহেবেরা
এই উলঙ্গ সন্ন্যাসীকে দেখিয়া বড় অস্বস্তি বোধ করেন। কাশীর
তৎকালীন ম্যাজিষ্ট্রেটের কানে এসব কথা গেল। সন্ন্যাসীর এই
রুচিবিগর্হিত আচরণের প্রতিবিধান করিতে উদ্যোগী হইলেন।

স্বামীজী সেদিন উলঙ্গ অবস্থায় গঙ্গার ঘাটে বসিয়া আছেন।
হঠাৎ একটি পুলিশ কর্ম্মচারী সেখানে আসিয়া উপস্থিত। স্বামীজীকে
তাহার সঙ্গে থানায় যাইতে বলে। ধ্যানাবিষ্ট মহাপুরুষের কানে কিন্তু
কোন কথাই পৌঁছিল না। পুলিশ কর্ম্মচারীটি তো মহা খাপ্পা।
বেয়াড়া লোকদের কি করিয়া কথা বলাইতে হয়, সে উপায় তাহার
ভাল জানা আছে। স্বামীজীকে সে মারধর করিতে উদ্যত হয়, কিন্তু
স্থানীয় ভক্তেরা বাধা দেওয়ায় সে মতলব তাহাকে ছাড়িতে হইল।

অতঃপর অফিসারটি থানা হইতে আরও লোকজন নিয়া আসে এবং মোনীর স্বামীজীকে একটি দোলায় উঠাইয়া সরাসরি ম্যাজিষ্ট্রেট সাহেবের নিকট হাজির করে।

সাহেব কড়া মেজাজে প্রশ্ন করিলেন, স্বামীজী কেন এমন অসভ্যের মত উলঙ্গ থাকেন, আর যত্রতত্র ঘুরিয়া বেড়ান?...কিন্তু এসব কোন কথাই স্বামীজীর কানে প্রবেশ করিল না। কথায় বা ইঙ্গিতে কোন উত্তরও তিনি দিলেন না।

ম্যাজিষ্ট্রেট ক্রোধে জ্বলিয়া উঠিলেন, আদেশ দিলেন, “এখনই একে হাতকড়া পরিয়ে হাজতে নিয়ে যাও।”

মুহূর্তমধ্যে সেখানে এক অলৌকিক কাণ্ড ঘটিয়া গেল। প্রহরী-বেষ্টিত কামরা হইতে, ম্যাজিষ্ট্রেট ও সমবেত লোকজনের দৃষ্টি এড়াইয়া, সন্ন্যাসী কোথায় হঠাৎ অদৃশ্য হইয়া গেলেন। অথচ সাহেবের কাছেই তো তিনি দণ্ডায়মান ছিলেন।

এজলাস কক্ষের ভিতরে বাহিরে অনেক খুঁজিয়াও কেহ বন্দীর সন্ধান পাইল না। পুলিশ কর্মচারীরা যখন একেবারে গলদঘর্ম্ম হইয়া উঠিয়াছেন, তখন হঠাৎ দেখা গেল, স্বামীজী তাঁহার পূর্ব স্থানটিতেই নীরবে দাঁড়াইয়া আছেন।

তাঁহার চোখে মুখে বালশূলভ কৌতুকের হাসি।

ব্যাপার দেখিয়া ম্যাজিষ্ট্রেট হতবুদ্ধি হইয়া গিয়াছেন। এতক্ষণে তাঁহার ধারণা হইয়াছে, এই সন্ন্যাসী সাধারণ মনুষ্য নহেন।

ইতিমধ্যে স্বামীজীর কয়েকজন বিশিষ্ট ভক্ত এক উকীল সঙ্গে নিয়া আদালতে আসিয়া উপস্থিত। ইংরেজ ম্যাজিষ্ট্রেটকে তাঁহারা বুঝাইলেন, ইনি একজন বিখ্যাত সাধু—সমস্ত জাগতিক লোভ-মোহ দ্বন্দ্ব-সঙ্কোচের অতীত। চন্দন ও বিষ্ঠায় এই নির্বিষকার পুরুষের সমজ্ঞান। তাই বস্ত্র পরিধানের আবশ্যকতা ইনি কিছুমাত্র বোধ করেন না। একজন বাঙ্গালী ডেপুটি ম্যাজিষ্ট্রেটও একথা সমর্থন করিয়া তাঁহাকে বুঝাইতে লাগিলেন।

শ্রীতৈলঙ্গস্বামী

ম্যাজিষ্ট্রেট বলিলেন, “উত্তম কথা। কিন্তু যদি এ লোকটির সর্ব বস্তুতে সমজ্ঞানই হয়ে থাকে, তবে তাকে আমার খানা খেতে হবে, আর এখানে দাঁড়িয়েই তা খাওয়া চাই।”

নিষিদ্ধ আমিষযুক্ত খানা এই সন্ন্যাসী কি করিয়া গ্রহণ করে তাহাই তিনি দেখিতে চান।

স্বামীজীকে প্রশ্ন করা হইল, সাহেবর খানা খাইতে তাঁহার কোন আপত্তি আছে কিনা? এতক্ষণে মৌনী মহাপুরুষের বাকশুভ্তি হইল। প্রশান্ত কণ্ঠে বলিলেন, “সাহেব তুম্কে খানা মঁয় খানে সক্তা, লেকিন ইস্কে পহেলে মেরে খানা তুম্কে খানে হোগা।” অর্থাৎ, সাহেব, তোমার খানা আমি নিশ্চয়ই খাব কিন্তু তার আগে আমার খাদ্য তোমায় গ্রহণ করতে হবে।

ম্যাজিষ্ট্রেট তখনি স্বীকৃত হইলেন। ভাবিলেন, এ আর এমন কি শক্ত কথা? হিন্দু সন্ন্যাসীরা তো প্রধানতঃ ফলমূলই খাইয়া থাকে। গ্রহণ করিতে তাঁহার বাধা কোথায়? কিন্তু সন্ন্যাসীকে তো নিষিদ্ধ মাংস ভোজনে বাধ্য করা যাইবে।

এজলাস-ভরা জনতার সম্মুখে স্বামীজী এবার এক অদ্ভুত কাণ্ড করিয়া বসিলেন। তখনি আপন হস্তের উপর মলত্যাগ করিয়া সাহেবের দিকে উহা প্রসারিত করিয়া দিলেন। কহিলেন, “সাহেব, এই হচ্ছে আমার আজকের খানা।”

চন্দন ও বিষ্ঠায় ব্রহ্মবিদ মহাযোগীর সমজ্ঞান। এই অদ্ভুত বস্তু সর্বসমক্ষে নির্বিকারভাবে তিনি গলাধঃকরণ করিয়া ফেলিলেন।

অসামান্য যোগবিভূতির প্রভাবে এই ঘৃণ্য বস্তু তখন রূপান্তরিত হইয়া গিয়াছে এক সুস্বাদু খাদ্যে। শুধু তাহাই নয়, সারা আদালত কক্ষ ভরিয়া উঠিয়াছে ইহার সৌগন্ধে।

এ সন্ন্যাসীর যোগশক্তি যে অপরিমেয় এবং ইহার ক্রিয়াকলাপ যে মোটেই সাধারণ মানুষের মত নয়, সাহেব ইতিমধ্যে এ তত্ত্বটি উপলব্ধি করিয়াছেন। অবিলম্বে তিনি আদেশ প্রচার করিলেন, “তৈলঙ্গ

স্বামীজী উলঙ্গ অবস্থায় স্বেচ্ছামত এ শহরে বিচরণ করতে পারবেন, এতে কখনো কোনরূপ বাধা দেওয়া হবে না।”

এই ম্যাজিষ্ট্রেট কাশী হইতে পরে বদলী হন। ইঁহার পর যে সাহেব কার্যভার নিয়া আসেন তিনি অত্যন্ত কড়া মেজাজের লোক। স্বামীজী সেদিন তাঁহার চিরাচরিত অভ্যাসমত উলঙ্গ হইয়া দণ্ডাশ্রমেঘ ঘাটে ঘুরিতেছেন। নূতন ম্যাজিষ্ট্রেট তো ইহা দেখিয়া ক্রোধে অগ্নিশর্মা !

সন্ন্যাসীকে তৎক্ষণাৎ ধরিয়া আনিয়া হাজতে তালাবদ্ধ করিয়া রাখা হইল। ভক্তজন ও বিশিষ্ট নাগরিকদের কোন যুক্তি বা প্রার্থনায় জেলাশাসক কর্ণপাত করিলেন না।

পরদিন ভোরবেলায় সাহেব হাজতগৃহে তাঁহার নূতন কয়েদীটিকে জিজ্ঞাসাবাদ করিতে গিয়াছেন। সেখানে পৌঁছিয়াই তো তিনি অবাক ! একি ! সন্ন্যাসী যে পরম নিশ্চিন্তমনে হাজতের বারান্দায় ঘুরিয়া বেড়াইতেছে। কি করিয়া যে সে কারাকক্ষ হইতে নিষ্ক্রান্ত হইয়া আসিল, তাহা কেহই বলিতে পারে না।

ক্রুদ্ধ ম্যাজিষ্ট্রেট তখনি হাজতের ভারপ্রাপ্ত কর্মচারী ও রক্ষীদেব ডাকাইলেন। ত্রৈলোক্যস্বামীকে যে কক্ষে রাখা হইয়াছিল তাহার দ্বাৰ তখনও পূর্ববৎ তালাবদ্ধ রহিয়াছে। অনুচরদের নিয়া সাহেব লৌহদ্বার, তালা, চাবি ও কক্ষের দেয়ালগুলি বারবার তন্ন-তন্ন করিয়া পরীক্ষা করিলেন। কিন্তু কয়েদীর কারাকক্ষের বাহিরে আসার কোন সূত্রই আবিষ্কার করা গেল না।

গম্ভীরস্বরে ত্রৈলোক্যস্বামীকে তিনি প্রশ্ন করিলেন, “সাধু, সত্য কথা বল, কি করে তুমি হাজতের বাইরে এলে ?”

স্বামীজীর উত্তর সহজ ও সরল। কহিলেন, “প্রত্যুষে আমার বাইরে আসবার ইচ্ছা হয়েছিল। সে ইচ্ছা জাগ্রত হওয়ার মুহূর্তেই বাইরে এসে পড়লাম, কোন বাধা কোথাও পেলাম না।”

কারাকক্ষটি জলে জলময় হইয়া রহিয়াছে। সেদিকে ত্রৈলোক্যস্বামীর

শ্রীত্রেলঙ্গস্বামী

দৃষ্টি আকর্ষণ করা হইলে অবলীলায় উত্তর দিলেন, “রাতে আমার প্রস্রাবের বেগ হইয়াছিল, দেখলাম দ্বার তালাবদ্ধ। ঘরের বাইরে যেতে তখন ইচ্ছে হয়নি, তাই শায়িত অবস্থায়ই খানিকটা মূত্রত্যাগ করেছি। তারপর রাত শেষ হয়ে এলে, অন্ধকার ঘরটা ভেমন ভাল লাগছিল না, তাই মুক্ত হাওয়ায় এ বারান্দায় ঘুরে বেড়াচ্ছি।”

ম্যাজিষ্ট্রেটের ক্রোধ আরও তীব্র হইয়া উঠিল। বন্দীকে আবার হাজতক্ষে পুরিয়া স্বহস্তে ডবল তালা লাগাইয়া তিনি এজলাসে চলিয়া গেলেন।

খানিক পরেই আবার একি অদ্ভুত কাণ্ড উলঙ্গ সন্ন্যাসীর! দেখিলেন, কারাগৃহ তো দূরের কথা, এবার তাঁহার আদালত কক্ষেরই এক কোণে বন্দী দাঁড়াইয়া আছে। চোখে-মুখে ছুষ্ট বালকের কোঁতুক-চপল মুহূ হাসি! নিতান্ত অবিশ্বাস্য এ দৃশ্য। ম্যাজিষ্ট্রেট একেবারে হতবুদ্ধি হইয়া গিয়াছেন।

যোগীবর ত্রেলঙ্গস্বামী এবার ধীর পদক্ষেপে সাহেবের সম্মুখে আগাইয়া আসিলেন। প্রশান্ত কণ্ঠে কহিলেন, “সাহেব, তুমি অগ্ৰাণ্ণ সাধারণ মানুষের মত শুধু জড় ও জড়ের শক্তিই বোঝ। এই জড় জগতের মধ্যে ওতপ্রোত হয়ে আছে এক মহাচৈতন্যলোক,—তার খবর তোমার মোটেই জানা নেই! সেই চৈতন্যলোকের সঙ্গে যার যোগাযোগ সাধিত হয়েছে, কোন বন্ধন বা কোন বাধাই আর তার স্বেচ্ছাবিহারকে আটকাতে পারে না। ভারতের যোগীপুরুষদের শক্তির কাছে পৃথিবীর কোন কার্যই কখনো অসাধ্য বলে গণ্য হয় না, বেটা। তাহলে বল দেখি, আমার মত সাধু-সন্ন্যাসীকে বিরক্ত করে লাভ কি? তাছাড়া, সে শক্তিই-বা তোমার আছে কই?”

এবার সাহেবের চৈতন্যোদয় হইল। তিনি নির্দেশ দিলেন, ত্রেলঙ্গস্বামীজী এখন হইতে স্বেচ্ছামত কাশী শহরে ঘুরিয়া বেড়াইবেন। শুধু তাহাই নয়, ভবিষ্যতে কেহ যেন এই সর্বত্যাগী সন্ন্যাসীর উপর

কোন উপদ্রব না করে—এ মর্মেও এক বিশেষ আদেশ তিনি এ সময়ে জারী করিলেন।

শেষের দিকে ত্রৈলোক্য মহারাজ পঞ্চগঙ্গার ঘাটে বসিয়াই দিন অতিবাহিত করিতেন। নিকটেই ছিল মঙ্গলভট্ট নামক এক মারাঠী ভক্ত ব্রাহ্মণের ক্ষুদ্র আবাস। প্রায় সাত বৎসর সাধ্য-সাধনার পরে ভট্টজী এই গৃহে মহাযোগীকে আনিতে সক্ষম হন।

স্বামীজীর এবার একটা বাসস্থান ও ঠিকানা হইল সত্য—কিন্তু স্বেচ্ছাবিহারী শক্তিধর মহাপুরুষকে এক স্থানে নিশ্চিত হইয়া পাইবার জো কোথায়? মনের আনন্দে কখনো দশাশ্বমেধ ঘাটে, কখনো বা মণিকর্ণিকার শ্মশানে তিনি বেড়াইয়া বেড়ান। কখনও দেখা যায় তিনি জাহ্নবীর খরস্রোতে গা ঢালিয়া দিয়া আনন্দে বিচরণ করিতেছেন।

ইতিপূর্বে প্রায়ই মৌনী থাকিলেও ত্রৈলোক্য মহারাজ কথাবার্তা একেবারে কখনো বন্ধ করেন নাই। মঙ্গলভট্টের গৃহে আসিবার পর হইতে তাঁহার চারিদিকে জনসমাগম আরও বাড়িতে থাকে। ব্যাধি ক্লিষ্ট আর্ত জনগণ ও অধ্যাত্মনির্দেশপ্রার্থী সাধকদের আনাগোনা য় তিনি বড় ব্যতিব্যস্ত হইয়া পড়েন। তাই আত্মরক্ষার জন্ত এখন হইতে প্রায়ই তাঁহাকে মৌনী থাকিতে হয়। নিতান্ত প্রয়োজন না হইলে এ সময়ে তিনি কথাবার্তা বলিতেন না।

গঙ্গাজলে বিহার ও ইতস্ততঃ ভ্রমণের পর স্বামীজী মঙ্গলভট্টের আশ্রমে ফিরিয়া আসিতেন। এ সময়ে দর্শনার্থী ও শিষ্যদের সঙ্গে তিনি কথাবার্তা চালাইতেন ইঙ্গিতের মাধ্যমে। এ কাজে একান্ত সেবক মঙ্গলভট্টজী ছিলেন তাঁহার প্রধান সহায়ক। কুটির প্রাঙ্গণে, মুক্ত উদার আকাশের তলে, উচ্চ একটি পাথরের বেদীতে স্বামীজী মহারাজ শয়ন করিয়া থাকিতেন, আর উহার নীচেকার দেয়ালে লিখিত থাকিত শাস্ত্রগ্রন্থের বহুতর শ্লোক ও উপদেশ। সত্যকার ভক্ত সাধক বা মুমুক্শু কেহ আসিলে তাঁহার প্রশ্নের উত্তরে স্বামীজী শুধু অঙ্গুলি সঙ্কেত করিতেন। আর মঙ্গলভট্টজীকে ঐ সকল শ্লোকের মর্ম

শ্রীত্রেলঙ্গস্বামী

উদঘাটন করিয়া আগন্তুকদের জিজ্ঞাস্তা নানা কৌতূহল নিবৃত্তি করিতে হইত।

স্বামীজী মহারাজের আবাসের এক প্রান্তে ছিল প্রস্তর নির্মিত বিশাল শিবলিঙ্গ, আর উহার এক পার্শ্বে নৃমুণ্ডমালিনী মহাকালীর পাষণ্ড প্রতিমা—শক্তিধর মহাসাধকের অধ্যাত্ম-জীবনের দুই মুখ্য প্রতীক। শিব শক্তির এই যুগ্ম আরাধনার পথে, যোগ ও তন্ত্র-সাধনার সমাহারের মধ্য দিয়া মহাযোগী ত্রেলঙ্গস্বামীর বিরাট আধ্যাত্মসত্তা একদিন ধীরে ধীরে গড়িয়া উঠিয়াছিল।

কাশীতে থাকাকালে শ্রীরামকৃষ্ণ সেবার ত্রেলঙ্গ মহারাজকে দর্শন করিতে যান। দর্শনের পর ঠাকুরকে বলিতে শোনা গিয়াছিল, “দেখলাম, সাক্ষাৎ বিশ্বনাথ তাঁর শরীরটা আশ্রয় করে প্রকাশিত হয়ে রয়েছেন। উঁচু জ্ঞানের অবস্থা। শরীরের কোন ছঁসই নেই। রোদে বালি এমনি তেতেছে যে পা দেয় কার সাধ্য? তিনি সেই বালির ওপরেই শুয়ে আছেন।”

১৮৬৮ সালের কথা। শ্রীরামকৃষ্ণ সেবার মথুরাবাবুর সঙ্গে কাশীতে তীর্থ করিতে আসিয়াছেন। বিশ্বনাথ দর্শনের পরই ঠাকুর ‘সচল শিব’ ত্রেলঙ্গস্বামীকে দর্শন করিতে চলিলেন।

স্বামীজী তখন মণিকর্ণিকা ঘাটেই বেশীর ভাগ সময় কাটান। ভাগিনেয় হৃদয়কে সঙ্গে নিয়া শ্রীরামকৃষ্ণ সেখানে গিয়া উপস্থিত। কিন্তু শ্মশানচারী ‘সচল শিবের’ সামাজিক বুদ্ধি বোধহয় তখনো একেবারে লোপ পায় নাই। নয়ন উন্মীলন করিয়া দেখিলেন, সম্মুখে দণ্ডায়মান দক্ষিণেশ্বরের মহাসাধক শ্রীরামকৃষ্ণ, আসন্ন এক অধ্যাত্মলীলার যিনি চিহ্নিত নায়ক। ত্রেলঙ্গ মহারাজ সেদিন পরম প্রসন্ন। স্থিতহাস্যে ঠাকুরের সম্মুখে একটি নম্রদানী তুলিয়া ধরিলেন। প্রবীণ ব্রহ্মবিদ স্বীকৃতি দিলেন নবীন ব্রহ্মবিদকে।

শ্রীরামকৃষ্ণও প্রথম দর্শনের দিনেই খুঁটিয়া খুঁটিয়া স্বামীজীর দেহের

যোগীচিহ্ন সকল দেখিয়া নিতে ছাড়েন নাই। তাহার পর ঘরে ফেরার পথে হৃদয়ের কাছে প্রকাশ করেন, “ওরে, বুঝলি, এঁতে ষথার্থ পরমহংসের লক্ষণ সব বর্তমান। ইনি যে সাক্ষাৎ বিশেষ্বর !”

একাদিক্রমে কয়েকদিনই ঠাকুর শ্রদ্ধাভরে ত্রৈলোক্যস্বামীজীর সমীপে গমন করেন। দুই বিরাট মহাপুরুষের অন্তর্লোকে সেদিন যে দেওয়া-নেওয়ার পালা চলিয়াছিল, তাহার সন্ধান অবশ্য কাহারো জানা নাই, জানিবার কথাও নহে।

কথাপ্রসঙ্গে ঠাকুর তাঁহার উত্তরকালে ঘনিষ্ঠ পার্শ্বদেবের নিকট এ সম্বন্ধে সামান্য দুই-একটি তথ্য প্রকাশ করেন। তিনি বলেন, “তখন কথা কন না, মৌনী। ইশারায় তাঁকে জিজ্ঞেস করেছিলাম—ঈশ্বর এক, না অনেক? তাতে ইশারা করেই বুঝিয়ে দিলেন—সমাধিস্থ হয়ে দেখ তো—এক; নইলে যতক্ষণ আমি, তুমি, জীব, জগৎ ইত্যাদি নানা জ্ঞান রয়েছে ততক্ষণ—অনেক।”

একদিন পরমহংসদেবের মনে অভিলাষ জাগে, স্বামীজীকে তিনি ক্ষীর ভোজন করাইবেন। মথুরাবাবুকে বলিয়া তাঁহার জন্ত আধ মণ ক্ষীর প্রস্তুত করান হইল। সহস্তু যোগীবরকে ইহা খাওয়াইয়া ঠাকুর লাভ করিলেন পরম তৃপ্তি।

ত্রৈলোক্যস্বামীজী দীর্ঘকাল অজগর-বৃত্তি অবলম্বন করিয়া অবস্থান করিতেন। আহার সম্পর্কে বরাবরই তিনি ছিলেন একেবারে উদাসীন। ভোজ্য সংগ্রহের যেমন কোন চেষ্টা তাঁহার ছিল না, তাহার পরিমাণ সম্বন্ধে অবহিত হওয়ার প্রয়োজনও তেমনি তিনি বোধ করেন নাই। নিজ হস্তে কখনো তাঁহাকে কোন আহার গ্রহণ করিতে দেখা যায়িত না। আবার যে কোন খাদ্যবস্তু সম্মুখে তুলিয়া ধরিলেই মহাযোগী অবলীলায় তাহা মুখবিবরে গ্রহণ করিতেন।

খাড়াখাড়ে তাঁহার ভেদজ্ঞান নাই, তাই একবার একদল ছুঁ লোক তাঁহাকে জড় করিতে আসে। এক বালতি চুণগোলা জল সম্মুখে

শ্রীতৈলঙ্গস্বামী

ধরিয়া স্বামীজীকে তাঁহারা উহা পান করাইতে শুরু করে। ইহাদের কু-অভিসন্ধি বুঝিতে স্বামীজীর মোটেই দেৱী হয় নাই। কিন্তু দ্বন্দ্বাতীত লোকে যাঁহার সদা বিচরণ, এদিকে দৃষ্টি দিবার অবসর তাঁহার কই? সমস্তটা চূণ-গোলাই তিনি নিঃশেষে পান করিয়া ফেলিলেন, প্রশান্ত মুখমণ্ডলে বিন্দুমাত্র বৈলক্ষণ্য দেখা গেল না।

পরম গম্ভীর যোগীর এই নির্বিকার ভাব দেখিয়া, কি জানি, কেন ছুঁইদের মনে বড় অনুতাপ শুরু হয়। পদতলে পড়িয়া তাঁহার কৃপা ভিক্ষা করিতে থাকে। এবার তৈলঙ্গ মহারাজের বাহুজ্ঞান ফিরিয়া আসে। অবলীলায় তিনি সকলের সম্মুখে মূত্রদ্বার-পথে সমস্তটা চূণ-গোলা জল নিঃসারিত করিয়া দেন।

বহু ধনবান শেঠ ও রাজরাজড়া বারাণসীতে তীর্থ করিতে আসে। ইহাদের অনেকে শ্রদ্ধাভরে স্বামীজীকে স্বর্ণালঙ্কারে সাজাইয়া দিয়া ধন্য হয়। এই ভক্তেরা চলিয়া গেলেই ছুঁর্বৃত্ত চোরেরা ছুটিয়া আসে—স্বামীজীর অঙ্গ হইতে ঐসব অলঙ্কার খুলিয়া নিয়া যায়! লোষ্ট্র কাঞ্চনে সমজ্ঞান মহাযোগীর তাহাতে ক্রম্পে নাই, চিত্তে নাই বিন্দুমাত্র আলোড়ন। পরম প্রশান্তি ও নির্লিপ্তি নিয়া তিনি শুধু অপরাধীদের দিকে চাহিয়া থাকেন।

সেবার তৈলঙ্গস্বামী ভিজিয়ানাগ্রামের মহারাজার অট্টালিকার সম্মুখ দিয়া চলিয়াছেন। এই সংবাদ পাইয়া মহারাজা ছুটিয়া বাহির হইলেন। সম্মুখে স্বামীজীকে প্রাসাদের ভিতর নিয়া যাওয়া হইল। সকলে মিলিয়া সোৎসাহে তাঁহাকে পটুবস্ত্রে সজ্জিত করিলেন। কোমরে, বাহুতে ও গলায় পরান হইল সোনার অলঙ্কার।

স্বামীজীর কিন্তু পরিচ্ছদ ও আভরণের দিকে কোন লক্ষ্যই নাই। সবেমাত্র রাজবাড়ীর বাহিরে কিছুটা দূর আসিয়াছেন, এমন সময় কয়েকটি ছুঁর্বৃত্ত আংগাইয়া আসে, তাঁহার শরীর হইতে এগুলি খুলিয়া নেয়। স্বামীজী কিন্তু মোন হইয়াই দাঁড়াইয়া থাকেন, তস্করদের কাজ

শেষ করার সুযোগ দিতেছেন। এমন সময় রাজপ্রহরীরা দূর হইতে ব্যাপারটি টের পায়। ছুটিয়া আসিয়া ইহাদের ধরিয়া ফেলে।

চারিদিকে এক হৈ-চৈ পড়িয়া যায়। ভিজিয়ানাগ্রামের মহারাজা ছুতকারীদের বাঁধিয়া আনিয়া স্বামীজীর পদতলে ফেলেন। বলেন, “বাবা, আপনি বলুন, এ ছুঁদের কি সাজা দেব?”

উত্তেজনা ও কোলাহলের মধ্যে ত্রৈলোক্য মহারাজ কিন্তু আপন মৌন মহিমা নিয়া নির্বিকার চিন্তে দাঁড়াইয়া আছেন।

মহারাজের প্রশ্নের উত্তরে অঙ্গুলি সঙ্কেতে নিজ দেহটি দেখাইয়া তিনি যাহা জানাইতে চাহিলেন তাহার মর্ম—‘উহারা অলঙ্কার নিয়াছে তো কাহার কি ক্ষতি হইয়াছে? আমি তো যেমন ছিলাম, তেমনই রহিয়াছি আমার কোন পরিবর্তন হইয়াছে কি? নির্বোধ-গুলিকে এবারকার মত ছাড়িয়া দাও।’

তবে আর কি করা যায়? সকলে নিতান্ত অনিচ্ছার সহিত ছুঁদের মুক্তি দিতে বাধ্য হন।

প্রভুপাদ বিজয়কৃষ্ণ গোস্বামীর উপর যোগীবরের আশীর্বাদ এক সময়ে অকুপণ করে বর্ষিত হয়। গোস্বামীজীর রূপান্তরসাধনে এই বিরাট পুরুষের অধ্যাত্মশক্তি পরম সহায়ক হইয়া উঠে।

ত্রৈলোক্যস্বামীজীর সহিত যখন তাঁহার সাক্ষাৎ হয়, তখন তিনি ব্রাহ্মসমাজেরই অন্তর্ভুক্ত। হৃদয়ে জাগিয়াছে মুমুক্ষুর তীব্র জ্বালা, তাই অস্থির হইয়া নানা স্থানে ঘুরিয়া বেড়ান। সেবার ব্যাকুল হইয়া কাশীতে উপনীত হন এবং অল্প কয়েকদিনের মধ্যে ত্রৈলোক্য মহারাজের কৃপালাভে ধন্য হন।

গোস্বামীজী নিজে এ সাক্ষাতের বড় মনোরম বিবরণ দিয়াছেন। উল্লস স্বামীজী গঙ্গার স্রোতে এক ঘাট হইতে অন্য ঘাটে ভাসিয়া বেড়াইতেছেন, আর তিনি তটপথে তাঁহার সঙ্গে সঙ্গে ছুটিতেছেন। সে এক অপূর্ব দৃশ্য।

শ্রীতৈলঙ্গস্বামী

স্থির হইয়া একস্থানে বসিলেই স্বামীজী গোঁসাইজীর আহারের জ্ঞাত উদ্ভিগ্ন হইয়া পড়িতেন। ভক্তেরা তাঁহার জ্ঞাত মিষ্ট দ্রব্যাদি আনিয়া উপস্থিত করিত। আর তিনিও স্নেহ ভঙ্গিতে নানা ইঙ্গিত করিয়া বিজয়কৃষ্ণকে এগুলি ভোজন করাইতেন। শুদ্ধাত্মা, মুমুক্শু বিজয়কৃষ্ণ গোড়া হইতেই তাঁহার স্নেহ ও আশীর্ব্বাদ প্রাপ্ত হন। সাধন জীবনে ইহা হয় তাঁহার পরম পাথের।

প্রভুপাদ বিজয়কৃষ্ণ যে বর্ণনা দিয়াছেন তাহার মধ্য দিয়া মহা-যোগীর এ সময়কার এক চিত্তাকর্ষক চিত্র ফুটিয়া উঠে। তিনি বলিয়াছেন, “কোন সময়ে হয়ত স্বামীজী গঙ্গায় পড়িয়া ভোস করিয়া ডুব দিতেন ও মণিকণিকার ঘাটে গিয়া উঠিতেন। আমি তখন গঙ্গার পার দিয়া দেড়াইয়া যাইতাম।...”

“একদিন এক কালীমন্দিরে গিয়া স্বামীজী প্রস্তাব করিয়া তাহা ছিটাইয়া কালীর অঙ্গে দিতে লাগিলেন। আমি জিজ্ঞাসা করিলাম, ‘একি ব্যাপার! বিগ্রহের গায়ে প্রস্তাব দেন কেন?’ তিনি মাটিতে লিখিয়া দিলেন, ‘গঙ্গোদকং’।

“আমি বলিলাম, ‘কালীর গায়ে ইহা ছিটাইয়া দিলেন কেন?’ তিনি অবলীলাক্রমে উত্তরে বলিলেন, ‘পূজা’।”

ঘটনাটি ঘটিবার সময় ঐ দেবালয় জনশূন্য ছিল। কিছুকাল পরে মন্দিরের লোক ফিরিয়া আসিলে গোঁস্বামী প্রভু তাঁহাদের নিকট তৈলঙ্গস্বামীজীর এই অদ্ভুত আচরণের কথা বলিলেন। মন্দিরের পূজারী ও অন্যান্য লোক তাঁহার প্রশ্নের উত্তরে বলিয়া উঠিলেন, “ইনি তো সাক্ষাৎ বিশেষ্বর! এঁর সম্বন্ধে কিছু বলতে নেই। এঁর প্রস্তাব যে গঙ্গোদক, তা ঠিকই।”

স্বামীজীর প্রতি কালীর অধিবাসীদের এই প্রগাঢ় ভক্তি দেখিয়া বিজয়কৃষ্ণের বিস্ময়ের সীমা রহিল না।

কিছুদিন পরে হঠাৎ একদিন তৈলঙ্গ মহারাজ গোঁসাইজীকে জানাইয়া দিলেন, তিনি তাঁহাকে দীক্ষা প্রদান করিবেন। গোঁসাইজী

তো একথা শুনিয়া অবাক !

ইতিমধ্যেই এই বিরাট পুরুষের সান্নিধ্য ও অন্তবঙ্গতা তাঁহাকে অনেকটা হুঃসাহসী করিয়া তুলিয়াছে। আবদারের সুরে স্বামীজীকে তিনি বলিয়া উঠিলেন, “কিন্তু আপনার কাছে আমি দীক্ষা নেব কেন ? আপনি দেব-বিগ্রহের গায়ে প্রস্তাব ছিটিয়ে দিয়ে বলেন—গঙ্গোদকং। আমি অমন অনাচারী লোকেব দ্বারা দীক্ষিত হব না। তাছাড়া, আমি তো ব্রাহ্ম, আমাকে আপনি কি করে দীক্ষা দেবেন ?”

ত্রৈলোক্য মহারাজ সহাস্যে কহিলেন “বেটা, তোকে দীক্ষা দেবার ব্যাপারে একটা গুঢ় কারণ রয়েছে। কিন্তু প্রকৃত দীক্ষা আমি দিচ্ছি। গুরু গ্রহণ না করলে শরীর শুষ্ক হয় না, তাই গুরুকরণ প্রয়োজন। কিন্তু তোর আসল গুরু আমি নই।”

বিজয়কৃষ্ণ বলিয়াছেন, “এরপর তিনি আমাকে ত্রিবিধ মন্ত্র প্রদান করে বললেন, ‘অব যাও। মেরে পর ভগওয়ানকে যো হুকুম থে, উহ্ ম’য়্য তামিল কিয়া।’ অর্থাৎ, আমার উপর ঈশ্বরের যা আদেশ ছিল তাই আমি পালন করলাম।”

উত্তরকালে গোস্বামীজী সন্ন্যাস ও যোগসাধন গ্রহণ করার পর আর একবার কাশীধামে উপনীত হন। যোগীববের সঙ্গে সে সময় আবার তাঁহার সাক্ষাৎ হয়। তিনি তাঁহাকে সেই পুৰাতন ঘটনার ইঙ্গিত করিয়া প্রশ্ন করেন, “ক্যা, তুমকে। ইয়াদ হ্যায় ?”—কি হে, আগেকার কথা কি তোমার স্মরণ আছে ?

গোস্বামীপ্রভু করযোড়ে ভক্তিগদগদ কণ্ঠে উত্তর দিয়াছিলেন, “হঁ্যা, মহারাজ।”

যোগী শ্যামাচরণ লাহিড়ীও একবার ত্রৈলোক্যস্বামীর চরণোপাঙ্গে উপনীত হন। লাহিড়ী মহাশয়কে দূর হইতে দর্শন করিয়াই স্বামীজী সন্মুখে তাঁহাকে সম্বর্দ্ধনা করেন।

কয়েকটি বিশিষ্ট ভক্ত সেদিন সেখানে উপস্থিত। স্বামীজীর

শ্রীত্ৰৈলোক্যস্বামী

এমনতর ভাবোচ্ছ্বাস তাঁহারা বড় একটা দেখেন নাই। তাই অনেকেই সবিস্ময়ে এ সম্পর্কে তাঁহাকে প্রশ্ন করেন।

উত্তরে স্বামীজী ভক্তদের বলিয়াছিলেন, “যোগমার্গের যে উচ্চাবস্থায় উঠে সাধকদের লেঙটি পর্য্যন্ত ছাড়তে হয়, ধূতিপাঞ্জাবি পরিহিত এ মহাপুরুষ অনেক আগেই সে অবস্থা লাভ করেছেন।”

ত্ৰৈলোক্য স্বামীজীর সেদিনকার এ সম্বন্ধে কাশীর সাধক সমাজে অতি সহজে এই নবাগত প্রচ্ছন্ন যোগীর পরিচয় সাধন করাইয়া দেয়। তাঁহার এই সন্তোহ আচরণ ও স্বীকৃতি দান যোগীগুরুরূপে লাহিড়ী মহাশয়কে প্রতিষ্ঠিত করার পক্ষে সহায়ক হয়।

পঞ্চগঙ্গা ঘাটের কাছে নানাস্থানে ও মঙ্গলভট্টের আবাসে স্বামীজী প্রায় আশীবৎসরকাল বাস করিয়া গিয়াছেন। কিন্তু কখনো কোন মঠ, আশ্রম বা মণ্ডলী স্থাপনের ইচ্ছা এই শক্তিধর মহাপুরুষের অন্তরে কোনদিন স্থান লাভ করে নাই।

সচ্চিদানন্দ সাগরের উদাৎ বক্ষে স্বেচ্ছাবিহারী মীনের মত মহাযোগী তাঁহার ঈশ্বরনির্দিষ্ট অধ্যাত্মলীলাটি উদ্‌যাপন করিয়া গিয়াছেন একান্ত নিঃসঙ্গতায়।

লোকোত্তর মহাপুরুষের মরলীলা এবার ধীরে ধীরে শেষ অঙ্কে আসিয়া পৌঁছিয়াছে। হঠাৎ একদিন গঙ্গাবিহার হইতে ফিরিয়া আসিয়া নিজেই আসন্ন তিরোধানের এ সংবাদ প্রকাশ করিলেন।

মঙ্গলভট্টের শোভা, গোবিন্দ ভট্ট আমাদিগকে ত্ৰৈলোক্য স্বামীজীর সেদিনকার কথোপকথনের এক কোতূহলোদ্দীপক বিবরণ দিয়াছেন—

ভট্টজী এবং আরো কয়েকটি বিশিষ্ট ভক্ত সেদিন সেখানে উপস্থিত। হাতছানি দিয়া স্বামীজী তাঁহাদের কাছে ডাকিলেন। স্মিত হাস্তে কহিলেন, “বেটা সব, এবার তোরা আমায় বিদায় দে। আমি স্থির করেছি, আজই সমাধিযোগে এ দেহ ত্যাগ করবো।”

এ সংবাদ যেমনি মৰ্ম্মাস্তিক, তেমনি অপ্রত্যাশিত। ভক্তদের প্রাণ

কাঁদিয়া উঠিল। করুণ কণ্ঠে তাঁহারা কহিলেন, “সে কি বাবা! এ আপনি কি বলছেন? আপনি চলে গেলে আমরা বাঁচবো কি নিয়ে।”

“আরে আমি কি তোদের একেবারে ছেড়ে যাচ্ছি? দেহের এই খোলসটা বড় পুরনো, বড় জীর্ণ হয়ে গিয়েছে। আর না বদলালে চলে না। তাই এটিকে এবার ছেড়ে দিচ্ছি।”

মঙ্গলভট্ট আবদারের সুরে কহিলেন, “না বাবা, সে হয় না। আগে থেকে বলা-কওয়া নেই, হঠাৎ এমনি করে একদিন চলে গেলেই হল? তবে এটাও বুঝতে পারছি, সিদ্ধান্ত যখন আপনি স্থির করেই ফেলেছেন তখন এটা আর ফেরানো যাবে না। কিন্তু আপনি আমাদের একটু সময় তো দেবেন! মনটাকে তো প্রস্তুত করে নিতে হবে। তাছাড়া, আপনার একটা পাথরের মূর্তি গড়িয়ে রাখবো বলে ভাবছি।”

“হ্যাঁরে ভট্ট, এই রক্ত মাংসের দেহ, এই পাথরের মূর্তি, এসব নশ্বর জিনিষের কি কোন মূল্য আছে? এতদিন আমার সঙ্গ করে এসে, আজ তোদের এ কি সব কথা?”

“বাবা, আমরা বদ্ধজীব, আপনাকে বুঝতে পারলুম কই? কিন্তু বাবা, আপনি যাই বলুন, আমরা একান্তভাবে চাই—একটা পাথরের মূর্তি অন্ততঃ আপনার এই সাধনক্ষেত্রে থাক। আপনার তিরোধানের পর রোজ আমরা বিগ্রহের মাথায় ঢালতে পারবো গঙ্গাবারি, দিতে পারবো ভক্তির অর্ঘ্য-পুষ্পাঞ্জলি।”

করুণাময় মহাযোগীর আননে ফুটিয়া উঠিল স্থিত হাস্য। কহিলেন, “আচ্ছা বেশ। তাহলে আমার যাবার দিন একমাস পিছিয়েই দিচ্ছি। তাড়াতাড়ি তোরা মূর্তি তৈরির যোগাড় কর।”

চঞ্চল বালক যেমন স্বেচ্ছামত তাহার বন্দুকটি নিয়া খেলিয়া বেড়ায়, তেমনিভাবে ত্রৈলোক্য মহারাজ অবলীলায় সেদিন দূরে ঠেলিয়া দিলেন তাঁহার মৃত্যুর নির্দিষ্ট সপ্তটিকে।

হাতে সময় বেশী নাই। ভক্তেরা তোড়জোড় শুরু করিয়া দিলেন।

শ্রীতৈলঙ্গস্বামী

সেই দিনই স্থানীয় এক ভাস্করকে ডাকিয়া আনা হইল, মাসখানেকের মধ্যে গড়িয়া উঠিল তৈলঙ্গ মহারাজের এক বৃহদায়তন প্রস্তরমূর্তি । ১

মহাপ্রয়াণের পূর্বদিন মহারাজ ভক্তদের প্রার্থনামত কিছু কিছু সাধন-উপদেশ প্রদান করিলেন । তাঁহার নির্দেশ আনুযায়ী একটি সুরহৎ চন্দন কাঠের সিন্দুক প্রস্তুত করানো হইল । মরদেহসহ এটিকে গঙ্গাগর্ভে একটি নির্দিষ্ট স্থানে সমাহিত করা হইবে, এই আদেশও আগে হইতে জানাইয়া রাখিলেন ।

১২৯৪ সনের পৌষমাস—শুক্রা একাদশীর পুণ্যতিথিতে ব্রহ্মরন্ধু-পাথ উৎক্রমণ ঘটে মহাযোগীর অমরাঙ্গার ।

কাষ্ঠসম্পূটস্থিত মরদেহখানি পঞ্চগঙ্গার ঘাটে নৌকায় তোলা হয় । ইতিমধ্যে তৈলঙ্গ স্বামীজীর তিরোধানের সংবাদ প্রচারিত হইয়া যায় । সর্বজনবন্দিত মহাপুরুষের গঙ্গাসমাধির অপূর্ব দৃশ্য দর্শন করিতে গঙ্গাতট সেদিন লোকে লোকারণ্য হইয়া উঠে ।

অসি হইতে বরুণা অবধি স্বামীজীর পুত দেহবাহী কাষ্ঠাধারটিকে ভ্রমণ করানো হয়, তারপর দেওয়া হয় গঙ্গাগর্ভে বিসর্জন ।

শিবধাম বারাণসীতে শিবকল্প মহাযোগী প্রায় দেড়শত বৎসর ব্যাপিয়া তাঁহার লীলানাট্য অভিনয় করিয়া গিয়াছেন, শত সহস্র লোকের নয়ন সমক্ষে এ নাট্যের দৃশ্যপট একের পর এক উন্মোচিত হইয়াছে । সেদিনকার সায়াংসন্ধ্যার স্তিমিত আলোকে সেই লীলা সম্বরণের পালাটিকেই সকলে সাক্ষরনয়নে অনুষ্ঠিত হইতে দেখিল ।

১ কালীধামের তৈলঙ্গস্বামী-মঠের পরিচালক গোবিন্দ ভট্টজী আজো পরম শ্রদ্ধাভরে এই প্রস্তর বিগ্রহ এবং তৈলঙ্গ স্বামীজীর ব্যবহৃত জলপাত্র, পাত্ৰকা ইত্যাদি দর্শনার্থীদের প্রদর্শন করিয়া থাকেন । খেয়ালী স্বামীজী একদিন গঙ্গাতীর হইতে স্বহস্তে এমন একটি বিরাট প্রস্তরময় শিবলিঙ্গ অনায়াসে তুলিয়া আনেন তাহা বহন করা দশবারজন বলিষ্ঠ পুরুষের পক্ষেও সম্ভব নয় । এই শিবলিঙ্গটিও স্বামীজীর এক অলৌকিক লীলার এক স্মারকচিহ্নরূপে বর্তমান রহিয়াছে ।

যোগী শ্রীশ্যামাচরণ লাহিড়ী

১৮৬১ খৃষ্টাব্দের কথা। হিমালয়ের রাণীক্ষেত অঞ্চলে এক সেনা-নিবাস নির্মাণের আয়োজন চলিতেছে। সামরিক পূর্তবিভাগের এক তরুণ বাঙালী কর্মচারী দানাপুর হইতে সেদিন এখানে বদলী হইয়া আসিয়াছেন। প্রাথমিক কাজকর্ম সবেমাত্র শুরু হইয়াছে। সামান্য যাহা কিছু কাজ হাতে থাকে তাঁবুতে বসিয়া প্রাতেই তিনি তাহা শেষ করিয়া ফেলেন। তারপর সারাদিন ব্যাপিয়া অখণ্ড অবসর। এ সময়ে প্রায়ই পিয়ন ও পাহাড়ী কুলীদের নিয়া নানা গল্পগুজবে তাঁহার সময় কাটিয়া যায়।

সম্মুখে নাগাধিরাজ হিমালয়। কন্দরে কন্দরে ইহার কত যোগী, কত সিদ্ধ সাধু-সন্ন্যাসী তপস্যায় রত। জন্মজন্মান্তরের পুণ্যফল কোন কোন ভাগ্যবানের জীবনে ঘটে তাঁহাদের আবির্ভাব, তাঁহাদেরই মাধ্যমে প্রকাশিত হয় দেবতাত্মা হিমালয়ের স্বরূপ।

পূর্তবিভাগের এই কর্মচারীটি স্থানীয় লোকদের মুখে নানা অলৌকিক কাহিনী, নানা জনশ্রুতি শুনিয়াছেন। আরও জানিয়াছেন, অদূরস্থ জোণগিরি শিবকল্প তাপসদের এক বিচরণভূমি। এখানে তাঁহাদের নানা লীলা অনুষ্ঠিত হয়, ভাগ্যবানদের চোখে ধরা পড়ে। অন্তরে একদিন কৌতূহল জাগিয়া উঠিল পাহাড়টিকে ভাল করিয়া দেখিয়া আসিবেন। সেদিন বিকালে এই উদ্দেশ্যে নিয়াই বেড়াইতে বাহির হইলেন।

রাণীক্ষেত হইতে জোণগিরি প্রায় পনের মাইল পথ। চারিদিকে দেবদারু ও চীড়গাছের ঘন বন। অদূরে ছুর্গম পাহাড়ের সারি পর পর উঁচু হইয়া উঠিয়া গিয়াছে।

যোগী শ্রীশ্যামাচরণ লাহিড়ী

পাকদণ্ডির আঁকাবাঁকা বনপথ দিয়া চলিতে চলিতে প্রায় সন্ধ্যা হইয়া আসিল। সম্মুখেই চোখে পড়ে, নন্দাদেবীর গিরি-চূড়ায় অন্তরাগের অপরূপ সমারোহ। দূরে দিকচক্রবালে চিরতুষারমণ্ডিত পর্বতশৃঙ্গের তরঙ্গমালায় দেখা যায় তাহার বর্ণচ্ছটা। দেবাদিদেব ধূর্জটির আতাত্র জটাজালে যেন দিগন্ত ঢাকিয়া গিয়াছে।

আত্মবিস্মৃত তরুণ এ মহিমময় দৃশ্যের দিকে চাহিয়া আছেন।

অকস্মাৎ নির্জন দ্রোণগিরি কম্পিত করিয়া ধ্বনিত হইল—
“শ্যামাচরণ! শ্যামাচরণ লাহিড়ী!”

একি! কে এই জনমানবহীন পার্বত্য অঞ্চলে তাঁহার নাম ধরিয়া ডাকিতেছে? সরকারী টেলিগ্রাম পাইয়া শ্যামাচরণ হঠাৎ দানাপুর হইতে পাঁচশত মাইল দূরে এই রাণীক্ষেতে চলিয়া আসিয়াছেন। কিন্তু এই অঞ্চলের কোন লোকই তো তাঁহার পরিচিত নয়! অন্তরে কিছুটা ভয়ের সঞ্চার হইল, আবার কোতূহলও জাগিল।

কণ্ঠস্বর অনুসরণ করিয়া কিছুদূর আগাইয়া গেলেন। দেখিতে পাইলেন, অদূরে পর্বত গুহার দ্বারে তেজঃপুঞ্জকলেবর, জটাজুটসমবিত এক যোগী একাকী দাঁড়াইয়া আছেন। তিনি যেন শ্যামাচরণের জন্মই অপেক্ষমাণ।

আয়ত নয়ন দুইটিতে দিব্য আনন্দের ছাতি। যোগীবর আগাইয়া আসিয়া প্রসন্নমধুর কণ্ঠে কহিলেন, “শ্যামাচরণ, অব্‌ ভূম আগয়া! ব্যয়ঠ যাও বিশ্রাম কর লো। ম'য়হি তুমহে পুকার রহা থা।” অর্থাৎ—শ্যামাচরণ, তুমি তা হলে এসে গিয়েছ! এবার বিশ্রাম কর। আমিই তোমায় এতক্ষণ ডাকছিলাম।

শঙ্কা ও সন্দেহ শ্যামাচরণের মনে ভীড় করিতেছে। ভাড়াভাড়ি কোনমতে একটি শুষ্ক প্রণাম করিয়া একপাশে দাঁড়াইলেন।

যোগী সাদর আহ্বান জানাইলে কি হইবে, শ্যামাচরণের মনের দ্বিধাদ্বন্দ্ব সহজে যাইতে চায় না। মনে মনে কেবলি ভাবিতেছেন,

তাইতো, এ সাধু আমার নাম কি করে জানলো? হয়তো কোন পিয়ন বা পাহারাদারের কাছে জেনে নিয়েছে।

পরম আশ্চর্যের কথা, মনে এই চিন্তা খেলিয়া যাইবার সঙ্গে সঙ্গেই যোগী অবলীলায় শ্যামাচরণের পিতৃপুরুষের নাম, ধাম, পরিচয়, সব কিছু একনিঃশ্বাসে বলিয়া দিলেন। শুধু তাহাই নয়, ঘনিষ্ঠ লোকের মত তাঁহার দিকে তাকাইয়া কেবলি তিনি মধুর হাসি হাসিতে লাগিলেন।

ক্ষণপরে কহিলেন, “বেটা, মন তোমার বৃথা সন্দেহে আলোড়িত হচ্ছে। জেনে রেখো, আমি তোমার নিতান্ত আপন জন—তোমারই প্রতীক্ষায় এ দুর্গম গিরিশিখরে বসে আছি। একবার ভাল করে ভেবে দেখ দেখি, এ পাহাড়ে আগে তুমি আর কখনো এসেছিনে কিনা।”

হাতছানি দিয়া শ্যামাচরণকে তিনি গুহার অভ্যন্তরে নিয়া গেলেন। স্বল্পালোকে দেখা গেল, এক কোণে সন্ন্যাসীর বাঘছাল, ধুনী, দণ্ড ও কমণ্ডলু প্রভৃতি পড়িয়া রহিয়াছে। রহস্যময় মহাপুরুষ শ্যামাচরণকে জিজ্ঞাসা করিলেন, “এবার দেখতো এগুলো চিনতে পারছো কিনা? এসব তোমারই পরিত্যক্ত জিনিস, এসব কথা কি একটু তোমার স্মরণে আসছে না?”

বিস্ময়বিমূঢ় শ্যামাচরণ বারবার স্মৃতির ছুয়ারে আঘাত করিতেছেন, কিন্তু কোন কিছুই মনে করিতে পারিতেছেন না।

এবার যোগীবর স্মিত হাস্তে আগাইয়া আসিলেন, হস্তদ্বারা স্পর্শ করিলেন শ্যামাচরণের মেরুদণ্ড। এ কি ইন্দ্রজাল! শ্যামাচরণের মনোলোকের যবনিকাটি মুহূর্ত্তমধ্যে কোথায় অপমৃত হইয়া গেল। ভড়িসঞ্চালিত তন্ত্রীর মত সমগ্র দেহটি তাহার কেবলই তখন বার-বার কম্পিত হইতেছে।

পূর্বজন্মের অধ্যাত্ম-জীবনের চিত্রপট শ্যামাচরণের নয়ন সমক্ষে সহসা উদ্ঘাটিত হইয়া গেল। জন্মান্তরের ব্যবধান শক্তির মহাযোগীর

যোগী শ্রীশ্যামাচরণ গাহিড়ী

পুণ্যকরম্পর্শে এক নিমেষে আজ যুচিয়া গিয়াছে। তিনি চিনিলেন—
এই দণ্ড, কমণ্ডলু, বাঘছাল ও পবিত্র ধুনি এসব তাঁহারই পূর্বজন্মের
ব্যবহৃত বস্তু; সম্মুখে দণ্ডায়মান এ যোগীই তাঁহার পূর্বজন্মের গুরু—
আর ইনিই আজ তাঁহার ইহ-পরকালের পরমাশ্রয়।

সাষ্টাঙ্গ প্রণিপাত করিয়া শ্যামাচরণ যুক্তকরে দণ্ডায়মান
রহিলেন। যোগী সহাস্তে বলিলেন, “বেটা, এসব জিনিস তোমারই
আগেকার ব্যবহার করা। তুমি পূর্বজন্মে আমার চেলা ছিলে।
সাধনার উচ্চ মার্গে অবস্থান করার কালে তোমার দেহপাত হয়। এ
জন্মে ঈশ্বরনির্দিষ্ট কর্ম সম্পাদনের জন্য আবার তোমায় জন্মগ্রহণ
কবতে হয়েছে। তোমার সেই সাধনসম্পাদকে গচ্ছিত বস্তুরূপে রক্ষা
করে আমি এ যাবত অপেক্ষা করছি। তোমায় দীক্ষা দেবার জন্যই
আজ আমার এখানে আগমন।”

যোগীবরের নিকট শ্যামাচরণ আরও যেসব তথ্য শুনিলেন
তাঁহাতে তাঁহার বিস্ময়ের অবধি রহিল না। যোগী বলিলেন, ‘বাবা
তোমায় এখানে আসতে আদেশ করেছে টেলিগ্রাম তোমার কার্যস্থল
দানাপুরে পাঠানো হয়, তা ওপরওয়াল সাহেবের ভ্রাতৃর ফলেই
ঘটেছে। একস্থানের নাম করতে গিয়ে সে আর একস্থানের উল্লেখ
করেছে। এ ভ্রাতৃ আমিই ঘটিয়েছি। জেনে রাখো, আবার সাত
দিন পরেই তোমার কাছে আদেশ আসছে—দানাপুরে ফিরে যাবার
জন্যে। ততদিনে আমার কাজও শেষ হয়ে যাবে।”

সাধারণ সংসারী মানুষ শ্যামাচরণের জীবনে এ কি অলৌকিক
কাণ্ড! অসামান্য যোগবিভূতিসম্পন্ন এই মহাপুরুষ তাঁহার গুরু?
তাঁহারই প্রতীক্ষায় গুরু এমনভাবে দিন গুণিতেছেন।

অন্তরাগরঞ্চিত জোণগিরির বক্ষে, রহস্যময় এই গুহাদ্বারে দাঁড়াইয়া
শ্যামাচরণের মনে হইল, জন্ম-জন্মান্তরে এই গুরু অপেক্ষা ঘনিষ্ঠতর
জন, আত্মার পরমাত্মীয় জন আর তাঁহার কেহই নাই। আত্মীয়, সুহৃদ

ও বিশ্বসংসার সমস্ত কিছুর অস্তিত্ব যেন অন্তর হইতে আজ নিশ্চিহ্ন হইয়া মুছিয়া গিয়াছে।

বাষ্পাকুল কণ্ঠে, সকাতরে শ্যামাচরণ कहিলেন, “বাবা, আর আমার সংসারে ফিরে যেতে বলবেন না, আপনার চরণসেবা করেই আমি জীবন কাটিয়ে দিতে চাই। হারানো অধ্যাত্ম-সম্পদের পুনরুদ্ধার করাই আজ থেকে হবে আমার জীবনের ব্রত।”

“না বাবা, সংসার তোমায় এখনি ত্যাগ করতে হবে না। সংসারে থেকেই আপন সাধন-বলে তুমি লাভ করবে যোগী জীবনের শ্রেষ্ঠ সার্থকতা। এই ঐশী বিধানই তোমার জন্ত রয়েছে। যোগসাধন প্রচারের তুমি হবে এক চিহ্নিত আচার্য্য। পরম গোপ্য এই সাধনকে উপযুক্ত পাত্র বুঝে বিতরণ করার দায়িত্ব তোমায় গ্রহণ করতে হবে।

বিদায় বেলায় যোগী বলিয়া দিলেন, “শ্যামাচরণ, স্মরণ রেখো, অফিস-ই তোমার জন্ত আজ রাণীক্ষেতে এসেছে—তুমি অফিসের জন্ত এখানে আসোনি। পরমাত্মার ইচ্ছে অনুসারেই এসব ঘটেছে। যে ক’দিন তুমি এই অঞ্চলে থাকবে, রোজই আমার সাথে সাক্ষাৎ করো।”

শ্যামাচরণ লাহিড়ীর জীবনে সেদিন এক পটপরিবর্তন ঘটয়া গেল। এ পরিবর্তন যেমনই নাটকীয় তেমনি বিস্ময়কর। নদীয়ার এক অখ্যাত গ্রামে তিনি ভূমিষ্ঠ হন। জীবন-পথের বাঁকে বাঁকে নিতান্ত সাধারণ ম নুষের মতই এতদিন তিনি অগ্রসর হইয়া আসিয়াছেন। তারপর কার্যব্যপদেশে রাণীক্ষেতে আসিবার পর সমস্ত কিছু আজ ওলোট-পালোট হইয়া গেল—শিবকল্প মহাযোগীর আশ্রয় তিনি লাভ করিলেন। এ অপ্রত্যাশিত কৃপা তাঁহার জীবনে সূচনা করিল এক নূতন সৌভাগ্যের।

শ্যামাচরণের পিতা গৌরমোহন (সরকার) লাহিড়ীর বাস ছিল কৃষ্ণনগরের কাছে ঘূর্ণী নামক গ্রামে। এখানকার এক সম্ভ্রান্ত ব্রাহ্মণ-বংশে তিনি জন্মগ্রহণ করেন। গৌরমোহন ছিলেন ধর্মনিষ্ঠ এবং

যোগী শ্রীশ্যামাচরণ লাহিড়ী

যোগসাধনপরায়ণ। স্বগ্রামে মহাসমারোহে একটি শিবমন্দিরও তিনি প্রতিষ্ঠা করেন। কিন্তু কালক্রমে তাঁহার এ মন্দির নদীগর্ভে বিলীন হইয়া যায়। পরবর্ত্তীকালে শিবের প্রত্যাদেশ অনুসারে বিগ্রহটিকে নদীগর্ভ হইতে উদ্ধার করা হয়, নূতন একটি মন্দির নির্মিত হয়। আজিও সে স্থানটি ঘূর্ণীর শিবতলা বলিয়া প্রসিদ্ধ। এই শিব পূজায় গৌরমোহনের পত্নী মুক্তকেশী দেবীর খুব উৎসাহ ছিল।

এই ধর্মনিষ্ঠ দম্পতির গৃহ আলো করিয়া ১২২৫ সালের ১৬ই আশ্বিন (১৮২৮ খৃঃ) শ্যামাচরণ আবিভূত হন। শৈশবে শিশুর মাতৃ-বিয়োগ ঘটবার পর হইতে পিতা গৌরমোহন তাঁহাকে নিয়া স্থায়ী-ভাবে কাশীতে বসবাস করিতে থাকেন।

নিষ্ঠাবান ব্রাহ্মণবংশের ধর্ম ও সংস্কৃতির ধারা শ্যামাচরণের জীবনে স্বাভাবিকভাবে বহমান ছিল। তরুণ বয়সে মহাতীর্থ কাশীতে বসবাসের ফলে এ ধারা আরও বেগবতী হইয়া উঠে। অগণিত মন্দির এবং ভজনস্থল এ শহরের চারিদিকে, সাধু-মহাত্মাদের আনাগোনাও যথেষ্ট। এই পরিবেশে মানুষ হওয়ায় শ্যামাচরণের মনে জাগিতে থাকে অধ্যাত্ম-জীবনের এক বিশেষ মূল্যবোধ।

পিতা গৌরমোহন শাস্ত্রপাঠ ও ধর্মসাধনায় চির-বিশ্বাসী, নিষ্ঠাভরে ঋতুপাঠ করা ছিল তাঁহার প্রতিদিনের অভ্যাস। কাশীতে তখন নাগভট্ট নামে এক বেদবিদ মহারাষ্ট্রীয় ব্রাহ্মণের খুব প্রতিষ্ঠা, ইঁহারই কাছে বালক শ্যামাচরণকে কিছুদিনের জ্ঞাত বেদশিক্ষার্থীরূপে রাখা হইল।

গৌরমোহন প্রাচীন ভারতের ধর্ম ও সংস্কৃতির ভক্ত হইলেও পুত্রকে শিক্ষাদানের ব্যাপারে আধুনিক ভাবধারাকে কখনো অগ্রাহ্য করেন নাই। শ্যামাচরণের জ্ঞাত তিনি উর্দু শিক্ষার ব্যবস্থাও করেন। তাছাড়া রাজা জয়নারায়ণ ঘোষালের স্কুলে এবং সরকারী সংস্কৃত কলেজে পড়িয়া শ্যামাচরণ বাংলা, সংস্কৃত, ফার্সী ও ইংরেজী আয়ত্ত করেন। স্কুল ও কলেজের সহপাঠীরা এই গৌরকান্তি, সুদর্শন মেধাবী তরুণকে বড় ভালবাসিত।

আঠারো বৎসর বয়সে শ্যামাচরণকে বিবাহ বন্ধনে আবদ্ধ হইতে হয়, নববধূ কাশীমণির বয়স তখন ছিল মাত্র আট বৎসর। শালিখার' এক পণ্ডিত-বংশে কাশীমণির জন্ম। ছোটবেলা হইতেই তিনি ছিলে নানা সদৃশ্যের আকর। পরবর্তীকালে সুদীর্ঘ দাম্পত্য জীবনে স্বামীর প্রকৃত সহধর্ম্মিণীরূপেই তাঁহাকে ফুটিয়া উঠিতে দেখা যায়। যোগাচার্য্য রূপে শ্যামাচরণ যে ভূমিকা গ্রহণ করেন, তাহাকে সার্থক করিয়া তুলিতে এই পত্নীর সহায়তা কম কার্য্যকরী হয় নাই।

তেইশ বৎসর বয়সে সরকারী পূর্ত দপ্তরের এক সাধারণ কন্স্টাবল হিসাবে শ্যামাচরণ কর্ম্ম আরম্ভ করেন। দুই বৎসর পরে তাঁহার পিতার লোকান্তর ঘটে এবং সংসারের গুরু দায়িত্ব মাথায় নিয়াই শ্যামাচরণের কর্ম্মজীবনের সূচনা হয়।

উত্তরকালে অসামান্য যোগবিভূতির অধিকারী হইয়াও লাহিড়ী মহাশয় পরম নির্লিপ্তির সহিত সংসারাত্মকের অনেক কিছু দায়িত্ব স্বচ্ছন্দে পালন করিয়া গিয়াছেন। বহিরঙ্গ জীবনের হাসিকান্না ও কর্ম্মচাক্ষুর মধ্যে যোগীজীবনের প্রশান্তিকে অবলীলায় ধারণ করিয়া রাখিয়াছেন।

উত্তরভারতের নানা স্থানে কাজ করিতে করিতে শ্যামাচরণ সেবার দানাপুরে বদলী হন। তখন তাঁহার বয়স তেত্রিশ বৎসরের বেশী নয়। এই সময়েই হঠাৎ রাণীক্ষেতে কর্ম্ম উপলক্ষে তাঁহাকে আসিতে হয়। ভগবৎ-কৃপার অমৃতভাণ্ডখানি হাতে নিয়া জন্মান্তরের গুরুদেব আকস্মিকভাবে তাঁহার সম্মুখে আবির্ভূত হন।

লাহিড়ী মহাশয় তাঁহার গুরুজীকে 'বাবাজী' বলিয়া অভিহিত করিতেন। অপরিমেয় সাধনশক্তি ও যোগবিভূতির অধিকারীরূপে এই জীবমুক্ত মহাপুরুষের খ্যাতি ছিল। কোন কোন সাধক ইঁহাকে 'ত্ৰ্যম্বক বাবা', কেহ বা 'শিব বাবা' বলিয়াও সম্বোধন করিতেন। এই মহাযোগীকে কেন্দ্র করিয়া হিমাচল অঞ্চলে ও সমগ্র উত্তর ভারতে বহু অলৌকিক কাহিনী প্রচলিত ছিল। বয়স শতাধিক বৎসর অতিক্রান্ত

যোগী শ্রীশ্যামাচরণ লাহিড়ী

হইলেও যোগবলে এই মহাত্মা স্থির-যৌবন মূর্তি রক্ষা করিতে সমর্থ ছিলেন, যোগেশ্বর মহাপুরুষরূপে উচ্চকোটি সাধক সমাজে ছিল তাঁহার অসামান্য প্রতিষ্ঠা।

লাহিড়ী মহাশয়ের গুরুকৃপা লাভের মূলে প্রধানতঃ ছিল তাঁহার পূর্ব জন্মের সঞ্চিত সাধনা, জন্মান্তরের অজিত মহাসম্পদ। শিষ্যের পূর্ব স্মৃতি উদ্বোধনের জন্য গুরু তাই বরাবর বলিতে লাগিলেন, “শ্যামাচরণ, ইয়ে তো তুমহারি অপনি চীজ হ্যায়”—অর্থাৎ, এ যে তোমারই নিজস্ব সম্পদ।

প্রথম সাক্ষাতের পরদিনই লাহিড়ী মহাশয় যোগীবরের পাহাড়ের কাছে তাঁবু ফেলিলেন। অফিসের সামান্য যাহা কিছু কাজ থাকিত এখান হইতেই তাহা সারিতেন। তারপর রোজ উপস্থিত হইতেন বাবাজীর গুহায়। সারাদিন তাঁহার পবিত্র সঙ্গলাভের পর দিনান্তে তাঁহারই দেওয়া যৎসামান্য আহাৰ্য্য সেখানে বসিয়া গ্রহণ করিতেন।

গুরু একদিন কহিলেন, “শ্যামাচরণ, দীক্ষাবীজ রোপণ না করলে পরম প্রাপ্তি হয় না। এবার সেই দীক্ষা আমি তোমায় দেব। লগ্ন এসে গিয়েছে।” দিন স্থির হইল। আগের দিন লাহিড়ী মহাশয় দেখিলেন, গুহার এক-প্রান্তে একটি মাটির পাত্র ঢাকা অবস্থায় রহিয়াছে। যোগী কহিলেন, “বাবা এর ভেতর যা আছে সবটা গলাধঃকরণ করে ফেল।”

পাত্রটি খুলিয়া দেখা গেল, কোন তৈলজাতীয় পদার্থে উহা পূর্ণ। লাহিড়ী মহাশয় ভাবিলেন, হয়তো ভুলবশতঃ এই পাত্রে কেহ তেল রাখিয়া থাকিবে। তাঁহাকে ইতস্ততঃ করিতে দেখিয়া বাবাজী হুকুম দিলেন, “আরে কেয়া দেখতে হো, সব পি ডালো।”

আর বিলম্ব না করিয়া লাহিড়ী মহাশয় সবটাই একেবারে উদরস্থ করিয়া ফেলিলেন।

পাহাড়ের নিকটেই গগাস নদী। যোগীবর আদেশ দিলেন—
“বাবা, এবারে তোমায় নদী সৈকতে গিয়ে পড়ে থাকতে হবে।”

আদেশ পালিত হইল। নদী তীরে পৌছবার সঙ্গে সঙ্গে শুরু হইল অনবরত ভেদ ও বমন। লাহিড়ী মহাশয় অত্যন্ত দুর্বল হইয়া পড়িলেন।

নদীতট কঙ্কর ও বালুকায় আচ্ছন্ন। এখানে শুইয়া থাকিয়াও নিস্তার নাই, হঠাৎ খরশ্রোতা গিরি-নদীতে নামিয়া আসিল তীব্র প্লাবন। অসুস্থ শরীরে, শ্রোতের টানে তিনি অনেক দূর ভাসিয়া গেলেন। শ্রোতের সহিত অবিরত যুঝিয়া লাহিড়ী মহাশয় মৃতকল্প হইয়া পড়িলেন।

ক্লান্ত অবসন্ন দেহখানি অতিকষ্টে টানিয়া নিয়া পরদিন প্রভাতে তিনি বাবাজীর সহিত দেখা করিতে গিয়াছেন। বাবাজী পরম উৎসাহে কহিলেন, “শ্রামাচরণ, বেশ ভালই হয়েছে। যত কিছু ময়লা ছিল সব এবার দূর হয়ে গেল।”

অতঃপর লাহিড়ী মহাশয়কে প্রচুর পরিমাণে গরম গরম পুরীহালুয়া ভোজন করানো হইল। ভোজন শেষে বাবাজী জানাইয়া দিলেন, “শ্রামাচরণ আজ সন্ধ্যাকালে পবিত্র ও শুভলগ্ন রয়েছে। আজই তোমায় দীক্ষা দেব।”

যথাসময়ে দীক্ষা সম্পন্ন হইয়া গেল। একদিকে উপযুক্ত অধিকারী শিষ্য, অপরদিকে কৃপাবর্ষণে উন্মুখ মহাশক্তিধর সৎগুরু—এ যেন মণিকাঞ্চন সংযোগ। বিস্ময়কর দ্রুততার সহিত লাহিড়ী মহাশয় এ সময়ে যোগসাধনার পদ্ধতিসমূহ আয়ত্ত করিয়া ফেলেন। গুরুশক্তিতে উদ্দীপিত নবীন সাধক অতীন্দ্রিয় রাজ্যের নানা দুর্লভ অনুভূতি এসময়ে লাভ করিলেন।

ইতিমধ্যে কয়েকদিন গত হইয়াছে। বাবাজী মহারাজ সোদিন শিষ্যকে স্নেহালিঙ্গন দিয়া কহিলেন, “বেটা তোমায় আরো বেশ কিছুকাল সংসারাত্রমে বাস করতে হবে। মানব-কল্যাণের জন্ত যোগ-সাধনার প্রচার আবশ্যিক, আর এ কাজে বিশিষ্ট আচার্য্যরূপে তোমার এক গুরুত্বপূর্ণ ভূমিকা রয়েছে। কিন্তু বেটা, এবার যে তোমার রাণী-ক্ষেতে থাকা আর চলবে না, পূর্বেরকার কর্মস্থলে ফিরে যেতে হবে।”

যোগী শ্রীশ্যামাচরণ লাহিড়ী

আসন্ন বিচ্ছেদের কথা শুনিয়া লাহিড়ী মহাশয়ের চোখে অশ্রু নামিয়া আসিল। গুরু আশ্বাস দিয়া কহিলেন, “শ্যামাচরণ তুমি দুঃখ করো না। আর শোন। প্রয়োজনমত যখন তুমি আমার স্মরণ করবে, তখনই আমার সাহায্য পাবে—একথা নিশ্চয় জেনো।”

নবীন যোগী সেদিন সদগুরুর চরণে নিবেদন করিলেন এক বিশেষ প্রার্থনা। আপন মোক্ষের স্বপ্নের সাথে জাগিল জগৎ হিতের কথা, যুক্তকরে কহিলেন, “বাবা আমার একান্ত অনুরোধ, ত্রিতাপক্লিষ্ট, স্বপ্নায়ু মানবের কাছে আপনার এই দুর্লভ যোগসাধনকে সহজলভ্য করে দিন। দিব্য করুণার ধারাকে ছাড়িয়ে দিন আমাদের জীবন-মরুতে।”

বাবাজী মহারাজ উত্তরে কহিলেন, “বেটা, ঐশী কৃপা ধারণ করার জন্য চাই ক্ষেত্রের প্রস্তুতি। সমাজের ভেতরে থেকে এ প্রস্তুতিতে তুমি সাহায্য কর।”

উত্তরকালে সার্থক যোগী শ্যামাচরণ লাহিড়ীর মাধ্যমে এই কৃপার ধারা বহু ভাগ্যবানের জীবনে বিস্তারিত হইয়াছিল।

বাবাজী একদিন লাহিড়ী মহাশয়কে ডাকিয়া কহিলেন, “শ্যামাচরণ, সময় হয়েছে, প্রস্তুত হও। এবার তোমার বদলীর নির্দেশ আসছে। তোমায় রাণীক্ষেত্র ত্যাগ করতে হবে?”

বড় মর্ম্মস্তিক এই কথা। শ্যামাচরণের দুই চোখে অশ্রুধারা নামিয়া আসিল। গুরুজীর কাছে তিনি আত্মসমর্পণ করিয়াছেন, সারা অস্তিত্ব আজ তাঁহারই চরণে হইয়াছে কেন্দ্রীভূত। কোন্ প্রাণে তাঁহাকে ছাড়িয়া যাইবেন? তাছাড়া, সাধন-সম্পদই বা এমন কি ইতিমধ্যে লাভ করিয়াছেন? কিছু তিনি পান নাই। সম্মুখে রহিয়াছে মাত্র গুটিকয়েক দিন। ইহারই মধ্যে নূতন জীবনের পাথেয়টুকু সঞ্চয় করিয়া নেওয়া চাই।

শক্তিধর গুরু যোগসিদ্ধির অনেক কিছু ঐশ্বর্য্য এ সময়ে অকুপণ করে ঢালিয়া দেন, আত্ম-নিবেদিত শ্যামাচরণ অপূর্ব্ব নিষ্ঠার সহিত তাহা গ্রহণ করেন।

রোজকার সাধনা ও যোগক্রিয়া শেষ হইলে লাহিড়ী মহাশয় গুরুর চরণে আসিয়া বসেন, যোগ-রাজ্যের নানা সাধনরহস্য শ্রবণ করেন। যোগীজীবনের বিচিত্র কাহিনী এক একদিন তাঁহাকে বিস্ময়ে অভিভূত করিয়া ফেলে। সিদ্ধ যোগী মহাত্মাদের লীলাভূমি এই পবিত্র হিমালয়। প্রতি শৃঙ্গে, প্রতি কন্দরে ইহার অধ্যাত্মলোকের কত নিগূঢ় ধন সঞ্চিত রহিয়াছে তাহার পরিমাপ কে করিবে !

বাবাজী মহারাজের মুখ হইতে শ্যামাচরণ এ সময়ে স্থানীয় এক মহাযোগীর কথা শ্রবণ করিয়া বিস্মিত হন —

দ্রোণগিরির এই জনমানবহীন গুহা হইতে মাইল পাঁচেক দূরে দেখা দেয় এক সুপ্রাচীন জীর্ণ দেবালয়। স্থানটি এক সিদ্ধ মহাপুরুষের বিচরণ ক্ষেত্র। সাধু-সন্ন্যাসীদের মতে, এই যোগসিদ্ধ মহাপুরুষের বয়সের নাকি কোন হিসাব নাই। স্থানীয় অধিবাসীরা বলে—এই মহাত্মা দ্রোণগিরির অভিভাবক, পৌরাণিক আমলের অমর মানুষ, ‘অশ্বখামা’ নামেও অনেকে এ রহস্যময় মহাপুরুষকে অভিহিত করে।

কাঠের খড়ম পায়ে, গভীর রাত্রে ইনি খট্ খট্ শব্দে একবার করিয়া পূর্বোক্ত ভগ্ন দেবালয়ে প্রবেশ করেন, দিব্য দেহ-জ্যোতিতে চতুর্দিক আলোকিত হইয়া উঠে।

যোগসাধন-পথের নূতন পথিক, কোতূহলী লাহিড়ী মহাশয়কে গুরুজী এক নিশীথে দূর হইতে এই মহাত্মার দেহজ্যোতি দর্শনও করাইয়াছিলেন।

বাবাজী মহারাজ বলিতেন, “এখানকার অনেকে মৃতকল্প রোগীদের এই মহাত্মার কুপার উপর নির্ভর করে পাহাড়ে ফেলে রেখে যায়। তাঁর কুপা-দৃষ্টিপাতে তারা বেঁচে উঠে।”

লাহিড়ী মহাশয় নিজেও একদিন ইহার কিছু পরিচয় পান—।

একদিন দুই তিনজন সাধুর সহিত তিনি ভ্রমণে বাহির হইয়াছেন। পথ চলিতে চলিতে একজন সঙ্গী হঠাৎ অরণ্যের এক বিষাক্ত ফল খাইয়া পীড়িত হইয়া পড়ে। প্রবল ভেদবমি দেখা দেয়। এদিকে রাত্রির

যোগী ত্রিশামাচরণ লাহিড়ী

অন্ধকার ধীরে ধীরে ঘনাইয়া আসিতে থাকে। এ আকস্মিক বিপদে সকলে হতবুদ্ধি হইয়া পড়িলেন।

সম্মুখেই মহাত্মা ‘অশ্বখামা’র ভগ্ন দেউলের চূড়া। অপর কোন উপায় না দেখিয়া তাঁহারা দ্রোণগিরির ঐ রহস্যময় মহাপুরুষের আশ্রয়েই সাধুটিকে রাখার সিদ্ধান্ত করিলেন। সে তখন মৃত্যুপথের যাত্রী। সকলে ধরাধরি করিয়া আনিয়া জরাজীর্ণ দেউলের এক পাশে শোয়াইয়া রাখিলেন।

সাধুটি কিন্তু পবদিনই সম্পূর্ণরূপে সুস্থ হইয়া আশ্রমে ফিরিয়া আসে। তাহার মুখে পর্বতশীর্ষচাবী মহাত্মার কৃপা কাহিনী শুনিয়া লাহিড়ী মহাশয়ের বিস্ময়ের সীমা রহিল না।

মৃতকল্প সাধুটি জীবন সম্বন্ধে হতাশ হইয়া পড়িয়া আছে, এমন সময় রহস্যময় পুরুষ সেখানে আবির্ভূত হন, বোধকষায়িত নেত্রে গর্জন করিয়া বলেন, “এখানে কে রে তুই?”

সঙ্গে সঙ্গেই আসে প্রচণ্ড পদাঘাত! এ আঘাতের ফলে রোগী গড়াইতে গড়াইতে সন্নিহিত নিম্ন ভূমিতে পড়িয়া যায়। কিন্তু মহা আশ্চর্যের কথা, কিছুকাল পরেই তাহার দেহে নব বসের সঞ্চার হইতে থাকে। তারপর পায়ে হাঁটিয়া সে নীচে চলিয়া আসে।

দ্রোণগিরি অঞ্চলের এইসব সিদ্ধ-যোগীদের লীলাকাহিনী নবীন সাধক লাহিড়ী মহাশয়ের চেতনায় প্রচণ্ডভাবে নাড়া দেয়, অতীন্দ্রিয় রাজ্যের নানা কাহিনী, নানা অলৌকিক তত্ত্ব শুনিয়া তিনি আরও উদ্বুদ্ধ হইয়া ওঠেন।

এ সময়ে চমকপ্রদ যোগবিভূতি দেখাইয়া ছ-একজন গুরুভ্রাতাও তাঁহাকে কম বিস্মিত করেন নাই।

একদিন লাহিড়ী মহাশয় তাঁহার এক গুরুভ্রাতা ও কয়েকটি সাধুসহ পার্বত্য নদী গগাস-এর অপর পারে শৌচাদির জন্ত গিয়াছেন। ফিরিতে সেদিন তাঁহাদে বেশ দেৱী হইয়া গেল। ইতিমধ্যে প্রবলবেগে নদীতে হড়কা বান আসিয়া পড়ে, ছই কুলের বিস্তীর্ণ অঞ্চল প্লাবিত

হইয়া যায়। তরুণ সাধকেরা প্রমাদ গণিলেন, তাই তো এ জলোচ্ছ্বাস অতিক্রম করা যে অসম্ভব।

গুরুভ্রাতাদের একজন ছিলেন অষ্টসিদ্ধিপ্রাপ্ত যোগী। মন্তক হইতে তাড়াতাড়ি পাগড়ীটি খুলিয়া নিয়া তিনি এ সময়ে এক অলৌকিক কাণ্ড করিয়া বসিলেন। পাগড়ীটি জলের মধ্যে নিক্ষেপ করিয়া সঙ্গীদের কহিলেন, “তোমরা এক মুহূর্ত দেৱী না করে এর ওপর হাত রেখে একে একে অপর পারে চলে যাও।”

সঙ্গীরা অগোণে জলে নামিয়া পড়িলেন। শক্তি সঞ্চারিত এই ভাসমান বস্ত্রখণ্ড ধারণ করিয়াই সেদিন সকলে নদীর অপর পারে আসিয়া পৌঁছিলেন।

উত্তরকালে লাহিড়ী মহাশয়ের মুখে সেদিনকার এ ঘটনাটির বর্ণনা শোনা যাইত।

ঐ অলৌকিক বস্ত্র-সেতুর রহস্য সম্বন্ধে সেদিন তিনি গুরুদেবকে প্রশ্ন করিয়াছিলেন। উত্তরে তিনি বলিয়াছিলেন, “বেটা, এতে বিস্ময়ের কিছু তো নেই। অষ্টসিদ্ধি পেয়েছে বলেই তোমার ঐ গুরুভাই এ যোগসামর্থ্য অর্জন করেছে। আমার নির্দেশিত সাধনপন্থা অনুসরণ করলে তুমিও অতি সহজে এ ধরনের যোগবিভূতি লাভ করতে পারবে। লাহিড়ী মহাশয় পরে বুঝিয়াছিলে গুরুভ্রাতার চমকপ্রদ বিভূতি প্রকাশের মধ্য দিয়া গুরুদেব সেদিন তাঁহার অন্তরে উদ্দীপনার সঞ্চার করিতে চাহিয়াছিলেন।

গুরুভ্রাতাদের কাছে বসিয়া নবীন যোগী এই সময়ে বাবাজী মহারাজের যোগ বিভূতির নানা কাহিনী শুনিতেন। জ্যোৎস্নাভিতে থাকিতে তিনি নিজেও ইহার কিছু কিছু পরিচয় পাইয়াছিলেন।

রাণীক্ষেতের সন্নিহিত অঞ্চলের এক ধনী ব্যবসায়ী ছিলেন বাবাজী মহারাজের ভক্ত। একদিন তিনি বাবাজী ও অন্যান্য বহু সংখ্যক সাধুকে ভোজনের নিমন্ত্রণ জানান। এই শেঠজী বাবাজী মহারাজের স্নেহভাজন। কিন্তু তাঁহার ধনাভিমান বড় প্রবল ছিল। বাবাজী

মহারাজ ঠিক করিয়াছেন, সেদিন তাঁহার গর্ব চূর্ণ না করিয়া তিনি ছাড়িবেন না। তিনি জানাইয়া দিলেন, নূতন শিষ্য লাহিড়ী মহাশয়কে সঙ্গে লইয়া তিনি নিমন্ত্রণে যাইতেছেন। কথা রহিল, অগ্ণাশ্রু অতিথিদের পূর্বেই তিনি শিষ্য উপস্থিত হইবেন, কিন্তু পৌছানোমাত্রই তাঁহাদিগকে ভোজন করাইতে হইবে। বিলম্ব করা চলিবে না।

যথাসময়ে গুরু ও শিষ্য নিমন্ত্রণকারী শেঠের গৃহে পৌঁছিলেন। ভোজনে বসিয়া লাহিড়ী মহাশয় যে দৃশ্য দেখিলেন তাহাতে তো তাঁহার চক্ষুস্থির! মিতাহারী গুরুদেবের আজ যেন সর্বগ্রাসী ক্ষুধা জন্মিয়াছে। চাঙারি ভর্তি পুরী, মালপোয়া, হালুয়া আসিতেছে আর প্রাপ্তি মাত্রই তিনি তাহা গলাধঃকরণ করিতেছেন। সঙ্গে সঙ্গে বলিতেছেন, “অওর কুছ?”

ক্রমে শেঠজীর মুখ শুকাইয়া উঠিল। অগ্ণাশ্রু নিমন্ত্রিত সাধুসন্ত সবাই ইতিমধ্যে আসিয়া পড়িয়াছেন। তাঁহাদের সেবা কি দিয়া চলিবে? ভোজ্যদ্রব্য পর্যাপ্ত পরিমাণেই প্রস্তুত করা হইয়াছে, কিন্তু তাহার সবটাই যে প্রায় ফুরাইয়া আসিল।

শেঠজী কাতরভাবে এবার বাবাজী মহারাজের শরণ নিলেন। লাহিড়ী মহাশয়ও বলিতে লাগিলেন, “গুরুজী, আপনি কি লোকটার সর্বনাশ করে ফেলতে চান? এখন দয়া করে তাড়াতাড়ি উঠে পড়ুন।”

ভোজন শেষে পাত্র ত্যাগ করিতে গিয়া বাবাজী বলিলেন, “ক্ষমতা তো এতটুকু—অথচ লোকটার গর্ব কম নয়। কি পরিমাণ আহাৰ্য্য সে যোগাড় করতে পারে, তা পরখ করে দেখবার আজ আমার ইচ্ছে হয়েছিল।”

আশ্রিত শিষ্যদের শিক্ষা ও শাসনের ব্যাপারে বাবাজী মহারাজের সতর্কতার সীমা ছিল না। অনেক সময় অত্যন্ত কঠোরভাবে তাহাদের সাধন-জীবনকে তিনি নিয়ন্ত্রিত করিতেন। ক্রটি-বিচ্যুতির জগ্রে শিষ্যদিগকে ধুনির অলস কাঠ দিয়া প্রহার করিতেও তাঁহার বিধা

ছিল না। জোণগিরিতে থাকাকালে লাহিড়ী মহাশয় স্বচক্ষে গুরুজীর এই ধরনের রুদ্ররোষ ছ-একবার দেখিয়াছিলেন।

ইতিমধ্যে সামরিক পূর্তবিভাগ হইতে সংবাদ আসিয়া গেল। কর্তৃপক্ষ ভ্রম সংশোধন করিয়া তার পাঠাইয়াছেন, শ্যামাচরণ লাহিড়ীর আর রাণীক্ষেতে অবস্থানের প্রয়োজন নাই—অগৌণে তাঁহাকে দানাপুর অফিসে ফিরিতে হইবে।

গুরুর পদবন্দনা করিয়া শিষ্য এবার সাশ্রনয়নে জোণগিরি ত্যাগ করিলেন।

ফিরিবার পথে লাহিড়ী মহাশয় মোরাদাবাদ শহরে দুই-তিনদিন অতিবাহিত করেন। এই সময়ে এক বিচিত্র ব্যাপার ঘটে। তিনি তাঁহার কয়েকটি বাঙ্গালী বন্ধুর সঙ্গে বসিয়া নানা প্রসঙ্গ আলোচনা করিতেছেন। হঠাৎ ইহাদের মধ্যে একজন বলিয়া উঠিলেন—“যাই বল, এযুগে কিন্তু আগের দিনের মত অলৌকিক যোগবিভূতিসম্পন্ন সাধুর দর্শন মেলে না।”

শ্যামাচরণ দৃঢ়স্বরে তখনি প্রতিবাদ করিয়া উঠিলেন, “সে কি কথা! এমন মহাপুরুষের সাক্ষাৎলাভ আজকের দিনেও মোটেই অসম্ভব নয়। ইচ্ছা করলে ধ্যানবলে আকর্ষণ করে আমিই এখানে এনে দেখাতে পারি।”

বন্ধুদের কোতূহল ও আগ্রহের সীমা রহিল না। তাঁহারা লাহিড়ী মহাশয়কে চাপিয়া ধরিলেন। অনুরোধ এড়ানো বড় কঠিন, তাছাড়া নিজের যোগবল ও গুরুদেবের করুণার কথা তিনি কথা-প্রসঙ্গে নিজেরই প্রকাশ করিয়া ফেলিয়াছেন। মহাপুরুষের মর্যাদারক্ষার প্রশ্নটিও যে এখানে জড়িত।

তিনি বলিলেন, “আচ্ছা বেশ তোমরা আমাকে একটা নির্জন ঘর দাও। এর দরজা-জানালা সব বাইরে থেকে বন্ধ থাকবে। ধ্যানের ফলে আমার শ্রীগুরুদেব অবশ্য আবির্ভূত হবেন।”

যোগী শ্রীশ্যামাচরণ নাহিড়ী

জ্যোৎস্নাগিরিতে বাবাজী মহারাজের নিকট শ্যামাচরণ দীর্ঘদিন থাকিতে পারেন নাই। গুরু মহারাজের বিচ্ছেদ তাঁহার পক্ষে অসহ্য, তাই আসিবার কালে বড় কাতর হইয়া পড়েন। এসময়ে বাবাজী মহারাজ তাঁহাকে আশ্বস্ত করিয়া বলেন, “বেটা, তুমি ব্যস্ত হয়ো না। তুমি স্মরণ করিলেই আমি আবির্ভূত হবো।”

গুরুজীর এ প্রতিশ্রুতিই সেদিন ছিল নবীন যোগী শ্যামাচরণের একমাত্র ভরসা।

আজ তাই নির্জন প্রকোষ্ঠে বসিয়া সদগুরুকে তিনি আহ্বান জানাইলেন।

ধ্যানযোগে আকর্ষিত হইয়া বাবাজী মহারাজের স্মৃতিসত্তা অচিরে সেই গৃহে স্মলদেহ পরিগ্রহ করিল।

আসন গ্রহণ করিয়া মহাযোগী প্রশান্ত কণ্ঠে বলিয়া উঠিলেন, “শ্যামাচরণ, তোমার ডাক শুনে আমি এসেছি। কিন্তু বেটা সামান্য তর্কচ্ছলে, বন্ধুদের সাধু দেখাবার উৎসাহে তুমি আমাকে এতদূর থেকে আহ্বান করে আনলে? তামাসা দেখাবার জ্ঞানই কি দীক্ষাদান করে তোমাতে আমি শক্তি সঞ্চারিত করেছি? তোমায় যোগবিভূতির অধিকারী করে তুলেছি?”

নাহিড়ী মহাশয় সাষ্টাঙ্গে শ্রীগুরুর চরণে প্রণিপাত করিয়া ভীত-ভাবে উপবেশন করিলেন। তীব্র তিরস্কারের ফলে তাঁহার মুখে তখন কথা সরিতেছে না, নতমস্তকে সেখানে চুপচাপ বসিয়া রহিলেন। বুঝিলেন, মহাযোগীর কৃপাদত্ত শক্তির এ অপব্যবহার নিতান্ত অমার্জনীয়। তাঁহার পক্ষে একাজ সত্যই বড় গর্হিত হইয়াছে। তাছাড়া, সদগুরুর সদাজ্ঞাত দূরসন্ধানী দৃষ্টিকে কীকি দিবার সাধ্য তাঁহার কই?

বাবাজী মহারাজ দৃঢ় কণ্ঠে বলিলেন, “শোন শ্যামাচরণ, আমার নিজের প্রতিশ্রুতি ও তোমার সম্মান রক্ষার জ্ঞান আজ আমি উপস্থিত হলাম। কিন্তু ভবিষ্যতে তুমি নিজে স্মরণ করা মাত্র আমার সাক্ষাৎ পাবে না—আমিই প্রয়োজনবোধে স্বেচ্ছায় আবির্ভূত হব।”

গুরুদেবের চরণে পতিত হইয়া শ্যামাচরণ বারংবার ক্ষমা ভিক্ষা করিতে লাগিলেন। নিজের কৌতূহলে নয়, অবিশ্বাসীদের মনে বিশ্বাস জন্মাইবার জন্তই যে তিনি এরূপ কাজ করিয়াছেন! তাই মিনতি করিয়া বাবাজী মহারাজকে কহিতে লাগিলেন, “গুরুদেব, যদি কৃপা করে এসে পড়েছেন তো সকলকে একবার দর্শন দিয়ে কৃতার্থ করুন।”

বাবাজী মহারাজের ইঙ্গিতে কক্ষের দ্বার উন্মুক্ত করা হইল। বন্ধুগণ বাহিরে তখনো অপেক্ষমাণ আছেন। যোগীবরের এ অলৌকিক আবির্ভাব দর্শনে সেদিন তাঁহাদের বিশ্বয়ের অবধি রহিল না। সকলে চরণ স্পর্শ করিয়া প্রণাম করিলেন—এ আবির্ভাব যে ইন্দ্রজাল নয়, কোন মায়িক দেহের উপস্থিতি নয়, এ সত্যও তাঁহারা উপলব্ধি করিলেন।

এবার কৃপালু গুরুজী মহারাজকে তো ভোগ নিবেদন করা চাই। শ্যামাচরণ শুদ্ধভাবে তখনি লুচি হালুয়া তৈয়ার করিয়া আনিলেন। বাবাজী মহারাজের ভোজনের পর সকলকে প্রসাদ বিতরণ করা হইল।

লাহিড়ী মহাশয় দানাপুরে ফিরিয়া আসিয়া কাজে যোগদান করিলেন। বাবাজী মহারাজের প্রদত্ত যোগসাধনাই এখন তাঁহার প্রধান অবলম্বন। মহাযোগীর কৃপাস্পর্শে আজ তাঁহার জীবনে দেখা দিয়াছে নূতনতর আনন্দ, নূতনতর আলোকের সন্ধান। অধ্যাত্ম-জীবনের শতদলখানি এবার ধীরে ধীরে উন্মোচিত হইয়া উঠিতেছে।

অফিসের দৈনন্দিন কাজকর্মের শেষে নীরবে লোকচক্ষুর অন্তরালে তিনি যোগসাধনায় নিমজ্জিত থাকিতেন। সহকর্মীদের মধ্যে অনেকেরই পক্ষে সেদিন তাই এ মহাসাধকের প্রকৃত পরিচয় জানা সম্ভব হয় নাই। আত্মভোলা, সদাত্মীয় লাহিড়ী মহাশয়ের কৃপান্তরের স্বরূপ তাঁহারা বুঝিতেন না। সত্য—কিন্তু অনেকেই তাঁহাকে এক প্রচ্ছন্ন সাধক বলিয়া ধরিয়া নিতেন।

অফিসের উপরওয়াল সাহেব এই উদাসীন কর্মচারীটিকে আদর করিয়া ডাকিতেন—‘পাগলা বাবু।’

একবারকার ঘটনায় শ্যামাচরণের অলৌকিক যোগবিভূতি কিছুটা প্রকাশিত হইয়া পড়ে। অফিসের সাহেবকে কয়েকদিন যাবৎ বড় বিষণ্ণ দেখা যাইতেছিল। শ্যামাচরণ তাঁহাকে ইহার কারণ জিজ্ঞাসা করিলেন। উত্তরে শুনিলেন মেমসাহেব ইংলণ্ডে খুব গুরুতর রোগে পীড়িতা, তাঁহার প্রাণরক্ষা হওয়া কঠিন। তাছাড়া, কিছুদিন যাবৎ দেশ হইতে কোন সংবাদ পাওয়া যায় নাই, এজন্য সাহেব বড়ই চিন্তায় পড়িয়াছেন।

লাহিড়ী মহাশয়ের অন্তর করুণায় ভরিয়া উঠিল। আশ্বাস দিলেন, আজই তিনি মেমসাহেবের সংবাদ আনিয়া দিবেন।

অধীনস্থ কর্মচারীর এ ধরনের কথা সাহেব সহজে বিশ্বাস করিতে চাহিবেন কেন? তবুও এ সমবেদনার সুরটুকু কি জানি কেন তাঁহার অন্তর স্পর্শ করে। উদাস নেত্রে লাহিড়ী মহাশয়ের দিকে চাহিয়া তিনি শুধু চুপ করিয়া বহিলেন।

অফিসের এক নির্জন কক্ষে গিয়া শ্যামাচরণ ধ্যানাবিষ্ট হইলেন। কিছুক্ষণ পরে বাহিরে আসিয়া সাহেবকে জানাইয়া দিলেন, তাঁহার স্ত্রী আরোগ্যলাভ করিয়াছেন এবং শীঘ্রই তিনি স্বহস্তে সাহেবকে এক পত্র লিখিতেছেন। শুধু তাহাই নয়, তিনি এই পত্রের ভাষা ও বিষয়বস্তুও বলিয়া দিলেন।

ভারতীয় যোগীদের নানা অলৌকিক বিভূতির কথা সাহেব শুনিয়াছেন। কিন্তু তাঁহার অফিসের ‘পাগলা বাবু’ যে সেই শক্তির অধিকারী তাহা সহজে মানিয়া নিতে মন যায় দিবে কেন? তবুও শ্যামাচরণের বাক্যে সেদিন তাঁহার মনের চাঞ্চল্য অনেকটা দূর হইয়া গেল।

কয়েকদিন পরেই মেমসাহেবের চিঠি আসিয়া উপস্থিত। লাহিড়ী মহাশয়ের বর্ণিত ভাষার সহিত ইহার আশ্চর্য মিল দেখিয়া সাহেব বিস্মিত হইয়া গেলেন।

কয়েক মাস পরের কথা। উপরোক্ত অফিসারের স্ত্রী ইংলণ্ড হইতে দানাপুরে আসিয়াছেন। হঠাৎ একদিন লাহিড়ী মহাশয়কে দেখিয়া এই ইংরেজ মহিলার বিস্ময়ের সীমা রহিল না। স্বামীকে তাড়াতাড়ি ডাকিয়া কহিলেন, “ওগো, এ মহাত্মাকেই যে ইংলণ্ডে থাকতে আমি দর্শন করেছি, আমার রোগ শয্যার পার্শ্বে ইনি দাঁড়িয়েছিলেন। জীবনের যখন কোন আশাই ছিল না, তখন ঐরই কৃপায় অলৌকিকভাবে আমার রোগমুক্তি ঘটেছে—আমার এই জীবন আবার ফিরে পেয়েছি।”

‘পাগলা বাবু’র এ অপূর্ব যোগবিভূতির কথা শুনিয়া সাহেব স্তম্ভিত হইয়া গেলেন।

একের পর এক যোগসাধনার স্তর ভেদ করিয়া লাহিড়ী মহাশয় অগ্রসর হইয়া চলিয়াছেন। গুরুর কৃপায় নানা অধ্যাত্ম অনুভূতি ও প্রচুর যোগৈশ্বর্য লাভও তাঁহার হইতেছে। গুরুশক্তিতে শক্তিমান সাধকের ঘটিতেছে দ্রুত রূপান্তর।

কিছুদিনের মধ্যে শীঘ্রই একবার প্রিয় শিষ্যের প্রয়োজনে বাবাজী মহারাজকে স্বেচ্ছায় আবিভূত হইতে হইল।

নিভগৃহের সম্মুখে লাহিড়ী মহাশয় একদিন ঘুরিয়া বেড়াইতেছেন এমন সময় দেখিলেন, নিকটেই এক বটবৃক্ষমূলে বসিয়া এক সাধু গঞ্জিকা সেবন করিতেছে। চেহারাটি তাহার মোটেই আকর্ষণীয় নয়, বহির্বাস ছিন্ন ও অপরিষ্কৃত। দেখিলে সহসা ভক্তির উদ্বেক তো হয়ই না, বরং মনে নানা প্রকার সন্দেহই জাগিয়া উঠে। আগেকার দিনে এ শ্রেণীর সাধু দেখিলে লাহিড়ী মহাশয় প্রবঞ্চক অথবা চোর বদমায়েস বলিয়াই মনে করিতেন।

কিন্তু এ আবার কি বিস্ময়কর ব্যাপার। তিনি কি জাগ্রত, না স্বপ্ন দেখিতেছেন? নিকটে গিয়া দেখিলেন, তাঁহার পূজ্যপাদ গুরুদেবই সেখানে বসিয়া নির্ভার সহিত ঐ কুদর্শন গঞ্জিকাসেবী সাধুটির লোটা মাজিতেছেন।

যোগী শ্রীশ্যামাচরণ লাহিড়ী

বাবাজী মহারাজ এখানে ? দানাপুরে তিনি কবে, কি উপলক্ষে আসিলেন ? এ শোচনীয় অবস্থাই বা তাঁহার কেন ? নিকটে গিয়া শ্যামাচরণ সাষ্টাঙ্গে প্রণত হইলেন ।

সখেদে বাবাজীকে প্রশ্ন করিলেন, “বাবা একি কাণ্ড ! আপনি কেন এমনতর হীন কাজে লিপ্ত হয়েছেন ? এ গঞ্জিকাসেবী সাধুটিই বা কে ?”

হাতের লোটা ঘষিতে ঘষিতে গুরুজী প্রশান্ত কণ্ঠে উত্তর দিলেন, “শ্যামাচরণ, আমি যে সাধু সেবা করছি । সকল ঘটেই আমার নারায়ণ বিরাজমান । তুমি তাঁর এই সর্বব্যাপী চৈতন্যময় রূপটি আবিষ্কার করতে চেষ্টা করছো না কেন, বলতো ?”

লাহিড়ী মহাশয়ের বৃষ্টিতে দেৱী হইল না, সর্ব জীবে ও সর্ব ভূতে পরিব্যাপ্ত পরমাত্মার অস্তিত্বটি তাঁহার চেতনায় জাগাইয়া তুলিতেই সৎগুরুর এ অপরূপ লীলা । যোগী-শিষ্যকে মহাপ্রেমিকরূপে রূপান্তরিত করিতে তিনি চাহিতেছেন । শ্যামাচরণের চেতন ও অবচেতন মনে যে ভেদজ্ঞানটি এখনো সূক্ষ্মরূপে রহিয়া গিয়াছে বাবাজী মহারাজ আজ তাহাই নিশ্চিত করিয়া দিতে চান । লাহিড়ী মহাশয়ের সর্বসত্তায়, সর্বচৈতন্যে সেদিন তাই এক বিরাট আলোড়ন জাগিয়া উঠিল ।

বাবাজী মহারাজকে স্বগৃহে নিয়া গিয়া তিনি তাঁহার অভ্যর্থনা ও সেবা পরিচর্যা করিলেন । প্রয়োজনীয় সাধন-নির্দেশাদি দিবার পর গুরুদেব আর সেখানে অবস্থান করেন নাই ।

ইহার পর হইতেই লাহিড়ী মহাশয়ের দৃষ্টিভঙ্গিটি যেন একেবারে বদলাইয়া যায় । এখন হইতে সর্বজীবেই তিনি নারায়ণ দর্শন করিতে থাকেন । ছুষ্ঠ ও পাপিষ্ঠ লোককেও তিনি ঈশ্বরজ্ঞানে মনে মনে নমস্কার জানাইতে ভুলিতেন না । দর্শনার্থী ও ভক্তের দল প্রণাম করিলে শ্রদ্ধাভরে অমনি তিনি প্রত্যভিবাদন করিতেন ।

দানাপুরে থাকিতেই তিনি ধীরে ধীরে যোগাচার্য্যের ভূমিকায়

আত্মপ্রকাশ করিতে থাকেন। ছই-চারিটি করিয়া মুমুকু ভক্ত তাঁহার নিকট উপস্থিত হইতে থাকে। ইহাদের মধ্যে বৃন্দা ভকত নামক এক সিপাহীই তাঁহার প্রথম দীক্ষিত শিষ্য। যোগসাধনায় লাহিড়ী মহাশয়ের এই নিরঙ্কর শিষ্যটির কৃতিত্ব এ সময়ে অনেককেই বিস্মিত করিত।

একবার বাঁকিপুরের এক জমিদারগৃহে বিশিষ্ট শাস্ত্রজ্ঞ পণ্ডিতদের মধ্যে ধর্মতত্ত্ব বিষয়ক বিতর্ক চলিতেছে। বৃন্দা ভকতও সেদিন তাহার কয়েকজন সঙ্গীসহ সেখানে শ্রোতারূপে উপস্থিত। পণ্ডিতদের কতকগুলি ভ্রমাত্মক উক্তির প্রতিবাদ করিতে উঠিয়া সে হঠাৎ সেখানে ধর্মের মূল তত্ত্বের ব্যাখ্যা আরম্ভ করিয়া দেয়। এ ব্যাখ্যা সাধনলব্ধ অভূতভূতিতে পূর্ণ, উপলব্ধ সত্যের দীপ্তিতে উজ্জ্বল। নিরঙ্কর সিপাহীর সেদিনকার ভাষণ শুনিয়া পণ্ডিতমণ্ডলী নির্বাক হইয়া যান।

লাহিড়ী মহাশয়ের আশ্রমে থাকিয়া বৃন্দা ভকত পরবর্তীকালে এক সার্থকনামা যোগীরূপে পরিচিত হইয়া উঠে। যোগীশ্বরকে সে সময়ে প্রায়ই এ শিষ্য সম্বন্ধে সন্নেহে বলিতে শুনা যাইত, “বৃন্দা সচ্চিদানন্দ সাগরে ভাসছে।”

রাণীক্ষেতে যোগদীক্ষা গ্রহণের পর প্রায় পঁচিশ বৎসরকাল লাহিড়ী মহাশয়কে চাকুরীতে থাকিতে হয়। কস্মোপলক্ষে যখন যেখানে তিনি থাকিতেন, ছই-চারিজন প্রকৃত অধিকারী পুরুষকে গৃঢ় যোগসাধন প্রদান করিতেন। এই সময়ে বিহারের মুন্সের ও ভাগলপুর, এবং বাংলার বিষ্ণুপুর, বাঁকুড়া ও কৃষ্ণনগর অঞ্চলে একদল সাধনকামী শিষ্য তাঁহার আশ্রয় প্রাপ্ত হন।

কালীধামে তখন ত্রৈলোক্য স্বামীজীর যোগৈশ্বর্যের প্রচুর খ্যাতি। স্থানীয় জনসাধারণ ও তীর্থকামীদের নিকট তিনি অভূতপূর্ব শ্রদ্ধা পাইয়া থাকেন।

স্বামীজী মহারাজ সেদিন গঙ্গার ঘাটে আসন করিয়া বসিয়াছেন।

স্বভাবগন্তীর যোগীবরকে ঘিরিয়া একদল ভক্ত নীরবে উপবিষ্ট। এই সময়ে ধুতি-পাঞ্জাবি পরিহিত এক বাঙালী ভদ্রলোক দুইজন সঙ্গীসহ তাঁহাকে প্রণাম করিতে আসিলেন।

আগন্তকের চোখ-মুখ এক দিব্য আনন্দের আভায় ঝলমল। ধীর গন্তীর পদক্ষেপে তাঁহাকে অগ্রসর হইতে দেখিয়া ত্রৈলোক্য স্বামীজী সহর্ষে উঠিয়া দাড়াইলেন। যোগ-সাধনার মূর্ত মৈনাক পাহাড়টি কোন্ ইন্দ্রজাল বলে হঠাৎ সচল হইয়া উঠিল।

আগাইয়া আসিয়া আগন্তককে তিনি তাঁহার বিশাল বক্ষে ধারণ করিলেন। যোগীশ্রেষ্ঠ ত্রৈলোক্য মহারাজের সর্বদেহে তখন আনন্দের আবেগ ধারা উচ্ছলিত হইয়া উঠিয়াছে। আগন্তক বাঙালী ভদ্রলোকটি কিছুক্ষণ তাঁহার সান্নিধ্যে রহিলেন, তারপর শ্রদ্ধাভরে প্রণাম করিয়া সদনবলে বিদায় নিলেন।

ত্রৈলোক্য স্বামীজীর অন্তরঙ্গ ভক্তগণ এতক্ষণ বিস্মিত হইয়া এই অপূর্ব দৃশ্য দেখিতেছিলেন। এই গৃহী ভদ্রলোকটির অভ্যর্থনায় স্বামীজীর যেন উল্লাসের সীমা নাই। এমন হর্ষভরে তাঁহাকে কখনও কাহাকেও তো প্রেমালিঙ্গন দিতে দেখা যায় নাই! এমন অদ্ভুত ঘটনা তাঁহারা খুব কমই প্রত্যক্ষ করিয়াছেন।

আগন্তকগণ চলিয়া গেলে সকলে উৎসুক হইয়া জিজ্ঞাসা করিলেন, “বাবা, ইনি এমন কি বড় সাধক যে, আপনি এত উৎসাহের সঙ্গে সম্বর্ধনা জানাচ্ছিলেন?”

স্বামীজী প্রশান্তকণ্ঠে উত্তর দিলেন, “যোগ সাধনাকি যিস্ উন্নতি করনেকে লিয়ে সাধকৌকো লেঙাটিতক্ ছোড়নী পড়ী হায়, গৃহস্থীনে রহতে ছয়েভী ইস্ পুরুষনে উস্ পদবীকো প্রাপ্ত কর লিয়া।”— অর্থাৎ, যে যোগসিদ্ধির জন্য সাধকদের লেঙাটিখানাও ত্যাগ করতে হয়, এ সাধক গৃহস্থাশ্রমে থেকেই তা আয়ত্ত করেছেন।

ভক্তবৃন্দ অতঃপর জানিতে পারিলেন, ইনি অসামান্য যোগবিভূতির অধিকারী সাধক—শ্যামাচরণ লাহিড়ী। ভারতের অন্যতম শ্রেষ্ঠ

যোগী 'বাবাজী মহারাজের' নিগূঢ় সাধন পদ্ধতি ইঁহার অধিগত ।
গৃহস্থাশ্রমে থাকিয়া প্রধানতঃ গৃহস্থদের মধ্যে যোগ সাধনার প্রচারই
ইঁহার প্রধান ব্রত ।

কাশীর অধ্যাত্ম-চক্রে সেদিন লাহিড়ী মহাশয়ের সম্বন্ধে গুঞ্জনধ্বনি
উঠে । যোগীশ্রেষ্ঠ মহাব্রহ্মজ্ঞ ত্রৈলোক্য স্বামীজীর এ স্বীকৃতি তাঁহাকে
সাধকসমাজের অগ্রতম নেতারূপে অচিরে পরিচিত করাইয়া দেয় ।

১৮৮৫ খৃষ্টাব্দে লাহিড়ী মহাশয় কল্যাণ হইতে অবসর গ্রহণ করেন ।
মহাসাধকের চরণোপান্তে এই সময় হইতেই দলে দলে বহু মুমুকুর
সমাগম হইতে থাকে । সিদ্ধযোগীর আচার্য্য জীবনের বৃহত্তর ভূমিকাটি
এ সময় হইতেই শুরু হয় ।

প্রধানতঃ সাধনেচ্ছু গৃহস্থ ব্যক্তিদের মধ্যেই লাহিড়ী মহাশয়
তাঁহার গুরুপ্রদত্ত যোগসাধনা বিস্তারিত করিতে থাকেন । বাবাজী
মহারাজ নির্দেশ দিয়াছিলেন, “শ্যামাচরণ তুমি সংসারে ফিরে যাও ।
সেখান থেকে যোগযুক্ত সাধু-গৃহস্থদের প্রতিষ্ঠিত কর, প্রাচীন
যোগসাধনার নিগূঢ় ধারাটিকে উজ্জীবিত করে তোল ।”

লাহিড়ী মহাশয় তাই চাহিতেন, শিষ্যগণ আধ্যাত্মিক পথে উন্নত
সাধন করিয়া যেন গৃহস্থাশ্রমেই বাস করে । সন্ন্যাস নিতে সাধনার্থীদের
প্রায়ই তিনি বারণ করিতেন । তাঁহাদিগকে সতর্ক করিয়া কহিতেন,
“সন্ন্যাস জীবন কিন্তু বড় কঠিন ও দায়িত্বপূর্ণ । তোমরা মনে রেখো,
সংসারশ্রমীর ভুল ভ্রান্তির কিছুটা হয়তো ক্ষমা আছে, কিন্তু সন্ন্যাসীর
ভুলের কোন ক্ষমা নেই ।”

এইসব গৃহী ভক্ত ও শিষ্য ছাড়া লাহিড়ী মহাশয়ের সর্বভ্যাগী
ব্রহ্মচারী এবং দণ্ডী সন্ন্যাসী শিষ্যও কম ছিল না ।

‘কাশীর বাবা’ বা ‘যোগীরাজ’রূপে অতঃপর তিনি সর্বসাধারণের
মধ্যে পরিচিত হইয়া উঠেন । উচ্চ ও নীচ, হিন্দু, মুসলমান ও খৃষ্টান
সর্ব সম্প্রদায়ের মুমুকু মানুষের জন্মই যোগীরাজের কৃপার দ্বার সदा
উন্মুক্ত থাকিতে দেখা যাইত ।

যোগী শ্রামাচরণ লাহিড়ী

নিরক্ষর সিপাহী বৃন্দা ভকত যেমন তাঁহার পরমাশ্রয়ে আসিয়া যোগসিদ্ধ মহাপুরুষে রূপান্তরিত হয়, তেমনই আবহুল গফুর খাঁ নামক এক দরিদ্র মুসলমান ভক্তও তাঁহার সাধন পাইয়া উন্নত অবস্থা লাভ করে। দরিদ্রতম কাশীবাসী হইতে আরম্ভ করিয়া কাশীর নৃপতি ঈশ্বরীনारायण সিংহের মত প্রভাবশালী ব্যক্তিকেও দীক্ষালাভের জন্য যোগীরাজের শরণাগত হইতে দেখা গিয়াছে।

গৃহস্থ ভক্তদের সঙ্গে সঙ্গে বিশিষ্ট সন্ন্যাসী সাধকদের আনাগোনাও তাঁহার নিকট কম ছিল না। সন্ন্যাসী সাধকদের মধ্যে যাহারা তাঁহার ঘনিষ্ঠ সান্নিধ্যে আসেন, তাঁহাদের মধ্যে দেওঘরের শ্রীমৎ বালানন্দ ব্রহ্মচারী ও কাশীর ভাস্করানন্দ সরস্বতীর নাম উল্লেখযোগ্য।

সমাজের বিভিন্ন স্তরের বহুতর শিষ্য পরিবেষ্টিত হইয়া লাহিড়ী মহাশয় কাশীধামে বসবাস করতে থাকেন এই মহাজীবনের শেষ দশটি বৎসর বিস্ময়কর যোগবিভূতি ও করুণার অপরূপ মাধুর্য্যে ভরিয়া ওঠে। ভারতের শ্রেষ্ঠ অধ্যাত্ম-কেন্দ্র কাশীধামের পটভূমিকায় যোগীরাজের অলৌকিক লীলা নানা রূপে ও ভঙ্গীতে প্রকাশিত হইতে থাকে। এ লীলার বহুতর কাহিনী আজিও জন্মস্থতিতে জাগরুক রহিয়াছে।

লাহিড়ী মহাশয় তখন কাশীর গুরুডেব্বর মহল্লায় বাস করিতেছেন। অন্তরঙ্গ শিষ্য যুক্তেশ্বর প্রায় প্রত্যহই গুরুদেবকে দর্শন করিতে যান। রাম তাঁহার ঘনিষ্ঠ বন্ধু, তিনিও প্রায়ই তাঁহার সঙ্গী হন। যোগীরাজের সঙ্গলাভে ও উপদেশাদি শ্রবণে পরম আনন্দে তাঁহাদের দিন কাটে।

ইথাৎ একদিন রাম কলেরায় আক্রান্ত হন। রোগের ধরনটি বড় মারাত্মক—একেবারে এশিয়াটিক কলেরা। যুক্তেশ্বর তখনি উৎকণ্ঠিত চিত্তে গুরুদেবের নিকট ছুটিয়া গেলেন। স্বাভাবিক ও সাংসারিক রীতি অনুযায়ী লাহিড়ী মহাশয় রোগের চিকিৎসায় সুদক্ষ ডাক্তারদেরই ডাকিতে বলিতেন। এক্ষেত্রেও সে ব্যবস্থাই হইল।

শহরের দুইজন দক্ষ ও অভিজ্ঞ চিকিৎসক রোগীর শয্যাপাশে উপস্থিত, কিন্তু চিকিৎসায় কোন ফলোদয়ই হইতেছে না। ডাক্তারদ্বয় শেষকালে হতাশ হইয়া যুক্তেশ্বরকে ডানাইয়া দিলেন, আর বড় জোর দুই ঘণ্টা এ রোগী বাঁচিতে পারে।

আবার তিনি গুরুদেবের উদ্দেশে ছুটিলেন—রামের সঙ্কটাপন্ন অবস্থার কথা তাঁহাকে জানাইবেন। কিন্তু আসনে উপদিষ্ট যোগীর প্রশান্ত আননে কোন ভাবান্তরই দেখা গেল না।

অশ্রুরুদ্ধ কণ্ঠে যুক্তেশ্বর তাঁহার ব্যক্তব্য শেষ করিলেন। কিন্তু লাহিড়ী মহাশয় শুধু ধীর কণ্ঠে কহিলেন, “যাও, ভয় কি? ডাক্তাররা তো দেখছেন।”

ফিরিয়া আসিয়া যুক্তেশ্বর শুনিলেন, রোগীর আর কোন আশা নাই বলিয়া ডাক্তারেরা বিদায় গ্রহণ করিয়াছেন।

মৃত্যুর পূর্ব মূহুর্তে রাম একবার ক্ষীণ স্বরে বলিয়া উঠিলেন—
“ভাই, গুরুদেবকে বলো আমি চললাম। আর একটা কথা দাঁহ করবার আগে অন্ততঃ আমার এ স্থূল শরীরকে তিনি যেন পদস্পর্শ দিয়ে ধন্য করেন।”

রামের নিপ্রাণ দেহ গৃহমধ্যে ফেলিয়া রাখিয়া যুক্তেশ্বর তখনই আবার গুরু সন্নিধানে ছুটিয়া গেলেন।

লাহিড়ী মহাশয় প্রশ্ন করিলেন, “কি হে, কি খবর? রাম এখন কেমন আছে বলতো?”

শোকাভূত যুক্তেশ্বর এইবার একেবারে ভাঙ্গিয়া পড়িলেন। ক্রন্দনের বেগ আর বাঁধ মানতে চায় না। ফোঁপাইয়া কহিলেন,
“গুরুদেব! এবার স্বচক্ষেই দেখবেন আসুন, সে কেমন আছে। তার দেহ শ্মশানে নেবার জন্ত উদ্যোগ চলছে।”

“শান্ত হও।” বলিয়া যোগীবর নয়ন নিমীলিত করিলেন। ধ্যানাবিষ্ট মূর্তিটি বহুক্ষণ নীরব নিষ্পন্দ হইয়া রহিল। তারপর বাহুজ্ঞান ফিরিয়া আসিলে সম্মুখস্থ দীপাধার হইতে তিনি কিছুটা

রেড়ীর তেল সংগ্রহ করিলেন। তাহাই যুক্তেশ্বরের হাতে দিয়া বলিলেন, “যাও, এটুকু এখনি রামকে পান করিয়ে দাও।”

যুক্তেশ্বরের বিস্ময়ের সীমা রহিল না। আর কাহাকে ইহা পান করাইবেন? রামের মৃত্যু যে তিনি স্বচক্ষে দেখিয়া আসিলেন। সঙ্গে সঙ্গে একথাও মানসপটে ফুটিয়া উঠিল—গুরুদেব ব্রহ্মজ্ঞপুরুষ, তাহার কখনো কোন ভুল হয় না!

নির্দেশমত কাজ অবশ্যই করিতে হইবে—তাই দ্রুতপদে তিনি গৃহে ফিরিয়া আসিলেন। রামের দেহ একেবারে ঠাণ্ডা হইয়া গিয়াছে, প্রাণের চিহ্নমাত্র নাই। কোনমতে মুখটি ফাঁক করিয়া কয়েক ফোঁটা তেল ঢালিয়া দেওয়া হইল।

ইহার পর যে অলৌকিক ঘটনা ঘটিল তাহাতে উপস্থিত সকলে বিস্ময়বিমূঢ় হইয়া গেলেন।

রামের প্রাণহীন নিষ্পন্দ দেহটি ধীরে ধীরে সকলের সমক্ষে নড়িয়া উঠিল, ক্রমে তিনি চেতনা লাভ করিলেন।

সুস্থ হইবার পর রাম এদিনকার বিচিত্র অভিজ্ঞতার কথা বর্ণনা করেন।—সে সময়ে তিনি দেখিতেছিলেন, এত জ্যোতির্ময় পুরুষরূপে লাহিড়ী মহাশয় তাহার শিয়রে দণ্ডায়মান। আননে স্নিগ্ধ মধুর হাসি ছড়াইয়া শান্ত স্বরে সন্নেহে যোগীরাজ বলিতেছেন, “রাম, আর কত ঘুমোবে? জেগে ওঠ তারপর যত শিগ্গীর পারো আমার কাছে এসে উপস্থিত হও।”

যুক্তেশ্বর বলিয়াছেন, পুনর্জীবন লাভের এ ঘটনাটি স্বচক্ষে না দেখিলে ইহা তাহার নিকট এক আঘাতে গল্প বলিয়া প্রতীয়মান হইত। তিনি সবিস্ময়ে সেদিন আরো দেখিলেন, রাম ধীরে ধীরে উঠিয়া বসিয়াছেন, শুধু তাহাই নয়, জামা কাপড় পরিয়া নিয়া গুরুদেবের নিকট যাইতেও তিনি উদ্যত।

উভয় বন্ধু অতঃপর একযোগে গাড়ি করিয়া লাহিড়ী মহাশয়ের নিকট উপনীত হন।

কৌতুকোজ্জ্বল হাসি ছড়াইয়া যোগীরাজ বলিলেন, “যুক্তেশ্বর, এখন থেকে মৃতদেহ দেখলেই তাড়াতাড়ি এক বোতল রেড়ীর তেল সর্বাগ্রে সংগ্রহ করে ফেলবে। স্বচক্ষে দেখলে তো, এর কয়েক ফোঁটা যমকেও পরাস্ত করতে পেরেছে!”

লাহিড়ী মহাশয়ের পরিহাস শুনিয়া উপস্থিত সকলেই হাস্য করিতেছেন। কিন্তু যুক্তেশ্বরের তখন আসল ব্যাপারটি বুঝিতে বাকী নাই। যোগীরাজ লৌকিক রীতি অনুযায়ী বৈজ্ঞানিক চিকিৎসার ব্যাঘাত জন্মাইতে চাহেন নাই—ডাক্তারদেরও স্বেযোগ তিনি দিয়াছেন। আর একথা সত্য যে তাঁহার ঐ রেড়ীর তেলের গুরুত্ব কিছু নাই, উহা একটি উপলক্ষ মাত্র।

যুক্তেশ্বরের অন্তরে রোগনাশক ঔষধ পাঠবার জন্য একটা প্রচ্ছন্ন আকাঙ্ক্ষা বর্তমান ছিল। তাই উহা পরিতৃপ্ত করিতেই গুরুদেব সেদিন তাঁহাকে ঐ তেলটুকু প্রদান করেন। হাতের কাছে এ বস্তুই তখন পাওয়া গিয়াছিল, অবলীলায় তাহাই তিনি ব্যবহার করিয়াছেন। বলা বাহুল্য, মৃতদেহে প্রাণসঞ্চারের কাজ সাধিত হইয়াছে তাঁহার অসামান্য যোগবলে।

আশ্রিত শিষ্য মাত্রেই রক্ষণাবেক্ষণের জন্য যোগীরাজ শ্যামাচরণ সর্বদা সজাগ থাকিতেন। অভয়া নামে তাঁহার একজন প্রিয় শিষ্যা ছিলেন। তাঁহার স্বামী কলিকাতার এক বিশিষ্ট উকিল। এই দম্পতির আটটি সন্তান একে একে মৃত্যুমুখে পতিত হইয়াছে। অভয়া একদিন গুরুর চরণ ধরিয়া মিনতি করিতে থাকেন, তাঁহার নবম সন্তানটির যেন জীবন রক্ষা হয়—এ কৃপা তাঁহাকে করিতেই হইবে।

আশ্রিত-বৎসল লাহিড়ী মহাশয় কহিলেন, “আচ্ছা আচ্ছা—তাই হবে। এবার তোমার এক মেয়ে হবে এবং সে ভালভাবে বেঁচেও থাকবে। কিন্তু আমার একটা বিশেষ নির্দেশ পালন করতে তোমাদের যেন ভুল না হয়। শিশুটির জন্ম হবে রাত্রিকালে। তখন থেকে

যোগী শ্রীশ্রীমাচরণ লাহিড়ী

শূর্য্যোদয় অবধি সন্ধ্যার ভেতর একটি তেলের প্রদীপ জ্বালিয়ে রাখতে হবে। কিন্তু সাবধান! স্মৃতিকাগারের লোকজন যেন ঘুমিয়ে না পড়ে, বাতিটি কখনো যেন নিভে না যায়।”

বৎসরখানেক পরে এই শিষ্যের একটি ঋণ ভূমিষ্ঠ হয়। গুরুদেবের কথামত ঘরে প্রদীপ জ্বালানো রাখার ব্যবস্থাও হইয়াছে। শেষ রাত্রিতে কিন্তু প্রস্তুতি ও ধাত্রী উভয়েই ঘুমাইয়া পড়িলেন। দীপাধারের তেলও ফুরাইয়া আসিতেছে! শিখাটি নির্ঝগোন্মুখ।

ইতিমধ্যে স্মৃতিকাগারে এক অলৌকিক কাণ্ড ঘটে! কক্ষের বন্ধ দ্বারটি হঠাৎ বায়ুর আন্দোলনে খুলিয়া যায়। নিদ্রোখিতা অভয়া বিস্ময় বিস্তারিত নয়নে দেখেন, গুরুদেব লাহিড়ী মহাশয় স্বয়ং কক্ষের দ্বারে দণ্ডায়মান।

স্তম্ভিত প্রদীপ শিখার দিকে আঙ্গুলি নির্দেশ করিয়া যোগীরাজ নব প্রস্তুতিকে বলিতেছেন, “অভয়া? তাড়াতাড়ি ঐ দিকে চেয়ে তাকাও, বাতি কিন্তু নিবে যাচ্ছে।”

ব্রহ্মব্যস্তে উঠিয়া শিষ্য দীপাধারে তেল ঢালিয়া দিলেন। ততক্ষণে গুরুদেবের করুণাঘন মূর্তি কোথায় অদৃশ্য হইয়াছে।

এই মহিলা এবার লাহিড়ী মহাশয়ের দর্শনাকাজক্ষায় ব্যাকুল হইয়া কলিকাতা হইতে কালী যাইতেছেন। হাওড়া স্টেশনে পৌঁছিতে না পৌঁছিতেই বেনারস এক্সপ্রেস ছাড়িয়া দেয়, গাড়িতে ওঠা আর হইয়া উঠে নাই। শিষ্যের অন্তর বেদনার্ত্ত হইয়া উঠিল, যোগীরাজের পবিত্র মূর্তিখানি স্মরণ করিয়া তিনি কাঁদিতে লাগিলেন।

হঠাৎ দেখা গেল, প্ল্যাটফর্মের অনতিদূরে ট্রেনটি কেন যেন থামিয়া গিয়াছে, চালক এবং ইঞ্জিনিয়ারগণ ইহার কোন কারণই খুঁজিয়া পাইতেছে না। অভয়া ছুটিয়া গিয়া মালপত্রসহ কামরায় উঠিয়া বসিলেন। আশ্চর্যের বিষয়, তিনি স্থির হইয়া বসিবার সঙ্গে সঙ্গেই গাড়িটি চলিতে আরম্ভ করিল।

কালীধামে পৌঁছিয়া লাহিড়ী মহাশয়কে প্রণাম করামাত্র তিনি

শ্মিত হাস্তে শিষ্যকে বলিলেন, “ওগো আরো একটু আগে রওনা হয়ে গাড়ি ধরতে হয়। কত ঝগাটেই যে তোমরা আমাকে ফেলতে পার! বল দেখি, পরের ট্রেনে কাশীতে পৌঁছলে তোমাদের কি এমন ক্ষতি হত? আর এত কঁাদতেও তোমরা পার।”

লাহিড়ী মহাশয়ের এক দীক্ষিত শিষ্য, স্বামী কেবলানন্দজী ভাস্করানন্দ সরস্বতী মহারাজের নিকট প্রায়ই বেদান্ত অধ্যয়ন করিতেন। ভাস্করানন্দজী ক্রীপে যোগীরাজ শ্যামাচরণের নিকট হইতে কয়েকটি বিশেষ যোগসাধন প্রাপ্ত হন, তিনি তাহার এক বিবরণ দিয়াছেন। শ্যামাচরণ মহাযোগী বাবাজী মহারাজের শিষ্য, তাঁহার নিগূঢ়সাধনের তিনি অধিকারী—ভাস্করানন্দজীর ইহা অজানা নাই। তাই তাহার নিকট যোগক্রিয়ার কয়েকটি উচ্চতর পদ্ধতি শিক্ষা করিতে তিনি উদ্গ্রীব হন। তাঁহার আশ্রমে আসিবার জন্ত শ্যামাচরণকে একদিন আমন্ত্রণও জানান।

কেবলানন্দজীর নিকট লাহিড়ী মহাশয় তাঁহার এ আমন্ত্রণের কথা শুনে। অতঃপর রহস্যভরে তিনি ইহার যে উত্তর দেন তাহা বড় তাৎপর্যপূর্ণ। তিনি বলেন, “ছাখা হে, পিপাসা পেলে তৃষ্ণার্দ্ লোকই তো কুয়োর কাছে ছুটে যায়। কুয়ো কি কখনো এজন্ত তার স্থান ত্যাগ করে?”

পরবর্তীকালে একবার এক নির্জন উদ্যানে আকস্মিকভাবে উভয়ের সাক্ষাৎ হয়। কৃপালু লাহিড়ী মহাশয় এ সময়ে ভাস্করানন্দ স্বামীকে কয়েকটি নিগূঢ় যোগসাধন প্রদান করেন।

যোগীরাজের পত্নী কাশীমণি দেবীর নিকট তাঁহার স্বামীর যোগৈশ্বর্য সম্বন্ধে নানা কাহিনী শুনা যাইত। উত্তরকালে আচার্য যোগানন্দ মহারাজ এগুলি সঙ্কলন করিয়াছিলেন, তাঁহার আত্মজীবনীতে কিছুটা তথ্য পরিবেশিত হইয়াছে।

একদিন গভীর রাত্ৰিতে কাশীমণি দেবীর ঘুম ভাঙ্গিয়া যায়। তিনি চাহিয়া দেখেন, সমস্ত কক্ষটি এক উজ্জ্বল আলোকে ভরিয়া গিয়াছে, আর গৃহকোণে পদ্মাসনযুক্ত যোগীরাজ ভূমি হইতে উর্দ্ধে উথিত হইয়া শূন্যে অবস্থান করিতেছেন।

কাশীমণি তো বিস্ময়ে হতবাক্। কিছুক্ষণ পরে ভাবিতে লগিলেন, তিনি স্বপ্ন দেখিতেছেন না তো !

যোগীরাজ এবার পত্নীকে আরও বিস্মিত করিয়া মূঢ় গম্ভীর কণ্ঠে বলিতে লাগিলেন, “না গো না ! এ তোমার ভ্রম নয়, স্বপ্নে দেখা কোন দৃশ্যও নয়। অনেক দিন তো কেটে গেল। এবার তোমার এ তামস নিদ্রা থেকে জেগে ওঠ—চিরকালের জ্ঞান তুমি জাগো !”

লাহিড়ী মহাশয়ের দেহটি অতঃপর ধীরে ধীরে শূন্য হইতে নিম্নস্থ আসনে অবতরণ করিল। স্বামীর চরণতলে মাষ্টাঙ্গে প্রণত হইয়া কাশীমণি সেদিন সাধন-প্রার্থিনী হইয়াছিলেন। ইহার পরই যোগীরাজ তাঁহাকে দীক্ষা ও যোগসাধনা দান করেন

কোন এক ভক্তিমতী শিষ্যা একবার লাহিড়ী মহাশয়ের নিকট হইতে তাঁহার একখানি ফটো চাহিয়া নেন। এটি হস্তান্তর করিবার সময় লাহিড়ী মহাশয় বলিলেন, “যদি সত্যিই ভক্তি-বিগ্ৰহ কর ও মান তো এটাই হবে এক পরমাশ্রয়, আর না মান তো নেহাত সাধারণ ছবি মাত্র।”

কিছুদিন পরের কথা। একদিন সন্ধ্যায় মহিলাটি অপর এক গুরুভগ্নীর সহিত বসিয়া শাস্ত্রগ্রন্থ পাঠ করিতেছেন। সন্মুখের টেবিলে লাহিড়ী মহাশয়ের ছবিটি স্থাপিত রহিয়াছে। হঠাৎ এসময়ে সেদিন প্রবল ঝড়বৃষ্টি শুরু হয় এবং ঐ গৃহে বজ্রপাত ঘটে।

যে গ্রন্থটি পাঠ করা হইতেছিল তাহা বিদ্যুৎ-এর আগুনে দগ্ধ হয়, কিন্তু মহিলা দুইটি অদ্ভুতভাবে গুরুকৃপায় বাঁচিয়া যান। দুর্ঘটনার সময় তাঁহাদের বোধ হইতে থাকে, কোন অদৃশ্য কল্যাণশক্তি যেন

একটি বরফের প্রাচীরদ্বারা তড়িৎ-বজ্রের আঘাত হইতে তাঁহাদের রক্ষা করিতেছে।

লাহিড়ী মহাশয়ের শিষ্য কালীকুমার রায় মহাশয় তাঁহার গুরু সম্বন্ধে নানা মনোজ্ঞ কাহিনী বিবৃত করিয়াছেন। তিনি বলিয়াছেন, “আমি ঠাকুরের কানীধামস্থ গৃহে গিয়া সপ্তাহের পর সপ্তাহ কাটাইয়া আসিতাম। তখন দেখিতাম—বহু সাধু-সন্ত, দণ্ডী সন্ন্যাসী গভীর বজ্রনীতে নিঃশব্দে তাঁহার চরণোপান্তে উপনীত হইতেন। উচ্চতম জ্ঞানতত্ত্ব ও ছরুহ যোগসাধনের নানা প্রণালী তাঁহারা শ্রদ্ধার সহিত গুরুদেবের নিকট হইতে গ্রহণ করিতেছেন, ইহাও দেখিতাম! এই আগন্তকের দল আবার প্রত্যুষ হইলেই গোপনে কোথায় সরিয়া পড়িতেন। অনেক সময় সপ্তাহের পর সপ্তাহ শ্রীশ্রীঠাকুরকে নিদ্রিত হইতে আমরা দেখি নাই।”

এক বিরাট অধ্যাত্মশক্তির উৎসমুখরূপে তখন যোগীরাজ লাহিড়ী মহাশয় অধিষ্ঠিত। অধ্যাত্ম-সাধনা ও যোগ-শক্তির দিব্য ভাণ্ডখানি তিনি জনকল্যাণে উন্মুক্ত করিয়া দিয়া বসিয়া আছেন। ভক্ত, মুমুক্শু ও যোগসাধনপ্রাপ্ত শিষ্যদলের যে কেহ এ মহাপুরুষের দর্শন লাভ করিত, অপার্থিব আনন্দধারায় সে হইত অভিষিক্ত। এমনিভাবে তাহার দর্শন ও স্পর্শন তৎকালে অগণিত লোকের আধ্যাত্মিক রূপান্তর সাধন করিতে থাকে।

এসব দর্শনার্থীদের মধ্যে অবিশ্বাসী লোকও হয়তো কিছু কিছু আসিত। ইহাদের আগমন লাহিড়ী মহাশয়ের ব্যবহারে প্রায়ই কোন তারতম্য ঘটাইত না। কিন্তু বিজ্ঞপপরায়ণ, ছুষ্টপ্রকৃতির অবিশ্বাসী ব্যক্তিদের মাঝে মাঝে তিনি শাস্তি দিতে ছাড়িতেন না। যোগপন্থার মর্যাদা রক্ষার জন্ত সদা নির্লিপ্ত, ধ্যানতন্ময় যোগীবরকে মাঝে মাঝে সজাগ হইয়া উঠিতে দেখা যাইত। তাঁহার শিষ্য কালীকুমার রায় ইহার এক কাহিনী শুনাইয়াছেন :

কালীকুমারবাবু অল্প কিছুদিন হয় দীক্ষা গ্রহণ করিয়াছেন

যোগী শ্রীশ্রামাচরণ লাহিড়ী

এবং গুরু-নির্দেশিত সাধনপথে অগ্রসর হইতেছেন। তাঁহার অফিসের মনিবটি কিন্তু এ সব পছন্দ করেন না। লাহিড়ী মহাশয়কে লক্ষ্য করিয়া প্রায়ই তাঁহাকে নানা বিদ্ৰূপ করিতে শুনা যাইত। একবার কালীকুমারবাবুর পিছনে পিছনে ভদ্রলোকটি লাহিড়ী মহাশয়ের গুরুদেবের মহল্লার বাড়িতে আসিয়া উপস্থিত। আগমনের উদ্দেশ্য, যোগীরাজের ধর্মাচরণকে অসার প্রতিপন্ন করা এবং কিছুটা অপমান করিয়া যাওয়া।

লাহিড়ী মহাশয়কে ঘিরিয়া কক্ষমধ্যে দশ-বারজন ভক্ত বসিয়া আছেন। আগন্তুক তাঁহাদের সম্মুখে উপবেশন করিলেন।

তিনি আসন গ্রহণ করা মাত্রই যোগীরাজ ধীন গম্ভীর স্বরে সকলকে জিজ্ঞাসা করিলেন, “তোমরা কি আজ একটি বিচিত্র দৃশ্য দেখতে চাও?”

সকলে সোৎসাহে সম্মত হইলেন। ঘরটি তখনই ঝঙ্কার করা হইল। লাহিড়ী মহাশয়ের যোগশক্তির ইঙ্গিত অনুসারে ভক্তদের সম্মুখে এবার ধীরে ধীরে একটি অলৌকিক দৃশ্য ফুটিয়া উঠিতেছে।

সকলে দেখিতে লাগিলেন— একটি সুন্দরী তরুণী লাল-পাড়শাড়ি পরিয়া দাঁড়াইয়া আছে। কালীকুমারবাবু মনিবকে ডাকিয়া লাহিড়ী মহাশয় এবার তীক্ষ্ণকণ্ঠে প্রশ্ন করিলেন, “দেখুন তো, এই রমণীকে আপনি চিনতে পাচ্ছেন কি না।”

আগন্তকের যত কিছু বীরত্ব ও বিদ্ৰূপের উৎসাহ ততক্ষণে নিস্তেজ হইয়া আসিয়াছে। ভীত কণ্ঠে তিনি উত্তর দিলেন, “আজ্ঞে হ্যাঁ, এ আমার পরিচিত।”

ভয়ে, লজ্জায় ভদ্রলোকটি ইতিমধ্যে বিবর্ণ হইয়া গিয়াছেন। সকলের সমক্ষে এবার তিনি সব কিছু অকপটে স্বীকার করিলেন। তরুণীটি তাঁহার উপপত্নী। নিজের স্ত্রী-পুত্র রহিয়াছে, অথচ এই নারীর পিছনে মূর্খের মত তিনি বহু অর্থ ব্যয় করিয়া চলিয়াছেন।

যোগীরাজের অধ্যাত্মপ্রভাব, যোগবিভূতির এই বিচিত্র প্রকাশ

তাঁহার অন্তরে এক তীব্র আলোড়ন তুলিয়া দিয়াছে। সঙ্গে সঙ্গে অনুতাপের জ্বালাও কম হয় নাই। অশ্রুধ্বকণ্ঠে তিনি নিবেদন করিলেন, “বাবা, আপনি আমায় ক্ষমা করুন, এ পাপমোহ থেকে আমায় ক্ষমা করুন। দয়া করে দীক্ষা দিয়ে শ্রীচরণে আমায় আশ্রয় দিন।”

অন্তর্যামী যোগীবর কিন্তু বুঝিয়াছেন, ভদ্রলোকটির আর্তি ও অনুশোচনা সাময়িক মাত্র। দীক্ষার প্রস্তুতি ও অধিকার তাঁহার নাই, তাঁহাকে তিনি কি করিয়া গ্রহণ করিবেন?

উত্তর দিলেন, ‘বেশ তো, আগামী ছয় মাস কাল যদি আপনি সংযত হয়ে থাকতে পারেন, তবে আপনার আশা পূর্ণ হবে, আপনাকে আমি সাধন দেব।’

উচ্ছৃঙ্খল লোকটির সে সৌভাগ্য আব হয় নাই। কোনক্রমে তিন মাস সংযত জীবন যাপন করার পর ঐ রমণীটির সহিত আবার তিনি মিলিত হন এবং ইহার দুই মাস পরেই তাঁহার মৃত্যু ঘটে। যোগীরাজ কেন সেদিন তাঁহার অনুরোধ এড়াইয়া গিয়া ছয় মাস পরে দীক্ষা দানের কথা বলিয়াছিলেন, তাহার নিহিতার্থ তখন বুঝা গেল।

বিপুল যোগ-বিভূতির ঐশ্বর্য্য লাহিড়ী মহাশয় লাভ করেন, কিন্তু ইহা তিনি বহন করিয়া চলিতেন নিতান্ত স্বাভাবিকভাবে ও সহজ স্বাচ্ছন্দ্যে। বিশেষ প্রয়োজন ব্যতীত সচরাচর তাঁহাকে ইহা প্রকাশ করিতে দেখা যাইত না। কখনো ছুষ্ঠের দমনে, কখনো বা নিতান্ত লীলাচ্ছলে তাঁহার যোগসামর্থ্য লোকলোচনের সম্মুখে মাঝে মাঝে আত্মপ্রকাশ করিত। মুমুকু ভক্তদের প্রত্যেকে দৃঢ়তর করিতেও বিভূতিলীলা তিনি প্রদর্শন করিতেন।

লাহিড়ী মহাশয়ের প্রতিবেশী এক যুবক একদিন তাঁহাকে প্রণাম করিতে আসিয়াছেন। ইহার নাম চন্দ্রমোহন দে, সবেমাত্র ডাক্তারী

যোগী শ্রীশামাচরণ লাহিড়ী

পাস করিয়া বাহির হইয়াছেন। যোগীরাজ তাঁহাকে আশীর্বাদ করিয়া আধুনিক চিকিৎসা শাস্ত্রের উন্নতি বিষয়ে নানা প্রশ্ন করিতে লাগিলেন। আলোচনায় বসিয়া নূতন ডাক্তার চন্দ্রমোহনের উৎসাহের অন্ত নাই— আধুনিক দেহ-বিজ্ঞানের নানা তত্ত্ব তিনি বুঝাইয়া দিতে লাগিলেন।

যোগীবর জিজ্ঞাসা করেন, “চন্দ্রমোহন, তোমাদের ডাক্তারী শাস্ত্র মতে মৃতের কি সংজ্ঞা রয়েছে, বলতো?” তারপর কৌতুকভরে বলিয়া বসিলেন, “আচ্ছা, তুমি আমায় পরীক্ষা করে বল দেখি, আমি সত্য সত্যই মৃত—না জীবিত?”

চন্দ্রমোহন তো তাঁহার দেহটি পরীক্ষা করিয়া একেবারে হতবাক। শ্বাস-প্রশ্বাসের ক্রিয়ার কোন লক্ষণই নাই, হৃদপিণ্ড নিঃশব্দ নিশ্চল। সমগ্র দেহের কোথাও প্রাণের কোন চিহ্নই খুঁজিয়া পাওয়া যাইতেছেনা।

কিছুক্ষণ পরে নয়ন উন্মীলন করিয়া লাহিড়ী মহাশয় তরুণ ডাক্তারকে বলিলেন, “দেখ চন্দ্রমোহন, একটা কথা স্মরণ রাখবে। স্থূল জগতের জ্ঞানের বাইরে, অতীন্দ্রিয় সূক্ষ্মলোকের অনেক তত্ত্ব ও তথ্যই আমাদের জ্ঞানবার রয়েছে। তোমাদের আধুনিক বিজ্ঞান তার সীমিত জ্ঞান নিয়ে যেখানে যেতে পারে না, ভারতীয় সাধকদের যোগ-শক্তি কিন্তু অবলীলায়ই সেখানেই পৌঁছুতে পারে।”

চন্দ্রমোহনের সেদিনকার এ বিস্ময় চিরদিনের শ্রদ্ধায় পরিণত হয়। উত্তরকালে তিনি এক যশস্বী চিকিৎসকরূপে পরিচিত হইয়া উঠেন, আর লাহিড়ী মহাশয়ের সেদিনকার এই লীলার সূত্রটি ধরিয়া তাঁহার জীবন ধীরে ধীরে রূপান্তরিত হইয়া যায়। অধ্যাত্ম-সাধনার পথে তিনি অগ্রসর হইতে থাকেন।

যোগীরাজ কখনো নিজের প্রতিচ্ছবি উঠাইতে সম্মত হইতেন না। একবার শিষ্য ও ভক্তমণ্ডলী গুরুদেবের ফটো উঠাইতে বড় ব্যস্ত হইয়া পড়েন। কাশীর সুদক্ষ ফটোগ্রাফার গঙ্গাধরবাবুকে আহ্বান করা হয় ও যোগীরাজকে বহু অনুনয় করিয়া সম্মত করানো যায়।

ক্যামেরার সন্মুখে গিয়াই লাহিড়ী মহাশয় বাজকের মত যন্ত্রটির নির্মাণ-কৌশল ও বিশেষত্ব সম্বন্ধে কৌতূহলী হইয়া উঠিলেন। ফটোগ্রাফারও মহা উৎসাহী। তিনি তাঁহাকে যন্ত্রের বিভিন্ন অংশ ও কার্যকারিতা সম্বন্ধে অনেক কিছু বুঝাইতে লাগিলেন।

ছবি গ্রহণের সময় ফটোগ্রাফার কিন্তু মহা বিপদে পড়িলেন। যোগীরাজের ছবিটি কি জানি কেন, ক্যামেরার ‘ভিউ ফাইণ্ডারে’ মোটেই প্রতিফলিত হইতেছে না। বারংবার পরীক্ষা করিয়া দেখা গেল, কোন যান্ত্রিক গোলযোগের চিহ্নমাত্র নাই। আরও আশ্চর্যের বিষয়—অপর কোন লোক ক্যামেরার সন্মুখে বসামাত্র তাঁহার ছবি ঠিকমতই প্রতিফলিত হইয়া উঠিতেছে। কিন্তু যোগীরাজের প্রাকরূপ কেন দেখা যাইতেছে না?

সম্ভাব্য কোন কারণের সন্ধান না পাইয়া ফটোগ্রাফার একেবারে মুষড়িয়া পড়িয়াছেন।

কৌতুকী লাহিড়ী মহাশয় এতক্ষণ নীরবে বসিয়া চতুর হাসি হাসিতেছেন। এবার প্রশ্ন করিলেন, “কি গো! এ বিষয়ে তোমাদের বিজ্ঞানের কি বক্তব্য আছে বল দেখি?”

সুদক্ষ ও অভিজ্ঞ ফটোগ্রাফার একেবারে হতাশ হইয়া গিয়াছেন। কাতরস্বরে বলিয়াই উঠিলেন, “দূর হোক আমাদের বিজ্ঞান! আমি আপনার চরণেই শরণ নিচ্ছি। আপনি ভক্তদের মনোবাঞ্ছা পূরণ করুন, আর ছবিটা তুলে আমিও আমার মান বাঁচাই। আপনি একবার দয়া করুন।”

লাহিড়ী মহাশয় মুচকি হাসিয়া আবার ছবি তোলার জন্য প্রস্তুত হইয়া বসিলেন। অমনি দেখা গেল তাঁহার ছবিটি ক্যামেরার ‘ভিউ ফাইণ্ডারে’ নিখুঁতভাবে ফুটিয়া উঠিয়াছে। যে ছবিটি সেদিন গৃহীত হয়, তাহা হইতেই লাহিড়ী মহাশয়ের বহুপ্রচারিত তৈল-চিত্রখানি অঙ্কিত হইয়াছিল।

সাধনহীন লোকদের শূন্যগর্ভ ধর্মালোচনায় যোগীরাজ কোনদিন

উৎসাহ প্রদান করিতেন না। আসন, মুদ্রা, প্রাণায়াম ও ধ্যান-ধারণার নিগূঢ় যৌগিক ক্রিয়াদির উপরই তিনি গুরুত্ব দিতেন বেশী। “ধ্যান-লোকের প্রত্যক্ষ অনুভূতি আশ্বাদন কর ও পরমাত্মার দর্শনলাভে উদ্ধুদ্ধ হও”—দর্শনার্থীদের কাছে তাঁহার এই নির্দেশ বাক্যই সর্বদা ধ্বনিত হইত। যে অতীন্দ্রিয় রাজ্যে তিনি নিজে বিচরণ করিতেন, শিষ্য-ভক্তদের মধ্যে তাহারই তত্ত্ব উদ্ঘাটনে তিনি তৎপর হইতেন। গুরুদেবের প্রত্যক্ষ অনুভূতির বর্ণনা ছিল জীবন্ত। তাই অতি সহজে ইহা অন্তরঙ্গ ভক্তদের হৃদয়ে আধ্যাত্মিক চেতনা জাগাইয়া তুলিত।

লাহিড়ী মহাশয় একদিন ভক্ত পরিবৃত হইয়া বসিয়া আছেন। কথাপ্রসঙ্গে ভগবদ্গীতার ছুই চারিটি শ্লোক তিনি মাঝে মাঝে ব্যাখ্যা করিতেছিলেন। অকস্মাৎ কেন যেন তিনি থামিয়া গেলেন। তারপর বসিয়া উঠিলেন। “তোমরা সকলে চুপ করে বস। আমি অনুভব করছি, বহু সংখ্যক নর-নারীর জীবন ও চেতনার সঙ্গে জড়িত হয়ে আমি নিজে জাপানের সমুদ্রাঞ্চলে ডুবে মরছি!”

কক্ষস্থ সকলে ভয়ে বিস্ময়ে স্তব্ধ হইয়া রহিলেন। কিছুক্ষণ কাটিয়া গেলে দেখা গেল, লাহিড়ী মহাশয় ধীরে ধীরে পুনরায় তাঁহার স্বাভাবিক অবস্থা প্রাপ্ত হইয়াছেন।

পরদিন শিষ্যগণ সংবাদপত্রে পড়িলেন, জাপানগামী যাত্রীবাহী একটি জাহাজ উপকূলের নিকটে আসিয়া নিমজ্জিত হয়। এই দুর্ঘটনায় বহু আরোহীর প্রাণনাশ ঘটে।

সকলেই বুঝিলেন, ঐ নিমজ্জমান সমুদ্রযাত্রীদের মর্শ্ববিদারী আর্তনাদই গতকাল যোগীরাজের অন্তর-সত্তায় প্রতিফলিত হইয়াছিল। সর্বজীব ও সর্বভূতের অস্তিত্ব যে মহাচৈতন্যে বিধ্বত, তাহারই সহিত যে যোগীরাজের অদ্বয় সাধিত হইয়া গিয়াছে। সেনিদকার অলৌকিক দর্শনের মধ্য দিয়া লাহিড়ী মহাশয় শিষ্যদের মধ্যে এ সত্যকেই পরিস্ফুট করিতে চাহিয়াছিলেন।

লাহিড়ী মহাশয়ের প্রচারিত যোগসাধনা কোনদিনই মানুষকে

সংসারের কৰ্ম হইতে বিচ্যুত করিতে চাহে নাই। তাঁহার গুরুদেব বিশেষ করিয়া গৃহস্থ-জীবনের ক্ষেত্রেই যোগ সাধনার বীজ বপনের নির্দেশ দেন। তাই দেখা যাইত, লাহিড়ী মহাশয়ের নিকটে আসিয়া গৃহস্থ শিষ্যগণ সাধন-পথের বাধাবিল্লের কথা বলিতে তিনি হাসিয়া উড়াইয়া দিতেন। অবসরের অভাব, জীবনযুদ্ধের তীব্রতা--কোন কিছু অস্ববিধার কথাই তাঁহার নিকট গ্রাহ্য হইত না। সংসারাত্মমে বাস করিয়া দীর্ঘ চাকুরী জীবনে তিনি নিজেই তাঁহায় আদর্শটি দেখাইয়া গিয়াছেন।

স্ত্রী-পুত্রের ভরণপোষণের জন্তে তিনি যেমন কৰ্ম করিতেন তেমনি বারাগসীতে লোক-কল্যাণকর শিক্ষাকেন্দ্র স্থাপনের জন্তও তাঁহার তৎপরতা কম ছিল না। এ ধরনের ব্যক্তিগত বা সমাজগত দায়িত্ব তিনি কোনদিনই এড়াইয়া যান নাই।

বর্তমান যুগের পরিবেশে, গার্হস্থ্য জীবনকে অব্যাহত রাখিয়া গোপনভাবে যোগসাধন করিতেই তিনি নির্দেশ দিতেন। তাঁহার নির্দেশিত পন্থায় অগ্রসর হইয়া বহু লোক অপূর্ব যোগসামর্থ্য প্রাপ্ত হইয়াছে, সমাজের স্তরে স্তরে অগণিত নীরব সাধকের জীবন সার্থকতায় ভরিয়া উঠিয়াছে।

ষোগীরাজের সাধন-পন্থার আর একটি বৈশিষ্ট্য—তিনি কাহাকেও স্বধৰ্ম্ম পরিত্যাগ করিতে দিতেন না। যে কোন ধর্ম্মের, যে কোন শ্রেণীর সাধক তাঁহার সাধন ও আশ্রয় গ্রহণে সমর্থ ছিলেন। এজন্য কাহাকেও নিজের আচরিত ধর্ম্ম বা সামাজিক আচার-আচরণ ত্যাগ করিতে হইত না। আধ্যাত্মিক জীবনের প্রকৃত পথিপ্রদর্শকের ভূমিকাটিই তিনি গ্রহণ করিতেন।

করুণা ও লোক-কল্যাণের দীপশিখাটি দীর্ঘদিন জ্বালাইয়া রাখিবার পর আচার্য্য-জীবনের সমাপ্তিটি ধীরে ধীরে আগাইয়া আসিল। মহাপ্রয়াণের প্রায় ছয় মাস পূর্বে পত্নী কাশীমণিকে একদিন তিনি ডাকিয়া বলিলেন, “ওগো দেখ, আমার দেহত্যাগের

সময় নিকটবর্তী হয়ে আসছে। কিন্তু তোমরা কেউ যেন আমার জ্ঞান শোক করো না।”

কয়েকটি অন্তরঙ্গ ভক্তের নিকটও দুই তিন মাস পূর্বে তিনি আসন্ন বিদায়ের কথা প্রকাশ করেন। এক ধরনের বিষাক্ত পৃষ্ঠব্রণ দ্বারা এবার তিনি আক্রান্ত হন, আর এই রোগ উপলক্ষ করিয়াই মরদেহ ত্যাগের ব্যবস্থাটি ত্বরান্বিত হইয়া উঠে।

যোগীরাজের দেহরক্ষার পূর্বে তাঁহার অন্যতম শিষ্য, স্বামী প্রণবানন্দজী কাশীধামের বাইরে অবস্থান করিতেছিলেন। গুরুদেবের অন্তিম অবস্থার কথা শুনিয়া তাঁহার উৎকণ্ঠার সীমা রহিল না। ত্রস্তব্যস্তে তিনি কাশী যাত্রার উদ্যোগ করিতেছেন, এমন সময় লাহিড়ী মহাশয় এক অলৌকিক মূর্তি পরিগ্রহ করিয়া তাঁহার সম্মুখে আবির্ভূত হইলেন।

কহিলেন, “প্রণবানন্দ, এত ছড়োছড়ি করে কাশীতে ছুটে যাবার কি প্রয়োজন? সেখানে আমার সঙ্গে তো তোমার সাক্ষাৎ হবে না! তুমি পৌছুবার পূর্বেই যে আমি এ দেহ ত্যাগ করবো।”

প্রণবানন্দজী শোকাভিভূত হইয়া কাঁদিতেছিলেন, যোগীরাজ তাঁহাকে অভয় দিয়া কহিতে লাগিলেন, “একি? ভয় কি? কাঁদছো কেন? আমি যে সর্বদাই সঙ্গে সঙ্গে রয়েছি! দেহ বিসর্জিত হলেও সদগুরুসত্তাকে তোমরা পাবে - প্রয়োজন মতই পাবে।”

লাহিড়ী মহাশয়ের আর এক শিষ্য, স্বামী কেশবানন্দজীও এ সময়কার একটি অলৌকিক কাহিনী বিবৃত করিয়াছেন।—গুরুদেবের তিরোধানের কয়েকদিন পূর্বে একদিন তিনি হরিদ্বারের এক কুটিরে উপবিষ্ট। হঠাৎ এসময়ের লাহিড়ী মহাশয়ের জ্যোতির্ময় মূর্তিটি তাঁহার সম্মুখে উদ্ভাসিত হয়।

দিব্যমূর্তি তাঁহাকে বলিয়া উঠেন, “বৎস তুমি অবিলম্বে কাশীতে চলে এস।” কথা কয়টি উচ্চারণ করিবার সঙ্গে সঙ্গেই উহা অদৃশ্য হইয়া যায়।

কেশবানন্দ অবিলম্বে কাশীধামে চলিয়া আসিলেন। দেখিলেন,

গুরুদেবের লীলা সম্বরণের আর বেশী দেৱী নাই, সেবানিষ্ঠ ভক্ত শিষ্যগণ দিবারাত্র তাঁহাকে ঘিরিয়া রহিয়াছেন।

১৮৯৫ সালের ২৬শে সেপ্টেম্বর। লাহিড়ী মহাশয়ের কক্ষে কয়েকজন অন্তরঙ্গ ভক্ত উপবিষ্ট। শরীর অত্যন্ত অসুস্থ, এ অবস্থায়ও লাহিড়ী মহাশয় ভগবদ্গীতার কয়েকটি প্রিয় শ্লোক লইয়া ধীরে ধীরে ব্যাখ্যা করিতেছেন।

কিছুক্ষণ পবে হঠাৎ শিষ্যদের দিকে তাকাইয়া প্রশান্ত কণ্ঠে বলিয়া উঠিলেন, “তাইতো, আমাকে যে এবার স্বস্থানে ফিরতে হবে!”

শোকাভিভূত শিষ্য ও ভক্তদের অশ্রুসজল দৃষ্টির সম্মুখে তিনি ধীরে ধীরে পদ্মাসনে উপবিষ্ট হইলেন। এই আসনেই সমাধিমগ্ন হইয়া যোগীরাজের মহাপ্রয়াণ ঘটে।

সমারোহের সহিত দেহটিকে গঙ্গাতীরে মণিকর্ণিকার ঘাটে আনিয়া সংস্কার করা হইল। গুরুব্রিয়োগবিধুর ভক্তদলের ন্যূনে তখন শোকাশ্রুর বত্যা বহিয়া চলিয়াছে।

মরলোকের পরপারে জ্যোতির্লোক হইতেও বিদেহী যোগীরাজকে এসময়ে তাহার অলৌকিক লীলা বিস্তারিত করিতে দেখা যায়। একই সময়ে ভারতের বিভিন্ন স্থানে তাঁহার তিনজন বিশিষ্ট শিষ্য গুরুদেবের দিব্য-দেহের সাক্ষাৎ প্রাপ্ত হন। জীবন ও মৃত্যুর ছরতিক্রম ব্যবধানকে ঘুচাইয়া দিয়া শক্তিধর মহাযোগী এমনি করিয়াই অমৃতলোকের পরম তত্ত্বটি তাঁহার আত্মজনের কাছে আবার সেদিন উদ্ঘাটন করিয়া যান।

দ্রোণগিরির পর্বত কন্দরে, এক অলৌকিক লীলাব মধ্য দিয়া বাবাজী মহারাজের যোগসাধনার বীজটি রোপিত হয়, দিনের পর দিন তাহাতে হয় শক্তি সঞ্চারিত। সেই শিবকল্ল পুরুষেরই উত্তর-সাধকরূপে মহাযোগী লাহিড়ী মহাশয় সমাজ ও গার্হস্থ্য-জীবনের স্তরে স্তরে এ বীজ ছড়াইয়া দেন। ঈশ্বর নির্দিষ্ট এক মহানব্রত তাঁহার মাধ্যমে উদ্ঘাপিত হয়।

যোগীবর গম্ভীরনাথজী

নশ্বদার তট ধরিয়৷ সন্ন্যাসী আগাইয়া চলিয়াছেন । শিরে দীর্ঘ জটার ভার নামিয়া আসিলেও বয়সে তিনি তরুণ । দেহখানি স্থায় সমুন্নত, অঙ্গকান্তি স্বর্ণাভ, আননে অপূর্ব মহিমার ব্যঞ্জনা, নয়ন দুইটি আনন্দের দ্যুতিতে ঝলমল করিতেছে । সহস্র সহস্র সাধু-সন্তের ভীড়ের মধ্যেও এই দিব্যশ্রীমণ্ডিত সাধককে হারাইবার উপায় নাই ।

প্রায় চার বৎসর পূর্বে এ পাদ-পরিক্রমার ব্রত তিনি গ্রহণ করেন । নশ্বদার উৎসমুখে বিরাজমান অমরকণ্ঠকের মহাতীর্থ । সেখান হইতে এ যাত্রা তাঁহার শুরু হইয়াছে, সমুদ্রসঙ্গম ঘুরিয়া আবার সেই পুণ্যস্থলীতেই ঘটিবে ইহার পরিসমাপ্তি ।

এ পথে তীর্থযাত্রী ও সাধুসন্তের চলার যেন বিরাম নাই । কখনো সাধু জমায়েতের মধ্যে, কখনো বা একাকী তরুণ সাধক অগ্রসর হইয়া চলিয়াছেন । আপন আনন্দে তিনি নিরন্তর ভরপুর ।

পুণ্যতোয়া তটিনীর নানা তীর্থে, নানা ঘাটে তাঁহাকে অবগাহন করিতে হয় । কখনো বা নদীতীরের বালুকা-গোফায় দিনের পর দিন তিনি ধ্যানে অতিবাহিত করেন । মাঝে-মাঝে পথে পড়ে বৃহৎ অরণ্য । কোন বিশেষ জায়গাটি ভাল লাগিলে সাধক সেখানে রূপড়ি বাঁধিয়া ফেলেন—আত্মসমাহিত হইয়া দু-দশদিন হয়তো ইহাতে কাটাইয়া দেন ।

বেলা সেদিন প্রায় পড়িয়া আসিয়াছে, সায়াংসন্ধ্যার বেশী দেৱী নাই । সন্ন্যাসীর চোখে পড়িল—সম্মুখে নদীতীরের এক ক্ষুদ্র পূর্ণকুটির । নিতান্ত নির্জন পরিবেশ, নিকটে কেহ কোথাও নাই ।

কোন তপস্বী হয়তো এখানে সাধনভজনের জন্য কুটির বাঁধিয়া আছে। আপাততঃ কার্যাত্তরে গিয়া থাকিবেন।

কুটির-অঙ্গনে পদার্পণ করিয়াই তাঁহার অন্তর এক অজ্ঞাত আনন্দে ভরিয়া উঠিল। এ কি স্থান-মাহাত্মা? না, তাঁহার নিজেরই কোন এক বিশেষ ধরনের অনুভূতি? কারণ যাহাই হোক, স্থির কবিলেন, দু-চারদিন এখানে কাটাইয়া যাইবেন।

বিশ্রামের পর আসন বিছাইয়া সন্ন্যাসী ধ্যানে বসিয়াছেন। অলক্ষণের মধ্যেই সেখানে এক বিস্ময়কর কাণ্ড ঘটিয়া গেল। তঠাৎ তিনি চোখ মেলিয়া দেখিলেন, এক বৃহদাকার সর্প ফণা উত্তত করিয়া তাঁহার সামনে দাঁড়াইয়া আছে। সাপটির পরবর্তী আচরণও বড় অদ্ভুত। নিষ্পন্দ দেহে স্থির দৃষ্টিতে অনেকক্ষণ চাহিয়া থাকিয়া তরুণ সাধককে উহা প্রদক্ষিণ করিল। তারপবেই অরণ্যের মধ্যে কোথায় মিলাইয়া গেল কে জানে!

সঙ্গে সঙ্গেই এক দিবা অনুভূতির তরঙ্গ সন্ন্যাসীর সর্ব সত্তাকে আলোড়িত করিয়া তোলে।

উপযুপরি তিন দিন এখানে তিনি ধ্যান ও ভজনে অতিবাহিত করিতে থাকেন। কিন্তু আশ্চর্যের বিষয়, প্রতিদিনই আসনে বসিবার সময় সর্পটি তাঁহার সম্মুখে উপস্থিত হয়। আব উহার অন্তর্দ্বানের সঙ্গে সঙ্গেই তিনি সমাধিস্থ হইয়া পড়েন।

কুটিরের অধিকারীটি এবার কার্যাত্তর হইতে ফিরিয়া আসিলেন। ইনি এক চুশ্চর তপস্শ্রাবত ব্রহ্মচারী, দীর্ঘদিন যাবৎ নর্মদাতীরে বসিয়া আপন সাধনায় নিমগ্ন রহিয়াছেন।

অতিথি-সন্ন্যাসীকে দেখিয়া সোৎসাহে তিনি অভ্যর্থনা জানাইলেন। তারপর তাঁহার সহিত কথাপ্রসঙ্গে ঐ সর্পটির বিবরণ শুনিয়া তাঁহার বিস্ময়ের সীমা রহিল না।

নির্বাকভাবে কিছুক্ষণ তরুণ সন্ন্যাসীর দিকে তাকাইয়া থাকিয়া ব্রহ্মচারী কহিলেন, “ভাই, সাধক হিসাবে সত্যই আপনার ভাগ্যেব

সীমা নেই। গত বার বৎসর যাবৎ এই নাগপ্রবরের দর্শনের আশায় আমি বসে রয়েছি, কুটির বেঁধে এখানে তাঁর জন্ম দিন গুণছি। কিন্তু পূর্বজন্মের স্মৃতি নেই, তাই এ দুর্লভ বস্তুর দর্শন আজ অবধি ঘটেনি। প্রকৃতপক্ষে, ইনি এক অসামান্য মহাপুরুষ স্বেচ্ছায় সর্পাকৃতি ধরে বিচরণ কচ্ছেন সাধকদের কৃপা করবার জন্ম। আপনি তিন দিনের ভেতর কি করে এর কৃপালাভ করলেন, আমার কাছে তা সত্যই এক দুজ্জের রহস্য।”

নাগরূপী এই ছদ্মবেশী মহাপুরুষের আশীর্বাদ-ধন্য তরুণ সন্ন্যাসীটিই উত্তরকালে গঙ্গীরনাথ বাবা। শুধু নাথ যোগ-পন্থীদের নায়করূপেই নয়, সর্বভারতের এক নার্থকনামা যোগী ও ব্রহ্মজ্ঞ পুরুষরূপেও এই মহাত্মার খ্যাতি-প্রতিপত্তির সীমা ছিল না।

নাথযোগী সম্প্রদায় এ দেশে এক সুপ্রাচীন যোগসাধনার ধারাকে বহন করিয়া চলিয়াছেন। মহাযোগী গোরক্ষনাথ হইতে এই বিশিষ্ট সাধন প্রণালীর সূচনা। উত্তরকালে পরম্পরাক্রমে এই সম্প্রদায়টিতে বহু স্বনামধন্য যোগীর অভ্যুদয় ঘটে, এই সব শক্তিধর মহাপুরুষদের দ্বারা যোগসাধনার ধারাটি দিকে দিকে বিস্তারিত হয়। আজও ভারতের দূর-দূরান্তস্থিত নানা অঞ্চলে নাথ-পন্থী সাধকদের স্থাপিত মঠ, আশ্রম ও যোগশুভা কম দেখা যায় না।

গোরক্ষপুরের প্রসিদ্ধ গোরক্ষনাথ মঠ এই সাধনকেন্দ্রগুলির মধ্যে বিশিষ্টতম। বিশেষ করিয়া শিবকল্লযোগী গোরক্ষনাথজীর স্মৃতিবিজড়িত থাকায় ইহার মাহাত্ম্য আরও না বাড়িয়া পারে নাই। কথিত আছে সুদূর অতীতে এক সময়ে গোরক্ষনাথজী এ অঞ্চলে দীর্ঘকাল কঠোর তপস্যায় নিরত ছিলেন। সে সময়ে এ স্থান ছিল গহন অরণ্য। উত্তরকালে তাঁহার তপঃক্ষেত্রটিকে কেন্দ্র করিয়াই মঠ ও মন্দির ইত্যাদি গড়িয়া উঠে। আজিকার দিনে গোরখপুর নগরী সেই পবিত্র সাধনস্থলীর চারদিকেই গাড়া উঠিয়াছে।

গোরখপুর মঠের পূর্বেরকার সে প্রসিদ্ধি আজ আর তেমন নাই। তপোনিষ্ঠ যোগপন্থী সাধকদের উপযোগী পবিত্র ও নির্জন পরিবেশও সেখানে আর পাওয়া যাইবে না। কিন্তু ইহা সত্ত্বেও গোরক্ষনাথ মঠ গুরুপরম্পরাক্রমে তাহার পূর্বতন গৌরব ও সাধন-ঐতিহ্য বহন করিয়া চলিয়াছে। তীর্থকামী যাত্রী ও সাধুসন্তদের আনাগোনা তাই এখানে কম দেখা যায় না। নাথযোগীদের কেন্দ্রস্থলরূপে গোরখপুর মঠ আজিও তাহার বৈশিষ্ট্য লইয়া দণ্ডায়মান আছে।

উনবিংশ শতাব্দীর মধ্যভাগের কথা। ভারতীয় যোগীসমাজে গোরখপুর মঠের প্রবীণ মোহান্ত বাবা গোপালনাথজীর তখন খ্যাতি প্রতিপত্তির অস্ত নাই। দূর-দূরান্ত হইতে আগত একদল মুমুক্শু সে সময়ে তাঁহার পদপ্রান্তে বসিয়া যোগ-সাধনা করিয়া চলিয়াছেন।

কিন্তু গোরখপুর মঠে তখনও তেমন ভীড় জমিয়া উঠে নাই। চারদিকে নির্জন বাগবাগিচা ও অরণ্যে রহিয়াছে সাধনোপযোগী পরিবেশ। আশ্রমের নাথজীর মন্দিরটি ঘিরিয়া ঋতকগুলি ছোট ছোট সাধনকুটির বর্তমান। যোগসাধনব্রতী সন্ন্যাসীরা এখানে আসন স্থাপন করিয়া বসিয়াছেন।

এক সৌম্য ও সুদর্শন যুবক সেদিন মঠে আসিয়া উপস্থিত। পরিধানে তাঁহার মূল্যবান সিল্কের পরিচ্ছদ, চোখে মুখে অনগ্রসর মর্যাদার ছাপ। একবার দেখার পর চারুদর্শন, ব্যক্তিত্বসম্পন্ন এই তরুণকে কোনমতে বিস্মৃত হইবার উপায় নাই। আশ্রমের সকলেই উৎসুক দৃষ্টি তাঁহার উপর পড়িল।

প্রথমে সকলের মনে হইয়াছিল, যুবক কোন ধনাঢ্য গৃহের সন্তান। পুণ্যকামী বা কোতূহলী দর্শকরূপেই মঠে বেড়াইতে আসিয়াছেন। দর্শনাদি শেষ হইলেই আবার স্বস্থানে চলিয়া যাইবেন। কিন্তু তাঁহার ভাবভঙ্গী ও আচরণে তেমন কিছু বুঝা গেল না। ভাবতন্ময় হইয়া বহুক্ষণ তিনি বাবা গোপালনাথজীর চরণোপান্তে বসিয়া রহিলেন।

যোগীবর গন্তীরনাথজী

তারপর মোহান্ত মহারাজের প্রকোষ্ঠ হইতে ফিরিয়া আসিলে জানা গেল, যোগীগুরুব কাছে চিরতরে তিনি আত্মসমর্পণ করিয়াছেন।

মুক্তিব ইশারা তাঁহাকে ঘরের বাহির করিয়া আনিয়াছে, আর সেখানে ফিরিবার বিন্দুমাত্র ইচ্ছা নাই। গার্হস্থ্য জীবন তাঁহার ধন্য নপূর্ণ, অভাব অনটন ও অশান্তি কিছু নাই। অথচ ত্যাগ-বৈরাগ্যময় জীবনকেও তিনি আজ গ্রহণ করিয়া বসিলেন। প্রবীণ সাধকের সতর্কবাণী, কচ্ছুরত ও যোগসাধনার দুর্গম পথের কথা—সব কিছুই তাঁহার কর্ণে পৌঁছিল, কিন্তু মর্মে প্রবেশ করিল না।

অধ্যাত্মজীবনের চরম সার্থকতা তরুণ চাহিতেছেন। এ লক্ষ্য হইতে বিচ্যুত হওয়াব কোন প্রশ্নই সেদিন তাই তাঁহার কাছে উঠিল না।

নিতান্ত স্বল্পকালের সান্নিধ্য ও কথাবার্তা—কিন্তু ইহারই মধ্য দিয়া বাবা গোপালনাথ সেদিন যুবকের অন্তর্লোকে কোন্ মহাবস্তুর সন্ধান পাউয়াছেন তাহা কে বলিবে! দেখা গেল, মুমুক্শু তরুণের আত্মসমর্পণে যেমন বিলম্ব হয় নাই, যোগী গোপালনাথও তেমনি তৎক্ষণাৎ ইঁহাকে গ্রহণ করিতে দ্বিধা কবেন নাই।

দীক্ষা দানের পর সৌম্য-দর্শন সাধকের তিনি নামকরণ করিলেন—গন্তীরনাথ। নাম এবং নামীব একাত্মকতা খুব কম সাধকের জীবনেই এমন সার্থকভাবে, এমন অপরূপ মহিমায় ফুটিয়া উঠিতে দেখা গিয়াছে।

কাশ্মীর-জম্মুর একটি ক্ষুদ্র গ্রামে গন্তীরনাথজী আবির্ভূত হন। বর্দ্ধিষ্ণু মধ্যবিস্ত পরিবারে তিনি লালিত। দূর পল্লী অঞ্চলে তখনও শিক্ষার বিস্তার ঘটে নাই, তাই গ্রাম্য বিদ্যালয়ের সামান্য শিক্ষা লাভ করিয়াই তাঁহাকে সন্তুষ্ট থাকিতে হয়।

বালক কিন্তু বড় প্রতিভাবান। মোটামুটি লেখাপড়া ও খেলাধুলার সঙ্গে সঙ্গে কলাবিদ্যার চর্চাও তিনি কিছু কিছু করিতে থাকেন। ভজন গান ও সেতার বাদনে তাঁহার দক্ষতা ফুটিয়া উঠে। দেহখানিও

তঁাহার অপরূপ রূপলাবণ্যের আধার—সুঠাম ও সুদৃঢ়। প্রিয়দর্শিতা ও পারদর্শিতার এক বিচিত্র সমাহার তঁাহার মধ্যে।

আবালবুদ্ধবনিতার ভালবাসা যেমন এই বালকের উপর বর্ষিত হইত, তেমনই এক অনাবিল প্রেমের সম্বন্ধে সকলের সঙ্গে নিজেকেও তিনি বাঁধিয়া লইয়াছিলেন। গ্রামের দুঃখী ও বিপন্নদের জন্য তঁাহার সমবেদনার অন্ত ছিল না। তাহাদের সেবায় ও সাহায্যদানে কোন-দিনই তঁাহার তৎপরতার অভাব দেখা যায় নাই।

গম্ভীরনাথের সংসারে প্রাচুর্য্য যথেষ্ট, জীবনের সুখসম্ভোগের নানা দ্বারই তঁাহার সম্মুখে উন্মুক্ত। কিন্তু সেদিকে তঁাহার কোন আকর্ষণই নাই। এক স্বাভাবিক বৈরাগ্যের স্রোত ফল্গুধারার মত নীরবে জীবনের অন্তস্তলে বহিয়া যাইতেছে। এক সহজাত অনাসক্তি এই বালক বয়স হইতেই যেন সমগ্র পরিপার্শ্ব হইতে তঁাহাকে পৃথক করিয়া দিয়াছে। সমবয়স্ক বিভাথী ও খেলার সাথীরা তাই তঁাহাকে সম্মুখের চোখে না দেখিয়া পারিত না।

গ্রামের অদূরে এক মহাশ্মশান। কিশোর গম্ভীরনাথের বৈরাগ্য-প্রবণতা প্রায়ই তঁাহাকে সেখানে টানিয়া আনে। চিতাধূম সমাচ্ছন্ন শ্মশানক্ষেত্রের এক প্রান্তে আত্মভোলা হইয়া তিনি নীরবে প্রহরের পর প্রহর বসিয়া থাকেন।

জটাজুটমণ্ডিত, ত্রিশূল-করোটিধারী সন্ন্যাসীর দল প্রায়ই শ্মশানে আসিয়া উপস্থিত হন। গম্ভীরনাথ পরম আনন্দে তাহাদের সেবায় লাগিয়া যান। আটা-ষি ও ধূনীর কাষ্ঠ সংগ্রহ প্রভৃতি কাজে তঁাহার উৎসাহের সীমা থাকে না। অবসর পাইলেই সাধকদের পদপ্রান্তে বালক তন্ময় হইয়া বসিয়া পড়েন। মন তঁাহার কোন্ অজানা লোকের অভিষাত্রায় বাহির হয় তাহা কে জানে !

সন্ন্যাসীদের সান্নিধ্যে একবার গিয়া বসিলে ভাবগম্ভীর গম্ভীরনাথের কোন হুঁসই থাকে না। এক-একদিন সমস্ত রাত্রিই নানা ধর্মপ্রসঙ্গে

অতিবাহিত হইয়া যায়। বাড়ীর লোকের তিরস্কার ও গল্পনা এজন্য কম সহ্য করিতে হয় না। কিন্তু তবুও অভ্যাসের পরিবর্তন হয় কই?

এই ভয়াল নির্জন শ্মশানে মন তাঁহার কি এক অজানা আকর্ষণে ছুটিয়া আসে। শ্মশানচারী সন্ন্যাসীদের সঙ্গে ঘুরিবার ফলে জীবনের মূল্যবোধটি বদলাইয়া যায়—বৈরাগ্যময় জীবনের সহিত ধীরে ধীরে যোগাযোগ স্থাপিত হয়। সমর্থ সাধকপুরুষ দেখিলেই শ্রদ্ধাভরে তিনি তাঁহার পরিচর্যায় রত হন, ধর্ম ও সাধনরহস্য শিক্ষার জন্য ব্যাকুল হইয়া উঠেন।

মুক্তির নেশা ক্রমে তাঁহার কিশোর জীবনকে চঞ্চল, অতিষ্ঠ করিয়া তোলে। যোগসাধনার মধ্য দিয়া পরম সিদ্ধির পথে তাঁহাকে এবার বাহির হইতে হইবে। কিন্তু কিশোর মনে কেবলই প্রশ্ন জাগে—তপশ্চর্য্যার এই দুর্গম পথে কুপাময় গুরুর আবির্ভাব তাঁহার জীবনে কবে সম্ভব হইবে? কোথায় তাঁহার সন্ধান পাইবেন?

অন্তরের ব্যাকুলতা ও ঐশীকুপা সদৃশ গুরুর সন্ধান অচিরেই আনিয়া দিল। গ্রামের ঐ শ্মশানে মাঝে মাঝে এক বৃদ্ধ যোগীর আগমন ঘটিত, গম্ভীরনাথও আন্তরিকভাবে ইঁহার সেবায় লাগিয়া যাইতেন। এই সর্বব্যাপী সাধকের প্রতি তাঁহার শ্রদ্ধার সীমা ছিল না। মহাআটি কুপাপরবশ হইয়া মাঝে মাঝে তাঁহাকে কিছু কিছু সাধন-উপদেশ দান করিতেন।

গম্ভীরনাথ একদিন ইঁহার নিকট দীক্ষা চাহিয়া বসিলেন। সন্ন্যাসী কহিলেন, “বেটা, আমা হতে তোর দীক্ষা লাভ হবে না। তোর গুরু হচ্ছেন গোরখনাথ মঠের মোহান্ত, বাবা গোপালনাথ। সেই সিদ্ধ যোগীবরের চরণে তুই আশ্রয় গ্রহণ কর।”

মুক্তিসন্ধানী গম্ভীরনাথের জীবনের পরম লগ্নটি সেদিন নিকটে আসিয়া গিয়াছে। ঈশ্বর-প্রেরিত দূতরূপে যোগী সেদিন তাহারই ইঙ্গিতটি দিয়া গেলেন।

হৃদয়মধ্যে এক অব্যক্ত বেদনা কেবলই গুমরিয়া মরিতেছে। এ বেদনা উদাসী গস্তীরনাথকে সংসার হইতে টানিয়া বাহির করিল। গৃহের স্নেহনীড়, পল্লীজীবনের আনন্দময় পরিবেশ, সব কিছু তাঁহার কাছে সেদিন শুধু তুচ্ছ নয়, দুঃসহও হইয়া উঠিয়াছে।

বাবা গোপালনাথ উত্তর ভারতের এক মহাসমর্থ যোগী। অসামান্য ঋদ্ধি ও সিদ্ধিরই শুধু অধিকারী নন, বহু মুমুক্শুরও ইনি পরমাত্মায়। ইঁহারই চরণে আত্মসমর্পণের জ্ঞাত গস্তীরনাথ সেদিন চিবতবে গৃহত্যাগ করিয়া আসেন।

মহাযোগী গোপালনাথের কৃপা তাঁহার জীবনে এক নূতনতর অধ্যায়কে উন্মোচিত করিয়া দিল; নাথপন্থের বিশিষ্ট যোগসাধনকে আঁকড়িয়া ধরিয়া গস্তীরনাথজী তাঁহার পরম প্রাপ্তির পথে অগ্রসর হইয়া পড়িলেন।

কিশোর সাধনাৰ্থী যে একজন উত্তম অধিকারী প্রথম সাক্ষাতেই তাহা বুঝিয়া নিতে বাবা গোপালনাথের ভুল হয় নাই। শুধু তাই নয়, দেহ ও মনের প্রস্তুতির দিক দিয়া এই তরুণ অনন্তসাধাবণ,

হাও তাহার দিব্যদৃষ্টির অগোচর বহে নাই। যোগপন্থার সাধন ও সিদ্ধির ক্রম একের পর এক তিনি সমস্তে তাহাকে শিক্ষা দিতে থাকেন। নবীন শিষ্যের সাধননিষ্ঠাব সহিত গুরুকৃপার সঞ্জীবনীধাবা মিণিত হয়, প্রাক্তন যোগসংস্কাবটি সাধকের অন্তরসত্তায় উজ্জীবিত হইয়া উঠে।

দীক্ষা গ্রহণের পর গস্তীরনাথজী সোৎসাহে ষাট-প্রদত্ত যোগসাধন পদ্ধতি আয়ত্ত করিতে থাকেন। কিছুদিন পর বাবা গোপালনাথজী শিষ্যের চুটিকাটা বা শিক্ষা ছেদনের পবিত্র অনুষ্ঠানটি সম্পন্ন করিলেন। নাথ যোগীদের রীতি অনুযায়ী নবীন সাধকের ‘অওঘর’ শ্রেণীভুক্ত করিয়াও লওয়া হয়। ‘নাদ, সেলি ও কোপীন’ পরিধান করিয়া তিনি পূর্ণ সন্ন্যাসাশ্রম গ্রহণ করেন। নিষ্ঠাবান তরুণ সাধকের জীবনে এ সন্ন্যাস এক নূতনতর তাৎপর্য্য নিয়া আত্মপ্রকাশ করে।

যোগীবর গন্তীরনাথজী

প্রিয়দর্শন, তপোনিষ্ঠ গন্তীরনাথজীকে এ সময়ে যে দেখিত সে-ই আকৃষ্ট হইয়া পড়িত। তাঁহার পূর্বাশ্রমের পরিচয় জানতে অনেকেরই কৌতূহলের সীমা ছিল না। কিন্তু সব কিছু প্রশ্নের উত্তরে নবীন যোগীকে স্থিতহাস্তে শুধু বলিতে শুনা যাইত—“প্রপঞ্চসে ক্যাং হোগা ?”—অর্থাৎ, মায়াময় সংসারের কথা জানবার কি প্রয়োজন ?

সর্বস্ব ত্যাগ করিয়া এবার সর্বদময়কে পাইতে হইবে,—এই সঙ্কল্পের দীপশিখাটিই গন্তীরনাথজীর অন্তরে নিরন্তর জ্বলিতেছে।

কিন্তু সাধনভজন ও ধ্যানের গভীরে একান্তভাবে তিনি নিজেকে ডুবাইয়া রাখিতে চাহিলে, গুরুজী তাঁহাকে কিছুকালের জন্য সেবাধর্মের কাজেই নিয়োজিত করিলেন। আশ্রমের নাথজীর অর্চনা, গুরু মহারাজের সেবাশুশ্রূষা ও অতিথি সাধু-সন্তদের আপ্যায়ন তাঁহাকেই কবিতো হয়। গো-মহিষের তত্ত্বাবধান ও আয়-ব্যয়ের হিসাবনিকাশের ভাবও তাঁহার উপর। মঠের নানা বৈষয়িক কন্ডোও এসময়ে তাঁহাকে কম সাহায্য করিতে হইত না। স্বল্পবাক্য, গন্তীরমূর্তি এ সাধককে এতটুকু সময়ের অপব্যয় কবিতো কেহ কখনো দেখে নাই। দৈনন্দিন কাজগুলি নীববে ও নিষ্ঠা সহকারে সম্পন্ন কবিয়া তিনি গুরু-উপদিষ্ট সাধনায় বসিতেন।

মঠ-মন্দিরের জনবহুল পরিবেশে, সেবা-পরিচর্যা প্রভৃতি কর্মের মধ্যে জড়িত থাকিয়াও তরুণ যোগী কিন্তু সদা থাকিতেন অন্তর্মুখী। বহিঃ জীবনের নানা চঞ্চলতার মধ্যে বহিয়াও নির্লিপ্ত ও প্রশান্তি তিনি লাভ করিবেন—ইহাই ছিল গুরু গোপালনাথের কাম্য।

গন্তীরনাথের এ সময়কাল সাধননিষ্ঠা ও অগ্রগতি গোবর্ধনপুর মঠের অধিবাসীদের বিস্মিত করিত।

নাথ যোগীদের সাম্প্রদায়িক রীতি-নীতি অনুযায়ী সাধকদের শেষ আনুষ্ঠানিক কাজ ‘কর্ণবেধ’। যোগীশ্বর মহাদেবের প্রতীকরূপে গুরুজী এই সময়ে শিষ্যের কর্ণে দুইটি কুণ্ডল পরাইয়া দেন। এই ধরনের

কুণ্ডলকে বলা হয় 'দর্শনী'। নাথ সন্ন্যাসীদের কর্ণে ছিদ্র করিয়া ইহা প্রবেশ করানো হয় বলিয়া তাঁহাদিগকে 'দর্শনযোগী'ও বলা হয়। পশ্চিম অঞ্চলের সাধারণ লোকের কাছে ইহারা 'কানফাট্টা যোগী' নামেও পরিচিত।

গুরু গোপালনাথ এবার গন্তীরনাথজীব কর্ণবেধ দীক্ষার জন্য উদ্যোগী হইলেন। তাঁহার ব্যবস্থাক্রমে প্রবীণ ও প্রসিদ্ধ নাথযোগী বাবা শিবনাথজী কর্তৃক এ দীক্ষাকার্য্য সম্পন্ন হইল।

সাম্প্রদায়িক আচার-অনুষ্ঠানাদি সবই ক্রমে শেষ হইয়া গেল। কিন্তু ইহাতে গন্তীরনাথজীর অন্তরের পিপাসা নিবৃত্ত হয় কই? পূর্ণাঙ্গ যোগের যে উচ্চতম স্তরে উঠিতে তিনি অভিলাষী, যে চরম অধ্যাত্ম-অনুভূতির আস্বাদ তিনি পাইতে চান, তাহা কোথায়? এই জনবহুল মঠে, এত কর্ম্মব্যস্ততার মধ্যে বসিয়া তিনি এ বস্তু কি করিয়া লাভ করিবেন?

শিবকল্প গোরক্ষনাথজীব সাধনজীবন গন্তীরনাথের আদর্শ। সংসার-আবেষ্টনীর বাহিরে, গহন অরণ্যে বসিয়া এই মহাযোগী সুদীর্ঘ তপস্যায় রত রহিয়াছেন, অসামান্য যোগৈশ্বর্য্য ও ব্রহ্মজ্ঞান তিনি লাভ করিয়াছেন। সেই পরম প্রাপ্তির আশায় তরুণ সাধক ব্যাকুল হইয়া উঠিলেন। তীব্রতর তপস্যার জন্য প্রস্তুত হইতে আর তাঁহাব বিলম্ব সহিল না।

অধ্যাত্ম-অনুভূতির দ্বারগুলি তখন একটির পর একটি খুলিয়া যাইতেছে। সাধক তাই সুদূর নির্জন স্থানে গিয়া নিরবচ্ছিন্ন সাধনায় ব্রতী হইতে চাহিতেছেন। গুরু গোপালনাথজী এবার তাঁহাকে আর বাধা দেন নাই। তিন বৎসর নিজের ঘনিষ্ঠ সান্নিধ্যে রাখিবার পর স্নেহভাজন শিষ্যকে তিনি আশ্রম ত্যাগের অনুমতি দেন।

গোরখপুর হইতে দক্ষিণ দিকে প্রথমে গন্তীরনাথজী পা বাড়ান। বিশ্বনাথধাম বারাণসী হয় তাঁহার প্রথম গন্তব্যস্থল। যুগযুগান্তের

সাধকদের চির অভিলষিত এই তপঃক্ষেত্র । কিছু
সাধন-ভজন করিবেন ইহাই তাঁহার অভিলাষ ।

দ্বিযাগ ও
মুটে

নিষ্কিঞ্চন যোগী শুধু একখানি কোপীন ও কস্বর
পথ হাঁটিতেছেন । ক্ষুধাতৃষ্ণা ও আশ্রয়ের জন্ত তাঁ
গ্রহণ করিয়াছেন অবাচক বৃত্তি ।

পথ চলিতে চলিতে গন্তীরনাথ একদিন বড় ক্লান্ত হইয়া পড়িয়াছেন,
ক্ষুৎপিপাসায়ও তিনি অত্যন্ত কাতর । এমন সময় দেখা গেল, এক
পূর্বপরিচিত ব্রাহ্মণ তাঁহার দিকে দ্রুত ছুটিয়া আসিতেছেন ।

নিকটে আসিয়া তিনি গন্তীরনাথকে সম্বোধে এক বৃক্ষচ্ছায়ায়
বসাইলেন । তারপর সবিনয়ে কহিলেন, গত রাত্রে শ্রীনাথজী তাঁহাকে
স্বপ্নাদেশ দিয়াছেন, ‘এ স্থানে এক শ্রান্ত, ক্ষুধার্ত্ত পরিব্রাজকের আগমন
হবে, তুমি তাঁর ভোজন ও সেবাপরিচর্য্যার ব্যবস্থা করো ।’

ব্রাহ্মণ তাই এমন ব্রহ্মপদে ছুটিয়া আসিয়াছেন । বড় অযাচিত-
ভাবে প্রাপ্ত এ আহাৰ্য্য । ভোজন শেষ হইলে গন্তীরনাথ আবার
পথ চলিতে আরম্ভ করিলেন ।

কাশীতে পৌছিয়া তাঁহার আনন্দের আর সীমা নাই । এই পবিত্র
ভূমি তাঁহার মতে, সৰ্ব্বতীর্থের রাজ্য । গঙ্গাস্নান ও বিশ্বনাথজীর
অৰ্চনার পর নদীতীরে একটি নির্জন স্থান তিনি বাছিয়া নেন ।
ক্রমান্বয়ে তিন বৎসরকাল এখানে কঠোর যোগসাধনায় ব্রতী হন ।
এসময়ে নানা উচ্চতর আধ্যাত্মিক অনুভূতিসমূহ তিনি অর্জন করিতে
থাকেন, শক্তিমান সাধক বলিয়া ক্রমে এ অঞ্চলে তাঁহার খ্যাতি রটিয়া
যায় । ইহার পর মানুষের ভীড়কে আর বাধা দেওয়া গেল না ।
যোগসাধনার নির্জন পরিবেশটি এভাবে নষ্ট হওয়ায় গন্তীরনাথজী
কাশীধাম ত্যাগ করিলেন ।

এবার তাঁহার সাধনস্থল হয় প্রয়াগধাম । ঝুঁসির চড়ায় জন-
বিরল স্থানে এক বালুকা-গুফায় বসিয়া তাঁহার কঠোর তপশ্চর্য্যা
শুরু হয় ।

দৈবানুগ্রহে এ সময়ে মুকুটনাথ নামক এক তরুণ সাধু যেন কোথা হইতে এখানে আসিয়া উপনীত হন। অধ্যাত্মসাধনার দিক দিয়া নাথপন্থেরই তিনি অনুবর্তী। সাধক গম্ভীরনাথ তখন নিরবচ্ছিন্ন ধ্যান-জপ ও যোগসাধনায় ডুবিয়া রহিয়াছেন। শীতাতপ তাঁহার মাথার উপর দিয়া চলিয়াছে, দেহের কোন প্রয়োজনের দিকেই দৃষ্টি দিবার তাঁহার অবসর নাই। কি জানি কেন, তরুণ সাধক মুকুটনাথ এই ত্যাগ-তিতিক্ষাময় যোগীর প্রতি আকৃষ্ট হইয়া পড়িলেন। এখন হইতে গম্ভীরনাথজীর সমস্ত পরিচর্যার ভার তিনি সাগ্রহে গ্রহণ করিলেন।

গম্ভীরনাথ ধীরে ধীরে এবার তাহার যোগসাধনার গভীরতর স্তরে ডুবিয়া যাইতেছেন। অন্তরে এখন তাঁহার তীব্র ব্যাকুলতা ও ছর্ব্বার সঙ্কল্প—যোগসিদ্ধির শীর্ষে তাঁহাকে আরোহণ করিতেই হইবে। সাধনগুহার বাহিরে এ সময়ে তিনি কদাচিৎ আল্পপ্রকাশ করিতেন। বাহিরের লোকের সাথে বাক্যালাপ দূরের কথা, একান্ত সেবক মুকুটনাথের সহিতও দিনান্তে তাঁহার খুব কম কথাবার্তা হইত। যে দৃঢ় সঙ্কল্প ও একাগ্রতা নিয়া তিনি যোগসাধনায় ব্রতী হইয়াছিলেন, এ সময়ে তাহা অনেকাংশে সফল হইয়া উঠে। একনিষ্ঠ তপস্যার ফলে তাঁহার সাধনসত্তায় দেখা দেয় অসামান্য যোগশক্তির বিকাশ।

প্রয়াগের ঝুঁসি-সৈকতের সেই বালুকা-গুহায় গম্ভীরনাথ একাদিক্রমে তিন বৎসর সাধনা করিয়াছিলেন। তারপর এ অঞ্চল তিনি ত্যাগ করেন ও নর্ম্মনা পরিক্রমায় ব্রতী হন।

কঠোর তপস্যার ফলে গম্ভীরনাথজী সাধনার স্থিরভূমি লাভ করিয়াছেন। এবার সাধক জীবনে শুরু হয় ব্যাপক পর্য্যটনের পাল। ভারতের সমতল ও পার্বত্য প্রদেশের সর্বত্র সহজগম্য ও হৃগম্ য়া কিছু তীর্থ আছে, কোনটির দর্শনই তিনি বাদ দেন নাই।

উত্তরকালে পরিব্রাজক-জীবনের বিচিত্র অভিজ্ঞতার কথা বলিতে গিয়া তিনি ইহার কল্যাণকারিতার উপর জোর দিতেন। শিষ্যদের

যোগীবর গন্তীরনাথজী

বলিতেন—“মনে রেখো, প্রাত্যহিক জীবনের অভাব-অভিযোগ ও সুখ-দুঃখের স্পর্শে এসে পরিব্রাজনরত সাধকের ভ্রম ও সংশয় ছুটে যায়—বৈরাগ্যে সুপ্রতিষ্ঠিত হবার ফলে তাঁর দেহাত্মবুদ্ধিও ক্রমে নষ্ট হয়। এইটাই হচ্ছে পর্যটনের সব চাইতে বড় লাভ।”

পরিব্রাজনরত গন্তীরনাথজী এবার কিছু সময়ের জন্য গুরুধাম গোরখপুরে প্রত্যাবর্তন করেন। ইতিমধ্যেই সিদ্ধপুরুষ বলিয়া জনসমাজে তাঁহার বেশ খ্যাতি রটিয়া গিয়াছে, তাঁহার ত্যাগ-তিতিষ্কার কথা সাধুসন্তদের মধ্যে আলোচিত হইতেছে।

প্রিয় শিষ্যকে আবার কাছে পাইয়া মোহান্ত গোপালনাথজী যেমন অপার সন্তোষ লাভ করিলেন, আশ্রমিকদেরও তেমনি আনন্দের অবধি রহিল না। কিন্তু জনবহুল মঠের আবেষ্টনী গন্তীরনাথজীকে বেশীদিন ধরিয়া রাখিতে পারে নাই। পরম প্রাপ্তির আকাঙ্ক্ষা আজিও তাঁহার জীবনে পূর্ণ হয় নাই, নিভৃত তপস্যার জন্য তাই আবার তিনি ব্যগ্রভাবে বাহির হইয়া পড়িলেন।

গয়ার নিকটেই ব্রহ্মাযোনী পাহাড়। এ পাহাড়ের সান্নিধ্য রহিয়াছে কপিলধারা নামে এক মনোরম জনবিরল স্থান। পরিব্রাজক সেদিন এখানে আসিয়া থামিয়া পড়িলেন।

এ স্থানই কি তাহার অভিষ্টসিদ্ধির চিহ্নিত ভূমি? হঠাৎ তাঁহার মর্ষমূলে কে যেন এ স্থানের ঘনিষ্ঠ যোগবন্ধনটির কথা জানাইয়া দিয়া গেল। এক অপূর্ব প্রেরণায় তিনি উদ্বুদ্ধ। স্থির করিলেন সিদ্ধির জন্য এখানেই আসন পাতিবেন।

এখানকার প্রাকৃতিক পরিবেশ বড় রমণীয়। তপোভূমির পবিত্রতা ওতপ্রোত রহিয়াছে ধূলিকণায় ও আকাশে বাতাসে। তিন দিকে তরুলতামণ্ডিত সবুজ পাহাড়ের শ্রেণী, আর একদিকে লোকালয়গামী সর্পিলা অরণ্যপথ। নিম্নে অদূরে জঙ্গলাকীর্ণ কপিলেশ্বর শিবের প্রাচীন মন্দির দণ্ডায়মান। সমগ্র অঞ্চলটিতে এক বিস্ময়কর নৈঃশব্দ ও

নিভৃতি। ছ-একটি সাধনরত সন্ন্যাসী ছাড়া এ অঞ্চলে স্থায়ীভাবে কেহ বসবাস করিতে আসে না।

এ অঞ্চলের সাধন-ঐতিহ্যও নিতান্ত কম নয়। বিষ্ণুপাদপুত গয়া অবস্থিত অতি নিকটে। এখানেই সাধিত হইয়াছিল বুদ্ধ ও চৈতন্যের পরম রূপান্তর। এই পুণ্যময় পরিবেশেই গভীরনাথ তাঁহার পূর্ণতর সিদ্ধির জন্ম তৎপর হইলেন।

কপিলধারার নিজ্জন পার্বত্য অঞ্চলে তাঁহার তপস্ত্যার ধারাটি নিরবচ্ছিন্নভাবে বহিয়া চলে। কখনো উদার উন্মুক্ত আকাশের তলে, কখনো ব্রহ্মযোনি পাহাড়ের গহ্বরে তিনি আত্ম-সমাহিত থাকেন। শীত বর্ষা গ্রীষ্ম—ঋতুর পর ঋতুর আবর্তন মাথার উপর দিয়া কখন চলিয়া যায়, কোনদিকেই তাঁহার ভ্রক্ষেপ নাই। অবিচল নিষ্ঠায় অধ্যাত্ম-জীবনের সার্থকতর অধ্যায়গুলি একের পর এক তিনি উন্মোচন করিয়া যাইতেছেন।

বহিরঙ্গ জীবনের অনেক কিছু গভীরনাথজী এ সময়ে বর্জন করিয়া চলিতেন। কচ্ছুরতী কোপীনবস্ত্র সন্ন্যাসীর সম্বলের মধ্যে মাত্র একখানি কম্বল, নারিকেলের খর্পর ও ফোঁরী বা যোগদণ্ড। সাহায্যকারী সঙ্গী বা সেবক কেহ কোথাও নাই। অন্তর্মুখী হইয়া দিনের পর দিন কেবলই ধ্যানের গভীরে নিমজ্জিত হইয়া যাইতেছেন।

যোগক্ষেম বহনের ব্যবস্থাটিও যেন এ সময়ে ভগবানের অদৃশ্য ইঙ্গিতে সম্পন্ন হইয়া গেল। আকু কুরমী গয়ার উপকণ্ঠবাসী এক দরিদ্র লোক, কাষ্ঠ আহরণ করিয়া সে তাহার জীবিকা অর্জন করে। এজন্য মাঝে মাঝে তাহাকে কপিলধারার অরণ্যে যাইতে হয়। হঠাৎ সেদিন জঙ্গলে ঘুরিতে ঘুরিতে ধ্যানমগ্ন যোগী গভীরনাথের দিব্য মূর্তি তাঁহার দৃষ্টিপথে পড়িয়া গেল।

দর্শনের সঙ্গে সঙ্গেই আকুর জীবনে এক পরিবর্তন ঘটিয়া যায়, নবীন তপস্বীর চরণে সে আত্মসমর্পণ করিয়া বসে। কি এক অমোঘ

যোগীবর গম্ভীরনাথজী

আকর্ষণ এই সন্ন্যাসীর মধ্যে রহিয়াছে, যুরিয়া যুরিয়া বারবার সে তাঁহার চরণতলে আসিয়া উপবেশন করে।

ধূনির কাঠ ও আগুন সংগ্রহের ভার আকু স্বতঃপ্রবৃত্ত হইয়া গ্রহণ করে। প্রতিদিন সাধুবাবার জন্তে কিছু ফলমূল ও ছুত্ব না আনিলেও মন তাহার তৃপ্ত হয় না।

কে এই কঠোরব্রতী সাধক, কি তাঁহার স্বরূপ তাহা সে জানে না, কিন্তু তাঁহার সেবা পরিচর্যার জন্য ব্যাকুলতার অন্ত নাই। পরে তাহার ভাই মুন্নিও গম্ভীরনাথজীর অনুরক্ত হইয়া উঠে এবং ক্রমে সারা কুরমী পরিবারটিই সাধুর সেবায় আত্মনিয়োগ করে।

সরলহৃদয় আকু ও তাহার পরিবারবর্গ, সাধুবাবাকেই তাহাদের অভিভাবক ও স্নহদরূপে সেদিন হইতে ধরিয়া নেয়। দুঃখ দুর্দ্দৈবে কোনক্রমে বাবার নিকট অন্তরের আবেদনটি পৌছাইয়া দিলেই যেন তাহাদের হৃদয়ের ভার মুহূর্তে লাঘব হইয়া যাইত।

আকুর পরিবারের এই নিবিড় সৌহার্দ্য ও নির্ভরতা, এই সেবা ও আত্মত্যাগ গম্ভীরনাথজীকে এক সহজ আত্মীয়তার সূত্রে বাঁধিয়া দিয়াছিল। শুধু এ সময়েই নয়, উত্তরকালেও দেখা যাইত, মহাযোগীর স্নেহপূর্ণ দৃষ্টি এই দুঃস্থ অশ্রুজ পরিবারটিকে সতত ঘিরিয়া রাখিয়াছে। তাঁহার মনোভাবে ও আচরণে সকলের মনে হইত, এই দরিদ্র কুরমী পরিবারের কাছে তিনি যেন চিরস্থানে আবদ্ধ হইয়া আছেন।

ইহার পর গম্ভীরনাথজীর একান্ত-সেবকরূপে পর পর দেখা দেন নবীন সাধকদ্বয়—নৃপৎনাথ ও সিদ্ধনাথ। গৃহত্যাগ করার পর নৃপৎনাথ সঙ্গুরুর সঙ্কানে নানা স্থানে ঘোরাফেরা করিতেছিলেন। এ সময়ে হঠাৎ একদিন গয়ার কপিলধারায় তিনি গম্ভীরনাথজীর সাক্ষাৎ লাভ করেন। সঙ্গে সঙ্গে এই সৌম্যদর্শন যোগীর চরণাশ্রয় গ্রহণ করিতে কৃতসঙ্কল্প হন।

গম্ভীরনাথজী সহসা কাহাকেও দীক্ষা দিতে রাজী হইতেন না। নৃপৎনাথকে সেদিন তাই প্রত্যাখ্যানই করিলেন। তৎসম্বন্ধেও নৃপৎনাথ

তাঁহাকেই গুরুজ্ঞানে একান্ত নিষ্ঠায় তাঁহার সেবা করিয়া যাইতে থাকেন। ধ্যানসমাহিত যোগীর দৈনন্দিন পরিচর্য্যার ভার এখন, হইতে প্রধানতঃ তাঁহার উপরই পড়ে।

শুধু গম্ভীরনাথের দেহের রক্ষণাবেক্ষণই নয় তাঁহার সাধনার পথে যাহাতে কোন প্রকার বিঘ্ন না হয়, সেদিকেও তীব্র দৃষ্টি রাখিতে নৃপৎনাথের ভুল হইত না। যোগীবরের সাধনভজনের প্রয়োজনানুযায়ী সমস্ত কিছু ব্যবস্থা সম্পন্ন করিয়া তিনি তাঁহার চতুর্দিকে পাহারা দিতেন।

ভয়ঙ্কর ভৈরবের বেশে সজ্জিত, সেবক নৃপৎনাথকে ত্রিশূল হস্তে প্রায়ই হিংস্র জীবজন্তু তাড়াইতে দেখা যাইত। তাছাড়া, কোতুহলী আগন্তুকেরা যাহাতে গম্ভীরনাথজীর যোগসাধনায় বিঘ্ন উৎপাদন না করে সেদিকেও তাঁহার সতর্কতা কম ছিল না। অনেকেই সে সময়ে ভৈরববেশী নৃপৎনাথের ভয়ে ধ্যানমগ্ন যোগীর সম্মুখে সহসা উপস্থিত হইতে সাহসী হইতেন না।

গম্ভীরনাথের সাধনক্ষেত্রের কিছুটা নিম্নভূমিতে খর্পর-ভৈরব নামক স্থানে নৃপৎনাথ ও সিদ্ধনাথ বাস করিতেন। যোগীবরের সেবা পরিচর্য্যার শেষে উভয়ে কপিলধারা হইতে নামিয়া আসিতেন এং নিজেদের পর্ণকুটিরে বিশ্রাম নিতেন। ফলে গম্ভীরনাথজীর কঠোর তপশ্চা এ সময়ে একান্ত নিভূতে অগ্রসর হইবার সুযোগ পায়।

ব্রহ্মযোনী পাহাড়ের স্থানে স্থানে, জনবিরল গুহায় দুই-একটি করিয়া তপস্বীর আস্তানা। ক্রমে ক্রমে ইহাদের মধ্যে গম্ভীরনাথজীর তপঃপ্রভাবের কথা প্রচারিত হইয়া যায়। এই উচ্চকোটি যোগীবরের আসনের সম্মুখে তাঁহারা মাঝে মাঝে আসিয়া জুটিতেন। বাবা গম্ভীরনাথের সন্নিধ্যে বসিয়া সাধনরত হইলে তাঁহারা নাকি অতি সহজে ধ্যানের গভীরে ডুবিয়া যাইতেন।

শুধু ব্রহ্মযোনী পাহাড়ের চারিপাশেই নয়, গয়া অঞ্চলেও এই সময়ে ধীরে ধীরে এ মহাসাধকের যোগৈশ্বর্য্যের খ্যাতি রটিয়া যায়।

কপিলধারার দিব্যদর্শন শক্তিমান মহাত্মার কথা তখন জনসাধারণ জানিয়া ফেলে ।

গয়ার মাধোলাল পাণ্ডা এক ধনী ও প্রতাপশালী লোক । হঠাৎ একটা জটিল, বিপজ্জনক মামলায় তিনি একবার জড়াইয়া পড়েন । এ মামলায় হারিলে পথের ভিখারী হওয়া ছাড়া তাঁহার আর গত্যন্তর নাই । অথচ মোকদ্দমার যে অবস্থা তাহাতে জয়ী হইবার ক্ষীণতম আশাও দেখা যাইতেছে না । আসন্ন সঙ্কটের সম্মুখে দুই চোখে তিনি সেদিন অন্ধকার দেখিতেছেন ।

মাধোলাল অবশেষে নিরুপায় হইয়া গম্ভীরনাথজীর চরণে আশ্রয় নেন, সাক্ষাৎকালে যোগীবরের কাছে আপন দুঃখের কথা নিবেদন করিতে থাকেন ।

আর্তের নয়নাশ্রু বাবা গম্ভীরনাথের অন্তর স্পর্শ করিল । সাস্থনা দিয়া প্রশান্ত কণ্ঠে বলিয়া উঠিলেন, “বেটা, চিন্তা মৎ করো । তুমহাৰা ভালাই হোগা ।”

নিতান্ত অপ্রত্যাশিতভাবেই মাধোলাল এ মামলায় জয়ী হন ভরাডুবি হইতে তিনি রক্ষা পান । আৰ্ত্ত ভক্তরূপে গম্ভীরনাথজীর আশ্রয় গ্রহণ করিয়া ক্রমে ক্রমে তিনি এক প্রকৃত ভক্তে রূপান্তরিত হন । এখন হইতে যোগীবরের সেবায় তাঁহাকেই আত্মনিয়োগ করিতে দেখা যায় । এই একনিষ্ঠ ভক্তের সনির্বন্ধ অনুরোধে গম্ভীরনাথজী তাঁহাকে কপিলধারার সাধনস্থলীতে একটি যোগগুহা ও বেদী নির্মাণে অনুমতি দিয়াছিলেন । প্রায় বার বৎসরেরও উপর একাদিক্রমে সেখানেই তিনি সাধনভজন করিয়া গিয়াছেন ।

যোগগুহার অন্তঃপ্রকোষ্ঠে গম্ভীরনাথ দিনের পর দিন ধ্যানাময় ও সমাধিস্থ থাকিতেন । সেবকগণ এই কক্ষের বাহিরে সামান্য পরিমাণ দুগ্ধ তাঁহার জন্ত রাখিয়া আসিত । ধ্যানাবেশ কাটিবার পর, প্রয়োজন বোধ করিলে গম্ভীরনাথজী উহা পান করিতেন । এভাবে অবস্থান

ভারতের সাধক

করার সময় মহাসাধক তাঁহার গুহা যোগসাধনার উচ্চতর স্তরগুলি পর পর অতিক্রম করিয়া যান।

প্রথম প্রথম সপ্তাহান্তে বা পক্ষান্তে যোগীবর তাঁহার যোগগুহার বাহিরে আসিতেন। দূব দূবাস্ত হইতে ভক্ত, মুমুক্শু আৰ্ত্তের দল সেখানে উপস্থিত হইয়া দর্শনের নিদিষ্ট সময়টির জগ্ৰু অপেক্ষা করিত। গন্তীরনাথজী তখন প্রায়ই থাকেন অন্তিমুখীন। সমাধি ভাঙ্গিলে নীরবে সমাগত জনমণ্ডলীকে আশীর্ব্বাদ জানাইয়া আবার তিনি যোগ-প্রকোষ্ঠে ঢুকিয়া পড়িতেন।

মৌনী হইয়া যোগীবর একবার এ যোগগুহাব মধ্যে একাদিক্রমে তিন মাস অবস্থান করেন। এ সময়কার অত্যাগ্ৰ সাধনার ফলে অভীষিত পরম বস্তু তিনি প্রাপ্ত হন। এক শক্তিমান ব্রহ্মজ্ঞপুরুষরূপে আত্মপ্রকাশ করেন।

গন্তীরনাথজীর সাধনসত্তায় দেখা যাইত যৌগন্ধ্য, জ্ঞান ও প্রেম-মাধুর্য্যের এক অপরূপ সমাহার। বিপুল সাধন ঐশ্বর্য্যকে তিনি এমন সহজ স্বাচ্ছন্দে, এমন মধুর ভঙ্গিমায় বহন করিয়া চলিতেন যে, অসামান্য যোগীরূপে তাঁহাকে চিনিয়া নেওয়া সাধারণের পক্ষে সম্ভব হইত না।

কিন্তু সমসাময়িক কালের বিশিষ্ট সাধক ও ব্রহ্মজ্ঞ পুরুষদের দৃষ্টিতে গন্তীরনাথ বাবার লোকোত্তর সত্তার এই পরিচয় ধরা না পড়িয়া পারে নাই। বরাবার পাহাড়ের প্রবীণ নাথযোগীদ্বয়, ধনিয়া পাহাড়ের নানকপন্থী মহাপুরুষঠাকুরদাস-বাবা প্রভৃতি গন্তীরনাথজীকে অসামান্য মর্য্যদা প্রদর্শন করিতেন। বৃন্দাবনের স্বনামধন্য ব্রহ্মজ্ঞপুরুষ রামদাস কাঠিয়াবাবার মুখেও এই মহাযোগীর সাধনৈশ্বর্য্যের স্মৃতি ধরিত না।

প্রভুপাদ বিজয়কৃষ্ণ গোস্বামী গন্তীরনাথজীকে আন্তরিকভাবে শ্রদ্ধা করিতেন। যোগীবরের নিকট নানা নিগূঢ় সাধন লাভ করিয়া

যোগীবর গম্ভীরনাথজী

তিনি কৃতার্থ হইয়াছিলেন। তাঁহার সম্বন্ধে কোন কিছু বলিতে গেলে গোস্বামীজীর উৎসাহের অন্ত থাকিত না। অন্তরঙ্গ শিষ্যদের নিকট তাঁহাকে বলিতে শুনা যাইত, “বাবা গম্ভীরনাথজী পলকে সৃষ্টি-স্থিতি-প্রলয় করিতে সমর্থ। ঐশ্বর্য্য-ভাবে সিদ্ধিলাভ করবার পর এখন তিনি মাধুর্য্যে ডুবে গিয়েছেন।”

প্রভুপাদ বিজয়কৃষ্ণের অন্যতম শিষ্য নবকুমার বিশ্বাস মহাশয় যোগীবর গম্ভীরনাথ ও গোস্বামীজী সম্পর্কে এক মনোজ্ঞ বর্ণনা প্রদান করিয়াছে,—“আকাশগঙ্গার আশ্রমে আমরা শয়ন করিয়া আছি! সমস্ত নিস্তব্ধ নীরব—জ্যোৎস্নাময় রাত্রি। মাঝে মাঝে আমরা শুনিতে পাইতাম, কে পাহাড়ের শৃঙ্গে একটা দুইটার সময় সেতার বাজাইয়া ভজন করিতেছেন। গোসাইজী আমাদেরকে বলিতেন, ‘ঐ শুনুন, বাবা গম্ভীরনাথজী কি মিষ্ট ভজন করিতেছেন।’ কোন কোনদিন ঐ ভজন শুনিয়া তিনি একাকী নিশীথ সময়ে ছুটিয়া চলিয়া যাইতেন। দুই এক ঘণ্টা পরে আবার ফিরিয়া আসিতেন। একদিন ঠাকুর বলিলেন, বাবা বড় প্রেমিক এবং শক্তিসম্পন্ন মহাত্মা। হিমালয়ের নীচে এরূপ আর দেখা যায় না। পাহাড়ে কত বাঘ, সাপ, হিংস্র জন্তু রয়েছে, কিন্তু বাবার শক্তিতে মুগ্ধ হয়ে কেউ তাঁর অনিষ্ট করে না।”

বাবা গম্ভীরনাথ ও গোস্বামীজীর মিসনের মধুর আলেখ্য আঁকিতে গিয়া শ্রীযুক্ত মনোরঞ্জন গুহঠাকুরতা লিখিয়াছেন,—“স্বাপদসঙ্কুল গয়ার পাহাড়ে, নির্জন কপিলধারার শৃঙ্গে বসিয়া গম্ভীরনাথজী গভীর রাত্রে সেতার বাজাইয়া ভজন গান করিতেন, আর আকাশগঙ্গার পাহাড় হইতে গোসাইজী সঙ্গীগণকে ফেলিয়া বন-জঙ্গল কাঁটাকাঁকর অগ্রাহ্য করিয়া উন্নত মনে ছুটিয়া আসিতেন। এ কিসের প্রেম! কিসের টান! কোন্ প্রেমে ইহারা পড়িয়াছেন? এ বন্ধনের সূত্র কোথায়? কোন্ মালাকার মাঝখানে আসিয়া দুইটি হৃদয় এমন করিয়া বাঁধিয়াছেন? এ পুণ্যকাহিনী শুনিলেও জীবের ধর্ম্ম হয়। পলকের জন্ম হৃদয় বিস্মিত ও স্তম্ভিত হয়।”

উত্তর ভারতের বহু মহাত্মা ও সার্থকনামা যোগী গন্তীরনাথজীর লক্ষ সৌহার্দ্য কামনা করিতেন। গঙ্গোত্রীর বাবা সুন্দরনাথ ইঁহাদের অন্যতম। এই শক্তিমান মহাপুরুষ যোগবলে একই সময়ে বিভিন্ন স্থানে সশরীরে উপস্থিত হইতে পারিতেন। বাবা গন্তীরনাথের সহিত ইঁহার নিবিড় সখ্য ছিল। তাঁহাকে দর্শনের জ্ঞাত এই মহাপুরুষ মাঝে মাঝে গোরখপুবেও উপনীত হইতেন।

আপন যোগৈশ্বর্যকে গন্তীরনাথজী সচরাচর প্রকাশ করিতেন না। তত্ত্বৈকনিষ্ঠ মহাযোগী এ সকল শক্তি-বিভূতিকে বলিতেন—প্রপঞ্চ। কিন্তু নিতান্ত স্বাভাবিকভাবেই যেন যোগীবরের যোগবিভূতি লীলা স্থানবিশেষে মাঝে মাঝে প্রকট না হইয়া পারে নাই। সূর্যালোকের মতই নিতান্ত সহজ স্বাচ্ছন্দে যোগৈশ্বর্যের এ দীপ্তি মহাপুরুষের সমগ্র পরিপার্শ্বকে ঝলমল করিয়া তুলিত।

কুরমী ভ্রাতৃত্ব, আকু ও মুন্নি দীর্ঘদিন বাবা গন্তীরনাথের সেবায় আত্মনিয়োগ করে। তাহাদের সমগ্র পবিবাবটিই প্রাপ্ত হয় এই কৃপালু মহাপুরুষের চরণাশ্রয়।

একবার বাবাব প্রিয় ভক্ত আকু কোন ছবারোগ্য ব্যাধিতে আক্রান্ত হয়, বাঁচিবাব কোন আশাই থাকে না। অবশেষে একদিন দেখা যায়, রোগীর দেহে মৃত্যুর সমস্ত লক্ষণই প্রকাশিত হইয়া পড়িয়াছে। আত্মীয় স্বজনগণ সৎকাবের ব্যবস্থায় উদ্যোগী হইয়া পড়িল। আকুর ছোট ভাই মুন্নি কিন্তু শোকাক্ত হইয়া আর ধৈর্য ধারণ করিতে পারে নাই, ছুটিতে ছুটিতে সে গন্তীরনাথজীর আসনের সম্মুখে গিয়া উপস্থিত।

মহাপুরুষের চরণ ধরিয়া কঁাদিতে কঁাদিতে সে বলিতে লাগিল “বাবা, তোমার একান্ত সেবক আকুর প্রাণবিয়োগ হয়েছে। কিন্তু আমরা তো জানি, তোমার অসাধ্য কিছুই নেই। কৃপা করে তুমি তাকে আজ বাঁচাও।”

যোগীবর গম্ভীরনাথজী

ধ্যানমগ্ন মহাযোগী নয়ন উন্মীলন করিলেন। আর্ন্তের আকুস ক্রন্দনে মুহূর্ত্ত মধ্যে ফুটিয়া উঠিল এক করুণাঘন মূর্ত্তি। শব সংকার থামাইতে আদেশ দিয়া মূর্ত্তিকে গৃহে পাঠাইয়া দিলেন, সঙ্গে সঙ্গে নিজেও চলিয়া গেলেন আকুর শয্যাপার্শ্বে।

ভক্তের দেহটি স্পর্শ করিবার পর গম্ভীরনাথজী কমণ্ডলু হইতে কয়েক ফোঁটা জল তাহার মুখে ঢালিয়া দিলেন। সকলে সবিস্ময়ে দেখিল, আকুর প্রাণ-স্পন্দন আবার ফিরিয়া আসিতেছে। অতঃপর ধীরে ধীরে সে চক্ষু মেলিয়া শয্যায় পাশ ফিরিল।

সেদিনের এ চিকিৎসাটির মত পথ্যদানের ব্যবস্থাও বড় বিচিত্র। আকুর জন্ত তখনই খিচুড়ী পথ্যের নির্দেশ দিয়া গম্ভীরনাথ কপিলধারার আসনে প্রত্যাবর্তন করিলেন।

এই কুপালীলার পর আকু আরও বহুদিন বাঁচিয়া ছিল।

কপিলধারায় গম্ভীরনাথজীর আসনের সম্মুখে একটি ব্যাঘ্র মাঝে মাঝে আসিয়া উপস্থিত হয়। তারপর ধীরে ধীরে মহাযোগীকে প্রদক্ষিণ করিয়া উহা যে কোথায় চলিয়া যায় তাহা কেহ জানে না। সাধারণতঃ ইহার আগমন ঘটে একান্ত নিভৃতে।

একদিন কিন্তু এই ব্যাঘ্রপুঙ্গব বহুজন সমক্ষেই আসিয়া হাজির। গম্ভীরনাথজী সেদিন ভক্ত ও সাধুজন পরিবৃত্ত হইয়া বসিয়া আছেন, এ হিংস্র বাঘের আগমন সকলকে ভীতব্রস্ত করিয়া তুলিল। বাবা তৎক্ষণাৎ সকলকে আশ্বাস দিয়া শান্তস্বরে কহিলেন, “আপনারা শঙ্কিত হবেন না। স্থানত্যাগের জন্ত ব্যস্ত হবারও কোন প্রয়োজন নেই। ইনি ব্যাঘ্ররূপী এক মহাপুরুষ। সকলে একটু চুপ করে বসে থাকুন।”

নিজ নিজ আসনে বসিয়া সবাই ভীতি-বিস্ময়মিশ্রিত নয়নে এই ভয়ঙ্কর জীবটির দিকে চাহিয়া রহিলেন। অতঃপর ব্যাঘ্রটি একদৃষ্টিতে কিছুকাল যোগীবরের দিকে তাকাইয়া থাকিয়া আশ্রম ত্যাগ করিয়া চলিয়া গেল।

অরণ্যের ব্যাঘ্রের সহিত গন্তীরনাথজীর বরাবরই এ ধরনের সখ্য ও অন্তরঙ্গতা ছিল। এ ঘটনার পরও মাঝে মাঝে তাঁহার সান্নিধ্যে এক একটি ব্যাঘ্র আসিয়া জুটিত, উহাদের ভাবভঙ্গী দেখিয়া তখন বুঝা যাইত না যে নরখাদক পশুর হিংস্র প্রবৃত্তি একটুও আছে মনে হইত, উহারা বাবার পোষা জীব।

উত্তরকালেও গোরখপুর মঠের পিঞ্জরে গন্তীরনাথজীর এক পোষা ও অনুগত বাঘকে দেখা যাইত। উহার সেবা-পরিচর্য্যার ব্যবস্থা সম্পর্কে মহাপুরুষের সতর্কতার অন্ত ছিল না। পরিচারকদের অসাবধানতার জ্ঞাত এক একদিন উহা পিঞ্জর হইতে বাহির হইয়া পড়িত। গন্তীরনাথজীর সঙ্গে এই বাঘটির গভীর অন্তরঙ্গতা ছিল, ছুটিয়া আসিয়া তিনি কহিতেন, “ওরে, তোর ভয়ে যে আশ্রমের সাধুরা চারদিকে ছুটে পালাচ্ছে! এবার তুই শান্ত হয়ে খাঁচার ভেতর ঢুকে পড় দেখি।”

অতঃপর সন্মুখে বাঘের কানটি ধরিয়া তিনি উহাকে লৌহ পিঞ্জরের দিকে টানিয়া নিতেন। আনন্দে লাঙ্গুল নাড়িতে নাড়িতে সে তাহার নির্দিষ্ট স্থানে প্রবিষ্ট হইত।

সুন্মূল্যল ধাড়ীওয়াল নামক এক গয়ালীর পাগলামীতে সকলে একবার অতিষ্ঠ হইয়া উঠে। মাঝে মাঝে সাধুদের উপরও সে অত্যাচার করিতে ছাড়িত না।

একদিন সে কপিলধারায় আসিয়া সাধু মহাত্মাদের উপর উপদ্রব করিতেছে, এ সময়ে বাবার কৃপাদৃষ্টি তাহার উপর পতিত হইল। হঠাৎ সুন্মূল্যলের গালে সজোরে তিনি দুইটি চপেটাঘাত করিলেন। ইহার ফলে পাগলের সেদিনকার অত্যাচারই শুধু নিবারিত হইল না, চিরতরেই সে শান্ত ও প্রকৃতিস্থ হইয়া গেল। অতঃপর বহু বৎসর ব্যাপিয়া স্বাভাবিকভাবে সংসারের কাজকর্ম ও ব্যবসাবাণিজ্য চালাইয়া যাইতে সুন্মূল্যলের কোন অসুবিধা হয় নাই।

যোগীবর গন্তীরনাথজী

প্রয়াগের কুস্তমেলায় একবার দাঙ্গা বাধিয়া যায়। কি এক কারণে উত্তেজিত হইয়া বৈষ্ণব নাগা সাধুর দল যোগী এবং সন্ন্যাসীদের উপর আক্রমণ শুরু করে। মেলাক্ষেত্রে সেদিন এক রক্তারক্তি কাণ্ড শুরু হয়, যোগীদের অনেকে আহত হইতে থাকেন।

যোগী সম্প্রদায়ের অগ্রতম নেতা বাবা গন্তীরনাথজী তখন সেই অঞ্চলেই ছাউনি করিয়া আছেন। ধ্যানাসনে উপবিষ্ট মহাপুরুষের কানে এই উত্তেজনা ও দ্বন্দ্ব-সংঘর্ষের কোন সংবাদই প্রবেশ করে নাই। লাঠি ও চিম্টা-ধারী নাগার দল যখন একেবারে তাঁহার ছাউনীর ভিতরে প্রবেশ করিতে যাইতেছে, তখনও তিনি নীরব নিষ্পন্দ হইয়াই বসিয়া আছেন।

এ সময়ে একজন ভক্ত তাঁহার আসনের সম্মুখে দাঁড়াইয়া চীৎকার করিয়া উঠিল, “মহারাজ, চেয়ে দেখুন কি বিপদ! ওরা সবাই মারমুখী হয়ে ছাউনীতে ঢুকেছে।”

গন্তীরনাথজীর ধ্যান এবার ভঙ্গ হইল। নয়ন উন্মীলন করিয়া তিনি উচ্চ স্বরে বলিয়া উঠিলেন—“ব্যস! শান্তি করো, শান্তি করো।”

মূহুর্তে এক ঐন্দ্রজালিক কাণ্ড ঘটয়া গেল। আক্রমণকারী নাগাদের উপর কে যেন হঠাৎ এক অঞ্জলি অলৌকিক শান্তিবারি ছিটাইয়া দিয়াছে। গন্তীরনাথজীর কথা কয়টি শোনা মাত্র তাহাদের উত্তেজনা একেবারে অন্তর্হিত হয়। লাঠি, চিম্টা প্রভৃতি নামাইয়া তাহারা নত মস্তকে ধীরে ধীরে স্থান ত্যাগ করে।

যোগ-বিভূতি ও অলৌকিক শক্তির যতটুকু প্রকাশ গন্তীরনাথজীর জীবনে দেখা গিয়াছে, তাহা একান্তভাবে কুপারূপেই তাঁহার আশে-পাশে ঝরিয়া পড়িয়াছে। সাধারণতঃ এসব কিন্তু তিনি নিতান্ত সতর্কতার সহিতই আবরিত করিয়া রাখিতেন। অলৌকিক শক্তির পরিচয় লাভেছু ভক্তদের কাছে যোগীবর নিজের সহজ ও লৌকিক পরিচয়টিই বেশী করিয়া তুলিয়া ধরিতে চাহিতেন।

একটি গৃহস্থ শিষ্য ত্যাগ ও সেবানিষ্ঠার দিক দিয়া খ্যাতি অর্জন করিয়াছিলেন। গুরু গন্তীরনাথজীর জন্ত অকাতরে তিনি পরিশ্রম করিতেন, তাঁহার সন্তুষ্টির জন্ত অর্থব্যয়ও তাঁহাকে কম করিতে হয় নাই। এই দীর্ঘ সেবা-পরিচর্যার মধ্যে একদিনের জন্তও ঐশ্বর্য-গোপনপ্রয়াসী গন্তীরনাথজীর অলৌকিকত্ব তাঁহার চোখে পড়ে নাই। এজন্ত শিষ্যটির মনে বড় খেদ ছিল।

একদিন তিনি বাবার বিভূতি-লীলা দর্শনের জন্ত বার বার আবদার করিতে লাগিলেন। তাঁহার দৃঢ় বিশ্বাস জন্মিয়াছে যে, তিনি ক্রমাগত যে ত্যাগ-তিতিক্ষা লইয়া সেবা করিয়া আসিতেছেন, তাহাতে গুরুজী কখনই তাঁহার এ অনুরোধ প্রত্যাখ্যান করিবেন না। গন্তীরনাথজী দেখিলেন, শিষ্যের মধ্যে সেবার অভিমান দানা বাঁধিয়া উঠিয়াছে, সংশোধন দরকার। এ উদ্দেশ্যে সেদিন তিনি নাথসম্প্রদায়ের একটি প্রাচীন কাহিনী তাঁহার কাছে বর্ণনা করিতে থাকেন। কাহিনীটি এরূপ :

মহাযোগী গোরক্ষনাথজী একবার দীর্ঘকাল তপস্চারত ছিলেন। এসময়ে এক ভক্ত ব্রাহ্মণ তাঁহার রক্ষণাবেক্ষণ করিতেন এবং তাঁহাকে রোজ পায়সান্ন বাঁধিয়া খাওয়াইতেন। বহুদিন পরিচর্যার পর এই সেবক ব্রাহ্মণটির কৌতূহল জন্মে, তিনি যোগীবরের যোগবিভূতিসমূহ প্রত্যক্ষ করিবেন। তাঁহার ধারণা, একনিষ্ঠ সেবাদ্বারা গোরক্ষনাথজীর তিনি প্রীতিভাজন হইয়াছেন, তাই তাঁহার এ অনুরোধ তিনি অবশ্যই রক্ষা করিবেন।

গোরক্ষনাথ দেখিলেন, ভক্তের মনের মধ্যে সেবার ‘অহং’ জাগ্রত হইয়াছে, অবিলম্বে ইহা উৎপাটন করা দরকার। তখনই তিনি বিপুল পরিমাণ ছন্ধ, চাল ও চিনি উদ্গীরণ করিয়া সম্মুখে রাখিলেন। তারপর গন্তীর স্বরে কহিলেন, “এত বৎসর ধরে যে পায়সান্ন তুমি আমায় ভোজন করিয়েছ—দেখ, তার সমস্ত কিছু উপকরণই পৃথক পৃথক এখানে উঠে এসেছে।”

যোগীবর গম্ভীরনাথজী

বলা বাহুল্য, এই অলৌকিক দৃশ্য দেখিয়া ভক্ত ব্রাহ্ম
বিস্ময়ে হতবাক হইয়া যান। সেবানিষ্ঠার যে অহমিকা তাঁর ^{সঙ্গে}
উদগ্ৰ হইয়াছিল সেদিন তাহা চূর্ণ হয়।

শিষ্য ও ভক্তদের কল্যাণের জন্ত গম্ভীরনাথজী উপরোক্ত
আখ্যায়িকাটি অনেক সময় বিবৃত করিতেন। গুরুজীর যোগবিভূতি
দর্শনের কৌতূহল যাহাদের মধ্যে দেখা দিত, অতঃপর আর তাঁহারা
সাহস করিয়া অগ্রসর হইতেন না।

কপিলধারার শান্ত সমাহিত জীবন ছাড়িয়া গম্ভীরনাথজী মাঝে
মাঝে তীর্থ ভ্রমণে বাহির হইয়া পড়িতেন। যত দূর, ছুর্গম বা
বিপদসঙ্কুলই হোক না কেন, ভারতের কোন তীর্থই তাঁহার অজানা
ছিল না। এক এক বারের পর্যটন সাজ করিয়া আবার তিনি গয়া
অঞ্চলেই প্রত্যাবর্তন করিতেন।

তাঁহার আশ্রমটিতে এ সময়ে নানা কারণে ভক্তজনের সমাগম
বৃদ্ধি পায়। নিভৃত তপস্শাস্ত্রলীতে ক্রমে মন্দির ও বাসভবন প্রভৃতি
নির্মিত হইতে থাকে। এ সময়ে কপিলধারার পরিবেশটিকে
তিনি আর তেমন নির্জজনবাসের উপযুক্ত মনে করিতেন না। ভক্ত
মাধোলাল তাই যোগীবরের জন্তে বামনীঘাটে একটি নির্জজন
বাগানবাড়ী নির্মাণ করিয়া দেন। তীর্থঞ্চল হইতে ফিরিয়া আসিয়া
যোগীবর বেশীর ভাগ সময় এই উদ্যানেই আসন বিছাইতেন।

নিতান্ত সাধারণভাবে সাধু ও তীর্থযাত্রীদের মধ্যে চলাফেরা
করিলে কি হয়, গম্ভীরনাথজীর অলৌকিক শক্তির পরিচয় মাঝে
মাঝে প্রকট হইয়া পড়িত। ভস্মাচ্ছাদিত বহি কোন্ ফাঁকে সহসা
জনতার সম্মুখে আত্মপ্রকাশ করিয়া বসিত, তাহার ঠিক ছিল না।

একবার গম্ভীরনাথজী আট-দশজন সঙ্গী সন্ন্যাসীসহ উদয়পুরে
গিয়াছেন। একটি জনবিরল মাঠের প্রান্তে সকলে ধূনী জ্বালাইয়া
ধ্যানে বসিলেন।

একটি ঘোর বর্ষাকাল। কিছুক্ষণের মধ্যেই সারা আকাশ জুড়িয়া
করিয়াকর মাতামাতি শুরু হইয়া যায়। প্রবল বর্ষণের ফলে চারিদিক
কি একেবারে জলে জলময় হইয়া গেল। কিন্তু নিতান্ত বিস্ময়ের বিষয়,
বাবা গন্তীরনাথ ময়দানের যে অঞ্চলে উপবিষ্ট সেখানে এক বিন্দু
বারিও পড়িতে দেখা যায় নাই। সঙ্গী সন্ন্যাসীরা গন্তীরনাথজীর
মাহাত্ম্য জানিতেন। তাঁহারা বুঝিলেন, এ অলৌকিক কাণ্ডটি এই
শক্তিধর মহাপুরুষেরই যোগশক্তির প্রভাবে ঘটিয়াছে।

এ ঘটনার পর যোগী গন্তীরনাথের খ্যাতি সে অঞ্চলে ছড়াইয়া
পড়ে। জনসমাগমের ফলে সন্ন্যাসীদের সেখানে তিষ্ঠানো দায় হয়।

ইহার উপর আর এক বিপদ উপস্থিত। উদয়পুরের মহারাণার
কানে এই যোগবিভূতিসম্পন্ন মহাপুরুষের কথাটি পৌঁছিয়া যায়।
গন্তীরনাথজীকে তাঁহার প্রাসাদে লইবার জন্য বারংবার তিনি লোক
পাঠাইতে থাকেন। কিন্তু যোগীবব জানাইয়া দেন, কোন গৃহস্থের
আবাসে তিনি পদার্পণ করেন না।

একমাত্র তাঁহার ভক্ত আকু কুরমীর প্রাণদানের সময় বাধ্য হইয়া
তাঁহাকে গৃহস্থ ভবনে যাইতে হইয়াছিল।

মহারাজের আমন্ত্রণ প্রত্যাখ্যান করিয়াও বিপদ এড়ানো গেল না,
তিনি নিজেই যোগীবরের নিকটে আসিবার উদ্যোগ করিতে
লাগিলেন। এ সংবাদ শুনিবামাত্র বৈরাগ্যবান মহাপুরুষ উদয়পুর
ত্যাগ করিয়া চলিয়া গেলেন।

অগণিত সাধু-সন্ন্যাসীর মধ্যেও গন্তীরনাথকে পৃথক করিয়া না
দেখিয়া উপায় ছিলনা। যে কোন সাধুর মেলা ও পঙ্গতে তিনি
উপস্থিত হইতেন, নিতান্ত স্বাভাবিকভাবেই তাঁহার নেতৃত্বটি সেখানে
প্রতিষ্ঠিত হইয়া যাইত।

প্রসিদ্ধ সাধক, বাবা গোকুলনাথজী তাঁহার স্মৃতি-কথায় বর্ণনা
প্রসঙ্গে বলিয়াছেন, “আমার পূর্বপুরুষগণ বংশানুক্রমে সারঙ্গকোটের

যোগীবর গম্ভীরনাথজী

যোগীদের শিষ্য ছিলেন। ১৮৯০ খ্রীষ্টাব্দে আমার বাবার সঙ্গে সারঙ্গকোটের গীর এলাচীনাথের ভাণ্ডারায় গিয়া শুনিলাম যে, একজন ‘রাজা যোগী’ অমরনাথ হইতে আসিয়াছেন। আমিও আমার পিতার সঙ্গে এই রাজা যোগীকে দেখিতে গেলাম। সেই ভাণ্ডারায় ১২০০ জন সাধু উপস্থিত ছিলেন। তাঁহাদের মধ্যে গম্ভীরনাথবাবাকে এক রাজা যোগীর মতই সেদিন আমার মনে হইল।”

গৃহস্থ, তীর্থযাত্রী অথবা সাধু-সন্ন্যাসী যাহার কাছেই যোগীবর যাউতেন, তাঁহারই অন্তস্তলে এক দিব্য আনন্দের স্রোত প্রবাহিত হইত ! তাঁহার সদা-প্রসন্ন, দিব্য মূর্তিটি হইতে ঝরিতে থাকিত অপার মাধুর্য ও শান্তির ধারা।

একবার পুরীধামে জটিয়া বাবার আশ্রমে বাবা গম্ভীরনাথ কয়েক দিন অতিবাহিত করেন। প্রভুপাদ বিজয়কৃষ্ণ গোস্বামরী শিষ্যগণ বাবার বড় প্রিয় ছিলেন। তাঁহাদের আমন্ত্রণেই তিনি সেখানে আসেন এবং সেবায় অত্যন্ত প্রীতিলাভ করেন।

এ সময়ে গম্ভীরনাথজীর সান্নিধ্য আশ্রমিকদের মধ্যে যে কল্যাণ-ধারা উৎসারিত করে তাহা শ্রীযুক্ত সারদাকান্ত বন্দ্যোপাধ্যায়ের বর্ণনা হইতে জানা যায়। তিনি লিখিয়াছেন—“তখন যে তাঁহাকে দর্শন করিয়াছি, ইহা তাঁহারই কৃপায় চিরদিনের তরে হৃদয়ে অঙ্কিত হইয়া রহিয়াছে। আশ্রমের সেবাকার্য্য সম্পন্ন করিয়া মাঝে মাঝে সন্ধ্যার প্রাক্কালে তাঁহার নিকট যাইয়া বসিতাম। তাঁহার নিকট বসিলেই অনুভব হইত, আমার গুরু প্রদত্ত ‘নাম’ আপনা আপনি স্রোতোবেগে চলিতেছে। কিছুক্ষণ পরে বাবা বলিতেন—যাও, এখন সেবার কার্য্যে যাও।”

গৌসাইজীর অন্ততম শিষ্য শ্রীমনোরঞ্জন গুহ ঠাকুরতা প্রয়াগের কুস্তমেলার (১৮৯৩) কথা প্রসঙ্গে মহাযোগী গম্ভীরনাথজীর এক মনোজ্ঞ আলেখ্য অঙ্কিত করিয়াছেন। তিনি লিখিয়াছেন, “যে রূপ তাকাইয়া একটু মাথা নাড়িয়া ইনি ইঙ্গিতে প্রাণ ভিজাইয়া দেন,

তাহার বর্ণনা হয় না। ইনি অত্যন্ত স্বল্পভাষী। সাধুরা ইঁহাকে সিদ্ধপুরুষ বলিয়া জানেন। ইনি বহু শিষ্য সঙ্গে মেলাস্থলে উপস্থিত ছিলেন। একদিন একজন ধনী ইঁহার আসনের নিকট পাঁচ শত ধও কম্বল রাখিয়া যান। বাবা গন্তীরনাথ তখন ধ্যানস্থ ছিলেন, কিছু পরে নেত্র উন্মীলিত করিয়া দেখিলেন, রাশীকৃত কম্বল। বাঁ হাতের আঙ্গুলি ঈষৎ নাড়িয়া বলিলেন—যাহাদেব দরকার আছে, তাহাদিগকে এ সকল দিয়া দাও। তখনই সমস্ত বিতরণ করা হইয়া গেল।”

শক্তিধর মহাযোগী হইয়াও গন্তীরনাথজী ব্যবহারিক জীবনে ছিলেন এক সহজ সুন্দর প্রেমিক পুরুষ। জাগতিক জীবনের নানা সমস্যা ও দ্বন্দ্ব বিক্ষোভের মধ্যে তাহার করুণাঘন রূপটিকেই সর্বত্র আশ্রয়প্রকাশ করিতে দেখা যাউত।

এক সময়ে গয়ার পাহাড়ে তাহার ভক্ত ও দর্শনার্থীদের সংখ্যা বেশ বৃদ্ধি পাইতে থাকে। লোকসমাগমের ফলে এখানে মাঝে মাঝে তস্করের উপদ্রবও দেখা দেয়। একদিন নিশীথ বাত্রে একদল দুর্বৃত্ত টিল নিক্ষেপ করিতে থাকে। ভক্তেরা সকলেই বড় চঞ্চল হইয়া উঠিলেন। বাবা গন্তীরনাথের কানে এ সংবাদ পৌঁছিতে বিলম্ব হইল না? নির্বিকার মহাপুরুষ ধীর পদক্ষেপে দুর্বৃত্তদের সম্মুখে উপস্থিত হইলেন। স্নেহে কহিলেন, “আচ্ছা, তোমরা এমন করে টিল ছুঁড়ছো কেন? এসো তোমাদের যা খুশী তা-ই আশ্রম! থেকে নিয়ে যাও। কেউ তোমাদের কিছু বলবে না।”

সেবক-শিষ্য রূপনাথ গুরুজীর আদেশে ঘরের দরজা খুলিয়া দিলেন। বলা বাহুল্য, তস্করের দল ব্যাপার দেখিয়া ততক্ষণে কিছুটা অপ্রস্তুত হইয়া পড়িয়াছে। কিন্তু লোভ তাহাদের প্রবল—অপহরণের এমন সুযোগই বা হঠাৎ কি করিয়া ছাড়ে? ধীরে ধীরে তাহারা আশ্রমে প্রবেশ করিল। অতিথিদের দেবার জন্ত যাহা কিছু তৈজস-পত্র, আহার্যোপকরণ ও কম্বল প্রভৃতি ছিল তাহা সংগ্রহ করিয়া তাহারা ফিরিয়া চলিল। প্রস্থানের পূর্বে সিদ্ধ মহাত্মা

গম্ভীরনাথজীকে প্রণাম করিয়া তাঁহার আশীর্বাদ নিতেও কিন্তু তাহাদের ভুল হয় নাই।

তস্করদের প্রতি করুণা ও সমবেদনায় মহাপুরুষের অন্তর তখন ভরিয়া উঠিয়াছে। স্নেহার্জকণ্ঠে তিনি কহিলেন, “বেটা, তোমারা সত্যিই অভাবগ্রস্ত, দুঃখে পড়েই এসব দুষ্কর্ম করছো, সবই বুঝতে পাচ্ছি। আবার দশ পনের দিন পরে এসো, আজকের মতই কিছু কিছু জিনিসপত্র সেদিনও মিলবে। কিন্তু লোকের ওপও অযথা দৌরাত্ম্য কখনো করো না।”

দিব্য করুণার এই স্পর্শ দুর্বলতাদের হৃদয় বিগলিত না করিয়া পারে নাই। নত শিরে তাহারা ধীরে ধীরে প্রস্থান করে।

ভক্ত মাধোলাল আশ্রমের অধিকাংশ প্রয়োজনীয় জিনিসপত্র যোগাইয়া থাকেন। পরদিনই ব্যস্তসমস্ত হইয়া নূতন তৈজসপত্র এবং চাল-ডাল-ঘি প্রভৃতি ক্রয় করিয়া আনিলেন। এবার হইতে ঐ চোরের দল কিন্তু অভাবে পড়িলেই মাঝে মাঝে বাবা গম্ভীরনাথের সম্মুখে আসিয়া দাঁড়াইত। যোগীবর যেমনি তাহাদিগকে প্রয়োজনীয় দ্রব্যাদি বিতরণ করিতেন, ভক্তপ্রবর মাধোলালেরও তেমনি আশ্রম ভাণ্ডারের ক্ষতি পূরণ করিতে দেরী হইত না।

মাধোলালকে বারবারই এরূপ অনাবশ্যক ব্যয়ভার বহন করিতে হইতেছে। একদিন গম্ভীরনাথজীর এ বিষয়ে হুঁস হইল। কহিলেন, তিনি নিজে স্থানান্তরে না গেলে এ ব্যয়বাহুল্য কমানো মোটেই সম্ভবপর হইবে না—তাই এবার গয়া অঞ্চল ত্যাগেরই সিদ্ধান্ত। তিনি করিয়াছেন।

ভক্ত মাধোলালের চোখ দুইটি সজল হইয়া আসিল। তিনি যুক্তকরে কহিলেন, “বাবা, শুধু এজ্ঞাই আপনি আসন ত্যাগ করে অন্ত্র যাবেন! তাও কি কখনো হয়? তাছাড়া, চোরের দল আর কতই বা নেবে? আপনি এ নিয়ে মোটেই ভাববেন না?”

আর একদল তস্কর সেদিন আশ্রমে উপস্থিত হয়। দুঃখের বিষয়, তাহাদের দান করিবার মত কোন কিছু জিনিসপত্র সাধুদের কাছে একেবারেই ছিল না। অগত্যা নিজের ব্যবহারের কন্ডলটি তাহাদের সম্মুখে রাখিয়া গন্তীরনাথ কহিলেন, “দেখ, আজ তো এদের দেবার মত বিশেষ কিছুই নেই, তোমরা বরং আমার এই কন্ডলটিই নিয়ে যাও।”

তস্করের দল, কি জানি কেন, মহাপুরুষের ব্যবহৃত কন্ডলটি গ্রহণ করিতে তেমন উৎসাহ দেখায় নাই। নীরবে তাহারা আশ্রম ত্যাগ করিয়া যায়।

সবেমাত্র কিছুটা দূরে তাহারা চলিয়া গিয়াছে, এমন সময় একটি নূতন সাধু স্বস্তির নিঃশ্বাস ফেলিয়া কহিলেন, “যাক, ভাগ্য ভাল। অমোদের কাছে যে কয়টা টাকা রয়েছে, তার সন্ধান ওরা পায়নি। খুব বেঁচে গিয়েছি।”

এ সাধুটি ও তাঁহার কয়েকজন সঙ্গী নবাগত অতিথি। তাঁহারা গন্তীরনাথের আশ্রিত বা ভক্তদের মধ্যে কেহ নহেন। তীর্থ ভ্রমণ উপলক্ষে বাহির হইয়া কয়েকদিনের জন্ত এখানে আশ্রয় গ্রহণ করিয়াছেন মাত্র। গন্তীরনাথজী কিন্তু এই অতিথিদেরও ছাড়িবার পাত্র নহেন। কথা কয়টি শুনিবামাত্র দৃঢ় স্বরে আদেশ দিলেন, “যাও, এখনি ছুটে যাও। সব কয়টা টাকা ওদের দিয়ে এসো।”

এ আদেশ অমান্য করিবার সাহস সাধুদের হয় নাই। ইহাদের একজন তখন ছুটিয়া গিয়া তস্করদের হাতে টাকা পৌঁছাইয়া দিয়া আসিলেন।

গুরু গোপালনাথজীর মহাপ্রয়াণের পর গন্তীরনাথজীর জ্যেষ্ঠ গুরুভ্রাতা বলভদ্রনাথজী মোহান্তের পদে বৃত্ত হন। ইহার পর ক্রমান্বয়ে তাঁহার দুই শিষ্য দিলবরনাথজী ও সুন্দরনাথজী গদীতে আরোহণ করেন।

ইতিমধ্যে যোগসিদ্ধ মহাপুরুষরূপে বাবা গন্তীরনাথের খ্যাতি সাধুসমাজে প্রচারিত হইয়াছে। কুন্তুমেলায় সমাগত প্রবীণ যোগী ও সন্ন্যাসীদের মধ্যেও তিনি কম স্বীকৃতি লাভ করেন নাই। তাই নাথযোগীদের মধ্যে অনেকেই ভাবিতেছিলেন, মোহান্ত পদ গ্রহণে তাঁহাকে কোনক্রমে সম্মত করাইতে পারিলে ভাল হয়। ইহার ফলে শুধু সম্প্রদায়ের মর্যাদাই বাড়িবে না, গোরক্ষনাথজীর সাধনপীঠের কাজও সুষ্ঠুভাবে চলিবে।

কিন্তু এই বৈরাগ্যবান সন্ন্যাসীকে গদী আরোহণে সম্মত করাইবে কে? বিশিষ্ট নাথপন্থী সাধকগণ প্রায়ই তাঁহার নিকট এ প্রস্তাব নিয়া উপস্থিত হইতেন, নানা যুক্তি দেখাইয়া মিনতিও করিতেন।

কিন্তু সব কিছু শুনিবার পর যোগীবর গন্তীর বদনে সংক্ষিপ্ত উত্তর দিতেন—“নেহী।”

ক্ষুণ্ণমনে সবাইকে নিরস্ত হইতে হইত।

গন্তীরনাথের আশ্রয়লাভের জন্ত প্রায়ই ভারতের দূর দূরান্ত হইতে বহু সাধকের আগমন ঘটিত। কিন্তু তাঁহার কাছ হইতে দীক্ষা পাওয়া বড় সহজ ব্যাপার ছিল না। কেহ খুব বেশী অনুরোধ উপরোধ করিতে থাকিলে তিনি তীক্ষ্ণ ভৎসনার সুরে বলিয়া উঠিতেন, “ক্যা? ম্যার পন্টন করোজে”—অর্থাৎ তোমাদের কি ইচ্ছা যে, আমি শেষকালে এক ফোজ গঠন শুরু করি?

কিন্তু ঐশী বিধান উত্তরকালে তাঁহাকে এই ‘পন্টন’ গঠনে নিয়োজিত না করিয়া ছাড়ে নাই। কপিলধারার অরণ্য পরিবেশ ছাড়িয়া গন্তীরনাথজী গোরখপুর মঠে আসিয়া থাকিতে বাধ্য হন, তাঁহার আশ্রয় পাইয়া বহু লোক তখন কৃতার্থ হয়।

গোরখপুর মঠের মোহান্ত সুন্দরনাথ ছিলেন তরুণ ও অব্যবস্থিত-চিত্ত। সম্প্রদায়ের নেতৃত্ব, মন্দিরের পূজা ও অতিথিসংকার প্রভৃতি দায়িত্বভার সবই ছিল তাঁহার উপর। কিন্তু এসব বহনের ক্ষমতা তাঁহার নাই। মঠের সম্পত্তি পরিচালনায়ও বিশৃঙ্খলার তখন অন্ত ছিল না।

সকলে মিলিয়া এ ছুরবস্থার কথা বারবার বাবা গন্তীরনাথের কানে ছুলিতে লাগিলেন।

অবশেষে গুরুধামের এই সঙ্কটের দিনে আর তাঁহার দূরে থাকা চলিল না। সুন্দরনাথজীকে মোহান্ত পদে রাখিয়া তিনিই তাঁহার কাজকর্ম নিয়ন্ত্রণ করিতে লাগিলেন। মঠের কাজ এখন হইতে তাঁহার নিজ তত্ত্বাবধানে সুশৃঙ্খলভাবে চলিতে আরম্ভ করিল।

১৯০৬ সাল হইতে স্থায়ীভাবে গন্তীরনাথজী গোরখপুর মঠে আসিয়া বাস করিতে থাকেন এবং গোরখনাথজীর মন্দিরেই তাঁহার সাধন আসনটি স্থাপিত হয়। ফলে, উত্তর ভারতের বহু সাধক ও মুমুকুর জীবনে তাঁহার কৃপার ধারা বিস্তারিত হইবার সুযোগ পায়।

মোহান্ত না হইয়াও বাবা গন্তীরনাথ মঠের অধ্যক্ষরূপে সমস্ত কাজকর্ম নির্বাহ করিতেন। মঠের দৈনন্দিন কাজকর্মে চাঞ্চল্য ও বৈষয়িক জটিলতার অবধি নাই, অথচ নির্বিবকার মহাপুরুষ নিতান্ত অবলীলায়ই সমস্ত কিছু দেখাশুনা ও পরিচালনা করিতেন। সম্প্রদায়ের নেতৃহ, গৃহস্থদের উপদেশ দান, সাধু-মহাত্মাদের সেবা প্রভৃতি কর্তব্য যেমন অনায়াসে করিতেন, তেমনই প্রজাদের দুঃখকষ্ট ও নানা প্রকার খুঁটিনাটি অভিযোগের সমাধানেও তাঁহাকে কম তৎপর দেখা যাইত না। এত কিছু কর্মচাঞ্চল্যের মধ্যেও তাঁহার নির্বিবকার সদাপ্রসন্ন রূপটি এক অপরূপ মহিমায় ফুটিয়া উঠিত।

মহাযোগীর দ্বৈতসত্তার এই রূপটি তাঁহার অন্তরঙ্গ শিষ্য শ্রীঅক্ষয় বন্দ্যোপাধ্যায়ের লেখনীতে সুন্দরভাবে ফুটিয়া উঠিয়াছে। তিনি লিখিয়াছেন, “যাঁহার নেতৃত্বাধীনে এত বড় একটা বিরাট সংসার এরূপ সুশৃঙ্খলভাবে পরিচালিত হইতে লাগিল, তাঁহার দিকে যখনই দৃষ্টিপাত করা যাইত তখনই দেখা যাইত তিনি আত্মস্থ, তাঁহার দৃষ্টি বাহিরের দিকে মোটেই নাই। তিনি যেন একটি নির্বিবকার শান্তির—তরঙ্গবিহীন পরিপূর্ণ আনন্দের প্রতিমূর্তিরূপে এই বিকারময়

যোগীশ্বর গন্তীরনাথজী

সংসারে প্রতিষ্ঠিত হইয়া আছেন। কস্মচারিগণ বৈষয়িক কাজকর্মের নিবেদন করিতেছে—মনে হইত যেন ভক্ত নিজ মনে দেবপ্রতিমার নিকটে তাহার বক্তব্য বিষয় বলিয়া যাইতেছে। বলা শেষ হইল, তিনি সব কথা শুনিয়াছেন কিনা তিনিই জানেন। তিনি শুধু একটি ‘হাঁ’ বা ‘নেহী’ কিংবা ‘আচ্ছা’ অথবা প্রয়োজনানুরূপ দু-একটি শব্দ উচ্চারণ করিয়া তাহাদের কর্তব্য নির্দেশ করিয়া দিলেন।

“এইরূপ—কখনও ভৃত্য আসিয়া হয়তো আদেশের প্রতীক্ষা করিতেছে, কখনও কোন কোন দরিদ্র ভিক্ষুক সাহায্যের প্রতীক্ষা করিতেছে, কখনও কোন আগন্তুক আশ্রমে অতিথি হইয়াছে, কখনও সাধুগণ বাদবিসম্বাদ করিয়া মীমাংসার জন্য তাঁহার স্মরণ লইয়াছে, একই সময়ে হয়তো বিভিন্ন শ্রেণীর লোক বিভিন্ন প্রকার দরবার লইয়া তাঁহার নিকট উপস্থিত। তিনি অর্দ্ধবাহ অবস্থাতেই যত্নভাবে দু একটি কথায়—যাহাকে যাহা বক্তব্য তাহা বলিয়া, যাহাকে যাহা দেয় তাহা দিয়া, অতিথি-অভ্যাগতদিগের যথোচিত সেবার ব্যস্থা করিয়া, আবার আত্মস্থ হইতেন। অথচ ইহাতেই সকল বিষয়ের সুবন্দোবস্ত হইয়া যাইত। তিনি যেসব আদেশ বা উপদেশ আশ্রমবাসীদিগকে দিতেন, তাহাতে প্রকাশ পাইত যে, আশ্রম সংশ্লিষ্ট কোন ব্যাপারই তাঁহার দৃষ্টি এড়াইতেছে না, সকলের প্রতি, সকল কর্তব্যের প্রতি তাঁহার চক্ষু যেন অনবরত ধাবিত হইতেছে— অথচ তাঁহার দিকে দৃষ্টিপাত করিলে প্রায় সর্বদাই দেখা যাইত যে, সে চক্ষু নিমীলিত বা অর্দ্ধনিমীলিত।”

মঠাধ্যক্ষরূপে গন্তীরনাথজীর জীবন ছিল নিতান্ত সহজ ও অনাড়ম্বর। পরিধানে তাহার থাকিত কোপীন ও তাহার উপর একখণ্ড শুভ্রবস্ত্র। গায়েও শুধু আর একখণ্ড বস্ত্র জড়ানো। পাছুকাকারূপে সর্বদা তিনি একজোড়া কাঠের খড়মই ব্যবহার করিতেন।

বর্ণ তাঁহার চম্পকের মত। সারা দেহে অপূর্ব লাবণ্যের ত্রী। সূচ্যম, সমুন্নত যোগীদেহে এক অপূর্ব ঋজুতা। স্বচ্ছ বাহিয়া গুচ্ছ গুচ্ছ

কেশভার নামিয়া আসিয়াছে। প্রশান্ত, দিব্যোজ্জ্বল মুখমণ্ডল গুহ্ম ও শ্মশ্রুসাজিতে শোভিত। হঠাৎ দেখিয়া কে বলিবে, ইনিই মহা-শক্তিধর যোগীবর বাবা গন্তীরনাথ? নূতন দর্শনার্থীদের মনে হইবে, ইনি হয়তো কোন সম্ভ্রান্ত গৃহস্থ ঘরের এক প্রাচীন ভদ্রলোক।

তরুণ মোহান্ত যে দোতলা ভবনটিতে অবস্থান করেন, তাহারই নিম্নতলের একটি ক্ষুদ্র প্রকোষ্ঠে বাবা গন্তীরনাথের বাস। সম্মুখের তক্তপোষের উপর বিস্তারিত রহিয়াছে শুধু একটি কম্বলের শয্যা। ঐ প্রকোষ্ঠটিতে তিনি সমাধি অথবা অর্দ্ধবাহ অবস্থায় ঘণ্টার পর ঘণ্টা অবস্থান করেন। আবার ইহাই এক এক সময় হইয়া দাঁড়ায় তাঁহার মঠ পরিচালনার অফিস। এখানেই নানা দিগ্দেশাগত ভক্তবৃন্দকে যোগীবর দর্শন ও উপদেশ দান করেন।

নিজের ভোজন ব্যবস্থার মধ্যে কোন প্রকার পার্থক্য বা বিশিষ্টতা রাখিতে গন্তীরনাথ সম্মত হইতেন না। নাথজীর ভাণ্ডারা প্রস্তুতের পর সাধারণ সাধু-সন্ন্যাসীদের জন্ত যে আহাৰ্য্য তৈরী হইত, তাহাই তিনি প্রতিদিন গ্রহণ করিতেন।

সন্ধ্যারতির শেষে মন্দির প্রদক্ষিণ করিয়া তিনি গুরু গোপালনাথজীর সমাধি মন্দিরের বারান্দায় আসিয়া বসিতেন। ভক্ত ও মুমুকু দল প্রধানতঃ এই সময়েই তাঁহার সান্নিধ্য লাভ করিত। তারপর ঘণ্টার পর ঘণ্টা নীরবে সেখানে উপবেশন করিয়া, ভাবাবিষ্ট মহাপুরুষের দুই চারিটি সংক্ষিপ্ত বাণী ও উপদেশ শ্রবণ করিয়া তাহারা ধন্য হইত।

মঠের অতিথিসেবার দিক দিয়া গন্তীরনাথজীর ব্যবস্থায় কোন ক্রটি ধরিবার উপায় ছিল না। সাধু ও গৃহী নানা শ্রেণীর অভ্যাগতই সর্বদা মঠে আগমন করিতেন, ইহাদের ভোজন ও শয়নের যে কোন খুঁটিনাটি ব্যাপারের তত্ত্বাবধানে কোনদিন তাঁহার ভুল হইতে দেখা যায় নাই। আশ্রমের এক কোণে কোন নবাগত ভক্ত বা অতিথি হয়তো শুষ্ক কাষ্ঠের অভাবে রন্ধন করিতে পারিতেছে না, সর্বজ্ঞ

বাবার তাহা জানিতে বাকী থাকে না। দেখা যায়, সেবক শিশুকে দিয়া অবিলম্বে তিনি আলানি পাঠাইয়া দিতেছেন।

অতিথি বা আশ্রিতদের যখন যে কোন বস্তুর প্রয়োজন হইত, অর্দ্ধবাহুজ্ঞানের অবস্থায়ও সে সব বুঝিয়া নিতে তাঁহার অসুবিধা হইত না। এমনই ছিল তাঁহার সর্ববাত্মক দৃষ্টি।

অতিথিসেবার ব্যাপারে মাঝে মাঝে গম্ভীরনাথজীকে অলৌকিক শক্তির ব্যবহার করিতে দেখা যাইত। বিভিন্ন ঋতুতে এবং মঠের নানা উৎসবে সাধুসন্ত ও ব্রাহ্মণদের ভোজন করানোর রীতি ছিল। এ সময়ে নিমন্ত্রিত অতিথিদের পরিতৃপ্তির জন্য তাঁহার উৎসাহের সীমা থাকিত না।

একবার মন্দিরে বহুসংখ্যক ব্যক্তির নিমন্ত্রণ হইয়াছে। ভোজনের সময় কিন্তু দেখা গেল, প্রায় দ্বিগুণ লোক আসিয়া উপস্থিত। আশ্রম-কর্মীদের তো চক্ষুস্তির! অনন্তোপায় হইয়া তাঁহারা ছুটিয়া গিয়া বাবার শরণাপন্ন হইলেন।

গুরুধাম ও গোরক্ষনাথজীর মঠের মর্যাদার প্রশংসা এক্ষেত্রে জড়িত। গম্ভীরনাথজীর ধ্যানস্তিমিত নয়ন তাই তৎক্ষণাৎ সজাগ হইয়া উঠিল। নিজস্ব আসনটি ছাড়িয়া ধীর পদক্ষেপে তিনি তাঁহার পেটিকার নিকট গেলেন।

একখানি নূতন চাদর বাহির করিয়া সেবকের হস্তে দিয়া প্রশান্ত কণ্ঠে কহিলেন, “ভোজনের সব কিছু সামগ্রী এ চাদর দিবে ঢেকে ফেল। তারপর এগুলোর এক প্রান্ত থেকে পরিবেশন করতে থাক। কোন ভয় নেই, নাথজীর কৃপায় কোন কিছুই অনটন হবে না।”

নির্দেশ অনুযায়ী আহাৰ্য্য পরিবেশিত হইল। সকলে সবিস্ময়ে দেখিলেন, দ্বিগুণ সংখ্যক লোক তৃপ্তি সহকারে আহাৰ্য্য করার পরও যথেষ্ট খাওয়া উদ্ধত রহিয়াছে।

গ্রীষ্মকালে আশ্রমের বাগানগুলিতে আম পাকিতে শুরু করিলেই গম্ভীরনাথজী - প্রতি বৎসর এক ভোজের আয়োজন করিতেন।

অতিথিদিগকে এই সময়ে প্রচুর পরিমাণে খাদ্য পরিবেশন করা হইত। একবারকার নিমন্ত্রণে অপ্রত্যাশিতরূপে বহু অভ্যাগতের সমাগম হয়। হঠাৎ এত লোকের আগমনে আশ্রমিকগণ হতবুদ্ধি হইয়া পড়িলেন। বাজার হইতে আম কিনিয়া আনিবারও তখন আর সময় নাই। কৰ্ম্মকর্তাগণ বাবার নিকট তাঁহাদের এ সঙ্কটের কথা নিবেদন করিলেন।

তিনি আদেশ দিলেন, সবগুলি আমের ঝুড়ি যেন এখনি তাঁহার তক্তাপোষের নীচে রাখিয়া দেওয়া হয়। ঝুড়িগুলিকে একখণ্ড শুভ্র চাদর দিয়া ঢাকিয়া দেওয়া হইল এবং সেবকগণ উহার একদিক হইতে আম তুলিয়া লইয়া পরিবেশন কবিতো লাগিলেন। আশ্চর্যের বিষয়, মহাপুরুষের যোগবিভূতির প্রভাবে ফলগুলি নিঃশেষিত হওয়ার কোন লক্ষণই দেখা গেল না। অজস্র লোককে সেদিন ভূরিভোজনে আপ্যায়িত করা হইল।

গোরক্ষনাথজীর দোহাই দিয়াও কোন কোন সময়ে আর্ন্ত ভক্তগণ বাবা গন্তীরনাথের যোগৈশ্বর্যের প্রকাশ ঘটাইতে সক্ষম হইতেন। শ্রীঅতুলবিহারী গুপ্ত তাঁহার “মৃত্যুর পরে ও পুনর্জন্মবাদ” নামক গ্রন্থে এ সম্পর্কে এক প্রত্যক্ষ ঘটনার বিবরণ দিয়াছেন :

অতুলবাবু গোরখপুর গভর্নমেন্ট স্কুলের একজন শিক্ষক। সেদিন এ বিদ্যালয়ের প্রধান শিক্ষক, গন্তীরনাথজীর অগ্রতম ভক্ত শ্রীঅঘোরনাথ চট্টোপাধ্যায়ের সহিত তিনি গোরক্ষনাথ মঠে গিয়াছেন। সেখানে পৌঁছিয়াই তাঁহারা এক করুণ দৃশ্য দেখিতে পাইলেন। শহরের এক বিশিষ্ট ধনী ও সম্ভ্রান্ত গৃহের বৃদ্ধা মহিলা গন্তীরনাথজীর পা দুটি ধরিয়া আকুলভাবে কাঁদিতেছেন। মহিলাটির পুত্র ব্যারিষ্টারী পড়িতে বিলাত গিয়াছেন। গত চার মাস যাবৎ নাকি তাঁহার কোন পত্রাদি পাওয়া যায় নাই। বিলাতস্থিত তাঁহার এক বন্ধুর নিকট পত্র লেখা হইয়াছিল কিন্তু তিনিও কোন খোঁজখবর দিতে পারেন নাই। পুত্রটি বর্তমানে একরকম নিখোঁজ।

যোগীবর গন্তীরনাথজী

ঝামেলা এড়াইবার উদ্দেশ্যে গন্তীরনাথজী শান্ত স্বরে কহিতে লাগিলেন, “মাস্ট, আমি গরীব, সংসারত্যাগী লোক। বিলাতের খবর আমি কি করে জানবো বল ?”

পুত্রবিরহবিধুরা মাতা কিন্তু ছাড়িবার পাত্রী নন। নানা অনুনয় বিনয়ের পর তিনি বলিয়া উঠিলেন, “বাবা আমি ভাল করেই জানি, আপনি ইচ্ছে করলেই আমার ছেলের সংবাদ এনে দিতে পারেন। ভগবান গোরখনাথের দোহাই, আমাকে আপনি দয়া করুন, এ মহা সঙ্কট থেকে এবার উদ্ধার করুন।”

সৌম্যদর্শন যোগীবরের আননে মৃদু হাস্যের রেখা ফুটিয়া উঠিল। কহিলেন, “আচ্ছা মাস্ট, তুমি শান্ত হও। দেখছি এ ব্যাপারে আমি কি করতে পারি।”

গন্তীরনাথজী তখন নিজের প্রকোষ্ঠে গিয়া দ্বার রুদ্ধ করিলেন। প্রায় চল্লিশ মিনিট পর তাঁহাকে ফিরিতে দেখা গেল।

এবার মহিলাকে আশ্বস্ত করিয়া কহিলেন, “মাস্ট, সামনের সোমবার তোমার পুত্র গোরখপুরে ঠিক হাজির হবে। এখন সে জাহাজে রয়েছে। তুমি তার জন্ম কোন দুশ্চিন্তা করো না।”

যোগীবরের উপর বৃদ্ধা মহিলার শ্রদ্ধা ও বিশ্বাস প্রচুর। পুত্রের আগমনের সংবাদ ও তাঁহার মুখের আশ্বাস পাইয়া তিনি স্থান ত্যাগ করিলেন।

পরে ঘটনা সম্বন্ধে অতুল গুপ্ত মহাশয় লিখিয়াছেন, “পরের বুধবার অপরাহ্ন প্রায় চারটের সময় অঘোরবাবু আমাকে ডাকিয়া পাঠাইলেন। তাঁহার বাংলোতে উপস্থিত হইয়া দেখিলাম, একজন সাহেবী পোশাক পরিহিত হিন্দুস্থানী যুবক তাঁহার সহিত কথোপকথন করিতেছেন। আমাকে দেখিয়া অঘোরবাবু বাংলা ভাষায় বলিলেন, ‘ইনিই সেই বৃদ্ধার নিরুদ্দিষ্ট পুত্র। বাবার কথা মতই পরশু, সোমবার এখানে আসিয়াছেন। বাবার সহিত ইঁহার মায়ের সাক্ষাতের কথা ইনি এখনও জানেন না। আমি ইঁহাকে ও তোমাকে এখনই

বাবার নিকট লইয়া যাইব। বাবাকে আমি মহামানব বলে মনে করি।...আজ তোমার বহু দিনকার একটা কুসংস্কারের মূলোচ্ছেদ হইবে।”

“বাবা একা পূর্বমত কুটিরের সম্মুখে দালানে বসিয়া আছেন। তরুণ ব্যারিষ্টার বাবাকে দেখিয়াই অত্যন্ত বিস্মিত ভাবে বলিলেন— ‘হ্যালো বাবা। ইউ আর হিয়ার!’ অঘোরবাবু বিরক্তভাবে বলিলেন, ‘বাবা ইংরেজী জানেন না।’ আমরা সকলে উপবিষ্ট হইলে ব্যারিষ্টার সাহেব এবারে হিন্দীতে বলিলেন, আপনি এখানে কবে আসিলেন? আমি আজ জাহাজ হইতে নামিয়া ইম্পিরিয়াল মেল ধরিয়াছিলাম। কিন্তু সে গাড়ীতে আপনি ছিলেন বলিয়া তো আমার মনে হয় না।’

“অঘোরবাবু ব্যারিষ্টার সাহেবকে বলিলেন, ‘তোমার কথায় মনে হইতেছে, তুমি বাবাকে যেন ইহার আগে অত্র কোন স্থানে দেখিয়াছ। সত্য কি?’

“ব্যারিষ্টার—‘খুব সত্য। আমাদের জাহাজ যখন বোম্বাই হইতে এক দিনের পথ, তখন আমি বাবাকে আমার ক্যাবিনের ঠিক বাহিরে দেখিতে পাই। একজন সাধুকে প্রথম শ্রেণীর নিকট ঘুরিতে দেখিয়া আমি বাহির হইয়া তাহার সহিত প্রায় পাঁচ মিনিট কথোপকথন করিয়াছিলাম। তাহার পর বাবা অত্রদিকে চলিয়া যান।’

“আমি।—আপনার কি মনে পড়ে, কবে কোন সময় আপনি জাহাজে বাবার সহিত কথা কহিয়াছিলেন?’

“পাঠক জানেন, ঐ বুধবার সন্ধ্যার পূর্বে বাবা নিজের কক্ষে প্রবেশ করিয়া প্রায় ৪০ মিনিট উহার মধ্যে অবস্থান করিয়াছিলেন। অথচ ব্যারিষ্টার সাহেব বলিলেন, যে, ঐ সময় তিনি বাবাকে জাহাজের উপর দেখিতে পান। এ সমস্তার উত্তর এই যে, বাবা সূক্ষ্ম দেহে ঐ জাহাজে উপস্থিত হইয়াছিলেন ”

মহাযোগীর এরূপ যোগবিভূতির প্রকাশ অগ্ৰাণ্য বহু ক্ষেত্রেও দেখা যাইত। তাছাড়া, একই সঙ্গে বিভিন্ন স্থানে স্থলদেহে তাঁহার আবির্ভাবের তথ্যও একদল ঘনিষ্ঠ শিষ্যের জানা ছিল।

গন্তীরনাথজী তখন যোগসিদ্ধির উত্তুঙ্গ চূড়ায় অধিষ্ঠিত। সমাধি ও ব্রহ্মধ্যানেই তাঁহার দিনের অধিকাংশ সময় কাটিয়া যাইত। কিন্তু এই সূক্ষ্মলোকচারী মহাপুরুষের দৃষ্টি হইতে স্থল জগতের মানুষের ক্ষুদ্রতম ইচ্ছা বা অভাব-অভিযোগটুকু কখনো এড়াইয়া যাইতে পারিত না। গন্তীরনাথজীর শিষ্য জীবিনোদবিহারী দাশগুপ্ত তাঁহার স্মৃতিলিপিতে ইহার কিছুটা উল্লেখ করিয়াছেন।

মঠে রামেশ্বর নামে এক কিশোরবয়স্ক ভৃত্য ছিল, সে বাবা মহারাজের সেবাপরিচর্যা করিত। একদিন দ্বিপ্রহরে নাথজীর প্রসাদ পাইবার পর গন্তীরনাথ তাঁহার প্রকোষ্ঠে বসিয়া বিশ্রাম করিতেছেন। এ সময়ে বিনোদবাবু চুপি চুপি ঘরে প্রবেশ করিলেন। বাবাজীর সেবার কোন সুযোগই তিনি এ যাবৎ পাইতেছেন না। আজ তাঁহার বড় ইচ্ছা হইয়াছে, রামেশ্বরের হাত হইতে টানা পাখার দড়িটি লইয়া নিজে কিছুক্ষণ নিজারত বাবাকে ব্যাজন করিবেন।

ঘরে প্রবেশ করিয়াই বিনোদবাবু কিন্তু থমকিয়া গেলেন। গন্তীরনাথজী খাটে উপবিষ্ট, আর বালক ভৃত্যটি তাঁহার কাছ ঘেঁষিয়া দাঁড়াইয়া আছে। বাবা সকাল বেলায় বেদানা, আপেল প্রভৃতি ফলের অজস্র ভেট পান। উহারই দুই তিনটি হাতে লইয়া তিনি নাড়াচাড়া করিতেছেন। উদ্দেশ্য—নিরিবিলিতে বসিয়া খাইবার জন্ত বালক ভৃত্যটিকে দুই চারিটি ফল দিবেন। দীনহুঃখী বালককে আদর করিয়া কিছু খাইতে দিবে এমন আপনজন কেহ নাই। তাই নিজেই গোপনে তাহাকে এগুলি বাহির করিয়া দিতেছেন। ঠিক এ সময়ে অপর একজনের আকস্মিক আগমনে দাতা ও গ্রহীতা উভয়েই চমকিয়া উঠিলেন।

বিনোদবাবু তৎক্ষণাৎ প্রকোষ্ঠ হইতে বাহির হইয়া আসিলেন ।

মঠ-এস্টেটের কর্মচারীদের কেহ কোন অপরাধমূলক কাজ করিলে গম্ভীরনাথজী তাহাকে কঠোরভাবে তিরস্কার করিতেন । কখনো কখনো তাহাকে অপর কাজে বদলী করাও হইত । কিন্তু কোন অপরাধীকে বরখাস্ত করার জন্য শিষ্টগণ কখনো চাপ দিলে তিনি রাজী হইতেন না । ব্যস্ত হইয়া বলিতেন, “বেচারী না খেয়ে মরবে ? তোমরা কি ওকে আরো অভাব ও পাপের ভেতরে ঠেলে দিতে চাও ?”

দীন দরিদ্র প্রতিবেশী এবং প্রজাদের তিনি ছিলেন পিতা ও প্রতিপালক । কোন প্রকার সাহায্য বা আশ্রয় একবার কেহ চাহিয়া বসিলে কাহাকেও প্রত্যাখ্যান করা তাহার স্বভাববিরুদ্ধ ছিল । উত্তরকালে গম্ভীরনাথজীর সমাধি মন্দিরের সম্মুখে তাই অনেক দুঃস্থ প্রজাকে অশ্রুমোচন করিতে দেখা যাইত । তাহারা খেদোক্তি করিত, “বুড়ো মহারাজ ! আপনি আজ কোথায় লুকিয়ে আছেন ? যেখানেই থাকুন—আমাদের ওপর আপনার কৃপাদৃষ্টি যেন থাকে । আমাদের দুঃখের কথা শোনবার, অভাব মোচন করবার যে আর কেউ নেই !”

শুধু মানুষই নয়, ইতর প্রাণীর দলও মহাযোগীর স্নেহস্পর্শ হইতে বঞ্চিত হয় নাই । তিনি বারান্দায় অথবা মঠপ্রাঙ্গণে উপবেশন করিলেই কুকুরের দল আসিয়া তাহার পা ঘেঁষিয়া শুইয়া পড়িত । যত ধূলি-মলিনই উহারা থাকুক, বাবার সান্নিধ্য হইতে উহাদের নড়ানো যাইত না । কুকুরদের উত্যক্ত করিতে গেলে তিনি নিজেই ভক্তদের নিষেধ করিতেন ।

বিনোদবাবুর লেখায় এক রাত্রির একটি চমৎকার দৃশ্য ফুটিয়া উঠিয়াছে—“একদিন শেষরাত্রে বাবার ঘরে খটখট শব্দ শুনিয়া দরজা খুলিয়া প্রবেশ করিয়া দেখি, বাবা তাহার খাটের নীচ হইতে রুটি ছিঁড়িয়া ইন্দুরগুলিকে বাঁটিয়া দিতেছেন । আমাকে দেখিয়া যেন লজ্জা পাইয়া তিনি খাটে গিয়া বসিলেন এবং আমার চিন্তাকে

যোগীবর গন্তীরনাথজী

অন্যদিকে ধাবিত করিবার জন্য আমাকে তামাক সাজিতে বলিলেন। বাবার চক্ষে কেহ কখনও এক ফোঁটা জল দেখে নাই, কিন্তু তাঁহার অন্তঃকরণটি যে অত্যন্ত কোমল ছিল, তাঁহার দৃষ্টি ও ব্যবহারের প্রতি পদে ইহার সাক্ষ্য পাইয়াছি।”

রেশমী বস্ত্র গন্তীরনাথজী কখনো পরিতে চাহিতেন না। কোন ভক্ত বা শিষ্য এরূপ পরিচ্ছদ ভেট দিলে তিনি উহা সরাসরিভাবে ফিরাইয়া না দিয়া নিকটস্থ সেবকশিষ্যকে কোথাও উঠাইয়া রাখিতে বলিতেন।

একবার একটি রেশমী বস্ত্র পরার জন্য তাঁহাকে বারবার অনুরোধ জ্ঞাপন করা হইলে আসল কথাটি প্রকাশ পায়। তিনি শান্তস্বরে বলিতে থাকেন, “যারা রেশম সূতো উৎপন্ন করে, তারা পোকের সঙ্গে গুটিগুলি ফুটন্ত গরম জলে ফেলে দেয়। জীবন্ত পোকাগুলো যাতে রেশম না কেটে ফেলে সেজন্যই এ ব্যবস্থা। কিন্তু এর ফলে বহু পোকের মৃত্যু ঘটে।”

সকলেই বুঝিলেন, এজন্যই রেশমী বস্ত্রের প্রতি বাবার এগন বিতৃষ্ণা।

১৯০০ সাল হইতে গন্তীরনাথজী লোকগুরুরূপে আত্মপ্রকাশ করেন। যোগীজীবনের এক করুণাঘন অধ্যায় এ সময়ে উন্মোচিত হইতে দেখা যায়। বহু মুমুকু ও ভক্ত তাঁহার নিকট আসিতে থাকে, ইহাদে মধ্যে কিছু সংখ্যক লোক তাঁহার শিষ্যত্ব লাভে ধন্য হয়। এ ভাগ্যবানদের মধ্যে বাঙালীর সংখ্যাই ছিল বেশী।

মহাযোগী গন্তীরনাথজীর প্রতি প্রভুপাদ বিজয়কৃষ্ণ গোস্বামীর শ্রদ্ধার অন্ত ছিল না। তিনি নিজে যেমন যোগীবরের নিকট হইতে সাধনার নির্দেশাদি নিতেন, তেমনি মুমুকু ও ভক্তদের মধ্যেও এই শক্তিধর মহাপুরুষের গুণ কীর্তনে তাঁহার বিরাম ছিল না। ঈশ্বর-প্রাপ্তির পথে গোস্বামীজী সদগুরু লাভের উপর অত্যধিক জোর দিতেন

এবং এ সময়ে অনেককে তিনি বাবার আশ্রয় গ্রহণে উৎসাহিত করিতেন। তৎকালীন বাংলার শিক্ষিত সমাজে বাবা গন্তীরনাথের কথা গৌসাইজীর উৎসাহেই বেশী প্রচারিত হয় এবং এই মহাযোগীর চারিদিকে ক্রমে ক্রমে আশ্রয়প্রার্থীর ভীড় জমিতে থাকে।

লোকমুখে গন্তীরনাথজীর লোকোত্তর জীবনের মহিমা শুনিয়া বহু ভক্ত দর্শনার্থী আসিয়া জুটিতে থাকে। আবার অলৌকিকভাবে নির্দেশ প্রাপ্ত হইয়াও কম সংখ্যক লোক তাঁহার নিকট আত্মসমর্পণ করে নাই।

কুমিল্লার এক ডাক্তার বড় ভগবদ্ভক্ত ছিলেন। একদিন তিনি স্বপ্নে দেখেন, একটি অপরিচিত স্থানে তিনি উপনীত হইয়াছেন। সেখানে এক সৌম্য, দিব্যদর্শন যোগী তাঁহাকে দীক্ষা প্রদান করিলেন। এ অদ্ভুত স্বপ্নের নিহিতার্থ কি ডাক্তার তাহা বুঝিতে পারেন নাই। কিন্তু এ সম্পর্কে তাঁহার ব্যাকুলতা ক্রমেই বৃদ্ধি পাইতে থাকে।

তাঁহার এক বন্ধু গোস্বামী বিজয়কৃষ্ণের শিষ্য। হঠাৎ একদিন ইহার সঙ্গে ডাক্তারের দেখা। প্রসঙ্গক্রমে তাঁহার অন্তরের আলোড়নের কথাও প্রকাশ হইয়া পড়ে।

বন্ধুটি সব কথা শুনিয়া সবিস্ময়ে কহিলেন, “তোমার স্বপ্নে দেখা এ মহাত্মা বোধহয় গোরখপুরের গন্তীরনাথজী। তুমি অবিলম্বে তারই কাছে শরণ নাও।”

কয়েকদিনের মধ্যেই ডাক্তার আকস্মিকভাবে তাঁহার যাতায়াত ব্যয়ের উপযুক্ত অর্থ প্রাপ্ত হন। ইহার পর গোরখপুরের মঠে পৌঁছিয়া তাঁহার বিস্ময়ের সীমা রহিল না। বুঝিলেন—স্বপ্নে এই স্থানটির দৃশ্যই তিনি দেখিয়াছেন, আর বাবা গন্তীরনাথই তাঁহার স্বপ্নদৃষ্ট গুরুদেব।

দীক্ষাদানের পর গন্তীরনাথজীকে তিনি তাঁহার স্বপ্ন সম্বন্ধে প্রশ্ন করেন। উত্তরে বাবা কহিয়াছিলেন, “বেটা, তোমার সংস্কার ছিল, আর তোমার সঙ্গে আমার পূর্বের সম্বন্ধও ছিল।”

যোগীবর গম্ভীরনাথজী

নোয়াখালির সুদূর অঞ্চলের এক বালকও এরূপ স্বপ্নযোগে একবার গম্ভীরনাথজীর দিব্য মূর্তিটি দর্শন করে। এ মহাত্মা কে— বালকের তাহা জানা নাই। অথচ ইহার চরণোপান্তে পৌছিবার জন্য সে উৎকণ্ঠিত হইয়া উঠে। একদিন ফেণীতে আসিয়া কোন পরিচিত ব্যক্তির গৃহে সে গম্ভীরনাথজীর আলোকচিত্র দর্শন করে। ইহাই যে তাহাব স্বপ্নদৃষ্ট মহাপুরুষের প্রতিকৃতি তাহাতে আর সন্দেহ থাকে না।

বালক ভক্তটির ব্যাকুলতা ক্রমেই বাড়িতে থাকে এবং পাথেয় সংগ্রহ করিয়া শীঘ্রই সুদূর গোরখপুরে উপনীত হয়। রাত্রি তখন তিনটা। এসময়ে মঠে উপস্থিত হইয়া সে দেখে, বাবা গম্ভীরনাথ বারান্দায় একটি লণ্ঠন জ্বালাইয়া রাখিয়া খাটিয়ার উপর বসিয়া আছেন। দূরদেশাগত বালক ভক্তটির জন্যই তিনি যেন প্রতীক্ষমাণ। প্রণাম করামাত্রই যোগীবর স্নেহভরে কুশল বার্তা জিজ্ঞাসা করিলেন। জানাইলেন, তাহার বিশ্রামের জন্য শয্যার ব্যবস্থা পূর্ব হইতেই ঠিক করা রহিয়াছে।

ময়মনসিংহের একটি ভক্ত বালকের অভিজ্ঞতাও কম বিচিত্র নয়। অল্প বয়সেই সে এক যোগসাধকের নির্দেশে ধ্যানাভ্যাস শুরু করে। একদিন আসনে উপবিষ্ট থাকাকালে গম্ভীরনাথজীর দিব্য মূর্তিটি তাহার মানসপটে ফুটিয়া উঠে। বিস্ময়ে আনন্দে বালক অধীর হয়, এরূপ কোন মহাপুরুষের চিত্র ইতিপূর্বে সে কখনো দেখে নাই, তাঁহার কথাও কখনো শুনে নাই। কিছুদিন পরে বাবা গম্ভীরনাথের এক শিষ্যের সহিত বালকটির যোগাযোগ স্থাপিত হয় এবং স্বল্পকাল মধ্যে সে যোগীবরের আশ্রয় লাভ করে।

অলৌকিক উপায়ে যে ভক্তদের সহিত গম্ভীরনাথজী যোগাযোগ স্থাপিত করেন তাহাদের সংখ্যা কিন্তু নিতান্ত কম নয়। এ সম্পর্কিত কার্যকারণের ধরন দেখিয়া মনে হয়, ঈশ্বর-নির্দিষ্ট বিশেষ

কোন বিধান অনুযায়ীই যোগীবর তাঁহার সম্ভাব্য শিষ্যদের অন্তরসত্য নিজেই প্রতিফলিত করিতেন। এক অমোঘ আকর্ষণের ফলে তাহারা একের পর এক ছুটিয়া আসিত।

যোগীবরের শিষ্য, অধ্যাপক শ্রীঅক্ষয়কুমার বন্দোপাধ্যায় লিখিয়াছেন, “স্বভাবতঃই মনে হয় যে বাবাজী তাঁহার শিষ্যমণ্ডলীকে আবাহন ও আকর্ষণ করিয়া আপনার কৃপায় তাহাদের কোলে টানিয়া লইয়াছেন এবং তাহাদের জীবন সাথক করিয়া দিয়াছেন। অথচ সাক্ষাৎ দর্শনের কালে কখনো তিনি ইহার কোন পরিচয় প্রদান করিতেন না। অলৌকিক দর্শন সম্বন্ধে কেহ সাহস করিয়া কোন কথা জিজ্ঞাসা করিলে তিনি প্রায়শঃ বলিতেন—‘স্বপ্ন তো স্বপ্নই, তৎপ্রতি এত মনোযোগ দিবার আবশ্যিকতা কি?’ দু-একজন ভক্ত নিতান্ত আকুল হইয়া কখনো জিজ্ঞাসা করিতে থাকিলে তাহাদিগকে যেন সান্ত্বনা প্রদানের স্বরে তিনি বলিতেন, ‘তোমাদের সহিত সম্বন্ধ ছিল’ অথবা ‘তোমার সংস্কার ছিল’।”

যোগীবর গম্ভীরনাথজীর অলৌকিক শক্তি দূরদূরান্তের কত মুমুক্শুকে টানিয়া আনিয়াছে, তাঁহার করুণার স্পর্শমণি কত মানুষকে রূপান্তরিত করিয়াছে! এইসব জীবন্ত মানুষদের সঙ্গে অশরীরী আত্মাও কখনো কখনো মহাপুরুষের কৃপা হইতে বঞ্চিত হয় নাই।

একবার একটি ভক্ত গম্ভীরনাথজীর নিকট সঙ্গীক দীক্ষা গ্রহণের সিদ্ধান্ত করেন। এ বিষয়ে তাঁহার স্ত্রীরও ব্যাকুলতা কম ছিল না। কিন্তু মহিলাটির দুর্ভাগ্যক্রমে ইহা ঘটয়া উঠে নাই। অল্পদিন মধ্যে আকস্মিকভাবে তাহার লোকান্তর ঘটে।

কিছুদিন পর ভক্ত স্বামীটির দীক্ষা গ্রহণের ব্যবস্থা ঠিক হইল। গম্ভীরনাথজীকে তিনি করজোড়ে কহিলেন, “বাবা, আমার স্ত্রীর বড় অভিলাষ ছিল, আমার সঙ্গে একত্রে দীক্ষা নেবেন। আজকের শুভ অনুষ্ঠানে তাঁর অপূর্ণ বাসনা চরিতার্থ হোক, তাঁর ওপর গুরুকৃপা বর্ষিত হোক—এ আমার একান্ত মিনতি।”

যোগীবর গন্তীরনাথজী

গন্তীরনাথজীর কাছে বারবার সকাতরে তিনি এ প্রার্থনাটি নিবেদন করিতে লাগিলেন ।

অক্ষয়বাবু এ ঘটনার এক মনোজ্ঞ বিবরণ দিয়াছেন—“যোগীরাজ প্রথমে ধীরভাবে উত্তর দেন, প্রেতাত্মাকে দীক্ষা দেওয়া কিরূপে সম্ভব ? যোগীরাজের পক্ষে যে ইহা অসম্ভব নয়, সে বিশ্বাস দীক্ষার্থীর ছিল । স্বামীটির ঐকান্তিক ব্যাকুলতায় যোগীরাজ ছুইখানা আসন স্থাপন করিতে নির্দেশ দেন । দীক্ষার্থী স্বামী গুরুদেবের সম্মুখে একখানা আসনে উপবেশন করিলে, তিনি তাঁহাকে চক্ষু মুদ্রিত করিয়া বসিতে আদেশ করেন ।

“দীক্ষা লাভের সঙ্গে সঙ্গে শিষ্যের অনুভব হইল যে, তাঁহার পত্নীও দীক্ষা লাভ করিয়া কৃতার্থ হইলেন । গুরুদেবের অসাধারণ করুণায় তাঁহার হৃদয় আনন্দে পরিপ্লুত হইল । অনুভূতির উপর বিশ্বাস সূদৃঢ় করিবার নিমিত্ত তিনি বিনীতভাবে প্রশ্ন করিলেন—‘তাঁহার স্ত্রীর দীক্ষালাভ হইয়াছে কিনা ?’ গুরুদেব মৃদুস্বরে উত্তর দিলেন—‘হ্যাঁ ।’ অহেতুক রূপাসিন্ধু গুরুদেব রূপা করিয়া প্রেতাত্মাকেও আকর্ষণপূর্বক আপনার চরণপ্রান্তে আনিয়া দীক্ষাদান করিলেন, ইহা ভাবিতে ভাবিতে তাঁহার হৃদয় বিস্ময়ে ভক্তিতে কৃতজ্ঞতায় বিহ্বল হইয়া পড়িল ।”

শিষ্যদের কাছে বাবা গন্তীরনাথের প্রধান উপদেশ ছিল,—‘বিশ্বাস রাখনা’—‘বিচার করনা ।’ গুরু এবং ঈশ্বরের প্রতি বিশ্বাস ও আত্মসমর্পণ ছিল তাঁহার প্রথম বাক্যের নিহিতার্থ । দ্বিতীয়টি জ্ঞাপন করিত—সতত পরিবর্তনশীল মায়াচ্ছন্ন সংসার সম্বন্ধে বিচারের কথা । এই বিচারের মধ্য দিয়া জ্ঞান লাভের নির্দেশ দিতেন ।

কিন্তু এ সমস্ত উপদেশাদি ছিল যোগীগুরু গন্তীরনাথজীর বহিরঙ্গ কথা । অন্তরঙ্গ ক্ষেত্রে তাঁহার প্রদত্ত দীক্ষা ও সাধন বহুতর সাধু-সন্ন্যাসী ও শিষ্যের জীবনকে চরম সার্থকতায় ভরিয়া তুলিত । তাঁহার

কৃপাপ্রাপ্ত শিষ্যদের যেসব অধ্যাত্ম-অভিজ্ঞতা ও অতীন্দ্রিয় অনুভূতির কথা শোনা যায়, তাহা কম বিস্ময়কর নয়।

শিষ্য ও ভক্তদের দৈনন্দিন জীবনের উপর, যোগীবরের সদাসতর্ক দৃষ্টিটি প্রসারিত থাকিত। তাহাদের মনোলোকের সামান্যতম তরঙ্গটিও তাঁহার অন্তরে প্রতিফলিত না হইয়া পারিত না। শক্তিধর যোগীবর দিনের পর দিন তাঁহার সমগ্র সত্তাটি দিয়া আশ্রিতদের জীবনকে যেন ঘিরিয়া রাখিতেন। সাংসারিক ও আধ্যাত্মিক যে কোন প্রয়োজনের ব্যাপারে 'বাবার' উপর তাহারা নির্ভর করিতে পারিত।

দর্শনাধী-পরিবৃত যোগীবরের সম্মুখে এক ভক্ত সেদিন উপবিষ্ট রহিয়াছেন। চা পানে তাঁহার আসক্তি যথেষ্ট, কিন্তু সঙ্কোচবশতঃ তাহা এতক্ষণ প্রকাশ করেন নাই। গম্ভীরনাথজী হঠাৎ অর্দ্ধবাহু অবস্থা হইতে জাগ্রত হইয়া তাহাকে উদ্দেশ্য করিয়া কহিতে লাগিলেন, “আরে যাও যাও, জলদি চা তো পী লেও।”

মঠের উদ্যান-গৃহে বহিরাগত শিষ্যগণ কখনো কখনো সপরিবারে আসিয়া বাস করেন। মহিলা ভক্তদের দেহ কেহ হয়তো গহনাপত্র সঙ্গে লইয়া আসিয়াছেন। রাত্রি অন্ধকাবে, বিশেষতঃ বাগানের নির্জনতায় ভয়ও তাঁহারা কম পাইতেছেন না। অন্তর্যামী গম্ভীরনাথজীর কাছে এসব তথ্য মোটেই অজানা থাকিত না। সতর্ক সংসারী অভিভাবকের মত তিনি বলিয়া পাঠাইতেন, গহনার বাক্স যেন তাঁহার প্রকোষ্ঠে রাখিয়া দিয়া সকলে নিশ্চিন্তে নিদ্রা যায়।

গম্ভীরনাথজী একদিন ধ্যানাবিষ্ট অবস্থায় তাঁহার আসনটিতে বসিয়া আছেন। চতুর্দিকে ভক্ত ও শিষ্যদের ভীড়। ধ্যানস্তিমিত নেত্রটি উন্মীলন করিয়া বাবা অকস্মাৎ কক্ষের এক কোণে অঙ্গুলি নির্দেশ করিলেন। দেখা গেল সেখানে একটি ঘূতের টিন রহিয়াছে। উহা তখনই রৌদ্রে দিবার জন্ত ইঙ্গিত করিয়া আবার তিনি পূর্ববৎ ধ্যানমগ্ন হইলেন। কিন্তু ব্যাপারটি এখানেই থামিল না। কিছুক্ষণ পর তিনি আবার নয়ন মেলিলেন। এবার ঘূতের ভাণ্ডটি দেখাইয়া

যোগীবর গম্ভীরনাথজী

যোগীবর নির্দেশ দিলেন, উহা হইতে কিছুটা অংশ একটি ভিন্ন পাত্রে ঢালিয়া যেন অবিলম্বে হাতিশালার দোতলায় নিয়ে যাওয়া হয়।

একটু পরেই ঘৃত সম্বন্ধীয় এ রহস্যের সন্ধান মিলিল। ঐ দোতলার প্রকোষ্ঠে একজন ভক্ত তখন সস্ত্রীক বাস করিতেছিলেন। এ দম্পতির প্রধান কার্য ছিল একনিষ্ঠভাবে যোগীবরের সেবা-পরিচর্যা করা। নানাবিধ ঘৃতপদ্য খাওয়া প্রস্তুত করিয়া প্রতিদিন তাঁহারা বাবার ভোজনের জন্ত পাঠাইতেন। আজ এ ঘৃতটুকু প্রেরণ করিয়া গম্ভীরনাথজী তাঁহাদের সেবানিষ্ঠাকে এক সম্মেহ স্বীকৃতি দান করিলেন। উপস্থিত সকলে দেখিয়া বিস্মিত হইল, আত্মসমাহিত মহাযোগীর কাছে ভক্ত-হৃদয়ের ক্ষীণতম ভাব-তরঙ্গটির মূল্য এতটুকুও তুচ্ছ নয়।

কান্তিচন্দ্র সেন গোরখপুরের অন্যতম শ্রেষ্ঠ ডাক্তার। বাবার প্রতি তাঁহার ভক্তি অপরিসীম। পরের চিকিৎসায় নাম করিলে কি হয়, নিজের পরিবারের কেহ ছুরারোগ্য ব্যাধিতে আক্রান্ত হইলে ডাক্তার সেন সর্বদাই গম্ভীরনাথজীর শরণাপন্ন হইতেন। বাবার নিকট হইতে কিঞ্চিৎ ধূনির বিভূতি অথবা ‘আশাবরী ধূপ’ লইয়া পরম নির্ভরতার সহিত তিনি রোগীকে ব্যবহার করিতে দিতেন। অগোণে সে আরোগ্য লাভও করিত।

ডাক্তার সেনের পুত্র একবার মরণাপন্ন কাতর হয়। বাঁচিবার যখন কোন আশাই নাই, তখন তিনি বাবা গম্ভীরনাথের শরণ গ্রহণ করেন। বাবার প্রদত্ত আশাবরী ধূপের ধোঁয়া নাসিকায় কয়েকবার দিবার পর বালকের রোগের উপশম ঘটে। শীঘ্রই সে সারিয়াও উঠে।

শিষ্যগণসহ গম্ভীরনাথজী একবার হরিদ্বারে উপস্থিত হইয়াছেন। সেখানে তখন কলেরার প্রাদুর্ভাব। ভক্ত উমেশবাবুর সহিত তাঁহার মুহুরীর একটি অল্পবয়স্ক পুত্রও বেড়াইতে আসিয়াছে। হঠাৎ এই ছেলেটি কলেরায় আক্রান্ত হইয়া পড়িল। পরের ছেলেকে লইয়া এ এক মহা সঙ্কট। উমেশবাবু তখন মহাপুরুষের চরণতলে

পড়িয়া বারবার এ বালকটির প্রাণ ভিক্ষা চাহিতে লাগিলেন। সঙ্গে সঙ্গে ইহাও তিনি ভাবিতে থাকেন, বালক, তাহার গরীব পিতার একমাত্র পুত্র—উমেশবাবুর পরিবারের কাহারো জীবনের পরিবর্তে যদি ইহার প্রাণরক্ষা হয় তাহাই তিনি বাঞ্ছনীয় মনে করিবেন।

গণ্ডীরনাথজী এতক্ষণ মৌনী হইয়াই ছিলেন। কিন্তু উমেশবাবুর মনে ঐ চিন্তাধারা উদ্গত হইতে দেখিয়াই তীব্র দৃষ্টিপাত করিয়া তিনি এক হুঙ্কার ছাড়িলেন।

উমেশবাবুর বুঝিতে বিলম্ব হইল না, বাবা তাঁহার মনোভঙ্গীর মধ্যে এক প্রচ্ছন্ন আগন্তুরিতার বীজ লুক্কায়িত দেখিয়াছেন। ভৎসনাসূচক হুঙ্কার এই কারণেই। ইহার মর্ম্মার্থ—‘হুঁ, তুমি এরই মধ্যে এমন মুক্তপুরুষ ও বীর হয়ে গিয়েছে যে, নিজের ছেলের পরিবর্তে পরের ছেলের জীবন রক্ষায় অগ্রসর হতে চাও!’ অতঃপর ভক্তের কাতর ক্রন্দনে কৃপালু যোগীবরকে সেদিন কিন্তু বলিতে হয়—“আচ্ছা, বাঁচেন।” বালকটির সঙ্কট সেই দিনই কাটিয়া যায় এবং অচিরে সে রোগমুক্ত হয়।

ভক্ত ও শিষ্যগণ যতদূরেই অবস্থান করুক না কেন, যোগীবরের কল্যাণহস্তখানি সতত তাহাদের জগৎ প্রসারিত থাকিত। বাবা একদিন গেরখপুর মঠে স্থায়ী প্রকোষ্ঠমধ্যে বসিয়া আছেন। সম্মুখে কয়েকজন অন্তরঙ্গ ভক্ত। অকস্মাৎ ব্যাকুলভাবে তিনি জিজ্ঞাসা করিলেন, শিষ্য উমেশবাবুর সংবাদ কেহ পাইয়াছে কিনা—তিনি কেমন আছেন?

উমেশবাবু তখন সপরিবারে হরিদ্বারে। সকলেই ভাবিলেন, নিশ্চয় তাঁহার কোন বিপদ উপস্থিত। টেলিগ্রামে তাঁহার সংবাদ আনানো হইবে কিনা প্রশ্ন করিলে গণ্ডীরনাথজী অর্দ্ধনিমীলিত নয়নে কিছুক্ষণ মৌনী থাকিয়া শুধু বলিলেন, “হাঁ, কাল দেখা যায়গা।”

যোগীবর গম্ভীরনাথজী

পরদিন তাঁহাকে এ বিষয়ে বলিতে গেলে সংক্ষেপে উত্তর দিলেন,—
এজন্য আর ব্যস্ত হইবার দরকার নাই।

কয়েকদিন পর উমেশবাবুর চিঠিতেই বিস্তারিত সংবাদ পাওয়া গেল। বাবা গম্ভীরনাথ যে সময়ে তাঁহার খোঁজখবর নিবার জন্য ব্যস্ত হন, ঠিক সেই সময়েই উমেশবাবু ট্রেনে ভ্রমণ করিতেছিলেন। চলন্ত গাড়ীর হাতল ধরিয়া ঝুলিতে ঝুলিতে হঠাৎ তাঁহার জীবন-নাশের উপক্রম হয়। তাঁহার স্ত্রী-পুত্রগণ গাড়ীর ভিতরে থাকিয়া চীৎকার করিতে থাকেন। এ আর্ত রব দূরে অবস্থিত বাবা গম্ভীরনাথের কর্ণে প্রবেশ কবে। বলা বাহুল্য, করুণার্দ্ৰ যোগীবর তখনই উমেশবাবুর প্রাণরক্ষায় অবহিত না হইয়া পারেন নাই।

আর একদিনের কথা। গম্ভীরনাথজী অর্দ্ধবাহু অবস্থায় আপন আসনটিতে বসিয়া আছেন। হঠাৎ কি এক অজ্ঞাত কারণে তাহার ধ্যানাবেশ টুটিয়া গেল। নয়ন মেলিয়া ব্যস্তভাবে তিনি ভক্ত ও শিষ্যদের কহিতে লাগিলেন, “মাষ্টারবাবু কি আজ মঠে ফিরে এসেছে?”

এই মাষ্টারবাবু তাঁহার অন্যতম শিষ্য, নাম প্রসন্নকুমার ঘোষ। শিক্ষা বিভাগ হইতে অবসর গ্রহণ করিয়া গুরুর সেবার জন্য সে সময়ে তিনি গোরখপুর মঠে বাস করিতেছিলেন। ঐ দিন রাত্রে প্রসন্নবাবু গাড়ী করিয়া মঠে ফিরিতেছেন। পথিমধ্যে হঠাৎ ঘোড়াটি উত্তেজিত হইয়া উঠে এবং গাড়ীটি ভাঙ্গিয়া ফেলে। এভাবে তাঁহার জীবন সংশয় হইলেও প্রসন্নবাবু বিশ্বয়করভাবে সামান্য আঘাতের মধ্য দিয়া সেদিন নিষ্কৃতি পাইয়া যান।

গম্ভীরনাথজী একবার কিছুদিনের জন্য কলিকাতায় আসিয়া বাস করেন। সে সময়ে শহরে এক শক্তিমান সাধকের আগমন ঘটে। যোগশক্তি সহায়ে ইনি যত্রতত্র বিচরণ করিতে পারিতেন এবং ইঁহার সম্বন্ধে নানা অলৌকিক কাহিনী শুনা যাইতে থাকে। যোগবলে ইনি পর-দেহে প্রবেশ করিতে পারেন বলিয়া খ্যাতি রটিয়া যায় এবং

তৎকালে অনেকে তাঁহাকে ‘পরদেহপ্রবেশী’ বলিয়াও অভিহিত করিতেন। লোকে বলিত, ইঁহাকে বারবার স্মরণ বা আহ্বান করিলে স্মৃষ্ণ দেহে ইনি আভির্ভূত হন।

বাবা গন্তীরনাথের এক শিষ্য মাঝে মাঝে ইঁহার নিকট যাইতেন। একদিন এই শিষ্যটি স্বগৃহে আসিয়া ঐ মহাপুরুষের প্রতি চিত্ত নিবিষ্ট করেন, মনে মনে আহ্বান জানান। অগোণে শক্তিধর মহাপুরুষ তাঁহার সম্মুখে উপস্থিত হন।

ঐ শিষ্যটির নিকট তাঁহার সেদিনকার অদ্ভুত অভিজ্ঞতার বিবরণ শুনিয়া ত্রীঅক্ষয়কুমার বন্দ্যোপাধ্যায় লিখিয়াছেন, “মহাপুরুষ তাঁহাকে দীক্ষা দিতে চাহিলেন, ভদ্রলোকটি তাহাতে ভীত হইলেন। তিনি এক মহাপুরুষের শিষ্য হইয়া কেন অগ্নের নিকট দীক্ষা গ্রহণ করিবেন? কিন্তু এইমহাত্মাকেও বিনা প্রয়োজনে আহ্বান করা অগ্নায় হইরাছে—এইরূপ চিন্তা করিতে করিতে তিনি বিমূঢ় হইলেন। ‘পরদেহপ্রবেশী’ তাঁহাকে বুঝিতে দিলেন, যে তাঁহার পূর্বলব্ধ মন্ত্রের শক্তি নষ্ট করিয়া তিনি তাঁহাকে দীক্ষা দান করিবেন। এমন সময়ে তিনি দেখিতে পাইলেন যে, পশ্চাৎ দিক হইতে বাবাঐর জ্যোতিঃপূর্ণ মূর্তি ‘পরদেহপ্রবেশী’র দিকে স্মৃতিস্মৃতিতে চাহিয়া আছে এবং সেই দৃষ্টি হইতে যেন অগ্নিস্থলিঙ্গ বিকীর্ণ হইয়া ‘পরদেহপ্রবেশী’কে অভিভূত করিয়া ফেলিতেছে। তিনি সেই ভোজে বিহ্বল হইয়া ভীত-চকিতভাবে নমস্কার করিতে করিতে প্রস্থান করিলেন। বাবাজীর মূর্তিও অন্তর্ভুক্ত হইল।”

গন্তীরনাথ বাবার শিষ্যটি ততক্ষণে যেন হাঁফ ছাড়িয়া বাঁচিলেন। বাবাজীর স্নেহময় দৃষ্টি যে বর্মের মতই তাঁহাকে সতত আবরিত করিয়া রাখিয়াছে, এ সত্য প্রত্যক্ষ করিয়া তাঁহার নয়ন সেদিন অশ্রুসিক্ত হইয়া উঠে। অন্ততপ্ত শিষ্য অতঃপর গুরুজীর নিকট গিয়া আপন ক্রটির জন্য বারবার ক্ষমা ভিক্ষা করিতে থাকেন। বাবার স্নেহমধুর আশ্বাসবাণীতে তাঁহার বিক্ষুব্ধ হৃদয় ক্রমে শান্ত হয়।

গন্তীরনাথজীর যোগবিভূতি ছিল অপরিমেয়। কখনো বাইরের সংঘাতে, কখনো বা রূপার প্রয়োজনে তাঁহার এই অলৌকিক শক্তির প্রকাশ ঘটিত—সাধারণ মানুষ ইহা দর্শনে বিস্ময়বিমূঢ় না হইয়া পারিত না। কিন্তু নিজস্ব আচরণে অথবা ব্যবহারিক জীবনের ক্ষেত্রে মহাযোগীর অলৌকিক ও সহজ মূর্তিটির দর্শনই সর্বদা মিলিত। মন্দির সংক্রান্ত মামলায় গন্তীরনাথজী উকিলদের পরামর্শের উপরই নির্ভর করিতেন। তাছাড়া, নিজে কোন কঠিন ব্যাধিতে আক্রান্ত হইলে চিকিৎসকের নির্দেশমত ঔষধ পথ্য গ্রহণে কখনো তিনি পরাজুখ হইতেন না, এসময়ে তাহাকে যেন অসহায় বালকের মতই দেখা যাইত। রোগের যন্ত্রণাকে তিনি সহজভাবে গ্রহণ করিতেন, অসুস্থ অবস্থায় চিরদিনই সেবক ও ডাক্তারদের পরামর্শ তাহাকে নির্বিচারে পালন করিতে দেখা যাইত।

একবারকার পীড়ায় তাহাকে তীব্র যন্ত্রণা ভোগ করিতে হয়। ভক্ত ও শিষ্যগণ তাহার এ অবস্থা দর্শনে নিতান্ত কাতর হইয়া পড়েন। একনিষ্ঠ, বাঙ্গালী সেবক-শিষ্য কালীনাথ ব্রহ্মচারীর উপরই তখন তাঁহার সেবাপরিচর্য্যার ভার। ব্রহ্মচারী একদিন সোজামুজি বলিয়া বসিলেন, “বাবা, আপনি ইচ্ছে করেই এত কষ্টে ভুগছেন, আর আপনার যন্ত্রণা দেখে আমাদের প্রাণেও এত দুঃখ হচ্ছে। ইচ্ছাশক্তি প্রয়োগ করে আপনি এখনই এ রোগটা ঝেড়ে ফেলুন।”

বাবাজী কিন্তু নিরুত্তর। বারবার তাহাকে এই মিনতি করা হইলে তিনি শুধু বলিয়া উঠিলেন, “ক্যা, ম’য় ভগবানকি কর্নী পলট দেঙ্গে ?”—কেন, আমি কি ভগবানের বিধানকে উল্টে দেব ?

১৯১৪ সালের শেষের দিকে গন্তীরনাথজীর একটি চোখ ছুরারোগ্য ব্যাধিতে আক্রান্ত হয়। স্থির হয় তাহাকে কলিকাতায় আনিয়া ভাল সার্জন দ্বারা অস্ত্রোপচার করা হইবে। নিতান্ত স্তবোধ বালকের মতই যোগীবর এ ব্যবস্থা মানিয়া নিলেন।

পরে কিন্তু বুঝা গেল, এই রোগ প্রকৃতপক্ষে মহাপুরুষের

এক ছলনা মাত্র—স্বীয় নেত্র-চিকিৎসার অজুহাতে বহু মুমুকুর নেত্র-উন্মীলনের ব্যবস্থাই সে সময়ে তিনি করিতে থাকেন। নিজের চিকিৎসা অপেক্ষা বাংলার একদল ভাগ্যবানকে কৃপা বিতরণই যে মহাযোগীর আসল উদ্দেশ্য, ভক্তগণ তাহা বুঝিলেন।

দীক্ষাদান বা শিষ্য গ্রহণে প্রথম জীবনে গম্ভীরনাথজীর বিশেষ উৎসাহ দেখা যাইত না। ১৯১৪ সাল অবধি খুব কম সংখ্যক লোককেই তিনি আশ্রয়দান করেন। বোধ হয় সে অবধি তাঁহার দাক্ষিণ্য শিষ্যের সংখ্যাও একশতকেরও অধিক হইবে না। কিন্তু চক্ষুর চিকিৎসা এবং এবারকার কলিকাতায় অবস্থিতি, মহাপুরুষের লোকগুরু জীবনের এক নূতনতর অধ্যায়কে উন্মোচিত করিয়া দেয়। বহু মুক্তিকামী নরনারীকে তিনি কলিকাতায় অবস্থানকালে শিষ্যরূপে গ্রহণ করেন। ইহার পরও অনেকে গোরখপুরে গিয়া তাঁহার চরণাশ্রয় লাভে ধন্য হয়। মরদেহ ত্যাগের পূর্বে গম্ভীরনাথজীর বাঙালী শিষ্যদের সংখ্যা হয় প্রায় ছয় শত। দীক্ষাদান সম্পর্কে বাবাজীর এই সময়কার ঔদার্য দেখিয়া তাঁহার পুরাতন শিষ্যগণ বিস্মিত হইয়া যাইতেন। তাঁহারা সহর্ষে বলিতেন, “বাবা যেন বাংলায় এসে কল্লতরু হয়ে বসেছেন!”

বাবা কলিকাতার থাকার কালে কুলদানন্দ ব্রহ্মচারীজী একদিন কয়েকজন শিষ্যসহ তাঁহার চরণ দর্শন করিতে আসেন। যোগীবর তখন আহারাশুে বিশ্রাম করিতেছেন। বিজয়কৃষ্ণ গোস্বামীজীর প্রতি বরাবরই গম্ভীরনাথজীর নিবিড় স্নেহ ছিল। তাই তাহার শিষ্য কুলদানন্দজীর আগমনে তিনি খুব হর্ষোৎফুল্ল হইয়া উঠিলেন, বিশ্রাম ভঙ্গ করিয়া তখনি সাগ্রহে ইঁহাদিগকে নিজ কক্ষে ডাকাইয়া আনিলেন।

সাষ্টাঙ্গ প্রণিপাত করিয়া কুলদানন্দজী যোড়হস্তে কহিলেন, “বাবা, গোসাইজীর প্রতি আপনার যেরূপ কৃপা ছিল, এ অধীনের প্রতিও যেন সেরূপ কৃপা থাকে।”

গম্ভীরনাথজীর চোখ দুইটি তখন আনন্দোজ্জ্বল হইয়া উঠিয়াছে । সম্মুখে গোঁসাইজীর শিষ্যদের উপর দৃষ্টিপাত করিয়া বারবার তিনি আশ্বাস দিতে লাগিলেন—“হাঁ, হাঁ ।”

অস্ত্রোপচারের পর চক্ষুরোগ আরোগ্য হয় এবং গম্ভীরনাথজী গোরখপুর মঠে ফিরিয়া যান । কিছুদিন এখানে থাকিবার পর শেষ বারের মত তিনি হরিদ্বারের পূর্ণকুন্ডে গিয়া যোগদান করেন ।

ব্রহ্মবৃণ্ডের সন্নিকটে নাথজীর দলিচা । এ স্থানটি তখন নাথপন্থী সাধুসন্তদের দ্বারা পূর্ণ হইয়া গিয়াছে । তাঁহার সঙ্গে বহুতর ভক্ত শিষ্য রহিয়াছেন । ইহাদের লইয়া তিনি এই ভাড়াটে বাড়ীতে থাকিবেন, ইহাই সকলের অভিলাষ ।

বাবা গম্ভীরনাথ কিন্তু সকল ব্যবস্থা উল্টাইয়া দিলেন । প্রথমে তিনি নাথজীর দলিচায়ই উপস্থিত হইলেন । তাহার উপস্থিতিতে সমাগত সন্ন্যাসীদের মধ্যে এক আনন্দ-হিল্লোল বহিয়া গেল । কিন্তু এই জনাকীর্ণ দলিচায় গুরুদেবের কণ্ঠ হইবে ভাবিয়া শিষ্যেরা তাঁহাকে ভাড়া বাড়ীতেই স্থানান্তরিত করিতে চাহিতেছেন ।

দলিচাস্থিত তরুণ প্রবীণ সমস্ত সাধুরা কিন্তু ইহাতে বাধা দিয়া বসিলেন । তাঁহারা সাগ্রহে বলিতে লাগিলেন, “বাবা আমাদের এখানেই থাকবেন । তিনি যে আমাদেরই একান্ত নিজস্ব ধন । আমরা কখনই তাঁকে ছেড়ে দেব না ।”

ইহাদের কথায় বাবা ওটকয়েক শিষ্যসহ এই দলিচাতেই রহিয়া গেলেন । অপর শিষ্যরা অন্ত্র অবস্থান করিতে লাগিলেন ।

নাথজীর দলিচায় থাকা কালে সহস্র সহস্র লোক বাবা গম্ভীরনাথকে দর্শন করিতে আসিত । শুধু নাথপন্থী সাধু ও মোহান্তেরা নয়, সর্বশ্রেণীর নরনারীই এই মহাশক্তিধর যোগীকে দর্শন করিতে তখন আগ্রহব্যাকুল । অন্তরের শ্রদ্ধার্ঘ্য অর্পণ করিয়া তাহারা কৃতকৃতার্থ হইত ।

হরিদ্বার পূর্ণকুন্ড হইতে ফিরিবার পর যোগীবর মাত্র দুই বৎসর

স্থূল শরীরে বর্তমান ছিলেন। অন্তরঙ্গ ভক্ত শিষ্যদের মধ্যে তাঁহাকে ষাঁহার। এ সময়ে লক্ষ্য করিতেন, তাঁহাদের চোখে প্রতিভাত হইত মহাপুরুষের নূতনতর এক দিব্য রূপ। তাছাড়া, দেখা যাইত, একদিকে যেমন জাগতিক বস্তুনিচয়ের উপর তাঁহার ঔদাসীণ্য বাড়িয়া যাইতেছে, তেমনই এক রহস্যঘন অন্তর্মুখীনতার গভীরে তিনি ডুবিয়া যাইতেছেন।

উদ্বিগ্ন শিষ্যদল দৈহিক স্বাস্থ্যের কথা জিজ্ঞাসা করিলে তিনি শুধু সংক্ষিপ্তভাবে উত্তর দিতেন, “আচ্ছা হায়”।

গোরখপুরে সন্নিকটে যোগীচৌক। জাগ্রত শিবলিঙ্গের ইহা এক মহাসিদ্ধ পীঠ। সেবার শিবরাত্রির সময় গম্ভীরনাথজী সেখানে যাইয়া তিন দিন অতিবাহিত করিয়া আসিলেন। লক্ষ্য করা গেল, শরীর তাঁহার বড়ই দুর্বল হইয়া গিয়াছে। কয়েকদিন পর যোগীবর সকলকে জানাইয়া দিলেন, শীঘ্রই তিনি এবার মফঃস্বলে যাইবেন।

কথাটি শুনিয়া সকলে ভাবিলেন, বাবা হয়তো মঠের জমিদারীর কোন বিশেষ স্থানে যাইয়া কিছুকাল বিশ্রাম নিতে চান। উৎকণ্ঠিত শিষ্যগণ প্রশ্ন তুলিলেন, তাঁহার এই দুর্বল শরীরে অণু কোথাও নড়াচড়া করা কি ভাল হইবে?

যোগীবর সহাস্ত্রে উত্তর দিলেন, “তোমাদের ছশ্চিন্তার কোনই কারণ নেই। স্থানটি পরম নির্জ্জন রমণীয়। সেখানে স্বাস্থ্য ভাল হবারই তো সম্ভাবনা।”

মফঃস্বলে যাইবার দিন স্থির করিতে হইবে। পঞ্জিকা দেখার পর শুভ সময় ঠিক হইল, ৮ই চৈত্র, বারুণী ত্রয়োদশীয় দিন। এ মফঃস্বল যাত্রার বিশেষ উদ্দেশ্য কি, গম্ভব্য স্থানটিই বা কোথায়, সে রহস্য উদ্ঘাটনে কেহ সেদিন সমর্থ হয় নাই।

বাবার শরীর কিন্তু ক্রমে আরও খারাপ হইতেছে। এ অবস্থায় কি করিয়া তিনি মফঃস্বলে যাইবেন? শিষ্যদের মিনতিপূর্ণ প্রশ্নের উত্তরে

যোগীবর গম্ভীরনাথজী

গম্ভীরনাথজী যাহা বলিলেন, তাহা আরও বিভ্রান্তিকর, আরও গাঢ় কুজ্জটিকায় আবরিত ।

উদাসভাবে তিনি কহিলেন, “সেখানে তো বিপদের কোন কারণ নেই । সেখানে একবার গেলে স্বাস্থ্য ভাল হবেই,—সে যে সকল ভালমন্দের অতীত—চিরশান্তিধাম ।”

সেই পূর্বনির্দিষ্ট মহাবারুণী তিথিতেই, ১৯১৭ সালের ২১শে মার্চ তারিখে মহাযোগী তাঁহার মরদেহ ত্যাগ করিলেন । রহস্যময় উক্তি ‘মফঃস্বলের’ গুঢ় অর্থ এবার সকলের বোধগম্য হইল ।

ধামী ডাক্তরানন্দ সরস্বতী

কানপুর জেলার মৈথেলালপুর এক সময়ে শাস্ত্রজ্ঞ ব্রাহ্মণ ও ভক্ত কবিদের জন্মস্থানরূপে খ্যাতি অর্জন করে। পণ্ডিত মিশ্রীলাল মিশ্র এই গ্রামেরই এক নেতৃস্থানীয় ব্যক্তি। উদারচেতা ও ধর্মনিষ্ঠ ব্রাহ্মণ-রূপেও আবালবৃদ্ধবনিতার তিনি সম্মানভাজন। সেদিন বেলা প্রায় পড়িয়া আসিয়াছে, হঠাৎ কোথা হইতে তাঁহার গৃহে তিনটি সন্ন্যাসী আসিয়া উপস্থিত। প্রণাম সমাপনের পর পণ্ডিত মিশ্রীলাল যুক্তকরে দাঁড়াইয়া আছেন, এমন সময় প্রাচীনতম সাধুটি তাঁহাকে নিকটে ডাকিয়া কহিলেন, “মিশ্রীলাল, আজ রাত্রে তোমার একটি পুত্রসন্তান ভূমিষ্ঠ হচ্ছে। কালে সে বহু মুমুক্শু মানবকে পথের সন্ধান দেবে। কিন্তু একটা কথা। এ শিশুর জন্মের পর কাউকে তার মুখ দর্শন করতে দেবে না, আর ভূমিষ্ঠ হবার পরই আমাদের তুমি অন্তঃপুরে ডেকে নিয়ে যোয়ো।”

মিশ্রীলালের পত্নী আসন্ন প্রসবা। সেই রাত্রেই—১৮৩৩ খৃষ্টাব্দের শুক্লা সপ্তমী তিথিতে তিনি সর্ববল্লভলক্ষণযুক্ত এক সন্তান প্রসব করেন। সন্ন্যাসীদল শিশুকে দর্শন করিয়া সেদিন গৃহের অঙ্গনে হোম সম্পন্ন করিলেন। পরদিন প্রত্যুষেই কিন্তু তাঁহাদের আর কোন সন্ধান মিলে নাই।

পণ্ডিতের নবজাত সন্তানকে দেখিবার জন্ম প্রভাতে ভীড় জমিতে থাকে। তাছাড়া, অপরিচিত সন্ন্যাসীদের ক্রিয়াকাণ্ডের কাহিনী শুনিয়াও লোকে কোতূহলী না হইয়া পারে নাই। দূরদূরান্ত হইতে সেদিন মিশ্রীলালের গৃহে লোক জড় হইতে থাকে। শিশু

মোতিরামকে কেন্দ্র করিয়া পণ্ডিতের অঙ্গনে সেদিন এক অপূর্ব আনন্দের বন্যা বহিয়া যায়।

উপরোক্ত ঘটনার পর আঠার বৎসর অতিক্রান্ত হইয়াছে। এই গৃহেই আবার আর একটি নবজাতকের আবির্ভাব ঘটিল। বৃদ্ধ পণ্ডিত মিশ্রীলাল আজিকার দিনে আরো বেশী আনন্দোচ্ছল না হইয়া পারেন নাই। তাঁহার প্রাণপ্রিয় মোতিরামের যে একটি পুত্রসন্তান জন্মগ্রহণ করিয়াছে।

বারবার তিনি পৌত্রমুখ নিরীক্ষণ করিয়া চঞ্চল হইতেছেন, কত সুখ-স্বপ্নের প্রাসাদ তাহার কল্পনায় আজ রচিত হইতেছে। কিন্তু বিনা মেঘে বজ্রাঘাতের মতই সেদিন সব কিছু যেন হঠাৎ বিপর্যস্ত হইয়া যায়। পণ্ডিতের গৃহে ক্রন্দনের রোল শুনিয়া গ্রামবাসী উচ্চকিত হইয়া উঠে। সকলে শুনিয়া বড় বিস্মিত হয়, মিশ্রীলালের পুত্র, প্রতিভাবান যুবক মোতিরাম চিরতরে গৃহ ত্যাগ করিয়া কোথায় চলিয়া গিয়াছে।

পুত্রের জন্মের সঙ্গে সঙ্গে মোতিরাম প্রমাদ গণিয়াছেন। সংসার জীবনের এই নূতনতর বন্ধনকে মানিয়া লইতে তাঁহার মন কোনমতেই সেদিন সায় দেয় নাই। জীবনের চরম সিদ্ধান্তটি তাই তিনি গ্রহণ করিয়া ফেলেন। তরুণী ভার্যা ও নবজাত সন্তানের মায়াপাশ ছিন্ন করিয়া মুক্তির পথে তিনি পা বাড়ান।

আঠার বৎসর পূর্বে পণ্ডিত মিশ্রীলালের গৃহে এক শিশুর আবির্ভাব যে আনন্দধারা উৎসারিত করে, আজিকার শিশুটির আগমন সেই স্রোতধারাকে খণ্ডিত করিয়া দিয়া গেল।

বিষয়বিরক্ত মোতিরামের এই গৃহত্যাগ সূচনা করে এক সার্থক যোগীজীবনের। ভাস্করানন্দ সরস্বতীরূপে ভারতের অধ্যাত্মগগনে উত্তরকালে তাঁহার অভ্যুদয় ঘটিতে আমরা দেখি।

নৈষ্ঠিক ব্রাহ্মণগৃহের সন্তান মোতিরাম। কিশোর বয়স হইতেই সংস্কৃত শাস্ত্র ও সাহিত্য অধ্যয়নে তাঁহার প্রবল আসক্তি। অগ্নুর্ন মেধার সাহায্যে সমস্ত কিছু পাঠ তিনি অতি সহজেই আয়ত্ত করিতে থাকেন, সতীর্থ ও শিক্ষকগণ ইহা দেখিয়া প্রায়ই চমৎকৃত হইয়া যান।

তীক্ষ্ণধী বালকের অন্তর্লোকে কিন্তু বহিয়া চলে বৈরাগ্যের এক অন্তঃসলিলা ধারা। মাঝে মাঝে ইহার বহিঃপ্রকাশ সকলকে সচকিত করিয়া তোলে। পুত্রের ভাবান্তর দর্শনে মিত্রীলাল মাঝে মাঝে শঙ্কিত হইয়া পড়েন। তাইতো! সংসার বন্ধনে তাঁহাকে না জড়াইতে পারিলে তিনি নিশ্চিত হইতে পারেন কই? আত্মীয় ও বন্ধুদের পরামর্শ গ্রহণ করিয়া পণ্ডিত এক রূপলাবণ্যবতী কন্যার সহিত মোতিরামের বিবাহ দিলেন।

শাস্ত্রপারঙ্গম না হইলে ব্রাহ্মণ সন্তানের চলিবে কেন? তাই বিবাহের পর অধ্যয়নের জন্ত মোতিরাম কাশীধামে প্রেরিত হন।

প্রতিভাবান তরুণ সতের বৎসর বয়সে অধ্যয়ন শেষ করিয়া মৈথেলালপুরে আসিলেন। কিন্তু বৈরাগ্যের যে আগুন এতদিন তাঁহার অন্তস্তলে আত্মগোপন করিয়া ছিল, কাশী হইতে ফিরিবার পর তাহা আরো তীব্র হইতে থাকে। পাণ্ডিত্যের খ্যাতি, পরিবারের স্নেহ-বন্ধন, ভোগবাসনা কোন কিছুই সেদিন যেন তাঁহাকে আর বাঁধিতে পারে না।

অজানা অমৃতলোকের হাতছানিটি তাঁহার হৃদয়ে পৌঁছিয়া গিয়াছে। উদাসীন মোতিরাম তাই ক্রমেই গভীর ও অন্তর্মুখী হইতে লাগিলেন। এমনই সময়ে পুত্রের জন্ম-সংবাদ।

মোতিরামকে সেদিনই চূড়ান্ত সিদ্ধান্ত গ্রহণ করিতে হইল। মধ্যরাত্রিতে তিনি গৃহত্যাগ করিলেন।

মুমুকু পরিব্রাজকরূপে অতঃপর তিনি উজ্জয়িনীতে উপনীত হন। মহাকালেশ্বর শিবের অধিষ্ঠানক্ষেত্র এই পুণ্যভূমি। কলনাদিনী শিপ্রার

তটপ্রান্তে সারি সারি মন্দির ও স্নানের ঘাট। অসংখ্য তীর্থযাত্রী আর ভাস্কর পূজা ও স্তবগানে দিগ্‌মণ্ডল মুখরিত। পথেঘাটে দণ্ডী, সন্ন্যাসী ও পরমহংসের ভীড়। মোতিরাম স্থির করিলেন, এই পবিত্র তীর্থে কিছুকাল অবস্থান করিবেন।

একবস্ত্রে কপর্দকহীন অবস্থায় তিনি বাহির হইয়াছেন--তাই আকাশবৃষ্টি ছাড়া আর গত্যন্তরই বা কি? প্রত্যুষে পুণ্যতোয়া শিপ্রায় অবগাহন করিয়া মহাকালেশ্বর মন্দিরে ধ্যানরত থাকেন, কখনো বা উজ্জয়িনীর শ্মশানঘাটে ভাবাবিষ্ট অবস্থায় তাঁহার দিন কাটে।

উজ্জয়িনীর শ্মশানে মোতিরাম কিছুকাল অতিবাহিত করেন। যোগী, তান্ত্রিক ও বৈদান্তিক বহু সন্ন্যাসীর সান্নিধ্যে তিনি আসেন, কিন্তু তাঁহার অধ্যাত্মজীবনের তৃষ্ণা নিবারিত হয় কই? কে দিবে তাঁহাকে মুমুক্শার পথসন্ধান? অভীষ্ট সিদ্ধির চাবিকাঠিটি বা কাহার হাতে? মোতিরাম আবার পরিব্রাজনে বাহির হইলেন। ইহার পর তিন-চার বৎসরকাল তিনি দ্বারকায় কাটান, এক প্রসিদ্ধ বেদান্তবাদী সন্ন্যাসীর নিকট বেদান্তশাস্ত্র অধ্যয়ন করেন।

উজ্জয়িনীতে ফিরিয়া আসিয়া মোতিরাম সন্ন্যাস ব্রত গ্রহণে কৃত-সঙ্কল্প হন। এই সময়ে তাঁহার বয়স প্রায় সাতাইশ বৎসর।

ব্রহ্মজ্ঞ মহাপুরুষরূপে সে সময় দাক্ষিণাত্যে শ্রীমৎ পূর্ণানন্দ সরস্বতীর খ্যাতি পরিব্যাপ্ত। মোতিরাম তাঁহার কৃপা লাভ করেন ও তাঁহার দ্বারাই সন্ন্যাসধর্ম্মে দীক্ষিত হন।

পূর্বব্রাহ্মণের সমস্ত পরিচয় এইবার নিঃশেষে মুছিয়া গেল, যজ্ঞসূত্র ত্যাগ করিয়া তিনি গুরুপ্রদত্ত নূতন নাম গ্রহণ করিলেন—ভাস্করানন্দ সরস্বতী।

ইহার পর রেবানদীর তটস্থিত এক শ্মশানে থাকিয়া কিছুকালের জ্ঞান তিনি কঠোর সাধনায় প্রবৃত্ত হন।

সন্ন্যাস জীবনের প্রথা অনুযায়ী স্বামী ভাস্করানন্দ একবার তাঁহার জন্মস্থান মৈথেলালপুর দর্শন করিতে আসিলেন। যে পুত্রের আগমনের

সঙ্গে সঙ্গে তিনি সংসার ত্যাগ করিয়াছিলেন, সংসারের মায়া ত্যাগ করিয়া ইতিমধ্যে সে পরলোকে প্রস্থান করিয়াছে

আত্মপরিজনের মিনতি ও অশ্রুজল কোন কিছুই সর্বব্যাপী সন্ন্যাসী মোতিরামকে সেদিন ধরিয়া রাখিতে পারিল না।

ইহার পর শুরু হয় তাঁহার তীর্থ পরিক্রমা। ত্রয়োদশ বৎসর ব্যাপিয়া ভারত ভ্রমণের পর তিনি হরিদ্বারে উপস্থিত হন। এই সময়ে সৌভাগ্যক্রমে বিখ্যাত বৈদান্তিক অনন্তরামের সহিত তাঁহার সাক্ষাৎ লাভ হয়। এই স্বনামধন্য আচার্য্যের নিকট শিক্ষা গ্রহণের সুযোগ তিনি ছাড়িলেন না। তাঁহা সাহায্যে বেদান্তশাস্ত্রের গূঢ়তম তত্ত্বসমূহ অধ্যয়ন ও উপলব্ধি করিয়া তিনি দূতার্থ হইলেন।

শিবপুরী কাশীধামের আহ্বান এবার আসিয়া গেল। পুণ্যতোয়া গঙ্গাতটে পৌছিয়া ভাস্করানন্দ স্বামীজী যে কৃচ্ছ্রত অবলম্বন করেন, তাহা তাঁহার সাধনজীবনের এক বিশিষ্ট অধ্যায়। আগার বিহার সমস্ত কিছু তখন পরিত্যাগ করিয়াছেন। গঙ্গার বালুতটে শীত ও গ্রীষ্মে সমভাবে অবস্থিত থাকিয়া বিশ্বনাথজীর আরাধনায় তিনি নিমগ্ন। একনিষ্ঠ সাধকের অন্তরে অহোরাত্র চলিতেছে ইষ্ট ধ্যান। মাঝে মাঝে তাঁহার মুখ হইতে নিঃসৃত হয় ‘বিশ্বনাথ’ ধ্বনি, আকাশে বাতাসে ইহার অনুরণন উঠিতে থাকে।

‘বেদব্যাস’ পত্রিকার সম্পাদক ভূধরবাবু তাঁহার এ সময়কার তপশ্চর্য্যার কাহিনী সম্বন্ধে লিখিয়াছেন - “স্বামীজী তীব্র শীতের সময় বিবস্ত্র দেহে জলের উপর ঠিক একখণ্ড কাষ্ঠের আয়তন ভাসিয়া বেড়াইতে বড় আনন্দ বোধ করিতেন। প্রচণ্ড গ্রীষ্মের সময় উত্তপ্ত বালুকার উপর নিজ দেহকে শায়িত করিয়া ধ্যানস্থ থাকিতেন। সে সময়ে তাঁহাকে কেহ কোনরূপ আহার করিতে দেখে নাই। যদি কেহ ভক্তি করিয়া কোন আহার্য্য সামগ্রী নিকটে যাইয়া ধরিতেন, তিনি দ্রব্যগুলির প্রত্যেক একবার নিরীক্ষণ করিয়া স্থিতহাস্তে সে স্থান পরিত্যাগ

করিতেন। ক্রমে এত শীর্ণ হইয়া পড়েন যে উত্থানশক্তি পর্যন্ত রহিত হইয়া যায়। এই অবস্থায় প্রায়ই সমাধিস্থ থাকিতেন।”

কঠোরতপা স্বামীজীর ত্যাগ-তিতিক্ষা এবং যোগ-বিভূতির কথা তৎকালে কাশীধামের চারিদিকে ছড়াইয়া পড়িতে থাকে। ফলে ভক্ত ও কোতূহলী জনতার সংখ্যা ক্রমেই বৃদ্ধি পায়। দর্শনার্থীদের ভীড় তাঁহাকে অতিষ্ঠ করিয়া তুলিত, তাই স্বামীজী মাঝে মাঝে সাতরাইয়া গঙ্গার অপর পারে রামনগরে গিয়াও আশ্রয় নিতেন। সেখানে তাঁহার ধ্যান-ধারণার মিলিত প্রচুর অবকাশ। আবার স্বেচ্ছামত তিনি কাশীতে ফিরিয়া আসিতেন।

ইহার পর ছুর্গাবাড়ীর নিকটে আনন্দবাগে স্বামীজী তাঁহার আসন স্থাপন করিলেন। এ উद्याনের মালিক আমেটির রাজা। তাঁহারই মিনতিতে এখানে আসেন—কিন্তু স্বামীজীর স্পষ্ট নির্দেশ থাকে যে, এখানে কোন দর্শনার্থীকেই প্রবেশ করিতে দেওয়া হইবে না এবং কয়েকজন প্রহরী এজন্ত নিযুক্ত থাকিবে।

প্রহরার ব্যবস্থা ঠিক মতই হইল। কিন্তু জনতা এড়ানো নিতান্ত সহজ হইল না।

ভাস্করানন্দের যোগৈশ্বর্যের খ্যাতি তখন দিকে দিকে ছড়াইয়া পড়িয়াছে। মুমুক্শু ও কোতূহলী আগন্তুকদের কোলাহলে নিস্তরক আনন্দবাগ দিনের পর দিন মুখরিত হইতে থাকে। স্বামীজী অবশেষে কৃপার ছয়ারটি উন্মুক্ত করিলেন। সারাদিন ভূগর্ভস্থ গৃহে সাধন-ভজন করার পর তিনি যখন উপরে উঠিয়া আসিতেন, তখন সকলে তাঁহার দর্শন ও উপদেশ লাভ করিয়া ধন্য হইত।

এ সময়ে একদিন এক কোতূহলী রাজা স্বামীজীকে পরীক্ষা করিতে উৎসুক হন। এজন্ত কয়েকজন রূপসী গণিকাকে তিনি নিযুক্ত করেন। তাহাদের প্রতি নির্দেশ থাকে, যে কোন প্রকারে স্বামীজীর

চিত্ত জয় করিতে সমর্থ হইলে তাহাদিগকে পর্যাপ্ত পুরস্কার দেওয়া হইবে।

গভীর নিশীথে তাহাদিগকে আনন্দবাগে প্রবেশ করাইয়া দেওয়া হইল। রাজা বাহাদুর সেদিন নিকটস্থ এক ঝোপের আড়ালে নীরবে লুকাইয়া রহিলেন।

স্বামীজী তখন ধ্যানমগ্ন অবস্থায় ভূগর্ভগৃহে উপবিষ্ট আছেন। বারাক্ষণাগণ দ্বারের কাছে আসিয়া বারবারই ফিরিয়া যাইতেছে। মহাপুরুষের প্রশান্ত মহিমময় মূর্তির মধ্যে তাহারা কি দেখিয়াছে তাহারাই জানে, কিন্তু সকলেরই হৃদয় কোন্ এক অজানা ভয়ে কাঁপিতেছে। রাজা বাহাদুরের কোন প্রলোভনই তাহাদের উৎসাহিত করিতে পারিতেছে না।

রাত্রির শেষ যাম। হঠাৎ এসময়ে স্বামীজীর ধ্যান ভঙ্গ হইল। দ্বারে সমাগত নারীদের উচ্চস্বরে বলিয়া উঠিলেন, “যদি বিন্দুমাত্র প্রাণের মায়া থেকে থাকে, এ মুহূর্তে তোমরা স্থান ত্যাগ করে যাও।”

রমণীদের মধ্যে একজন কিছুটা সাহস সঞ্চয় করিয়া দাঁড়াইয়া রহিল, অপরেরা ততক্ষণে ভীত সন্ত্রস্তভাবে ছুটিয়া আনন্দবাগের প্রাচীরের বাহিরে আসিয়া পৌঁছিয়াছে।

স্বামীজীর সম্মুখে দাঁড়ানো নারীটি হঠাৎ আর্তস্বরে চীৎকার শুরু করিয়া দিল। অতর্কিতে কোথা হইতে একটি বৃহদাকার সর্প বাহির হইয়া এসময়ে তাহার পা দুইটি বেঁধেন করিয়া ফেলিয়াছে।

তাহাকে এভাবে ফেলিয়া রাখিয়া নিৰ্বিকারভাবে স্বামীজী ভূগর্ভগৃহ হইতে উপরে উঠিয়া আসিলেন।

ঘটনাস্থলে উপস্থিত হইয়া রাজাবাহাদুরের অন্তরাত্মা কাঁপিয়া উঠিল। সর্পবেষ্টিত। রমণীকে সেই অবস্থাতেই ফেলিয়া ভয়ান্ত হৃদয়ে তিনি সদলবলে পলায়ন করিলেন।

সূর্যোদয়ের পর ঐ নারীর নাগপাশ মোচন হয়—সর্পটি কোন্ এক অলৌকিক শক্তির নিদেশে ধীরে ধীরে স্থান ত্যাগ করিয়া যায়।

ভ্রষ্টা নারীটি এবার স্বামীজীর চরণতলে লুটাইয়া পড়ে, বারবার মার্জনা ভিক্ষা করিতে থাকে। উত্তরকালে বিত্ত-বিষয় বর্জন করিয়া সে সংসার ত্যাগ করে এবং স্বামীজীর কৃপায় এক বিশিষ্টা সাধিকারূপে পরিণত হয়।

স্বামীজীকে ক্রমে তাঁহার কোণীনটিও পরিত্যাগ করিতে দেখা যায়। অন্তর বাহিরের সমস্ত ভেদাভেদ যাঁহার যুচিয়া গিয়াছে সংসারের সমস্ত কিছু সংস্কার, সমস্ত কিছু প্রয়োজন আজ তাঁহার নিকট নিতান্ত অকিঞ্চিৎক। তাই দেখা যায়, বারাণসীর আনন্দবাগ উদ্ভানের একপ্রান্তে তিনি উলঙ্গ হইয়া বসিয়া আছেন, আর সভ্যজগতের বিশিষ্ট চিন্তানায়ক ও অভিজাত ব্যক্তির তাঁহার চরণে শ্রদ্ধার্ঘ্য লইয়া উপস্থিত হইতেছেন।

এক এক সময়ে লৌকিক জীবন ও সমাজের প্রয়োজনে তিনি নিজেই নিজের স্বাধীনতা সাময়িকভাবে খর্ব করিয়া নিতেন। দর্শনার্থী মহিলা ভক্তগণ আসিলে অল্প সময়ের জ্ঞাৎ কাহারো নিকট হইতে এক টুকরা বস্ত্র লইয়া কটিদেশ আবৃত করিয়া বসিতেন। তাহার পরই আবার তাঁহাকে নগ্ন অবস্থায় ধ্যানমগ্ন থাকিতে বা স্বচ্ছন্দে বিচরণ করিতে দেখা যাইত।

অসামান্য যোগবিভূতির অধিকারীরূপে স্বামীজী তখন খ্যাত, চারিদিকে তখন আশ্রয়প্রার্থীর ভীড়ের অন্ত নাই। কাশীর আনন্দবাগে অধিষ্ঠিত এই মহাযোগীকে এসময়ে যাঁহারাই দেখিতে যাইতেন, তাঁহার সীলাময় জীবনের রূপটি তাঁহাদিগকে বিস্মিত করিত। ভারত ও বহির্ভারতের রাজরাজড়ার দল, গবর্ণর-জেনারেল ও কমান্ডার-ইন্-চীফ, প্রভৃতি যাঁহাকে দর্শন করিয়া কৃতার্থ হইতেছেন, নিরন্ন ভিখারীও তেমনি তাঁহার স্নেহদৃষ্টির স্পর্শে নবজীবন প্রাপ্ত হইতেছে।

যোগীবরের নিজস্ব জীবনধারাটি কিন্তু বড় অদ্ভুত। নিদারুণ শীতের নিশীতেও এই উলঙ্গ সন্ন্যাসীকে আনন্দবাগের শিশিরসিক্ত দুর্বাদলের মধ্যে পরম আনন্দে শায়িত থাকিতে দেখা যাইত।

‘বেদব্যাস’ পত্রিকার সম্পাদক ভূধরবাবু লিখিয়া গিয়াছেন, “স্বামীজী চত্বারিংশ বৎসর বয়সে আনন্দবাগে আগমন করিয়া, যেমম অনাবৃত দেহে বামহস্তোপরি মস্তক গুপ্ত করিয়া, নিদারুণ পৌষ মাসের শীতেও ভূমিতে শয়ন করিয়া রাত্রি যাপন করিতেন, দেহত্যাগের শেষ সময় পর্য্যন্তও তাঁহার এই নিয়মের ব্যতিক্রম ঘটে নাই। পূর্বেও যেকপ পিপাসায় শুষ্ককণ্ঠ হইলেও পানীয় পাত্রাভাবে তাঁহার জল পান করা হইত না, দেহত্যাগের শেষ সময় পর্য্যন্ত, চেষ্টা করিয়া জলপানার্থে আনীত পানপাত্রে কোনমতেই তিনি জলপান করিতেন না। যদি কোন দর্শনাথী লোটা হস্তে লইয়া তাঁহার নিকট আগমন করিতেন, তাহা হইলে তাঁহার ঐ লোটা লইয়া জলপান করতঃ তৎক্ষণাৎ প্রত্যর্পণ করিতেন, নতুবা করপুটই তাঁহার পানপাত্রের কার্য্য করিত।”

পানপাত্র অভাবে স্বামীজীর অসুবিধা হইতেছে ভাবিয়া একবার এক ঘনিষ্ঠ শিষ্য তাঁহাকে একটি পাথরের জলপাত্র প্রদান করেন। বৈরাগ্যবান মহাপুরুষ তখনই উহা সম্মুখে দাঁড়ানো এক ব্যক্তিকে দান করিয়া ফেলিলেন।

প্রায়ই তাঁহাকে বলিতে শুনা যাইত, “সাধু সর্বদা অবলম্বন করে থাকবে আকাশবৃষ্টি,—আগামীকালের জন্ম সঞ্চয় করে রাখবার তার অধিকার তো নেই?”

একবার তাঁহার এক সন্ন্যাসী শিষ্য পরের দিনের জন্ম সামান্য কিছু রন্ধনকাষ্ঠ সংগ্রহ করিয়া রাখেন। এ মনোবৃত্তির জন্ম স্বামীজী তাঁহাকে তীব্র ভৎসনা করিতে ছাড়েন নাই।

রাজা, মহারাজ। ও শ্রেষ্ঠীদের মধ্যে তাঁহার অনুরাগী ভক্তের সংখ্যা কম ছিল না। ইঁহাবা প্রায়ই বুড়িভর্তি ছুপ্রাপ্য ফলমূল, খাদ্য ও অর্থাদি আনন্দবাগে প্রেরণ করিতেন। আশ্রমে আসামাত্র অমনিই তাহা চারিদিকে বিতরিত হইয়া যাইত।

কাশ্মীরের মহারাজা একবার তাঁহাকে প্রণাম করিতে আসিয়া এক সহস্র স্বর্ণমুদ্রা প্রণামী দেন। স্বামীজী মহারাজ তখনি উহা স্পর্শ

করিয়া ফিরাইয়া দেন। কহেন, “আমার একটা অতিরিক্ত কৌপীনও নেই, কোথায় এসব টাকাকড়ি আমি রাখবো বলতো?”

কাশীর নৃপতি একদিন বুড়িভর্তি বহু ফল-পাকড় পাঠাইয়াছেন। স্বামীজী তাঁহার অভ্যাসমত তখনই উপস্থিত ব্যক্তিদের মধ্যে ইহা বিতরণ করিয়া দিলেন। ভক্ত ও সেবক রামচরণ তেওয়ারীজীরকিন্তু ইহা মোটেই মনঃপূত হইল না। ক্ষুব্ধ হইয়া ভাবিতে লাগিলেন, পাঁচভূতে মিলিয়া এগুলি খাইয়া গেল, স্বামীজীকে কোন কিছুই দেওয়া গেল না।

সেদিন স্বামীজীর আহার হইয়া গিয়াছে—কাল তাঁহাকে আহ্বারের সময় কিছু ফল খাওয়াইবেন মনে করিয়া তেওয়ারীজী উহার কয়েকটি বস্ত্রের ভিতর লুকাইয়া ফেলিলেন।

সর্বজ্ঞ স্বামীজীর দৃষ্টিকে ফাঁকি দেওয়া সম্ভব হইল না। তিনি পরিহাসের সুরে বলিয়া উঠিলেন, “কেঁও রামচরণ, তুমি পরমহংসকা ভাণ্ডারা বনাতে হো?”

ধরা পড়িয়া গিয়া তেওয়ারীজী বড় লজ্জিত হইয়া পড়িলেন। স্বামীজী এবার তাঁহাকে সান্ত্বনা দিয়া মধুর কণ্ঠে কহিলেন, “রামচরণ তুমি হয়তো মনে করছো যে, আমার এসব খাওয়া হয়নি। কিন্তু তুমি তো জানো না—আমি এই ভক্তদের জিহ্বা দিয়ে এগুলোর সম্পূর্ণ আশ্বাদ গ্রহণ করেছি।”

স্বামীজীর ভক্তদের মধ্যে রাজা ও শেঠদের সংখ্যা যথেষ্ট ছিল। এজ্ঞ বহিরাগত ব্যক্তিদের কেহ কেহ মনে করিতেন তিনি বুদ্ধি ধনী ও প্রতিপত্তিশালী ব্যক্তিদের প্রতিই বেশী আকৃষ্ট। অবশ্য ঘনিষ্ঠ লোকেদের কাছে তাঁহার স্বরূপটি অজানা ছিল না। সংসারের সমস্ত ভোগসুখকে অবলীলায় পশ্চাতে ফেলিয়া যিনি আসিয়াছেন, যোগ সাধনার মহাসিদ্ধি যাহার করতলগত, সমাজের ধনী ও অভিজাতদের মূল্য সেই মহাসন্ন্যাসীর কাছে কতটুকু? তাই দেখা যাইত, রাশিয়ার অধিপতি জারের পুত্র নিকোলাস এবং ভারতের প্রধান সেনাপতি

স্মার উইলিয়ম লক্‌হার্ট প্রভৃতি পদস্থ ব্যক্তি যেমন এই মহাযোগীর আশিস পাইতেন, যেমনি প্রতিদিন প্রভাতে বাবার প্রিয়পাত্র, দীনহীন কাঙাল সহাই তেলীও তাঁহাকে দর্শন করিতে না আসিলে তিনি চঞ্চল হইয়া উঠিতেন।

আনন্দবাগে উপস্থিত হইলেই সহাই তেলী সর্বপ্রথমে তাঁহার সাক্ষাতের সৌভাগ্য লাভ করিত। ‘আও মেরে বাপ,’ ‘আও মেবে বাপ’ বলিয়া স্বামীজী তাহাকে সন্নেহে সম্ভাষণ জ্ঞাপন করিতেন। ধনী ও পদস্থ লোকদের ভীড়ে দরিদ্রদের অনেক সময় দর্শনের অসুবিধা ঘটিত। স্বামীজী তাই মাঝে মাঝে তাহাদের সুবিধাব জ্ঞাত দিন নির্দিষ্ট করিয়া দিতেন—সে দিনটিতে অভিজাত দর্শনার্থীদের আনন্দবাগে ঢুকিতে দেওয়া হইত না।

বিশিষ্ট মার্কিন সাহিত্যিক মার্ক টোয়েন ভারতবর্ষে আসিয়া শ্রীস্বরানন্দজীকে দর্শন করিতে যান। তিনি তাহার মোর ট্রাম্পস্ অ্যাব্রড্’ নামক পুস্তকে এক মোনোহর বর্ণনা দিয়াছেন—

“দর্শনের জ্ঞান আনন্দবাগেব একপ্রান্তে আমাদের দাঁড়াইয়া থাকিতে হইল। অপেক্ষমান থাকিয়া বুঝিতেছিলাম যে সেদিন স্বামীজীর দর্শন লাভ বড় সহজ হইবে না, কাবণ, সেদিন তিনি সাক্ষাৎপ্রার্থী রাজা-মহারাজাদিগকে দর্শন না দিয়া শুধু সমাজের নিম্নস্তরের জনতার সহিতই দেখা করিতেছেন। অভিজাত্য ও পদমর্যাদা এ মহাপুরুষের কাছে কিছুই নয়, সকলেই তাঁহার দৃষ্টিতে সমান। এক এক সময়ে তিনি স্বেচ্ছামত রাজরাজড়ার সঙ্গেই শুধু দেখা করেন, গরীব সেদিন অবজ্ঞাত। আবার এক একদিন তিনি দীনদরিদ্র লোকদের দর্শনদানেই উন্মুখ—ধনীর দল সেদিন তাঁহার সম্মুখ হইতে বিতাড়িত হইতেছে।”

হাস্যরসাত্মক রচনার জ্ঞান এই মার্কিন সাহিত্যিকের খ্যাতি তখন পৃথিবীব্যাপী। এসময়ে তিনি কলিকাতায় আসিলে ‘ইংলিশম্যান’

কাগজের প্রতিনিধি প্রশ্ন করিলেন, “ভারতবর্ষে এসে আপনি যা দেখলেন, তার ভেতর কোন্ বস্তুটি সর্বাপেক্ষা উল্লেখযোগ্য?”

তিনি তৎক্ষণাৎ উত্তর দিলেন, “বেনারস ও দেখানকার পবিত্রাশ্রম মহাপুরুষটি।” একথা বলিতে বলিতে স্বামী ভাস্করানন্দের উলঙ্গ ছবিটি তিনি সর্ব সমক্ষে খুলিয়া ধরিলেন।

“এ বড় বিস্ময়ের কথা। সকলেই জানে, আপনার বৈশিষ্ট্য হচ্ছে, আপনি এমন সব প্রসঙ্গ উত্থাপন করে লোককে হাসাতে পারেন, যাতে হাসবার বস্তু মোটেই কিছু নেই। এ উলঙ্গ সন্ন্যাসীর কথা আপনি উত্থাপন করায় আমরা ভেবেছিলাম, না জানি তাঁকে নিয়ে আপনি কত কিছু হাস্যরসের অবতারণা করবেন। এখন ব্যাপার দেখছি অন্তরূপ।”

তিনি শ্রদ্ধাভরে কহিলেন, “তিনি যে ঈশ্বর-প্রতিম।”

এই স্বনামধন্য সাহিত্যিক তাঁহার ভ্রমণ-গ্রন্থে স্বামীজীর কথা উল্লেখ করিয়া লিখিয়াছেন, “ভারতের তাজমহল অবশ্যই এক পরম বিস্ময়কর বস্তু, যার মহনীয় দৃশ্য মানুষকে আনন্দে অভিভূত করে, নূতন চেতনায় উদ্বুদ্ধ করে। কিন্তু স্বামীজির মত মহান ও বিস্ময়কর জীবন্ত বস্তুর সঙ্গে তা কি করে তুলনীয় হতে পারে? এ যে জীবন্ত, এতে শ্বাস-প্রশ্বাস বয়, এ কথা বলে, লক্ষ লক্ষ লোক এতে আস্থা স্থাপন করে, ভগবান ভেবে ভক্তি করে, কৃতজ্ঞতার সহিত এর পূজা করে।”

মার্ক টোয়েন তাঁহার ভ্রমণগ্রন্থে এই ভারতীয় মহাপুরুষের কথা বারবার শ্রদ্ধাভরে উল্লেখ করিতে ভুলেন নাই।

সুপ্রসিদ্ধ খ্রীষ্টান ধর্ম্যাচার্য ডাঃ ফেয়ারবার্গও স্বামীজীর দর্শন লাভের পর প্রকাশ করেন, “স্বামীজীর সামনে দাঁড়িয়ে আমি পবিত্রতা ও সত্যতার এমন এক ভাবময় রূপ অন্তরে অনুভব করেছি, সমগ্র খ্রীষ্ট জগতে যার সমতুল্য কিছু আমি কখনো দেখিনি।”

এ দেশের বহুতর শিক্ষিত ও অভিজাত ভক্তদের মধ্য দিয়া বহির্ভারতের দিগ্বিদিকে স্বামী ভাস্করানন্দের নাম প্রচারিত হইতে

থাকে। এই খ্যাতনামা 'হোলিম্যান অব্ বেনারস' বা কাশীর পবিত্রাত্মা মহাপুরুষকে দর্শনের জগু সারা বিশ্বের মনীষী ও প্রভাবশালী ব্যক্তিদের ব্যগ্রতার সীমা ছিল না। জার্মান পণ্ডিত ডয়সন, রাশিয়ার জার নিকোলাসের পুত্র প্রভৃতি ছিলেন স্বামীজীর বিশিষ্ট বিদেশী দর্শনার্থীদের অগ্রতম।

কাশীর সমকালীন মহাপুরুষদের স্বীকৃতিও স্বামীজী কম লাভ করেন নাই। ইহাদের অনেকের সহিতই সৌহার্দ্যবন্ধনে তিনি আবদ্ধ ছিলেন। প্রসিদ্ধ বৈদান্তিক সন্ন্যাসী বিশুদ্ধানন্দজী চিরকাল স্বামী ভাস্করানন্দকে 'বড়দাদা' বলিয়া সম্বোধন করিতেন। মহাযোগী ত্রৈলোক্য মহারাজের সহিত স্বামীজীর প্রগাঢ় সখ্য ছিল এবং সাক্ষাৎ মাত্রই উভয়কে পরম্পরের প্রতি অনুরাগ প্রদর্শন করিতে দেখা যাইত।

প্রভুপাদ বিজয়কৃষ্ণ গোস্বামী কাশীতে বাস করাব কালে মাঝে মাঝে ভাস্করানন্দজীকে দর্শন করিতে যাইতেন। তাঁহার আশীর্ব্বাদ প্রাপ্ত হইলে গোস্বামীজীর আনন্দের সীমা থাকিত না। একদিন তিনি ভাস্করানন্দজীকে দর্শন করিতে আসিয়া দেখেন, তাঁহার পদপ্রান্তে বসিয়া জর্নৈক মহারাজা বহু স্বর্ণমুদ্রাপূর্ণ একটি থালা তাঁহাকে নিবেদন করিতেছেন। কিন্তু স্বামীজী তাহা সবই ফিরাইয়া দিলেন। ক্ষুণ্ণমনে বিশিষ্ট ভক্তটিকে আনন্দবাগ ত্যাগ করিতে হইল। স্বামীজীর উদ্দেশে সেদিন গোস্বামীজীকে ভক্তিভরে কয়েকটি প্রশস্তি-শ্লোক উচ্চারণ করিতে শুনা যায়।

ভাস্করানন্দজীর দীক্ষিত শিষ্যের সংখ্যা ছিল প্রায় লক্ষাধিক। আর ইহাদের মধ্যে বিভিন্ন অঞ্চলের কত বিচিত্র নরনারীই যে দেখা যাইত তাহার ইয়ত্তা নাই। কাশীধামে সে সময়ে একদল ছদ্মাস্ত্র পাণ্ডা ছিল, ইহাদের কবলে পড়িয়া নিরীহ যাত্রীরা বিপদগ্রস্ত হইত। স্বামীজী বাহিয়া বাহিয়া এই পাণ্ডাদের মধ্যে সর্ব্বাপেক্ষা নিকৃষ্ট

ব্যক্তিদেরই তাহার শিষ্যদলভুক্ত করিয়াছিলেন। এজন্য অনেকেই বিস্মিত না হইয়া পারিতেন না। কিন্তু পরে দেখা যায়, কুখ্যাত লোকগুলি মহাপুরুষের রূপাবলে ধীরে ধীরে নূতন মানুষে রূপান্তরিত হইয়া গিয়াছে।

ভাস্করানন্দজীব যোগবিভূতির কাহিনী সে সময়ে সারা ভারতে জনশ্রুতিতে পরিণত হয়। ভক্তদের অনুরোধ ও আদ্যাব রক্ষা করিতে গিয়া এবং অনেক সময় তাঁহাদের কল্যাণার্থ, অবলীলায় তিনি নানা অলৌকিক শক্তির প্রকাশ করিয়া বসিতেন। যে বস্তু তাঁহার নিকট নিতান্ত নগণ্য, বালকের ক্রীড়া বস্তুর মত তুচ্ছ, দর্শনার্থী ও ভক্তজনের মানসপটে এক এক সময় তাহাই অপ্রাকৃত রশ্মি-রেখার চকিত আবির্ভাব ঘোষণা করিয়া দিত।

কলিকাতা হাইকোর্টের বিচারপতি শ্রী রমেশচন্দ্র মিত্র স্বামীজীর নিকট মাঝে মাঝে যাইতেন। একদিন তত্ত্বালোচনা প্রসঙ্গে রমেশচন্দ্র কহিলেন, “স্বামীজী আপনি প্রায়ই বলেন, জগৎ নিতান্তই অলীক—মায়া মাত্র। কিন্তু আপনাকে স্পর্শ করবার কালে তো তা আমাদের মনে হয় না।”

এই কথা কয়টি বলিতে বলিতে তিনি ভাস্করানন্দ মহারাজের হৃদস্পর্শ করেন। কিন্তু চব্বৎ হইতে হস্তটি উঠাইতে না উঠাইতেই সবিষ্ময়ে তিনি দেখিলেন, স্বামীজীব স্থূল দেহটি কোথায় অন্তর্হিত হইয়াছে।

ক্ষণপরেই আবার স্থূলদেহে সেখানে আবির্ভূত হইয়া স্বামীজী শ্রী রমেশচন্দ্রকে বলিতে লাগিলেন, “এবার বুঝতে পাচ্ছে তো? সমস্তই অলীক না হলে আমি এরূপভাবে প্রতিক্রিয়াই আছি, আবার নেই—তা কি করে সম্ভব হয়?”

এ কথা বলিয়াই তিনি শ্রী রমেশচন্দ্রের সম্মুখ হইতে দ্বিতীয় বার অদৃশ্য হইলেন। পুনরায় স্বস্থানে আবির্ভূত হইয়া যোগীবর বিস্মিত

জাস্টিস্ মিত্রকে বলিতে লাগিলেন, “কি বল রমেশ ? জগৎ স্বপ্ন-দর্শনের মত অলীক, এ কথাটা কি এখন অবিশ্বাস করছে ?”

ভারতের কমাণ্ডার-ইন্-চীফ্ স্যর উইলিয়ম লক্‌হার্ট ভাস্করা-নন্দজীকে বড় শ্রদ্ধা করিতেন। মাঝে মাঝে সস্ত্রীক তাঁহাকে স্বামীজীর সহিত সাক্ষাৎ করিতে দেখা যাইত।

একবার লক্‌হার্ট সাহেবের চৈতন্যোদয়ের জন্য তিনি এক অদ্ভুত যোগবিভূতি প্রদর্শন করেন। শৈলেন্দ্রনাথ মুখোপাধ্যায় নামক একজন পুরাতন ভক্ত সেদিন আনন্দবাগে স্বামীজীর নিকট উপস্থিত ছিলেন। ঘটনাটি চাক্ষুষ দেখিয়া ভক্তটি তাহার এক বর্ণনা দিয়াছেন—

“সেনাপতি যে দিন স্বামীজীকে দর্শন করিতে আসেন, সেই দিন সেই সময়ে আমি আনন্দবাগে উপস্থিত ছিলাম। স্বামীজীর নিকট লক্‌হার্ট সাহেব, আফ্রীদিগণকে কিরূপে পরাজিত করিয়াছিলেন, বর্ণনা করিতে লাগিলেন, আমরাও সকলে শ্রবণ করিতে লাগিলাম।

গল্প করিতে করিতে যে সময়ে সহসা সাহেবের মনে অহঙ্কার আসিয়া উপস্থিত হইল, সেই সময়ে স্বামীজীর নিকটে এক পেনসিল পড়িয়া রহিয়াছে দেখিতে পাইয়া তিনি ঐ পেনসিল তুলিয়া আনিবার জন্য লক্‌হার্ট সাহেবকে বলিলেন। কিন্তু কি আশ্চর্য্য ! লক্‌হার্ট সাহেব সহস্র চেষ্টা করিয়াও পেনসিলটি তুলিতে পারিলেন না। তখন স্বামীজী বলিলেন, ‘তুমি যে যুদ্ধে জয়লাভ করিয়াছ এরূপ ভাবিও না। জয় পরাজয়ের কর্তা কেবল একজন আছেন। আমি যেরূপ তোমার শক্তি হরণ করিয়াছি, তিনিও ঐ ভাবে তোমার বুদ্ধি হরণ করিতে পারিতেন, তাহা হইলে যে কৌশল অবলম্বন করিয়া তুমি আফ্রীদিগণকে পরাজিত করিয়াছ, ঐ প্রকার বুদ্ধি তোমার মনে যুদ্ধ-জয়কালে কখনই উপস্থিত হইত না। ঈশ্বরের উপরই সর্বদা নির্ভর করিবে।’

আধি-ব্যাধি পীড়িত বিপন্ন মানবের হৃৎক মোচনেও স্বামীজীর হৃদয়

বিগলিত হইয়া উঠিত। কৃপা ও আশ্রয়দানের মধ্য দিয়া প্রায়ই প্রকটিত হইত অলৌকিক যোগৈশ্বর্য। ডাঃ ঈশ্বর চৌধুরী বেনারসের একজন খ্যাতনামা হোমিওপ্যাথ। একবার তাঁহার বালক পুত্রটি কোন মারাত্মক ব্যাধির কবলে পড়ে। বিজ্ঞানসম্মত সর্বপ্রকার চিকিৎসাই করা হয়, কিন্তু রোগীর অবস্থা ক্রমেই সঙ্কটাপন্ন হইতে থাকে।

অনন্তোপায় হইয়া ডাক্তার চৌধুরী এবার ভাস্করানন্দ মহারাজের শরণাপন্ন হন। স্বামীজী তখন বহু দর্শনার্থী ও ভক্তজন পরিবৃত্ত হইয়া আনন্দবাগে বসিয়া আছেন। ডাঃ চৌধুরীর কাতর প্রার্থনায় তাঁহার দয়া হইল। তখনই হাত বাড়াইয়া সম্মুখের বুড়ি হইতে একটি ফল নিয়া তিনি রোগীকে খাওয়াইতে বলিলেন। বলা বাহুল্য, ইহা গ্রহণের পর সঙ্কট কাটিয়া যায়, বালকটি বাঁচিয়া উঠে।

তৎকালে বঙ্গবাসী কাগজে স্বামীজীর কৃপালীলার নানা তথ্য প্রকাশিত হয়। ছুইটি কাহিনী এখানে উদ্ধৃত হইল :

“পূর্ববঙ্গের কয়েকটি বাবু একবার তাঁহাকে দর্শন করিতে গিয়াছিলেন। কয়েকজন প্রণাম করিলে পর, অগ্র একটি বাবু যেমন প্রণাম করিতে যাইতেছেন, অমনি স্বামীজী তাঁহাকে প্রণাম করিতে নিষেধ করিলেন। বলিলেন, ‘তোমার অশৌচ হইয়াছে, পিতৃবিয়োগ হইয়াছে, তুমি প্রণাম করিও না। তুমি এখনই বাটী চলিয়া যাও, বাটীতে তোমার অনাধিনী মাতা যারপরনাই শোকে কাতরা।’ প্রথমে তাহাদের কথায় বিশ্বাস হয় নাই, কিন্তু ঐ বাবুটি যেমন বাসায় ফিরিলেন, অমনি দেখিলেন, দরজার কাছে তার-পিয়ন দাঁড়াইয়া হাতে টেলিগ্রাম :--‘তোমার পিতৃবিয়োগ হইয়াছে ; অবিলম্বে বাটী আসিবে’।

“সুখীপুর নিবাসী একজন ব্রাহ্মণ স্বামীজীর নিকট আপন ব্যাধির আরোগ্য কামনায় উপস্থিত হয়। ঐ ব্যক্তির শরীর অতিশয় কুশল ছিল, যাহা খাইত তাহাই বমি হইয়া উঠিয়া যাইত। স্বামীজী

আগন্তুককে দর্শনমাত্র তাহার মনোগত ভাব বুঝিতে পারিয়া বলিলেন,
—‘পাঁড়েজি ভোজন প্রস্তুত কর।’ আদেশমত সে ব্যক্তি খিচুড়ি
রাঁধিয়া স্বামীজীর কণিকামাত্র প্রসাদ খাইয়া সম্পূর্ণ স্তম্ভ হইয়া
উঠিল।

ঢাকা বহর গ্রামের চণ্ডীচরণ বসু একজন প্রবীণ রাজকর্মচারী।
দীর্ঘদিন যাবৎ তিনি কঠিন বহুমূত্র রোগে ভুগিতেছিলেন। অভিজ্ঞ
ডাক্তার ও হেকিমদের চিকিৎসায় দীর্ঘকাল থাকিয়াও তাঁহার রোগ
নিরাময় হইল না। ধীরে ধীরে তিনি মৃত্যুর দিকে আগাইয়া
চলিলেন।

এ সময়ে চণ্ডীবাবু ভাবিতে থাকেন, এ জীবন তো শেষ হইয়াই
যাইতেছে, কিন্তু দীক্ষাহীন ভাবে মরা তো ঠিক নয়। তাই কাশীধামে
আসিয়া সকাতরে তিনি ভাস্করানন্দ মহারাজকে ধরিয়া বসিলেন,
তাঁহাকে মন্ত্র দান করিতেই হইবে।

স্বামীজী কৃপাপরবশ হইয়া কহিলেন, “তোমায় আমি মন্ত্র দিব
ঠিকই, কিন্তু তার আগে তোমার কুলগুরু কাছে তোমায় দীক্ষা নিতে
হবে।”

চণ্ডীবাবু বড় হতাশ হইয়া পড়িলেন। তাঁহার কুলগুরু থাকেন
সুদূর পূর্ববঙ্গে, কাশীতে কি করিয়া তিনি তাঁহার দেখা পাইবেন?

কিন্তু মহাপুরুষের কৃপায় অচিরে তাঁহার ছশ্চিন্তা কাটিয়া গেল।
একদিন তিনি শহরের রাস্তা দিয়া কোথায় চলিয়াছেন। দেখিলেন,
তাঁহার কুলগুরু সেই পথেই আসিতেছেন। হঠাৎ এক সন্যোগ পাইয়া
তিনি কাশীতে তীর্থ করিতে আসিয়াছেন। একবার কুলগুরুর নিকট
দীক্ষা লাভের পর চণ্ডীবাবু ভাস্করানন্দজী হইতে মন্ত্র প্রাপ্ত হন।
মহাপুরুষ এই সময়ে তাঁহাকে বলিয়া দেন, উনচল্লিশ দিনের মধ্যে
তাঁহার ব্যাধি হইতে তিনি মুক্তি পাইবেন। ঠিক ঐ সময়েই চণ্ডীবাবু
স্তম্ভ হইয়া উঠিয়াছিলেন।

দেবচন্দ্র বসু মল্লিক কলিকাতার এক বিশিষ্ট নাগরিক। ভাস্করানন্দ স্বামীর একটি কুপা-লীলার কথা তিনি বর্ণনা করিয়াছেন—“আমার ভগ্নীপতি, কলিকাতার পাথুরিয়াঘাটার বিখ্যাত জমিদার স্বর্গীয় রায় রমানাথ ঘোষ বাহাদুর ও তাঁহার মাতা স্বামীজীর নিকট গমন করিলেন। রমানাথ বাবুর পুত্রের কোষ্ঠী প্রস্তুত হইলে জানা যায় যে, পুত্রটির ষোল বৎসর বয়সে একটি বড় ফাঁড়া আছে; ঐ ফাঁড়া হইতে তাহার রক্ষা পাইবার কথা নহে। রমানাথবাবুর মাতার ঐকান্তিক ইচ্ছা যে বালকের বিবাহ দেন কিন্তু রমানাথবাবু বিবাহ দিতে নিতান্ত অনিচ্ছুক। শেষে তাঁহারা স্থির করেন, স্বামীজীর আদেশমত কার্য্য করিবেন। স্বামীজীর মত জিজ্ঞাসা করা হইলে তিনি বলিলেন, ‘আচ্ছা তোমরা ছেলের বিয়ে দাও।’

“স্বামীজীর আদেশ পাইয়া, রমানাথবাবু ও তাঁহার মাতা চলিয়া গেলেন। একটি জ্যোতিষী তথায় ঐ সময়ে উপস্থিত ছিলেন। তিনি স্বামীজীকে বলিলেন, ‘প্রভো! পুত্রটির বিষম ফাঁড়া আছে। জ্যোতিষ বাক্যও তো আপনার, অর্থাৎ ঋষিবাক্য। আপনি জানিয়া শুনিয়া কি করিয়া বিবাহ দিতে আদেশ করিলেন?’

“তদুত্তরে স্বামীজী বলিলে, ‘জানি পুত্রের মৃত্যু হইবেই, কিন্তু সেই কণ্ঠাটি, যাহার পূর্বজন্মার্জিত কৰ্ম্মানুসারে ইহজীবনে বৈধব্যদশা ভোগ নির্দিষ্ট হইয়াছে ও যাহার কৰ্ম্মের সহিত ঐ বালকের কৰ্ম্ম এক স্তরে বাঁধা, তাহাকে বিধবা হইতেই হইবে; তবে আমি যতদিন জীবিত থাকিব, পুত্রটিকে ততদিন মরিতে দিব না, ইহা নিশ্চয় জানিও।’

“জ্যোতিষী স্বামীজীর কথা মানিয়া লইলেন। একদিন স্বামীজীর কলেরা হইল, রমানাথবাবুর পুত্র গণেশও ঘোড়া হইতে পড়িয়া গেল, কিন্তু যে কয়দিন স্বামীজী জীবিত রহিলেন, গণেশও অজ্ঞানাবস্থায় পড়িয়া রহিল। স্বামীজী রাত্রি বার ঘটিকার সময় দেহত্যাগ করিলেন, গণেশও ঠিক ঐ সময় আমাদিগকে পরিত্যাগ করিয়া চলিয়া গেল।”

কত মুমুকু ও আশ্রিত ভক্তজন যে মহাপুরুষের আশ্রয়ে আসিয়া

রূপান্তরিত হইয়াছে, নবজন্ম লাভ করিয়াছে তাহার সংখ্যা কে নির্ণয় করিবে ? এমনই একজন ভাগ্যবান ছিলেন, নেপালের এক প্রবীণ রাণা কর্ণেল মিনা বাহাদুর। ভাস্করানন্দজীর কুপারশ্মি ইহার জীবনে পতিত হয় এবং রূপান্তর সাধন করে। মহাপুরুষের আশীর্ব্বাদ লাভের পর সংসারে সমস্ত সুখৈশ্বর্য ও আত্মপরিজনের মায়া তিনি ত্যাগ করেন। হিমালয়ের শালিগ্রাম নদীতটে এক পর্ণকুটির নির্মাণ করিয়া এই সাধক কঠোর তপস্যায় রত হন।

অনেক সময় জিজ্ঞাসুগণ স্বামীজীর নিকট হইতে তাঁহাদের জ্ঞাতব্য নির্দেশাদি স্বপ্ন বা অশ্রাব্য অলৌকিক পন্থার মধ্য দিয়াও প্রাপ্ত হইতেন। একবার প্রভুপাদ বিজয়কৃষ্ণ গোস্বামীর এক শিষ্য, ভূতনাথ ঘোষ মহাশয় স্বামীজীর নিকট গিয়া সাধন বিষয়ক কয়েকটি প্রশ্ন উত্থাপন করেন। খেয়ালী স্বামীজী তাঁহার প্রশ্নের তো কোন উত্তর দিলেনই না, বরং তখনই তাঁহাকে সেখান হইতে তাড়াইয়া দিলেন। বলা বাহুল্য, ঘোষ মহাশয় ইহাতে খুব বিরক্ত না হইয়া পারেন নাই। কিন্তু সেই দিনই রাত্রিতে স্বপ্নযোগে তিনি স্বামীজীর দর্শন ও নির্দেশ প্রাপ্ত হন। তাঁহার মনের সমস্ত সন্দেহ ও বিরক্তির মেঘ অপমৃত্ত হইয়া যায়।

অযোধ্যারাজ প্রতাপনারায়ণ সিংহ স্বামী ভাস্করানন্দে একজন অনুগৃহীত শিষ্য। স্বামীজীর কৃপাবলে তাঁহার একবার প্রাণরক্ষা হয়। সে সময় তিনি গুরুদেবের চরণ দর্শনের জন্য বেনারসে আসিয়াছেন, হঠাৎ অযোধ্যা হইতে জরুরী তার আসিল, অগোণে সেখানে মহারাজার উপস্থিতি প্রয়োজন। স্থির হইল পরের ট্রেনে তিনি অযোধ্যায় ফিরিয়া যাইবেন। কিন্তু ভাস্করানন্দজী কিছুতেই সেদিন তাঁহাকে যাইতে দিতে রাজী নহেন। প্রতাপনারায়ণ মহা সঙ্কটে পড়িলেন।

অনুমতির জ্ঞাত্য বারংবার অনুনয় করা হইলে স্বামীজী কহিলেন, “যদি নিতান্তই আজ তোমার যেতে হয়, তবে যে গাড়ীতে যাবে বলে ঠিক করেছ তার পরের গাড়ীতে যেয়ো।”

অগত্যা সেই ব্যবস্থাই ঠিক হইল। স্টেশনে পৌঁছিয়া এক সংবাদ শুনিয়া তো মহারাজের চক্ষুস্থির। তারে সংবাদ আসিয়াছে, ইতিপূর্বে যে গাড়ীখানা অযোধ্যার দিকে যায়, তাহা পশ্চিমধ্যে অগ্নি এক গাড়ীর সহিত সংঘর্ষে লাইনচ্যুত হয়। ফলে, বহুলোক হতাহত হইয়াছে। স্বামীজীর নিষেধে যাত্রা স্থগিত না রাখিলে প্রতাপনারায়ণ ঐ গাড়ীতেই উঠিতেন এবং জীবন তাঁহার বিপন্ন হইত।

ইহার পূর্বদিন ভাস্করানন্দ মহারাজ নিতান্ত কৌতুকভরে এক অলৌকিক লীলা প্রদর্শন করেন। রাজা প্রতাপনারায়ণকে সঙ্গে কবিয়া স্বামীজী মহারাজ সন্ধ্যাকালে আনন্দবাগে ভ্রমণ করিতেছেন। ভক্তের মনে এক উদ্বেগের ছায়া পড়িয়াছে। জরুরী তার পাওয়া সম্বন্ধেও তিনি দেশে যাইতে পারিতেছেন না, সারাদিন তাই বিষণ্ণ হইয়াই আছেন। সদানন্দনয় স্বামীজী তাঁহার সহিত এ সময়ে এক বঙ্গ গুরু করিয়া দিলেন।

বেড়াইতে বেড়াইতে তাঁহারা আনন্দবাগের নিকটস্থ পুষ্করিণী হুর্গাকুণ্ডের ধারে আসিয়াছেন। হঠাৎ স্বামীজী রাজার নিকট হইতে তাঁহার হীরক অঙ্গুরীয়টি চাহিয়া নিলেন, তারপর ক্রীড়াচ্ছনে উহা জলগর্ভে নিক্ষেপ করিলেন। অযোধ্যারাজ গুরুদেবকে ভালভাবে জানেন, এ বহুশ্রম আচরণে তাই তেমন কিছু বিস্মিত হন নাই। তাছাড়া, গুরুজী যখন উহা জলে ফেলিয়া দিলেন, তখন তাঁহার আর কি-ই বা করিবার আছে? ব্যাপারটিকে অতঃপর কোন গুরুও না দিয়া অপর এক সঙ্গীর সহিত তিনি কথা কহিতে লাগিলেন।

শিষ্যের এ শাস্ত্র আচরণ দর্শনে স্বামীজী খুশী না হইয়া পারেন নাই। সহাস্ত্রে তাঁহাকে কহিলেন, “তোমার আংটি এখনই মিলবে, তুমি সরোবরের যে কোন স্থানে হাত ডোবাও দেখি।”

প্রতাপনারায়ণ চাতুরী করিয়া দুর্গাকুণ্ডের অপরপারে গিয়া জল-মধ্যে হস্ত প্রসারিত করিলেন। কি আশ্চর্য্য! জল হইতে কতকগুলি হীরক অঙ্গুরীয় উঠিয়া আসিল। সবগুলিই দেখিতে একপ্রকার—কোনও পার্থক্য নির্ণয় করা বড় কঠিন। অঙ্গুরীয়ের অধিকারীও তাঁহার নিজস্ব বস্তুটি চিনিতে সমর্থ নন।

স্বামীজী এবার বালকের মত খল্ খল্ করিয়া হাসিয়া উঠিলেন। অযোধ্যারাজের নিজস্ব অঙ্গুরীয়টি তাঁহাকে প্রত্যর্পণ করিতে তাঁহার দেৱী হইল না। সঙ্গে সঙ্গে অপরগুলি পুষ্করিণীতে বিসর্জন দিলেন। সমস্ত পরিবেশটি মহাপুরুষের এই কোতুক-ক্রীড়ায় হাস্যোজ্জ্বল হইয়া উঠিল।

স্বচ্ছাময় স্বামীজী মাঝে মাঝে নিতান্ত মনের আনন্দে বালকবৎ তাঁহার যোগবিভূতি প্রকাশ করিতেন। একবার কয়েকজন সন্ন্যাসী তাঁহার সহিত দেখা করিতে আসিয়াছেন। আগন্তুকদের সহিত তত্ত্বালোচনা করিতে করিতে স্বামীজী একটি শাস্ত্রগ্রন্থ লইয়া বসিলেন। পাঠ ও ব্যাখ্যায় বেলা বাড়িয়া যাইতেছে। হঠাৎ স্বামীজীর খেয়াল হইল, তাই তো, এ সন্ন্যাসীদের তো খাওয়া-দাওয়া হয় নাই। তিনি তাঁহাদের ভোজনের জন্য ব্যস্ত হইয়া পড়িলেন।

ভক্ত শ্রীশুরেন্দ্র মুখোপাধ্যায় এ ঘটনাটি লিপিবদ্ধ করিয়াছেন। “সেখানে তখন কয়েকটি সন্ন্যাসী উপস্থিত। ইহাদের একজন তাঁহাকে বলিয়াছেন,—সর্বদর্শী স্বামীজী তখন আমাদিগকে জিজ্ঞাসা করিলেন, ‘তোমরা কিছু খাবে না?’ আমরা উত্তর করিলাম যে, তিনি আমাদের তিন জনের উপযুক্ত আহার কোথায় প্রাপ্ত হইবেন? স্বামীজী ঈষৎ হাস্য করিয়া উত্তর করিলেন, ‘আচ্ছা তোমরা আহারার্থ উপবেশন কর, এখনই তোমাদিগের আহার উপস্থিত হইবে; তোমরা কোন্ কোন্ দ্রব্য খাইতে চাও আমাকে বল।’ ইহা শুনিয়া আমাদিগের মধ্যে একজন উত্তর করিলেন, ‘আমরা রাবড়ী,

বরফী, ক্ষীর, দধি, ছানা, সন্দেশ, আত্র ও কমলালেবু ভোজন করিব।’

“এই কথা সমাপ্ত হইতে না হইতে আমরা সকলে দেখিতে পাইলাম ছুইটি দিব্যাকৃতি সুন্দর বালক আমাদের দিকেই আগমন করিতেছে। বালক ছুইটি আগমনপূর্বক তাহাদিগের মস্তকস্থিত ঝুড়ি ছুইটি স্বামীজীর পদতলে স্থাপন করিয়া মুহূর্ত্তমধ্যে কোথায় যে অদৃশ্য হইয়া গেল, আমরা কিছুই বুঝিতে পারিলাম না। ইহা অপেক্ষাও অধিকতর আশ্চর্য্যের বিষয় এই যে, আমরা যে যে খাদ্যদ্রব্য ভোজন করিতে ইচ্ছা করিয়াছিলাম, বালক ছুইটি কেবলমাত্র সেই কয়েকটি দ্রব্যই আনয়ন করিয়াছিল।”

অলৌকিক ঘটনার অজস্রতা ভাস্করানন্দজীর জীবনে কম নয়, কিন্তু ভক্ত লছমন মালার আবিষ্কারের অলৌকিকত্ব অনেক কিছুকেই যেন হার মানাইয়া দেয়। উত্তরকালে এই দরিদ্র ধীবর ভক্তের প্রতি স্বামীজী মহারাজের রূপা তাঁহার অগ্ৰাণ্য ভক্ত শিষ্যদের বিস্মিত না করিয়া পারিত না।

শেষ জীবনে স্বামীজী একবার জন্মভূমি মৈথেলালপুর দর্শন করিতে যান। তিনি সেখানে গোপনে আসিয়াছেন, কিন্তু কি করিয়া যেন মহাপুরুষের আগমন সংবাদটি চারিদিকে রটিয়া যায়। সহস্র সহস্র লোকের সমাবেশে ক্ষুদ্র গ্রামটি আলোড়িত হইয়া উঠে।

স্বামীজীকে সেদিন এক মঞ্চোপরি বসাইয়া অভ্যর্থনা করা হইতেছে। বিরাট জনতা তাঁহার সম্মুখে নীরবে সশ্রদ্ধভাবে উপবিষ্ট। উপদেশাদি দানের শেষে সকলকে প্রসাদ বিতরণ করা হইতেছে। এমন সময় স্বামীজী সহসা তাঁহার সম্মুখস্থ ব্যক্তিদের আদেশ দিলেন, “লছমন মালা নামে এক দরিদ্র জেলে এ জনতার ভেতর মিশে আছে। সে যে আমার এক পরম ভক্ত, তাকে তোমরা সকলে শীগ্গির খুঁজে বার কর।”

বহুক্ষণ খোজাখুঁজির পর এই শুদ্ধাত্মা ধীবরকে আবিষ্কার করা গেল। কপালু স্বামীজী তাঁহাকে মঞ্চের উপর নিজের পার্শ্বে সাদরে বসাইয়া দিলেন। ধনীজন ও রাজ্যবর্গবন্দিত যোগীরাজ ভাস্করানন্দ সরস্বতী যে কাঙালের মত ঠাকুর ইহা বুঝিতে কাহারো বাকী রহিল না। ছিন্নবাস পরিহিত দরিদ্র ধীবরের মধ্যে স্বামীজীর দিব্যদৃষ্টি সেদিন কোন্ রত্নের সন্ধান পাইল, ইহাই অনেকে ভাবিতেছিলেন।

পরবর্তীকালে স্বামীজী ভক্তদের নিকট তাঁহার এই নব আবিষ্কৃত সাধকের পরিচয় দিতে গিয়া বলিতেন, “আমার লছমন মালার ভেদ-জ্ঞান দূর হয়েছে—সে সার্থক সাধক ও মহাজ্ঞানী।”

দিগ্বিদিকে করুণার ধারা বিস্তারিত করার পর যোগীজীবনের অন্ত্যলীলাটি এবার ধীরে ধীরে অগ্রসর হইয়া আসিতেছে। এক অপূর্ব দিব্য আনন্দে মহাপুরুষের জীবনসত্তাটি ভরপুর। তাঁহার সারা দেহে মনে নিরন্তর সেই আনন্দজ্যোতিরই বিচ্ছুরণ। প্রিয় ভক্ত লছমন মাল। তাঁহার নিকট তখন আনন্দবাগেই বেশী সময় অবস্থান করে। প্রত্যহ স্বামীজীর আদেশমত তাঁহার প্রিয় গানের ধূয়াটি ধরিয়া সে বারবার গাহিয়া চলে—

লারে মালাহা কিনারে লাইয়া
সরযুকে তীরে ভীড় বৈ ভারী
ঠহরে হায় রামলছমন হু ভাইয়া—

গান থামিয়া যায়। তারপর উদাস সুর ঝঙ্কার আনন্দবাগের আকাশে বাতাসে ছড়াইয়া পড়ে। সন্ধ্যার তরল অন্ধকার বন-বীথিকায় জড়াইয়া জড়াইয়া নিবিড় হইয়া উঠে। স্বামীজী উদাস দৃষ্টিতে সেদিকে তাকাইয়া থাকেন।

তারপর স্তম্ভিত হাসি হাসিয়া বলেন, “মালা, আমার জগৎও তোকে শীগ্গিরই অসিঘাটে নৌকা নিয়ে আসতে হবে।”

স্বামী ভাস্করানন্দ সরস্বতী

ভক্ত লছমন মালার গণ্ড বাহিয়া অশ্রুধারা গড়াইয়া পড়ে । প্রভুর
বিরহ কি সত্য সত্যই আসন্ন ?

১৩০৬ সালের ২৫শে আষাঢ় স্বামীজীর প্রতিক্রিত লগ্নটি
উপস্থিত হয় । কয়েকদিন পূর্বে উদররোগে তিনি আক্রান্ত হইয়াছেন ।
তাহাই অগ্রসর হইয়া আসে মরদেহের বিলুপ্তির কারণরূপে ।
মহাপ্রয়াণের কালে মৃতকল্প শরীরে এক অপূর্ব অলৌকিক শক্তি
সঞ্চার হইতে দেখা যায় । ধ্যানামনে উপবিষ্ট হইয়া মহাপুরুষ
সজ্ঞানে শেষ নিঃশ্বাসটি ত্যাগ করেন, জ্যোতির্ময় অমৃতলোকে
তাহার মহা-উত্তরণ ঘটে ।

শ্রীরাধাদাস কাঠিয়াবাবা

উত্তরাখণ্ডের শীতার্ন্ত মধ্য রাত্রি। দূর পাহাড়ের চূড়ায় চূড়ায়
শ্বন তুষারের আবরণ। চৌড় ও দেবদারুর বিশীর্ণ শাখা হইতে
টুপটাপ করিয়া বরফের কণা ঝরিয়া পড়িতেছে। এই শীতের মধ্যে
কচ্ছবতী তরুণ সাধু ধুনী জ্বালাইয়া আসনে উপবিষ্ট। ধ্যান-জপে
দীর্ঘকাল অতিক্রান্ত হইয়াছে। দেহটি ক্লান্ত, অবসন্নপ্রায়। দুই চোখে
তাঁহার দুর্নিবার ঘুম নামিয়া আসিতেছে। আসনের উপর দেহটি কোন্
সময়ে যে ঢলিয়া পড়িল, তাঁহার হুঁস নাই।

ধুনীর উপর মাঝে মাঝে বরফ পড়িতেছে। কিছুকালের পর
কাঠের আগুন একেবারেই নিভিয়া গেল। এই প্রাণান্তকর শীতে
ঘুমাইবারই বা উপায় কোথায়? কাঁপিতে কাঁপিতে যুবক সাধুটি
উঠিয়া বসিলেন। কিন্তু এ বিপদে কি করিয়া প্রাণ আজ বাঁচাইবেন?
রাত্রে ধ্যানের আসন ছাড়িয়া উঠা গুরুদেবের বারণ। পাহাড়ীদের
বাড়ী হইতে যে আগুন সংগ্রহ করিবেন, তাহারও জো নাই।

নিকটেই গুরুদেবের রূপড়ি উহার মধ্যে তিনি ধ্যানমগ্ন। তাঁহার
নিকট হইতে জলন্ত কয়লা চাহিতে যাওয়া,—সে যে আরো
সাংঘাতিক কথা। প্রায় জলন্ত অগ্নিতে ঝাঁপ দিবারই সমান। নিকটে
উপস্থিত হওয়া মাত্রই তিনি ক্রোধে ফাটিয়া পড়িবেন। শিষ্যের
তামসিক আলস্তে ধুনী নির্বাপিত হইয়াছে। এ অপরাধের জন্য চরম
দণ্ড প্রদান না করিয়া তিনি ছাড়িবেন না। আবার এদিকেও বিপদ
কম নয়। অবিলম্বে আগুন সংগ্রহ না করিতে পারিলে মাঘের এই
প্রচণ্ড শীতে মৃত্যু অনিবার্য।

অবশেষে সাহস সঞ্চয় করিয়া তরুণ সাধু রূপড়ির দ্বার সম্মুখে গিয়া দাঁড়াইলেন। ডাকিতে লাগিলে, “গুরুজী।”

কিছুক্ষণ পরে ভিতর হইতে গুরুগম্ভীর কণ্ঠ ধ্বনিত হইল—“কে ? বাহিরে কে দণ্ডায়মান ?”

ভীতিজড়িত কণ্ঠে শিষ্য নিবেদন করিলেন, “মহারাজ, আমার ধুনীর আগুন হঠাৎ নিভে গেছে। যদি কৃপা করে আমায় ধুনী থেকে কিছু কয়লা দেন, তবে আবার তা জ্বালিয়ে নিতে পারি। শীতে জমে যাচ্ছি, মহারাজ।”

ভিতর হইতে এবার আসিল রোষদগ্ধ তর্জ্জন গর্জ্জন, আর অনর্গল ভৎসনা। যদি সে আসনে বসিয়া না ঘুমাইয়াই থাকে, তবে ধুনী কি করিয়া নিভে ? এই ভাসম ঘুম ও আরামের প্রয়োজনই যদি এত বেশী তো পিতামাতাকে ছুঃখ দিয়া গৃহত্যাগ করিয়াছে কেন ? গার্হস্থ্য জীবনের সুখকর পরিবেশেই তো সে বেশ ঘুমাইতে পারিত।

শিষ্য রামদাসের দেহে তখন শীতের কাঁপুনি অপেক্ষা ভয়ের কাঁপুনিই বেশী লাগিয়াছে। মিনতিপূর্ণ কণ্ঠে তিনি বারংবার ক্ষমা প্রার্থনা করিতে লাগিলেন। সান্ন্যাসে গুরুদ্বীকে জানাইলেন, নিতান্ত আকস্মিকভাবে তিনি ঘুমাইয়া পড়িয়াছেন, তাই আজ এ অপরাধ ঘটিয়াছে। আর কখনও এরূপ হইবে না। এবার হইতে নিশ্চয়ই ছেদ-বিরতিহীন ধ্যান জপে তিনি ব্রতী হইবেন। ধুনীর আগ্নেয় রক্ষায়ও তাঁহার আর কখনো শৈথিল্য ঘটিবে না।

কিন্তু গুরুদেবের ক্রোধ প্রশমিত হয় কই ? রূপড়ির ভিতর হইতে কঠোর কণ্ঠে তিনি বলিয়া উঠিলেন, “ইয়ে জাড়ামে এক ঘণ্টা ঠিক্‌সে খাড়া হো কর্‌ রহো, লেকিন্‌ আগ্‌ তুমকো নহি মিলেগা।” অর্থাৎ, এই তীব্র শীতে তুমি এক ঘণ্টা বাইরে এমনি করেই দাঁড়িয়ে থাকো—আগুন কিছুতেই মিলবে না।

ভারতের সাধক

এ আদেশ অমল্ভবনীয়। তরুণ সাধক হিমাচলের স্তূতী শীতে দাঁড়াইয়া কাঁপিতে লাগিলেন। কিছুক্ষণ পরে অবশ্য রূপড়ির দরজাটি হঠাৎ খুলিয়া গেল। গুরুদেব তাঁহার আসনে বসিয়াই ভিতর হইতে একখণ্ড জ্বলন্ত কাঠ বাহিরে নিক্ষেপ করিলেন। সঙ্গে সঙ্গে তীক্ষ্ণ কণ্ঠে সতর্ক করিয়ে দিলেন, আর যেন এরূপ ভ্রুটি না ঘটে।

নূতন সমিধ প্রাপ্ত হইয়া শিষ্যের ধুনী তৎক্ষণাৎ আবার প্রদীপ্ত হইয়া উঠিল। দীর্ঘ তপস্যা ও কৃচ্ছ্রভ্রমের মধ্য দিয়া এই শিষ্যের জীবনসামিধেও এমনি করিয়া আত্মনিবেদনের আত্মশিখাটি প্রজ্জ্বলিত হয়, গুরুকৃপার দিব্য স্পর্শে তাহা জ্যোতির্ময় হইয়া ওঠে, অমৃতময় সত্তায় রূপান্তর লাভ করে। উত্তরাখণ্ডের শীতজর্জর নিশীথের সেদিনকার এই তরুণ সাধকই উত্তরকালের শ্রীবৃন্দাবনের রামদাস কাঠিয়াবাবা। আর তাঁহার গুরু—মহাসমর্থ তাপস শ্রীশ্রী ১০৮ স্বামী দেবদাসজী মহারাজ।

নিম্বার্ক সম্প্রদায়ের শ্রীমং নাগাজীর শাখার এক শক্তিমান আচার্য্য দেবদাসজী মহারাজ। ভারতীয় সাধকসমাজে তখন তাঁহার বিরাট প্রসিদ্ধি। এই শক্তিশ্বর মহাপুরুষের অন্তর্লোকের পরিচয়, তাঁহার মহাজীবনের জ্যোতির্ময় স্বরূপ অনুগত শিষ্য রামদাসের সাধনসত্তায় তৎকালে ধীরে ধীরে ফুটিয়া উঠিতেছে। সাধক রামদাস তাঁহার গুরু-মহারাজের অপার মহিমার পরিচয় প্রাপ্ত হইয়াছেন। আত্মগোপনাল যোগীগুরুর কঠিন বাহ্যাবরণটি ভেদ করিতে সেদিন তাই তাঁহার সাধনোজ্জ্বল দৃষ্টি ভুল করে নাই।

অধ্যাত্মপথের দুঃসাহসিক অভিযানে তরুণ সাধক রামদাস অগ্রসর হইয়াছেন। আর এ অভিযাত্রার জন্ত দিনের পর দিন তাঁহাকে কম মূল্যও প্রদান করিতে হয় নাই। কৃচ্ছ্রসাধন ও ত্যাগ-তিত্ত্বকার চরম পরীক্ষার মধ্য দিয়া সদগুরু তাঁহাকে পরম পরিণতিটির দিকে টানিয়া নিতেছেন।

গুরুদেব একদিন রামদাসকে ডাকিয়া কহিলেন, কোন বিশেষ কাজের জন্ত তাঁহাকে বাহিরে যাইতে হইবে। তিনি প্রত্যাবর্তন না করা পর্য্যন্ত যেন বৃক্ষতলেই আসনখানি ত্যাগ করিয়া কোথাও না যান। রামদাস ধূনী জ্বালাইয়া ধ্যানে বসিলেন।

দিনের পর দিন গত হইল। গুরুদেবের প্রত্যাগমনের কিন্তু কোন লক্ষণই নাই। ক্রুদ্ধ হইতে এ কি বিচিত্র পরীক্ষায় তিনি শিষ্যকে ফেলিয়া গেলেন? ক্রমাগত আটদিন রামদাস শুধু অবিরত ধ্যান ও ভজনে নির্দিষ্ট আসনটিতে বসিয়া কাটাইয়া দিলেন। আহার নাষ্ট, মঙ্গমূত্র ত্যাগ পর্য্যন্ত নাই, গুরুদেবের প্রতি একনিষ্ঠাই সেদিন তাঁহার জীবনে এক দৈবী শক্তির প্রেরণা জাগাইয়া তুলিল।

ফিরিয়া আসিয়া গুরুজী সব শুনিলেন। প্রসন্নমুখ হাম্বে তাঁহার আননটি এবার প্রদীপ্ত হইয়া উঠিয়াছে। শিষ্য রামদাসকে নিকটে ডাকিয়া সম্মুখে কহিতে লাগিলেন; সদগুরু চরণে এই আত্মসমর্পণই যে সর্ব্বাপেক্ষা বড় প্রস্তুতি, ইহাতেই মিলে সাধকের বহু প্রার্থিত ধন—গুরুরূপ। গৃহত্যাগের বেদনা ও পিতামাতার অশ্রুজলে এই পবন প্রাপ্তির মধ্য দিয়াই যে সার্থক হইয়া উঠে।

যোগীবর দেবদাসজী শিষ্যকে তাঁহার অপারামেয় যোগ-বিভূতি অর্পণ করিতে চাহেন। ইষ্ট প্রাপ্তির পরম সহায়করূপে, সদগুরুরূপে তিনি আজ রামদাসের সম্মুখে বিরাজমান। পরম আদিকারী এই শিষ্যের জন্ত তাই তাঁহার সতর্ক দৃষ্টি ও যত্নের অবধি নাই। নিরন্তর শাসন ও ভৎসনায় শিষ্যের ক্রোধ উদ্দীপ্ত হয় কিনা, তাহাই সতর্কভাবে তিনি পরীক্ষা করেন, অবিরাম বাক্য-যন্ত্রণার দহনে তাঁহার হৃদয়ের অভিমানকে ভস্মীভূত করিতে থাকেন।

অক্লান্ত গুরুসেবা ও সাধন-ভজনে ব্যাপৃত থাকিয়াও শিষ্য রামদাসকে সতত শুনিতে হয় শ্লেষ ও নিন্দার স্তুতী কষাঘাত। “এ চামার”, “এ ভাজী”—বলিয়া ডাকিয়া গুরুমহারাজ তাঁহার বৈষ্যের পরীক্ষা করেন। উদরের পরিচর্য্যার জন্তই যে শিষ্য এই বৈরাগ্য

ভারতের সাধক

এ আদেশ অলঙ্ঘনীয়। তরুণ সাধক হিমাচলের স্তূতীত্র শীতে দাঁড়াইয়া কাঁপিতে লাগিলেন। কিছুক্ষণ পরে অবশ্য রূপড়ির দরজাটি হঠাৎ খুলিয়া গেল। গুরুদেব তাঁহার আসনে বসিয়াই ভিতর হইতে একখণ্ড জ্বলন্ত কাঠ বাহিরে নিক্ষেপ করিলেন। সঙ্গে সঙ্গে তীক্ষ্ণ কণ্ঠে সতর্ক করিয়ে দিলেন, আর যেন এরূপ ক্রটি না ঘটে।

নূতন সমিধ প্রাপ্ত হইয়া শিষ্যের ধুনী তৎক্ষণাৎ আবার প্রদীপ্ত হইয়া উঠিল। দীর্ঘ তপস্যা ও কৃচ্ছ্রত্বের মধ্য দিয়া এই শিষ্যের জীবনসমিধেও এমনি করিয়া আত্মনিবেদনের আত্মশিখাটি প্রজ্জ্বলিত হয়, গুরুকৃপার দিব্য স্পর্শে তাহা জ্যোতির্ময় হইয়া ওঠে, অমৃতময় সত্তায় রূপান্তর লাভ করে। উত্তরাখণ্ডের শীতজর্জর নিশীথের সেদিনকার এই তরুণ সাধকই উত্তরকালের শ্রীবৃন্দাবনের রামদাস কাঠিয়াবাবা। আর তাঁহার গুরু—মহাসমর্থ তাপস শ্রীশ্রী ১০৮ স্বামী দেবদাসজী মহারাজ।

নিম্বার্ক সম্প্রদায়ের শ্রীমং নাগাজীর শাখার এক শক্তিমান আচার্য্য দেবদাসজী মহারাজ। ভারতীয় সাধকসমাজে তখন তাঁহার বিরাট প্রসিদ্ধি। এই শক্তিদ্বর মহাপুরুষের অন্তর্লোকের পরিচয়, তাঁহার মহাজীবনের জ্যোতির্ময় স্বরূপ অনুগত শিষ্য রামদাসের সাধনসত্তায় তৎকালে ধীরে ধীরে ফুটিয়া উঠিতেছে। সাধক রামদাস তাঁহার গুরু-মহারাজের অপার মহিমার পরিচয় প্রাপ্ত হইয়াছেন। আত্মগোপনাল যোগীগুরুর কঠিন বাহ্যাবরণটি ভেদ করিতে সেদিন তাই তাঁহার সাধনোজ্জ্বল দৃষ্টি ভুল করে নাই।

অধ্যাত্মপথের ছ.সাহসিক অভিযানে তরুণ সাধক রামদাস অগ্রসর হইয়াছেন। আর এ অভিযাত্রার জন্ত দিনের পর দিন তাঁহাকে কম মূল্যও প্রদান করিতে হয় নাই। কৃচ্ছ্রসাধন ও ত্যাগ-তিত্তিকার চরম পরীক্ষার মধ্য দিয়া সদগুরু তাঁহাকে পরম পরিণতিটির দিকে টানিয়া নিতেছেন।

গুরুদেব একদিন রামদাসকে ডাকিয়া কহিলেন, কোন বিশেষ কাজের জন্ত তাঁহাকে বাহিরে যাইতে হইবে। তিনি প্রত্যাবর্তন না করা পর্য্যন্ত যেন বৃক্ষতলেই আসনখানি ত্যাগ করিয়া কোথাও না যান। রামদাস ধুনী জ্বালাইয়া ধ্যানে বসিলেন।

দিনের পর দিন গত হইল। গুরুদেবের প্রত্যাগমনের কিন্তু কোন লক্ষণই নাই। ক্রুদ্ধ হইতে এ কি বিচিত্র পরীক্ষায় তিনি শিষ্যকে ফেলিয়া গেলেন? ক্রমাগত আটদিন রামদাস শুধু অবিরত ধ্যান ও ভজনে নির্দিষ্ট আসনটিতে বসিয়া কাটাইয়া দিলেন। আহার নাশ, মলমূত্র ত্যাগ পর্য্যন্ত নাই, গুরুদেবের প্রতি একনিষ্ঠাই সেদিন তাঁহার জীবনে এক দৈবী শক্তির প্রেরণা জাগাইয়া তুলিল।

ফিরিয়া আসিয়া গুরুজী সব শুনিলেন। প্রসন্নমুখ হইয়া তাঁহান আননটি এবার প্রদীপ্ত হইয়া উঠিয়াছে। শিষ্য রামদাসকে নিকটে ডাকিয়া সম্মুখে কহিতে লাগিলেন; সদগুরু চরণে এই আত্মসমর্পণই যে সর্বাপেক্ষা বড় প্রস্তুতি, ইহাতেই নিলে সাধকের বহু প্রার্থিত ধন—গুরুরূপ। গৃহত্যাগের বেদনা ও পিতামাতার অশ্রুজলে এই পবন প্রাপ্তির মধ্য দিয়াই যে সার্থক হইয়া উঠে।

যোগীবর দেবদাসজী শিষ্যকে তাঁহার অপারামেয় যোগ-বিভূতি অর্পণ করিতে চাহেন। ইষ্ট প্রাপ্তির পরম সহায়করূপে, সদগুরুরূপে তিনি আজ রামদাসের সম্মুখে বিরাজমান। পরম আশ্রয়ী এই শিষ্যের জন্ত তাই তাহার সতর্ক দৃষ্টি ও যত্নের অবধি নাই। নিরন্তর শাসন ও ভৎসনায় শিষ্যের ক্রোধ উদ্দীপ্ত হয় কিনা, তাহাই সতর্কভাবে তিনি পরীক্ষা করেন, অবিরাম বাক্য-যন্ত্রণার দহনে তাঁহার হৃদয়ের অভিমানকে ভস্মীভূত করিতে থাকেন।

অক্লান্ত গুরুসেবা ও সাধন-ভজনে ব্যাপৃত থাকিয়াও শিষ্য রামদাসকে সতত শুনিতে হয় শ্লেষ ও নিন্দার স্তুতী কষাঘাত। “এ চামার”, “এ ভাজী”—বলিয়া ডাকিয়া গুরুমহারাজ তাঁহার বৈধেয় পরীক্ষা করেন। উদরের পরিচর্য্যার জন্তই যে শিষ্য এই বৈরাগ্য

গ্রহণ করিয়াছেন—বারংবার ইহা বলিয়া দেবদাসজী তাঁহার উদ্ধাকে জাগ্রত করিতে চান। পরীক্ষার পর পরীক্ষা চলিতে থাকে।

রামদাস জানেন, গুরুজীর এ কঠোর বাহ্য রূপের অভ্যন্তরে রহিয়াছে এক অপরূপ ভগবৎসত্তার প্রকাশ। ঐশী করুণার মাধুর্য্যে যোগবিভূতির ঐশ্বর্য্যে ও মহিমায় তাহা ভরপুর। এই বিরাট পুরুষের চরণে তাই তিনি এমনভাবে পড়িয়া রহিয়াছেন।

একদিন কিন্তু গুরুদেবের আচরণের রূঢ়তা চরমে পৌছিল। প্রচণ্ড বোম্বে অকস্মাৎ তিনি জলিয়া উঠিলেন সামান্যতম কারণে রামদাসকে নির্দয়ভাবে প্রহার করিতে তাঁহার বাধিল না।

প্রহার ও অশ্রাব্য গালিগালাজ তো বর্ষিত হইলই, সঙ্গে সঙ্গে তিনি বলিতে লাগিলেন, “আমার এত দিনকার বড় বড় চেলা সব চলে গিয়েছে, আর তুই শালা ভাজী কিজন্য আমার পেছনে এমন করে এখনও লেগে রয়েছিস বলতো? এখনই তুই আমার সামনে থেকে দূর হ। কোন শালার সেবায় আর আমার এতটুকুও দরকার নেই।”

লগুড়াঘাতে জর্জর রামদাস ভূতলে পতিত হইয়াছেন। তবুও গুরুজীর চরণ ধরিয়া অশ্রুসিক্ত কণ্ঠে বারবার মিনতি করিতে থাকেন, পিতা-মাতাকে ত্যাগ করিয়া আসিয়া তিনি গুরুর পরমাশ্রয় গ্রহণ করিয়াছেন, আর যে কোথাও তাঁহার যাঁইবার স্থান নাই। সেই গুরুই যদি আজ তাঁহাকে পরিত্যাগ করেন, তাহা হইলে সমগ্র পৃথিবীতে তিনি দাঁড়াইবেন কোথায়? ইহা অপেক্ষা গুরুদেব বরং তাঁহার গলায় এক কাটারী বসাইয়া দিন। যে চরণে রামদাস সর্বস্ব নিবেদন করিয়া বসিয়া আছেন, জীবন থাকিতে তিনি তাহা কখনই ত্যাগ করিবেন না।

রুদ্ধ অকস্মাৎ প্রসন্ন হইয়া উঠিলেন। ঝঙ্কারঝঙ্কার মেঘমালা হইতে এবার বর্ষিত হইল প্রাণদায়িনী বারিধারা। দেবদাসজী মহারাজ

মুহূৰ্ত্তমধ্যে ৰূপান্তৰিত হইয়া গেলেন। স্থিতহাস্তে, স্নেহভৱা কণ্ঠে বলিতে লাগিলেন,—তাঁহাৰ স্নেহপুস্তলী ৰামদাসেৰ শেষ পরীক্ষা আজ সম্পন্ন হইয়াছে। শিষ্য তাঁহাৰ আজ সসম্মানে উত্তীৰ্ণ—তাঁহাৰ অহংবোধ এতদিনে নিশ্চিহ্নপ্ৰায়, বুদ্ধিও নিশ্চলা ও তত্ত্বোজ্জ্বলা হইয়া উঠিয়াছে।

গুৰু যেন আজ কল্পতৰু হইয়া বসিয়াছেন। উদাৰ দাক্ষিণ্যভৱা কণ্ঠে ৰামদাসকে তিনি প্ৰাণভৱা আশীৰ্বাদ জানাইছেন, “বৎস, তোমাৰ সৰ্ববাভীষ্ট সিদ্ধ হব। ঋষি সিদ্ধি আজ থেকে তোমাৰ কৰতলগত। আমি বলছি, এতলকাল মध्येই তোমাৰ ইষ্ট সাক্ষাৎকাৰ হব।”

নতশিৰে দণ্ডায়মান ৰামদাসেৰ নয়নে তখন প্ৰেমাশ্ৰুৰ ধাৱা বহিতেছে। পুলকাঙ্কিত দেহে গুৰুদেবেৰ চরণতলে তিনি সাষ্টাঙ্গে লুটাইয়া পড়িলেন।

কয়েকদিন পৰেৰ কথা। গুৰু দেবদাসজী এক শহৰেৰ উপকণ্ঠে আসন পাতিয়া বসিয়াছেন। প্ৰিয় শিষ্য ৰামদাস কিছুটা ব্যবধানে ধুনী জ্বলাইয়া উপবিষ্ট। এমন সময় কয়েকটি দৰ্শনাত্মী তাঁহাৰ নিকট আসিয়া উপবিষ্ট হয়। উহাদেৰ মধ্যে একজন কয়েকটি টাকা তাঁহাৰ চরণতলে ৰাখিয়া প্ৰণাম কৰে।

ৰামদাস চমকিত ও শশব্যস্ত হইয়া উঠিলেন। কহিলেন—সে কি কথা। তাঁহাৰ শ্ৰীগুৰুদেব মহাসমৰ্থ তাপস—দেবদাসজী মহাৰাজ যে স্বয়ং সেখানে উপস্থিত। ভেট যদি দিতেই হয় তো তাঁহাকেই ইহা নিবেদন কৰা উচিত। যোগেশ্বৰ গুৰুদেবেৰ সাক্ষাতে শিষ্য ৰামদাস কি কৰিয়া উহা গ্ৰহণ কৰিবেন ?

কিন্তু দৰ্শনাত্মী ভক্তটি যে মনে মনে এ প্ৰণামী তাঁহাকেই নিবেদন কৰিয়াছে। কিছুতেই সে উহা আৰ ফিৰাইয়া নিতে সন্মত নয়। ভক্তটি চলিয়া যাইবামাত্ৰ ৰামদাসজী আসন ত্যাগ কৰিয়া গুৰুদেবেৰ সন্মুখে

গেলেন। টাকা কয়টি তাঁহার সম্মুখে রাখিয়া জোড়হস্তে কহিলেন, “মহারাজ এ টাকা ক’টি এক ভক্ত দর্শনার্থী এইমাত্র ভেট দিয়েছে; কৃপা করে আপনি গ্রহণ করুন।”

গুরুদেব ক্রোধে একেবারে ফাটিয়া পড়িলেন। এ কোন্ ধরনের অশিষ্ট চেল্য সে? স্বয়ং গুরু সম্মুখে উপস্থিত থাকিতে সে নিজেই পূজা-ভেট গ্রহণ করিতেছে? এমনি ঔদ্ধত্য তাহার।

রামদাসজী মহা ফাঁপরে পড়িলেন। কাতরকণ্ঠে গুরুজীকে বুঝাইতে লাগিলেন, এ ভেট তিনি কোনমতেই গ্রহণ করিতে চান নাই। কিন্তু দর্শনার্থী ব্যক্তিটি তাঁহার কথা না মানিয়াই উহা রাখিয়া গিয়াছে। আর তাছাড়া, তিন তো তাহা অবিলম্বে গুরুদেবের চরণেই নিবেদন করিতে আসিয়াছেন—আন্তর বা বাহ্য কোন দিক দিয়াই তিনি নিজে ভেট গ্রহণ করেন নাই। তবে গুরুজী কেন এমন কঠোর হইতেছেন?

ক্রোধের অভিনয় ততক্ষণে সমাপ্ত হইয়া গিয়াছে। দেবদাসজীব মুখের খোলসটি খুলিয়া এবার বাহির হইয়াছে তাঁহার করুণাঘন রূপ। সর্ব্ব দেহে ও মনে দিব্য আনন্দের অপক্লপ রশ্মিটি তখন বিচ্ছুরিত। সহাস্ত্র আননে শিষ্যের শিরে হাত রাখিয়া ব্রহ্মজ্ঞ মহাপুরুষ কহিলেন “আরে বেটা, তুমি তো আভি সিদ্ধ হো গিয়া। অ্যায়সা তো হোনেই পড়েগা। তুমকো তো মালুম নেহি হ্যায়—তুমি এক শের বন্ গিয়া। বাকি, দো শের এক ঠোর্ মে রহনে না সক্তে।” —অর্থাৎ বাবা তুমিও যে ইতিমধ্যে সিদ্ধ মহাপুরুষ হয়ে গিয়েছ। কাজেই এরূপ ঘটনা ঘটাই যে স্বাভাবিক। তাছাড়া, তুমি জান না, তুমিও যে অধ্যাত্মজগতের এক বাঘ হয়ে গিয়েছ। তাই এক গুহায় আমাদের ছই বাঘের থাকা তো আর ঠিক নয়।

অধ্যাত্মজীবনের স্থিতির জ্ঞান, প্রকৃত কল্যাণের জ্ঞান শিষ্যকে এখন হঠাৎ পৃথক পৃথক পথেই চলিতে দিতে হইবে। রামদাসজীকে গুরু তাই এবার পরিব্রাজনে প্রেরণ করিলেন। তাঁহার স্বাধীন, স্বস্থ

অধ্যাত্মপরিক্রমার শুরু এইখানেই। ইহারই পরিণতির মধ্য দিয়া ঘটে শ্রীশ্রী১০৮ রামদাস কাঠিয়াবাবার অভ্যুদয়।

অধ্যাত্মজীবনের নানা বিচিত্র পথরেখা বাহিয়া রামদাস সদগুরু দেবদাসজীর চরণোপাশ্তে আসিয়া উপনীত হন। সমগ্র পথটির বাঁকে বাঁকে, সমগ্র পরিক্রমার পশ্চাতে দেখা যায় দৈবীশক্তির এক সুনির্দিষ্ট লীলা। বাল্য, কৈশোর ও যৌবনে রামদাসের জীবনে রহিয়াছে একই গতিচ্ছন্দ, আর একই মুমুক্ষু-পথের অনুসৃতি। তেমনি ইহার নেপথ্যেও সদা সঞ্চরমান রহিয়াছে ঐশী করুণার এক অপূর্ব আলোক-সংস্পর্শ।

পূর্ব পাঞ্জাবের এক নগণ্য গ্রাম লোনাচামারী। অমৃতসর হইতে ইহা প্রায় বিশ ক্রোশ দূরের পথ। এই গ্রামেরই এক বর্দ্ধিষ্ণু গৃহস্থের ঘরে রামদাসের জন্ম। পিতা এক সম্মানিত ব্রাহ্মণ, গুরুগিরি করিয়া তাঁহার সংসার চালান। নিতান্ত সরল ও অনাড়ম্বর জীবন, কিন্তু গৃহে কোন কিছুই অনটন নাই। ক্ষেতের পর্যাপ্ত ফসল ও চার-পাঁচটি মহিষের দ্বন্ধে সুখে স্বচ্ছন্দে এ পরিবারের দিন চলে।

পিতৃগৃহের নিকটেই এক পরমহংস শ্রেণীর সন্ন্যাসীর বাস। বালক রামদাস মায়ের পিছে পিছে প্রায়ই তাঁহার নিকট গিয়া বসেন। একদিন কিন্তু এ ক্ষুদ্র বালকের এক প্রশ্ন সকলকে বিস্মিত করিয়া দেয়। পরমহংসজীকে সে জিজ্ঞাসা করে,—বাবা মহারাজের নিকটে আগত সকল লোকই তো তাঁহার চরণে মস্তক নত করে। তিনি সকলেরই বড় ও পূজ্য। কিন্তু কি করিয়া তিনি এত বড় হইলেন, ইহাই সে জানিতে চায়। ঐ পদ্ধতিটি একবার জানিতে পারলে সে উহার অনুসরণ করিবে।

পরমহংসজী সকৌতুকে এই বালকের দিকে চাহিলেন। সন্মুখে তাহাকে নিকটে ডাকিয়া কহিলেন, “বেটা, আমি যে সদাই রামনাম জপ করি। আর এ মঙ্গলময় নামই আমাকে ছোট থেকে বড় করে

তুলেছে। মনে মনে এ নাম জপ কর, তবে তুমিও আমার মত হতে পারবে।”

বালক সেদিন দৃঢ়ভাবে জানাইয়া দিতে ছাড়ে নাই—এই রামনামই সে জপ করা শুরু করিবে, আর এমনই বড় ও দেশপূজ্য সে হইবে। সেদিন হইতেই রামদাসের অন্তরে রামনামের প্রচ্ছন্ন জপমালাটি আবর্তিত হইয়া চলে।

পিতার মহিষগুলি মাঠে বিচরণ করিতে যায়। রামদাস পাঁচনি হস্তে মাঝে মাঝে ইহাদের অনুগমন করে। তখনও সে এক নিতান্ত ক্ষুদ্র বালক, বয়স সাত-আট বৎসরের বেশী হইবে না। একদিন সে মাঠের মাঝখানে এক বটবৃক্ষের ছায়ায় বসিয়া আছে, অকস্মাৎ সেখানে কোথা হইতে এক জটাজুটসম্বিত সাধু আসিয়া উপস্থিত। সন্ন্যাসী বড় ক্ষুধার্ত। রামদাসকে কিছু আহার্যের যোগাড় করিতে বলিলেন।

বালকের উৎসাহের সীমা নাই। সানন্দে সে कहিয়া উঠিল—
“সাধুবাবা, তুমি আমার মোষগুলো একটু ঢাখো, আমি ঘর থেকে তোমার জন্য সব কিছু নিয়ে আসছি।”

প্রচণ্ড গ্রীষ্মের অপরাহ্ন। বেলা ক্রমে গড়াইয়া পড়িতেছে। গৃহে পিতামাতা উভয়েই নিদ্রিত। রামদাস চুপি চুপি ভাঁড়ার খুলিয়া ময়দা, চিনি ও ঘি লইয়া সোৎসাহে বৃক্ষতলে ফিরিয়া আসিল।

এ সেবানিষ্ঠা দেখিয়া সাধু বড় প্রসন্ন হইলেন। আশীর্ব্বাদ করিয়া कहিলেন, “বাচ্চা, তুম্ এক যোগীরাজ বন্ যাওগে।”

রামদাস কিন্তু বড় বিস্মিত হইয়া গিয়াছে। যোগীরাজ হইবার মত যোগ্যতা তাহার আছে কিনা, তাহা সে জানে না।

ব্যস্তসমস্ত হইয়া সে উত্তর করিল—“কিন্তু সাধুবাবা, আমার বাবা রোজ প্রায় দশ সের করে মোষের দুধ পান করেন, আমিও তেমনি তাঁর সঙ্গে বসে দু-বেলা পাঁচ সের করে দুধ না খেয়ে পারিনে। তাহলে আমি কি করে যোগীরাজ হবো ?”

শ্রীরামদাস কাঠিয়াবাবা

সন্ন্যাসী সহাস্ত্রে দক্ষিণ হস্তটি উত্তোলন করিলেন, উদার ও দাক্ষিণ্যভরা কণ্ঠে কহিলেন, “বাচ্চা, হামারা বচনসে তুম জরুর যোগীরাজ হোগে।” অতঃপর তল্লা-তল্লা গুটাইয়া ধীরে ধীরে তিনি সেখান হইতে চলিয়া গেলেন।

কিন্তু একি অলৌকিক কাণ্ড! সর্বব্যাপী সাধকের উচ্চাবিত এ আশীর্ববাণীটি যেন চৈতন্যময়। এ বাণীর ইন্দ্রজাল রামদাসের সমস্ত জাগতিক চেতনাকে মুহূর্তের মধ্যে বিলুপ্ত করিয়া দেয়। বালকের স্মৃতি হইতে পিতা-মাতা, গৃহ-অঙ্গন, বন-প্রান্তর—এই চারণরত মহিষেয় দল, সমস্ত কিছুর আকর্ষণই যেন অপসৃত হইয়া যায়। সারা অন্তরে তাঁহার ধ্বনিত হইতে থাকে শুধু একটিমাত্র বোধ—গৃহস্থাশ্রম তাঁহার জন্ত নহে। এক অদৃশ্য অপরিচিত লোকের আহ্বান কেবলই কানের কাছে গুঞ্জন করিয়া ফিরে।

সাত বৎসর বয়স্ক বালকের অন্তরের এই প্রতিক্রিয়া সত্যসত্যই বড় বিস্ময়কর। উত্তরকালে রামদাস কাঠিয়াবাবা মহারাজ তাঁহার বাল্যজীবনের এই অনুভূতিটির কাহিনী সোৎসাহে শিষ্যদের নিকট বিবৃত করিতেন।

রামদাসের পিতা আড়ম্বর সহকারে পুত্রের উপনয়ন দিলেন। তারপর শাস্ত্রাধ্যয়নের জন্ত ব্রহ্মচারী বালককে নিকটস্থ গ্রামের এক আচার্য্যের নিকট প্রেরণ করা হইল। মেধাবী রামদাসের পক্ষে গুরুর হৃদয় অধিকার করিতে বেশী বিলম্ব হয় নাই।

সামান্য অভ্যাসে পাঠ তাহার রোজ তৈরী হইয়া যায়, তারপর মালাটি লইয়া সে অভ্যস্ত রামনাম জপে নিবিষ্ট হয়।

ঈর্ষ্যাপরায়ণ একদল সহপাঠী একদিন আচার্য্যের নিকট নালিশ জানাইয়া বসে—রামদাস তাহার কোন পাঠেই মনঃসংযোগ করে না; গুরুর বাক্য অবহেলা করিয়া সে শুধু বসিয়া বসিয়া মালা টপ্‌কায়।

রামদাসকে তখনই ডাকা হইল। কিন্তু আচার্য্য পরীক্ষা করিয়া দেখিলেন, কোন পাঠই তাহার আয়ত্ত করিতে বাকি নাই। নিজের

পাঠ সমাপ্ত করিয়া তবেই রোজ সে তাহার নিয়মিত জপসাধনে রত হয়। ইহাতে আর দোষ কোথায় ?

আচার্য্য ঐ ছাত্রদের তিরস্কার করিতে লাগিলেন। বলা বাহুল্য, ইহার পর হইতে আচার্য্য-গৃহে শিক্ষার্থী রামদাসের প্রতাপ-প্রতিপত্তি আরও বাড়িয়া যায়। আট-নয় বৎসর এই পণ্ডিতের শিক্ষাধীনে থাকিবার পর বিভিন্ন শাস্ত্রপাঠ তাঁহার সমাপ্ত হয়। গুরুগৃহ হইতে যেদিন তিনি গৃহে প্রত্যাগমন করেন সেদিন দেখা যায়, তরুণ শিক্ষার্থীর বক্ষোদেশে বাঁধা রহিয়াছে একখানি ভগবদ্গীতা। এই মহাগ্রন্থখানির সহিত তাঁহার জীবন তখন এক অচ্ছেদ্য প্রেমবন্ধনে বাঁধা পড়িয়া গিয়াছে।

পুত্র আচার্য্য-গৃহ হইতে পড়া শেষ করিয়া ফিরিয়াছে। পিতা তাই এবার তাঁহার বিবাহের জন্ত ব্যস্ত হইয়া পড়িলেন। কিন্তু রামদাস তাহাতে কান পাতেন কই ? মুমুকু তরুণের স্মৃতিতে আজিও অক্ষুট স্বরে ধ্বনিত হয় বালক কালের দেখা সন্ন্যাসীর সেই বাণী—
বাচ্চা, তুম্ জরুর যোগীরাজ বন যাওগে।

গৃহজীবনের মোহ ও বিষয়াসক্তি রামদাসের জীবন হইতে মুছিয়া গিয়াছে—তাই অধ্যাত্মজীবনের পথপরিভ্রমায় বাহির হইতেই তিনি আজ কৃতসঙ্কল্প। পিতা-মাতাকে তিনি স্পষ্টভাবে জানাইয়া দিলেন, কনিষ্ঠ ভ্রাতাকেই বিবাহ দেওয়া হোক—তিনি নিজে আর সংসারাত্মকে প্রবেশ করিবেন না। আত্মপরিজনের ভৎসনা বা অশ্রুজল কোন কিছুই তাঁহাকে এ প্রতিজ্ঞা হইতে বিচ্যুত করিতে পারিল না।

গ্রামের প্রান্তে এক বিরাট বটবৃক্ষ। ইহারই নীচে রামদাস আসন পাতিয়া জপে বসিয়াছেন। গায়ত্রী মন্ত্রে সিদ্ধিলাভ করিবেন, ইহাই তাঁহার সঙ্কল্প। এক লক্ষ জপ সমাপ্ত হইবার পর তিনি এক দিব্য বাণী শ্রবণ করিলেন। এ প্রত্যাদেশ তাঁহাকে জানাইয়া দিল—
‘বৎস, তুমি অবশিষ্ট পঁচিশ হাজার জপ জাগ্রত মহাতীর্থ জালা-মুখীতে গিয়ে সম্পূর্ণ কর—তোমার মনস্কামনা পূর্ণ হবে।’

শ্রীরামদাস কাঠিয়াবাব।

এ নির্দেশ প্রাপ্ত হইবার পর রামদাসের উৎসাহের সীমা রহিল না। জ্বালামুখী তাঁহার লোনাচামারী গ্রাম হইতে প্রায় চল্লিশ মাইল দূরে অবস্থিত। অবিলম্বে এই তীর্থের দিকে তিনি অগ্রসর হইলেন।

কিন্তু পথমধ্যে এক নূতন কাণ্ড ঘটয়া গেল। রামদাস হঠাৎ দেখিলেন, বৃক্ষতলে জটাজুটসম্বিত, দিব্যশ্রীমণ্ডিত এক সন্ন্যাসী আসন পাতিয়া বসিয়া আছেন। অমোঘ আকর্ষণ এই সন্ন্যাসীর। রামদাস ধীরে ধীরে মহাত্মার কাছে উপস্থিত হইলেন। তাঁহার পূর্ব জীবনের সংস্কার জাগিয়া উঠিল। এ সন্ন্যাসী যেন কত কালের আপন জন! ভাবাবিষ্ট হইয়া ধীরে ধীরে তিনি তাঁহার চরণতলে নিপতিত হইলেন। জ্বালামুখী তীর্থে বসিয়া তপস্যা করার সঙ্কল্প একেবারে পরিত্যক্ত হইয়া গেল।

মুমুক্ষু তরুণ ব্যগ্রভাবে মহাপুরুষের নিকট সন্ন্যাস ও মন্ত্রদীক্ষার জ্ঞান বারবার প্রার্থনা করিতে লাগিলেন। কৃপা অবশেষে মিলিল, শরণার্থী যুবককে চেলা করিয়া নিতে সন্ন্যাসী সন্মত হইলেন। মস্তক মুণ্ডন করিয়া রামদাস এক শুভ মুহূর্তে বৈরাগ্য-আশ্রম গ্রহণ করিলেন। শক্তিধর মহাপুরুষের এ আশ্রয়ই উত্তরকালে তাঁহাকে অমৃতলোকের তোরণদ্বারে পৌঁছাইয়া দেয়।

পিতার কাছে সন্ন্যাসের সংবাদ পৌঁছিতে দেরী হয় নাই। পুত্র ও তাঁহার দীক্ষাদাতা গুরুর নিকট তখনই তিনি ছুটিয়া আসিলেন। ভীতি প্রদর্শন ও অনুনয়-বিনয় সমস্ত কিছুই ব্যর্থ হইল—রামদাস প্রাণ গেলেও তাঁহার বৈরাগ্য-আশ্রম ত্যাগ করিতে সন্মত নন। এদিকে তাঁহার মাতা শোকাकुলা হইয়া আহার নিদ্রা ত্যাগ করিয়াছেন। পিতা তাই সন্ন্যাসীকে অনুরোধ জানাইলেন, পুত্রকে জননীর সহিত একবার সাক্ষাতের অনুমতি তিনি দিন, অন্ততঃ শেষ-বারের মত নিজগৃহ সে একবারটি দেখিয়া আসুক। অনুমতি মিলিবার পর রামদাস লোনাচামারীতে ফিরিয়া আসিলেন।

তরুণ সাধক কিন্তু নিজগৃহে আর বাস করেন নাই, গ্রামের প্রান্তস্থিত এক বটবৃক্ষমূলে তিনি আসন পাতিয়া বসিলেন। কিন্তু জননীকে লইয়াই যত মুশ্কিল। তিনি কাঁদিয়া অস্থির। তাঁহাকে ধৈর্য্য ধারণ করাইবে কে? রামদাস কিন্তু টলিলেন না। দৃঢ়স্বরে কহিলেন, মাতা স্থির না হইলে কাল বিলম্ব না করিয়া তিনি এই স্থান ত্যাগ করিয়া যাইবেন।

নবীন সন্ন্যাসী কোন নির্দিষ্ট গৃহেও ভোজন করেন না। পর্য্যায়ক্রমে গ্রামের বিভিন্ন গৃহস্থ-ঘরে তিনি আহার করিতে থাকেন।

ইতিমধ্যে এখানে একদিন এক বিচিত্র ব্যাপার ঘটিল। সেদিন গভীর রাত্ৰিতে রামদাস বৃক্ষতলে ধ্যানমগ্ন হইয়া রহিয়াছেন। সম্মুখস্থ আকাশমণ্ডল অকস্মাৎ এক স্বর্ণীয় জ্যোতিতে উদ্ভাসিত হইয়া উঠিল। স্বয়ং গায়ত্রী দেবী তরুণ সাধকের সম্মুখে আবির্ভূতা হইয়া কহিলেন—“বৎস, তুমি গায়ত্রী মন্ত্রে সিদ্ধ হয়েছ। আমি তোমার প্রতি আজ প্রসন্না। তুমি তোমার ঈঙ্গিত বর প্রার্থনা কর।”

রামদাস উত্তর দিলেন—“মা, আমি যে এখন সন্ন্যাসী হয়েছি। কামনাবাসনা আমার থাকতে নেই, বর প্রার্থনার প্রয়োজনও তাই দেখছি। আমার অন্তরের এই শুধু প্রার্থনা—তুমি আমার প্রতি সদা প্রসন্না থাক।”

“তথাস্তু” বলিয়া দেবী অন্তরীক্ষে মিলাইয়া গেলেন।

রামদাসের নিকট গ্রামের বহু নরনারীই তখন আনাগোনা করিতেছে। এই সময়ে তিনি কিন্তু এক মহা বিপদে পতিত হন। এক সুন্দরী তরুণী সন্ন্যাসী রামদাসকে দেখিয়া বড় মুগ্ধ হয়, তাঁহাকে সে প্রলুব্ধ করিতে থাকে। রমণীর বাস এই গ্রামেই, রামদাসের সে পূর্বপরিচিতা। বারবার সতর্ক করা সত্ত্বেও তাহাকে প্রতিনিবৃত্ত করা কঠিন হইয়া পড়ে।

যুবতীটি একদিন কামার্ত্তা হয়, গভীর নিশীথে সে তাঁহার আসনের দিকে ধীরে ধীরে অগ্রসর হইতে থাকে। তরুণ সাধক প্রমাদ গণিলেন।

শ্রীরামদাস কাঠিয়াবাবা

অনন্তোপায় হইয়া সজোরে তিনি প্রস্তর নিক্ষেপ করিতে থাকেন, অবশেষে এই নারী বিতাড়িত হয়।

পরের দিন দেখা যায়, রামদাস গ্রাম হইতে অন্তর্হিত হইয়াছেন। আর কখনো তিনি জন্মভূমিতে পদার্পণ করেন নাই।

এইবার সাধক জীবনের পরিব্রাজনের পালা। গুরুর নির্দেশে বহু তীর্থ ও জনপদ ঘুরিয়া ঘুরিয়া তাঁহাকে দীর্ঘদিন কাটাইতে হয়। এই সময়ে একবার রামদাসজী মহারাজ কোন এক দেশীয় করদ-রাজ্যে উপস্থিত হন। এখানকার রাণী এক বিধবা তরুণী, তাছাড়া অসাধারণ রূপলাবণ্যবতীও তিনি। রামদাসকে প্রাসাদে আনয়ন করিয়া রাণী সাহেবা তাঁহার সেবাযত্ন করিতে থাকেন। তরুণ সাধুর ঘনিষ্ঠ সান্নিধ্যে আসিয়া রাণী ধীরে ধীরে তাঁহার প্রতি আকৃষ্ট হন, একদিন ব্যাকুল অন্তরে প্রেম নিবেদনও করিয়া বসেন। স্বীয় যৌবন ও বিপুল সম্পদ ভোগ করার জন্ত নবীন সন্ন্যাসীকে তিনি বারংবার মিনতি জানাইতে থাকেন।

এই রূপসী তরুণীর সান্নিধ্য ও তাঁহার প্রেমের স্পর্শ সাধক রামদাসকে কিছুটা চঞ্চল না করিয়া পারে নাই। কিন্তু হঠাৎ এক সময়ে তিনি সজাগ হইয়া উঠিলেন। অন্তরে পড়িল বিবেকের তীব্র কষাঘাত। মোহাবিষ্ট হইয়া এ তিনি কি করিতেছেন? বৈরাগ্য-আশ্রম গ্রহণ করিয়া মুক্তির সাধনায় তিনি ব্রতী। রমণীর রূপমোহ কি আজ তাঁহাকে পথভ্রষ্ট করিবে?

সে মুহূর্ত্তেই এই নারী ও রাজপ্রাসাদের সমস্ত কিছু প্রলোভন ত্যাগ করিয়া রামদাস সবেগে রাজপথে বাহির হইয়া পড়িলেন।

কিন্তু এ কি অদ্ভুত ব্যাপার? ঐ রূপসী রাণী সাহেবার স্মৃতি তখনও তাঁহার অন্তর হইতে মুছিয়া যাইতে চাহে না। রাজপ্রাসাদের এ মোহিনী যেন তাহার মায়াজাল বিস্তার করিয়া আবার তাঁহাকে কবলিত করিতে চাহিতেছে। সাময়িক এক দুর্বলতা তরুণ সাধকের

অন্তরে সে সময়ে দেখা দেয়, কিন্তু ঈশ্বরের কৃপায় তিনি আত্মরক্ষা করিতে সমর্থ হন। দ্রুত পদবিক্ষেপে রাজ্যের বাহিরে আসিয়া তিনি হাঁফ ছাড়েন।

উত্তরকালে মহাসাধক রামদাস কাঠিয়াবাবাকে প্রায়ই বলিতে শুনা যাইত—“অহেতুক ভগবৎকৃপা ছাড়া তরুণ সাধকের পক্ষে রিপু জয় করা বড় কঠিন।”

পরিব্রাজকরূপে রামদাসজী একবার উত্তরাখণ্ডের গহন বনাঞ্চলে ভ্রমণ করিতেছেন। ঘুরিতে ঘুরিতে একদিন জনবিরল কোন উচ্চ পাহাড়ে একটি প্রস্তরাবদ্ধ গুহামুখ তিনি দেখিতে পান। কৌতূহলী হইয়া তরুণ সাধক উহার দ্বার উন্মোচন করিলেন। ভিতরে প্রবেশ করিয়া যাহা দেখিলেন তাহাতে তাঁহার বিস্ময়ের অবধি রহিল না। দীর্ঘ জটাজুটসম্বিত বিরাটকায় এক প্রাচীন যোগী সেখানে উপবিষ্ট রহিয়াছেন। গুহার প্রান্তদেশে তিনি গভীর ধ্যানে মগ্ন। লোল চর্ম্মের আবরণে চক্ষুদ্বয় ঢাকিয়া গিয়াছে। রামদাস ভয় পাইয়া তাড়াতাড়ি পর্বতগুহা হইতে বাহিরে আসিয়া দাঁড়াইলেন।

প্রাচীন তাপস উঠিয়া আসিয়া গুহাদ্বারে দাঁড়াইলেন। তারপর হস্ত দ্বারা নয়নোপরি বিলম্বিত চর্ম্মাবরণটি তিনি ধীরে ধীরে তুলিয়া ধরিলেন। রামদাসের তখন মনে হইল, মহাপুরুষের চক্ষু-তারকা হইতে যেন অগ্নি বর্ষিত হইতেছে। গভীরকণ্ঠে বৃদ্ধ যোগীবর তাঁহার পরিচয় জিজ্ঞাসা করিলেন।

রামদাস ততক্ষণে ভয়ে বিস্ময়ে একেবারে আড়ষ্ট হইয়া গিয়াছেন অর্ধক্ষুণ্ট স্বরে তিনি উত্তর দিলেন—“মহারাজ, আমি আপনার এক দীন চেলা।”

“চেলা ? সে কি কথা ? বেশ, চেলাই যদি হও, আমার আদেশ-মত সব কিছু কাজ করতে পারবে ?”

“আজ্ঞে মহারাজ, আপনার কৃপায় অবশ্যই সব পারবো।”

গুহার নিকটেই এক সুগভীর পার্বত্য-খাদ । এক ধরশ্রোতা নদী উহার উপর দিয়া গর্জন করিতে করিতে ছুটিয়া চলিয়াছে । বৃদ্ধ সাধু নিম্নে অঙ্গুলী নির্দেশ করিয়া কহিলেন, “বদি চেলাই হয়ে থাক, তবে এষ্ট মুহূর্তে আমার আদেশে ঐ জলশ্রোতে ঝাঁপ দিয়ে পড় !”

নীচে তাকাইয়া রামদাস শিহরিয়া উঠিলেন । পার্বত্য-খাদের ঐ উন্মত্ত প্রবাহে ঝাঁপ দিবার অর্থ, নিশ্চিত মৃত্যু । কিন্তু আদেশ পালন না করিলেই বা বাঁচিবার উপায় কোথায় ? রুদ্রপ্রতিম এই যোগীর রোষবহ্নি হইতে যে নিস্তার নাই ।

উষ্ট্রনাম স্মরণ করিয়া রামদাস পর্বতশৃঙ্গ হইতে তৎক্ষণাৎ লক্ষ প্রদান করিলেন । জলে নিপতিত তাঁহার দেহখানি তখন তীব্র শ্রোতে ভাসিয়া চলিয়াছে ; এ সময়ে হঠাৎ এক মহা অলৌকিক কাণ্ড সংঘটিত হইতে দেখা গেল । বৃদ্ধ তাপস অসামান্য যোগবিভূতিবলে তাঁহার হস্তখানি নিম্নদিকে প্রসারিত করিলেন । মুহূর্তমধ্যে তাহা দীর্ঘায়ত হইয়া রামদাসের শ্রোত-বাহিত দেহখানিকে স্পর্শ করিল । যোগশক্তির বিস্ময়কর ক্রিয়া এখানেই শুধু থামে নাই । তৎক্ষণাৎ যোগীর হস্তের আকর্ষণে ভাসমান দেহখানি শূন্যে উত্তীর্ণ হয় ও তাঁহাকে একেবারে গুহাদ্বারে আনিয়া দাঁড় করাইয়া দেয় ।

ভয়ে বিস্ময়ে রামদাস তখন একেবারে বিমূঢ় হইয়া গিয়াছেন । সম্মুখে দণ্ডায়মান যোগীবরের ক্রোধোদ্দীপ্ত রূপটি কিন্তু আর নাই । আননে তাঁহার প্রসন্নমধুর হাসির রেখা ফুটিয়া উঠিয়াছে ।

রামদাসকে আশীষ জানাইয়া তিনি কহিতে লাগিলেন—‘বৎস, তুমি চেলা হবার যোগ্য, এটা ঠিকই । তোমার কল্যাণ হোক—সদগুরুর কৃপায় অভীষ্ট পূর্ণ হোক । কিন্তু এখান থেকে তুমি অবিলম্বে প্রস্থান কর । এ অঞ্চল ঋষিদের এক বিশেষ তপঃক্ষেত্র । এখানে তুমি আর অবস্থান করো না ।’

সাষ্টাঙ্গ প্রণাম জানাইয়া রামদাস ধীরে ধীরে যোগীর সাধনস্থল হইতে নিষ্কাশ হন ।

পরিব্রাজনের পর্ব এবার শেষ হয় রামদাস অতঃপর দেবদাসজী মহারাষ্ট্রের সহিত মিলিত হন, গুরুদেবের একনিষ্ঠ সেবায় তিনি আত্মনিয়োগ করেন। শক্তিদ্বর আচার্যের নিরন্তর সাহচর্য ও সাধন-নির্দেশে রামদাসের অধ্যাত্ম-জীবনে ক্রমে এক বিরাট রূপান্তর সাধিত হইতে থাকে।

দেবদাসজী পূর্বাশ্রমে ছিলেন অযোধ্যা প্রদেশের অধিবাসী। নিম্বার্ক শাখার অন্তর্ভুক্ত এক অসামান্য যোগীর কৃপাদৃষ্টি তাহার উপর পতিত হয়। তারপর বহু বৎসর তপশ্চর্য্যার পর এই কঠোরতপা সাধক অপরিমেয় যোগশক্তির অধিকারী হন। রামদাস জ্বালামুখী গমনের পথে যখন দেবদাসজীর চরণাশ্রয় গ্রহণ করেন তখনই তিনি এক বহুবিশ্রুত যোগী। পরিব্রাজনের সময় কিছুকালের জ্ঞাত উভয়ের মধ্যে ছাড়াছাড়ি হয়। তারপর আবার শুরু হয় গুরু ও শিষ্যের জীবনে ঘনিষ্ঠ যোগবন্ধনের এক বিচিত্র অধ্যায়। দেবদাসজীর যোগবিভূতি ও কৃপালীলা শিষ্যের সম্মুখে পর পর উদ্ঘাটিত হইতে থাকে।

গুরুদেব কোন কোন সময়ে একাদিক্রমে একই আসনোপরি ছয় মাসকাল জড় সমাধিতে মগ্ন থাকিতেন। দিনের পর দিন তাঁহার এই কাণ্ড দেখিয়া তরুণ শিষ্য রামদাসজীর বিস্ময়ের সীমা থাকিত না। যোগীবর দেবদাসজীর বাহ্য জীবনের চলাফেরার বৈশিষ্ট্যও বড় কম ছিল না। নয়নে নিজার লেশমাত্র নাই, গাঁজা আর চরসের ধূমপানে আগ্রহও ছিল তাঁহার অপরিসীম।

রামদাসজীর চোখে গুরুর আহায্য গ্রহণ পর্বটি ছিল সর্বাপেক্ষা অদ্ভুত ব্যাপার। ধূনী হইতে খানিকটা ভস্ম লইয়া কমণ্ডলুর জলে তিনি ফেলিয়া দিতেন, তারপর এই বিভূতি-মিশ্রিত জল সবটা পান করিতেন। আবার সঙ্গে সঙ্গে এ উপাদেয় বস্তুকে অগোণে উদর হইতে বিদায় দিতেও তাঁহার বিলম্ব ঘটিত না। যৌগিক প্রক্রিয়াবলে উহা উদ্গীরণ করিয়া ফেলিয়াই শিষ্য রামদাসকে দেবদাসজী উহা ভৌল করিতে বলিতেন। প্রতিবারই মাগিয়া দেখা যাইত, এই

শ্রীরামদাস কাঠিয়ারাবা।

ভস্ম-গোলা জল সমপরিমাণেই পাকস্থলী হইতে পুনরায় বাহির হইয়া আসিয়াছে। ইহাই ছিল তাঁহার গুরুদেবের দৈনন্দিন আহার।

মহাযোগীর এ আহার সম্বন্ধে ব্যতিক্রমও যে মাঝে মাঝে না দেখা যাইত এমন নয়। একবার দেবদাসজী শিষ্যকে ডাকিয়া ব্যাকুলভাবে বলিলেন, তাঁহার দেহে প্রচণ্ড উত্তাপ অনুভূত হইতেছে। অবিলম্বে প্রচুর ছুঙ্ক পান না করাইলে তাঁহার আর নিস্তার নাই।

ব্রহ্মবাস্তু রামদাসজী দ্রুতপদে একটি বৃহৎ ভাণ্ড লইয়া গৃহস্থদের বসতিতে চলিয়া গেলেন। সাধুবাবার জন্ত প্রায় আধমণ ছুধ সংগৃহীত হইল। হাঁড়িটি সম্মুখে স্থাপন করামাত্রই দেবদাসজী মহারাজ ঢক্ ঢক্ করিয়া উহার সবটা পান করিয়া ফেলিলেন।

কিন্তু দেহের গরম তাহাতেও মিটিতেছে না—তিনি আরও বেশি পরিমাণ ছুঙ্ক আনয়নের জন্ত আদেশ দিলেন। ব্যাপার দেখিয়া রামদাসের তো চক্ষুস্থির।

যুক্তকরে সাধুনয়ে তিনি কহিলেন, “বাবা, তুমি পরমাত্মস্বরূপ—তোমার দেহের উত্তাপ মেটাবার মত সামর্থ্য আমার কোথায়? আধমণ ছুধ তো এক মুহূর্তে উড়ে গেল, তারপর আর এখন কি করা যায়?”

গুরুদেব কৃপাপরবশ হইয়া স্মিতহাস্তে বলিলেন, “না বেটা, তুমি আরও সামান্য কিছু ছুধ নিয়ে এসো। এবার আমার পিপাসা নিশ্চয় মিটবে।”

আরও কয়েক সের ছুধ সংগ্রহ করা হইল। উহা পানের পর তবে দেবদাসজীর এ উত্তাপ শান্ত হয়।

ষনিষ্ঠ শিষ্যদের পরীক্ষার জন্তও শক্তিদ্রব গুরুকে মাঝে মাঝে লীলাখেলার অবতারণা কম করিতে হয় নাই। একবার কোন পার্বত্য শহরের নিকটে এক গহন বনে দেবদাসজী মহারাজ আসন পাতিয়াছেন। সঙ্গে তাঁহার রামদাস প্রভৃতি জনকয়েক অন্তরঙ্গ শিষ্য। গুরুদেব হঠাৎ মধ্য রাত্রিতে আদেশ করিয়া বসিলেন—নিকটস্থ শহর

হইতে এখনই ছু-টাকার গাঁজা কিনিয়া আনিতে হইবে, শিষ্যদের একজন এখনই রওনা হইয়া যাক্ ।

সকলেই প্রমাদ গণিলেন । এ অঙ্গল হিংস্র জন্তু ও স্থাপদসঙ্কুল । এ সময়ে বাহির হইতে হইলে প্রাণ হাতের মুঠায় করিয়া যাইতে হইবে । অন্ধকার রজনীতে পথ চিনিবারও উপায় নাই । তাছাড়া নিঃসম্বল সাধুদের কাহারো নিকট টাকাকড়ি কিছুই নাই । এই গভীর রাত্ৰিতে শহরে গেলে ভিক্ষাই বা কে দেবে ?

শিষ্যের দল নতশিরে চিন্তামগ্ন । কিন্তু রামদাস দৃঢ়চিত্তে তখনি টিঠিয়া দাঁড়াইলেন । গুরুদেবের আদেশ পালনের জন্ত তিনি প্রস্তুত । দেবদাসজী প্রসন্ন হইয়া কহিলেন—“বেশ বাচ্চা, তবে তুমিই যাও । টাকার জন্ত তোমার কোন ভাবনা নেই । শহরে পৌঁছামাত্রই একটি লোক তোমায় দুটো টাকা দেবে । তাই নিয়ে গিয়ে তুমি গাঁজা কিনে আনবে ।”

অরণ্যপথ অতিক্রম করিয়া রামদাস শহরে পৌঁছিলেন । গভীর নিশীথ । রাস্তাঘাট জনশূন্য । গৃহস্থ ও দোকানীদের ঘরে আলো জ্বলিতেছে না । কিছুদূর অগ্রসর হইয়া রাস্তার একটি বাক ফিরিতেই তিনি দেখিলেন নিকটস্থ গৃহে প্রদীপ জ্বলিতেছে । দ্বারে করাঘাত করা মাত্র এক ব্যক্তি তাড়াতাড়ি বাহির হইয়া আসিল । এই নিশীথ রাত্রে সাধুর দর্শন পাইয়া তাহার যেন আনন্দের সীমা নাই । প্রণাম করিয়া যুক্তকরে সে জানাইল—আজ তাহার পরম সৌভাগ্য ! সকাল হইতেই সে সঙ্কল্প করিয়া আছে, দুইটি টাকা কোন সাধুকে ভেট দিবে । সারাদিন প্রতীক্ষায় কাটিয়াছে । এ গভীর রাত্রে অপ্রত্যাশিতভাবে ভগবান সে সঙ্কল্প সিদ্ধ করিলেন ।

টাকা দুইটি লইয়া রামদাস গুরুদেবের জন্ত গাঁজা ক্রয় করিলেন । এইবার সত্তর তাঁহাকে ফিরিতে হইবে । সম্মুখে ঘোর অন্ধকারময় বনপথ । রাত্ৰিতে ঠাণ্ডাও খুব পড়িয়াছে । রামদাসজী গুরুসেবার সঙ্গে সঙ্গে প্রসাদী গাঁজা সেবনেও আজকাল বেশ কিছুটা অভ্যস্ত

হইয়াছেন। ভাবিলেন, ইহা হইতে এক ছিলিম গাঁজা পৃথক করিয়া লইয়া এক কল্কে এখানেই টানিয়া গেলে ক্ষতি কি? করিলেনও তাহাই। ছিলিম উড়াইয়া তারপর তৃপ্ত মনে ধীরে ধীরে বনপথ দিয়া গুরু সকাশে তিনি উপস্থিত হইলেন।

দেবদাসজী মহারাজের পদপ্রান্তে গাঁজার পুঁটলীটি রাখা মাত্রই তিনি স্বেচ্ছাকৃত কণ্ঠে বলিতে লাগিলেন, “ওরে, গুরুসেবা কি শিষ্য এমনি করেই করে? ভোগের অগ্রভাগ আগে নিজে নিয়ে তারপর তা গুরুকে নিবেদন করছিস? এ শিক্ষাই বুঝি এতদিনে হয়েছে?”

রামদাস বিস্ময়ে ভয়ে ভতঙ্কণে হতবাক হইয়া গিয়াছেন। যে কথা কেবল শোনা ও জানা ছিল—আজ উহা তাঁহার ধৃতিতে অনড় হইয়া বসিয়া গেল। তিনি বুঝিলেন, গুরুদেব অন্তর্যামী ও মহাশক্তিধর। তাঁহার সদাজাগ্রত দৃষ্টি অবলীলায় যে কোন জাগতিক বাধা, যে কোন দূরত্বে অতিক্রম করিতে সক্ষম।

ভীতকণ্ঠে জোড়হাতে তিনি মার্জনা চাহিলেন। তিনি অবোধ শিশুনাথ, শ্রীগুরুর মহিমা আজিও তাঁহার অন্তর-সন্তায় ফুটিয়া উঠে নাই,—ইহাই বারংবার সখেদে কহিতে লাগিলেন।

দেবদাসজী মহারাজ এবার প্রশ্ন হইয়া বলিলেন, “ঠিকই। তুমি নিতান্ত বালক মাত্র। তাই আজকের এ অপরাধ ক্ষমা করা গেল। কিন্তু জেনে রাখবে, প্রকৃত সৎগুরুর দৃষ্টি থেকে সামান্যতম চিন্তাটুকুও কখনো গোপন করা যায় না।”

একবার রামদাস তাঁহার গুরুজীর সঙ্গে পাঞ্জাবের কোন এক তীর্থে দিকে চলিয়াছেন। লাহোর নগরীর সন্নিহিত অঞ্চলে এক সময়ে উভয়ে আসন পাতিয়া বসিলেন। চতুর্দিক হইতে আরও বহু সন্ন্যাসীও সেখানে আসিয়া জড় হইয়াছেন। রীতিমত এক বৃহৎ সাধু জমায়েৎ। লাহোরের প্রসিদ্ধ ব্যবসায়ীদের অনেকে ইহাদের নিকট আনাগোনা করিতেছেন।

হঠাৎ কি জানি কেন, শিষ্যদিগকে তিনি কিছুটা দূরে অবস্থান করিতে আদেশ দিলেন। তারপর স্বয়ং ঐ সরোবরের তীরে দাঁড়াইয়া উচ্চরবে বার বার শঙ্খধ্বনি করিতে লাগিলেন।

ভূপালতালের অপর তীরেই মুসলমান নবাবের প্রকাণ্ড প্রাসাদ ইতিপূর্বে নবাব এক ঘোষণা প্রচার করিয়াছেন, এই সরোবরের তীরবর্তী অঞ্চলে কেহ শঙ্খ-ঘণ্টাধ্বনি করিতে পারিবে না। এ আদেশ অমান্যের শাস্তি—শিরশ্ছেদ।

হঠাৎ এ প্রচণ্ড শঙ্খধ্বনি শুনিয়া তো সকলে বিস্মিত। ব্যাপার কি জানিবার জন্য নবাব তৎক্ষণাৎ লোক পাঠালেন। দরবারে সংবাদ পৌঁছিল, এক হিন্দু সন্ন্যাসী সরকারী আজ্ঞা উপেক্ষা করিয়া ওখানে শঙ্খ বাজাইতেছে।

আর যায় কোথায়? নবাব বাহাদুরের রোষ তীব্রভাবে উদ্দীপ্ত হইয়া উঠিল। প্রাসাদের অদূরে দাঁড়াইয়া বারংবার আইন অমান্যর এ ছঃসাহস তাঁহার কি করিয়া হয়? প্রহরীদের আদেশ দিলেন, তাহারা যেন অবিলম্বে উক্ত সাধুর শিরশ্ছেদ করে অথবা তাহাকে গ্রেপ্তার করিয়া আনে।

সাধুর আসনের সম্মুখে গিয়া নবাবের অনুচরগণ কিন্তু বিস্ময়ে হতবাক হইয়া গেল। সেখানে কোন জীবিত মানুষ তো নেই! শুধু একটি সাধুর মস্তক ও অঙ্গপ্রত্যঙ্গ ছিন্নভিন্ন ও রক্তাক্ত অবস্থায় ভূপালতালের তীরে ছড়ানো রহিয়াছে।

নবাবের প্রহরীদল ফিরিয়া আসিয়া এই সংবাদ নিবেদন করিল। কিন্তু একি অত্যাশ্চর্য ব্যাপার! আবার সেই স্থানটি হইতেই কে যেন সজোরে শঙ্খধ্বনি করিতেছে। প্রহরীরা দ্রুতবেগে ছুটিয়া গিয়া এবার যাহা দেখিল, তাহা আরও রহস্যময়। মনুষ্য দেহের কণ্ঠিত অংশগুলি সেখান হইতে ইহারই মধ্যে অদৃশ্য হইয়াছে। রক্তপাতের বিন্দুমাত্র চিহ্ন কোথাও দেখা যাইতেছে না।

আনুপূর্বিক সমস্ত ঘটনা শুনিয়া নবাবের ধারণা হইল, এই সাধু

নিশ্চয়ই এক মহাশক্তিধর যোগীপুরুষ। মনে তাঁহার ভয় ও ভক্তি
ছয়েরই সঞ্চার হইল। ভাবিয়া দেখিলেন, ইহার সহিত আর ঘন্থে
অবতীর্ণ হওয়া মোটেই যুক্তিযুক্ত নয়।

অমাত্যবর্গসহ অগোণে তিনি সরোবরের তটে উপস্থিত হইলেন।
সকলে হতবাক্ হইয়া দেখিলেন, দীর্ঘ জটাজুটসম্বিত এক তেজোদৃশ
সন্ন্যাসী সেখানে উপবিষ্ট।

যোগীকে অভিবাদন করিয়া নবাব বারংবার ক্ষমা প্রার্থনা করিতে
লাগিলেন। সেবা পরিচর্যা ও আদেশ পালনের জন্ত তাঁহার তখন
ব্যগ্রতার সীমা নাই।

যোগীবর প্রশান্ত কণ্ঠে কহিতে লাগিলেন, “শঙ্খ-ঘণ্টা বাজানো
বন্ধ করা তোমার পক্ষে কি গর্হিত হয়নি? তুমি মুসলমান, তোমার
ধর্ম তুমি পালন করে যাও। সঙ্গে সঙ্গে অপর ধর্মের লোকদেরও
তাদের প্রয়োজন অনুযায়ী ধর্মাচরণ করতে দেওয়া তোমার উচিত।
তোমার এ অগ্র্যায় ঘোষণা অবিলম্বে প্রত্যাহার কর।”

নবাব তখনই যোগীবরের আদেশ সানন্দে মানিয়া নিলেন। এই
ভূপালতালের তীরে দেবদাসজী অতঃপর এক দেবমন্দির প্রস্তুত
করান। উত্তরকালে রামদাস কাঠিয়াবাবা ইহাকেই তাঁহার গুরুদ্বারা
বলিয়া অভিহিত করিতেন।

শক্তিধর গুরুর আশ্রয়লাভের সঙ্গে সঙ্গে রামদাসজীর জীবনে
দুশ্চর তপস্তার অগ্নি প্রজ্বলিত হইয়া উঠে। কঠোর কচ্ছুব্রত, একনিষ্ঠ
অধ্যাত্ম-সাধনা ও চরম আত্মত্যাগের মধ্য দিয়া পরম প্রাপ্তির পথে
তাঁহাকে অগ্রসর হইতে হয়। মহাসমর্থ গুরুর সদাসজাগদৃষ্টি ও
নিপুণ পরিচালনা এই উপযুক্ত অধিকারী শিষ্যকে তাঁহার প্রার্থিত
সিদ্ধির দিকে পৌছাইয়া দিতে থাকে।

শীত নাই, গ্রীষ্ম নাই ধুনী জ্বালাইয়া রামদাসকে সারা রাত্রিই
ভজন করিতে হইত। মাঘের প্রচণ্ড শীতে তাঁহার একমাত্র গাত্রাবরণ
ছিল একখণ্ড তিন হাত লম্বা বস্ত্র। অগ্র্যায় শিষ্যদের সহিত

রামদাসের কোমরেও গুরুজী মোটা ও ভারি একটি কাঠের আড়বন্ধ বাঁধিয়া দিয়াছিলেন, তাহাতে আবার কাষ্ঠনির্মিত এক লেঙোটী ঝুলানো থাকিত। এই কঠিন পরিচ্ছদ পরিধান কবিয়াই দিনান্তের সাধন শেষে রামদাস ও তাঁহার সতীর্থদের শয়ন করিতে হইত। তামসিক ঘুম যাহাতে নবীন সাধকদের ভজন ও ধ্যানে বিঘ্ন ঘটাইতে না পারে সেজন্যই গুরু দেবদাসজীব এ কঠোর ব্যবস্থা।

কিন্তু নিদ্রা তো দূরের কথা, এ কাষ্ঠ-লেঙোটী বিশ্রাম বা শয়নেই বিঘ্ন জন্মাইত। আড়বন্ধটি সর্বদা এরূপ উচু হইয়া থাকার জন্য, দেহটিকে শায়িত ও বিত্তস্ত রাখা বড় দুষ্কর ছিল। তাই গোড়ার দিকে রামদাস বালুকাময় স্থানকেই শয্যারূপে নির্বাচন করিতেন এবং কাষ্ঠনির্মিত আড়বন্ধ ও লেঙোটী উহার মধ্যে প্রবেশ করাইয়া তবে তিনি খানিকক্ষণ শয়ন করিতে পারিতেন। পরবর্তীকালে এ কৃচ্ছ সাধনে তিনি অভ্যস্ত হইয়া উঠেন, তাঁহার এ কাঠের পরিচ্ছদটিই কাঠিয়াবাবারূপে তাঁহাকে সর্বত্র পরিচিত করিয়া তোলে।

গুরুকৃপা শিরে ধারণ করিয়া রামদাস সাধনার দীর্ঘ পথ অতিক্রম করেন—দেবদাসজী মহারাজের নানা কঠোর পরীক্ষায়ও তিনি উত্তীর্ণ হন। মহাসমর্থ গুরুর আশীর্ব্বাদে ঋদ্ধি ও সিদ্ধি দুই-ই তখন তাঁহার করতলগত হয়।

এই সময়ে দেবদাসজী একদিন শিষ্যকে আদেশ দেন, দ্বারকাধাম তাঁহাকে দর্শন করিতে হইবে। কারণ, দ্বারকা তাঁহাদের নিম্বার্ক সম্প্রদায়ের মুখ্যধাম।

রামদাস কিন্তু মহারাজকে ছাড়িয়া কোথাও যাইতে রাজী নহেন। করজোড়ে কহিলেন, “মহারাজ, আপনাকে আমি ভগবৎ-স্বরূপ বলেই জানি। শাস্ত্রেও রয়েছে সৎগুরুর চরণেই সর্ব তীর্থ বর্তমান। আপনার চরণতলে বসেই তো আমার তীর্থ-ধর্ম্য সবকিছু হচ্ছে। দ্বারকায় যেতে তাই আমার তেমন ইচ্ছে নেই।”

দেবদাসজী মহারাজ অমনি গর্জিয়া উঠিলেন। শ্লেষাত্মক ভাষায় রামদাসকে কহিতে লাগিলেন, “আরে, তুই দেখছি মস্ত জ্ঞানী হয়ে পড়েছিস্! তোর বুদ্ধি ধারণা হয়েছে যে, তোর মত জ্ঞানী তোর গুরুপর্যায়ের মধ্যে কেউ হয়নি? আমি দ্বারকাধামে গিয়েছি, আমার গুরু, দাদা-গুরু সবাই গিয়েছেন। আর তুই এমনি মহাজ্ঞানী যে, তোর আর এই মুখ্যধাম দর্শনের প্রয়োজন নেই! এ বুদ্ধি পরিত্যাগ কর। আমি আদেশ করছি, দ্বারকাধাম থেকে ঘুরে আয়।”

রামদাস বাধ্য হইয়া দ্বারকার পথে সেদিন পা বাড়াইলেন। কিন্তু শ্রীধাম দর্শনান্তে ফিরিয়া আসিয়া যে ছঃসংবাদ শুনিলেন, তাহাতে তাঁহার মাথায় আকাশ ভাঙ্গিয়া পড়িল। দেবদাসজী মহারাজ ইতিমধ্যে মরদেহটি ত্যাগ করিয়াছেন।

গুরুর শূন্য আসনের দিকে তাকাইয়া রামদাস শোকে উন্মত্তপ্রায় হইয়া উঠিলেন। তাঁহারই পরমাশ্রয়ের লোভে পিতামাতা, ভাই-বন্ধু, সংসারের সবকিছু আকর্ষণ ত্যাগ করিয়া তিনি আসিয়াছেন। ভগবদ্ব্যস্বরূপ গুরুজীর বিহনে এ জীবনে যে কোন প্রয়োজনই নাই! এ সন্ন্যাসীর বেশই বা আর ধারণ করা কেন? শোকাবুল রামদাস কাঁদিতে কাঁদিতে মস্তকের জটাজাল উৎপাটিত করিতে লাগিলেন। গুরু-ভ্রাতাগণ তাঁহার এই কাণ্ড দেখিয়া জোর করিয়া সেদিন তাঁহার মস্তক মুণ্ডন করিয়া দেন। অনাহারে, অনিদ্রায় ও নিরন্তর ক্রন্দনে রামদাসের দিনগুলি অতিবাহিত হইতে থাকে।

ক্রমান্বয়ে সাতদিন এইরূপ শোকাভিভূত অবস্থায় কাটিল। ইহার পর বিদেহী দেবদাসজী মহারাজ একদিন জ্যোতির্ময় মূর্তি পরিগ্রহ করিয়া শোকাক্ত শিষ্যের সম্মুখে আবির্ভূত হইলেন।

স্নেহভরা কণ্ঠে সান্ত্বনা দিয়া কহিলেন, “বৎস, কেন তুমি এমন করছো? তুমি শান্ত হও। আমি আশীর্বাদ করি, তোমার প্রকৃত কল্যাণ হোক। জেনে রেখো, আমার মৃত্যু হয়নি, শুধু আমার মর-জীবনের লীলাটি সমাপ্ত হয়েছে মাত্র। কিন্তু তাতে তোমার আমার

মধ্যে ব্যবধান তো কিছু গড়ে ওঠেনি। তাছাড়া প্রয়োজনমতই আমি তোমায় মাঝে মাঝে দর্শন দেবো।”

দেবদাসজীর কৃপালীলার কাহিনী বলিতে গিয়া কাঠিয়াবাবা মহারাজ উত্তরকালে প্রায়ই বলিতেন, গুরুজী তাঁহার এ কথা রক্ষা করিয়াছিলেন। বিশেষ বিশেষ প্রয়োজনের ক্ষণে তিনি তাঁহার প্রিয়তম শিষ্যকে দর্শন দিয়া অনুগৃহীত করিতেন।

গুরুর দেহাবসানের পর হইতে কাঠিয়াবাবা সাধনার আরও গভীরে প্রবেশ করেন। গ্রীষ্মকালে পঞ্চধুনি জ্বালাইয়া উহার মধ্যে তিনি কঠোর তপস্যায় রত থাকেন। আবার প্রচণ্ড শীতের মধ্যে অবস্থান করেন বরফ-গলা শীতল জলে। এক একদিন এই কৃচ্ছ্রতের বিপজ্জনক পরিস্থিতির উদ্ভব হইত। অন্ত্যাত্ম সাধুরা সকাল বেলায় তাঁহাকে জল হইতে তুলিয়া আনিতেন। নিম্পন্দ দেহে বারংবার আগুনের তাপ লাগাইবার পর কাঠিয়াবাবাজীকে চক্ষু উন্মীলন করিতে দেখা যাইত।

একবার রামদাসজী মহারাজ এক গ্রামে পঞ্চধুনি জ্বালাইয়া ধ্যান করিতেছেন। তাঁহার সঙ্গে অপর একটি সন্ন্যাসীও রহিয়াছেন। রামদাসজীর সাধন-সাফল্য ও খ্যাতি প্রতিপত্তি এই সন্ন্যাসীর ঈর্ষ্যা জাগাইয়া তুলে। ধুনীমণ্ডলের মধ্যে ধ্যানস্থ রামদাসজীর প্রাণনাশের জন্য একদিন সে এক জঘন্য কার্য্য করিয়া বসে।

ধ্যানস্থ কাঠিয়াবাবাজীর কোন হুঁসই নাই, এই সুযোগে সন্ন্যাসীটি প্রজ্বলিত ধুনাগুলির চারিদিকে সহস্র সহস্র ঘুঁটে সজ্জিত করিয়া তাহাতে অগ্নিসংযোগ করে। বাহুজ্ঞান-রহিত সাধকের দেহের চতুর্দিকে অগ্নিশিখা পরিব্যাপ্ত হয়। বলাবাহুল্য, দুর্বল সন্ন্যাসীটি ইতিমধ্যে সে স্থান হইতে সরিয়া পড়ে।

দাউ-দাউ করিয়া আগুন জ্বলিয়া উঠিলে গ্রামের লোকজন সেদিকে ছুটিয়া আসে। সকলেরই দৃঢ় ধারণা, তপোনিরত সাধুবাবার দেহ

নিশ্চয়ই ভস্মীভূত হইয়াছে। সমবেত চেষ্টায় আগুন নেভানো হইলে এক আশ্চর্য্য দৃশ্য দেখা গেল—কাঠিয়াবাবাজী যোগমুক্ত হইয়া প্রশান্ত বদনে তাঁহার আসনে উপবিষ্ট রহিয়াছেন। অগ্নি তাঁহার কোন অনিষ্টই করে নাই।

সঙ্গী সাধুটির নৃশংস কার্য্য দেখিয়া গ্রামবাসীরা উত্তেজিত হয়। পলায়িত সাধুটিকে ধরিয়া আনিতে চাহিলে কাঠিয়াবাবা তাহাদিগকে নিরস্ত করিয়া কহেন, “ভাইসব, তোমাদের কিছু করার দরকার নেই, ছুঁই নিজেই নিজের ওপর দণ্ড টেনে নিয়ে এসেছে।”

ছুই দিন পরে সংবাদ পাওয়া গেল, সেই সাধুটি অপর একটি অপরাধের অভিযোগে ধৃত হইয়াছে। বিচারে তাহার ছয় মাস কারাদণ্ড হয়।

প্রজ্বলিত হুতাশনের মধ্যে থাকিয়াও সেদিন রামদাস বাবাজীর শরীর দগ্ধ হয় নাই—কেহ কেহ তাঁহাকে এই রহস্যের মর্ম্ম জিজ্ঞাসা করেন। তিনি উত্তরে জানান—পঞ্চধুনী তাপিতে বসিবার পূর্বে সাধককে অগ্নি হইতে আত্মরক্ষা করার মন্ত্রটিকে চৈতন্যময় করিয়া নিতে হয়। তারপর স্মিতহাস্তে আরও কহেন, “যাদের দেহ অগ্নিতে ক্লিষ্ট বা দগ্ধ হয় তারা যোগী নয়, এ কথাটা মনে রাখবে।”

গুরুকুপায় কাঠিয়াবাবা একরূপ বহুতর যোগসিদ্ধি লাভ করিয়াছিলেন। তাঁহার সাধন ও পরিব্রাজনের কালে এগুলি নানা সময়ে, প্রয়োজনমত প্রকট হইয়া উঠিত। একবার তিনি আগ্রায় যমুনার ধার দিয়া চলিয়াছেন। তখন সিপাহী বিদ্রোহের কাল, চারিদিকে প্রচণ্ড যুদ্ধবিগ্রহ ও রক্তারক্তি চলিতেছে।

যমুনার উপর গোরা পল্টনে ভর্তি একটি ক্ষুদ্র জাহাজ নোঙর-করা। একদল গোরা সৈন্য তীরস্থিত সাধু কাঠিয়াবাবাকে দেখিয়া এই সময়ে বড় উত্তেজিত হইয়া উঠে। ইহাদের একজন তাঁহাকে লক্ষ্য করিয়া গুলি ছুঁড়িয়াও বসে। গুলিটি কিন্তু কানের পাশ দিয়া চলিয়া গেল, তাঁহার দেহ স্পর্শ করিল না। অকুতোভয় কাঠিয়াবাবাজীর কিন্তু

একটুও ক্রক্ষেপ নাই। যমুনার তীর ধরিয়া একমনে তিনি অগ্রসর হইয়া চলিয়াছেন।

গোরা সৈনিকটি নিরস্ত্র হইবার পাত্র নয়। বন্দুক উঠাইয়া সে জাহাজ হইতে আবার গুলি চালাইতে উত্তত হইল। কাঠিয়াবাবাজী বিরক্ত হইয়া অশ্রুটস্বরে কহিলেন, “ভাল বিপদ হয়েছে। এ ব্যাটা দেখছি কিছুতেই আজ ছাড়বে না।”

অশ্রুর্লীন হইয়া কিছুক্ষণের জন্য তিনি চক্ষু দুইটি মুদ্রিত করিলেন। ক্ষণপরেই সৈনিকের হস্তধৃত বন্দুকটি কোন্ এক ইন্দ্রজাল বলে স্থলিত হইয়া যমুনায় ডুবিয়া গেল।

এতক্ষণে জাহাজের গোরা সৈনিকের কিছুটা হুঁস হইয়াছে। তাহারা বুঝিয়াছে—এ সাধু নিশ্চয়ই অসামান্য যোগশক্তি ধারণ করে, ইহার সহিত তাই সৌহার্দ্য স্থাপন করাই ভাল। গোরার দল তখন জাহাজ হইতে নামিয়া টুপী খুলিয়া বাবাজীকে বারবার অভিবাদন জানাইতে থাকে।

সদগুরু দেবদাসজী মহারাজ লীলা সংবরণ করিয়াছেন। কিন্তু তাঁহার রোপিত দীক্ষা-বীজটি এবার শিষ্য কাঠিয়াবাবার মধ্যে ধীরে ধীরে অঙ্কুরিত হইয়া উঠিতে থাকে। গুরুকৃপা ও আপন তপস্তার ধারাপথটি বাহিয়া তাঁহার জীবনে সাধিত হয় এক পরম রূপান্তর, একনিষ্ঠ সাধক রামদাস ঈশ্বরদর্শন করনেও সিদ্ধকাম হন। রামদাসজীর সাধনার এ পরিণতি ঘটে ভরতপুরের পবিত্র তীর্থ সয়লানিকা-কুণ্ডায়। কাঠিয়াবাবাজী নিজেই ইহা বর্ণনা করিতেন—

রামদাসকো রাম মিল।

সয়লানিকা-কুণ্ড।

সন্তন তো সচ্চা মানে

ঝুঠ, মানে শুণ্ড।

—অর্থাৎ, সাধক রামদাসের ভাগ্যে উপাস্ত শ্রীরামচন্দ্রের দর্শন হয় সয়লানির কুণ্ডে ; সাধু-সজ্জন ব্যক্তির এ তথ্যকে সত্য বলিয়াই গ্রহণ করিবে—আর অসত্য বলিয়া ভাবিবে শুধু দুর্বৃত্তের দল ।

ভরতপুরে ঈশ্বর দর্শনের পর হইতেই শুরু হয় সিদ্ধকাম সাধক কাঠিয়াবাবার গুরু-জীবন । আর এ সময় হইতেই ক্রমে ক্রমে দুই একটি করিয়া শিষ্যকে তিনি আশ্রয় দিতে থাকেন । তাঁহার প্রথম চেলার নাম গরীবদাস । ভরতপুরের এক নিষ্ঠাবান ভগবদ্-ভক্ত ব্রাহ্মণ কাঠিয়াবাবার মাহাত্ম্যে মোহিত হইয়া বালক পুত্রটিকে আনিয়া তাঁহার চরণতলে সমর্পণ করেন । ত্যাগে, প্রেমে ও তপোনিষ্ঠায় এই বালক পরিণত হন এক অসামান্য সাধকরূপে ।

ভগবানদাস, ঠাকুরদাস এবং নরোত্তমদাস নামেও কয়েকটি বিশিষ্ট চেলা কাঠিয়াবাবাজীর আশ্রয় গ্রহণ করিয়া ধন্য হন । উত্তরকালে আরও বহু সংখ্যক সাধক অনুগ্রহ লাভ করেন, ইহাদের অধিকাংশেরই বাস বাংলা দেশে ।

কঠোর তপস্যা ও পর্যটনের পালা সাজ হইবার পর লোকগুরু-রূপে কাঠিয়াবাবার আত্মপ্রকাশ দেখা যায় । বাবাজী ভাবিতে থাকেন, কোথায় তাঁহার তপস্যা ও আশ্রমের স্থান নির্দিষ্ট করিবেন ? কঠোরতপা সাধুদের পক্ষে উপযোগী উত্তরাখণ্ডের নির্জন পর্বতগুহা । কিন্তু তিনি মনে মনে বিচার করিলেন—সেখানেও তো উদরের চিন্তা কম নাই । বর্ষাকালে কোন্ স্থানে কন্দমূলের অঙ্কুর দেখা যায় তাহা আগে হইতে খুঁজিয়া দেখিয়া রাখিতে হয় । এও তো আহারের জন্ত এক প্রকারের চেষ্টা । এ সময়ে ব্রজভূমির তীব্র আকর্ষণই বরং তিনি অন্তরে অনুভব করিতে লাগিলেন । প্রেমের ঠাকুর কাছাইয়া লালের ইহা লীলাভূমি । তাছাড়া, এ পবিত্র ভূমিতে সাধুদের সেবার জন্ত ব্রজবাসী ও ব্রজমাসীদের স্বাভাবিক আগ্রহ রহিয়াছে । তাই বৃন্দাবনে আশ্রয় নিবার জন্তই রামদাসজী মনস্থ করিলেন ।

গঙ্গাজীৱ কুঞ্জের নিকটস্থ ঘাটে, বটবৃক্ষতলে কাঠিয়াবাবা তাঁহার আসনটি প্রথমে পাতিয়া বসেন। সঙ্গে সেবকশিষ্য গরীবদাসজী। যমুনার ঘাটে স্ত্রী-পুরুষ বহু লোকই স্নান করিতে আসে। ইহাদের অনেকেই এই সুদর্শন, তেজোদৃশ্য সাধুকে নম্র নতি জানাইয়া যায়। তাঁহার সহিত ধর্মকথা আলোচনা করিয়াও বহু লোক তৃপ্ত হয়।

গভীর রজনীতে সেদিন সেখানে এক বিচিত্র কাণ্ড ঘটিল। কাঠিয়াবাবা তাঁহার প্রথম রাত্রির ভজন শেষ করিয়া আসনের উপর শায়িত রহিয়াছেন। চুপি চুপি অন্ধকারাচ্ছন্ন পথ অতিক্রম করিয়া আসিয়া এক তরুণী হঠাৎ তাঁহাকে জড়াইয়া ধরিল।

বাবাজী মহারাজ চমকিত হইয়া তখনই চেলা গরীবদাসজীকে ডাকিয়া তুলিলেন, নিকটেই সে ঘুমাইতেছিল। গরীবদাস আলো জালিলে দেখা গেল, কাঠিয়াবাবার আসনের উপর এক বিধবা যুবতী বসিয়া আছে।

তিরস্কার ও প্রশ্নবাণ বর্ষণের পর রমণী জানায়, সে এক আশ্রয়-হীনা বিধবা। আজ সে বড় কামার্তা হইয়াছে। দুর্দমনীয় আবেগ এড়াইতে না পারায় নিশীথে তাহার এ অভিসার।

বাবাজী মহারাজ তো ক্রোধে একেবারে অগ্নিশর্মা। উত্তেজিত কণ্ঠে কহিতে লাগিলেন, “তোমার কাম যদি এতই জেগে থাকে, তবে গৃহস্থ পুরুষের কাছে যাও। ত্যাগী সাধুসন্তদের কাছে এমন করে আসা কেন?”

যুবতী বিনাইয়া বিনাইয়া বলিয়া চলিল, “মহারাজ আপনার অপূর্ব রূপ দেখে আমি মুগ্ধ হয়েছি। দর্শনের পর থেকেই আমার কামবাসনা কেবলি বেড়ে চলেছে। আপনি কৃপা করে আমার অভিলাষ পূরণ করুন।”

এতক্ষণ অবধি তবুও কাঠিয়াবাবা কিছুটা ধৈর্য্য ধরিয়াছিলেন, রমণীর এ কথা শুনিবামাত্র এক বিস্ফোরণ ঘটিল।

ক্রোধে ফাটিয়া পড়িয়া চেলা গরীবদাসকে হাঁক দিয়া কহিলেন,
“ওরে, তুই কিছুটা দূরে সরে যা তো, এই পাপীয়সীকে আমি সাধুর
সিদ্ধাই কিছু দেখিয়ে দিচ্ছি। ও সাধুর সাধুত্ব হরণ করে নিতে চায়।
কিন্তু তাঁর সামর্থ্যও যে কত ভয়ঙ্কর হতে পারে সেইটেই ওকে আমি
আজ দেখিয়ে ছাড়বো।”

ভীতা সন্ত্রস্তা রমণী করুণ কণ্ঠে কাঁদিয়া উঠিল। জোড়হস্তে অশ্রুঝর
কণ্ঠে নিবেদন করিল, এ দুষ্কার্য্য করিতে সে স্বেচ্ছায় আসে নাই।
একদল কুচক্রী ব্রজবাসী ষড়যন্ত্র করিয়া তাহাকে এখানে পাঠাইয়াছে।
মহারাজ কামজিৎ কিনা, তাহারা পরীক্ষা করিতে চাহিয়াছিল।

যুবতীটি বারংবার কাঠিয়াবাবার কাছে মার্জনা ভিক্ষা করিতে
থাকে।

বাবাজী মহারাজ সব কথা শুনিয়া দৃঢ়কণ্ঠে কহিলেন, “আচ্ছা,
এখনই এখানে থেকে তুমি চলে যাও। আর কখনো কোন সাধুর
কাছে এরূপ ভাবে যেও না। জেনো, সব সাধুই এক রকম নয়—
এদের মধ্যে কেউ কেউ কিন্তু যোগীরাজও থাকেন।”

কম্পিত হৃদয়ে পলায়ন করিয়া রমণী হাঁফ ছাড়িয়া বাঁচিল।

ব্রজভূমির সকল লোকের সহিতই কাঠিয়াবাবার সখ্যভাব।
তাঁহার গাঁজা-চরসের আড্ডায় অনেকেই আসিয়া জড়ো হয়—বাবাজী
মহারাজের সহিত তাহাদের নানা ঠাট্টা তামাসা চলে।

গৌসাইয়া নামক এক ব্যক্তিও রোজ সেখানে আসিয়া জোটে।
এ ব্যক্তি বৃন্দাবনের এক দুর্দর্শ ও পুরাতন দুর্বৃত্ত। চৌদ্দ বৎসর
দ্বীপান্তরে বাস করিয়াও তাহার অপরাধ প্রবণতা কিছুমাত্র কমে
নাই। বৃন্দাবনবাসীরা তাহার দৌরাভ্যে অস্থির।

একদিন জোর গাঁজা-চরস উড়ানো হইতেছে। বাবাজীর এই
ধূমপান-বৈঠকের বিশিষ্ট সদস্য, পালোয়ান ছন্নু সিং হঠাৎ বলিয়া উঠিল,
“বাবাজী মহারাজ, আপনার মতন মহাত্মা ও সিদ্ধপুরুষ এখানে

থাকতে ডাকাত গৌসাইয়ার কোন পরিবর্তন হলো না! ওর অত্যাচার থেকে ব্রজবাসীদের আপনি কৃপা করে রক্ষা করুন।”

কথা কয়টি মিনতিপূর্ণ। বাবাজীর হৃদয়তন্ত্রীতে সেদিন উহা আঘাত করিয়া বসিল। সঙ্গে সঙ্গে বাহির হইয়া আসিল তাঁহার এক করুণাঘন রূপ।

গৌসাইয়া কিছুক্ষণ পরেই সেখানে আসিয়া উপস্থিত। কাঠিয়া-বাবা সঙ্গেহে তাহাকে জিজ্ঞাসা করিলেন, গৌসাইয়া, তুই কি সাধু হয়ে প্রকৃত আনন্দের স্বাদ পেতে চাস? চুরি-ডাকাতি ছেড়ে দিয়ে তুই আমার চেলা হয়ে থাকবি।”

করুণামাখা এ কথা কয়টিতে কোন্ যাহু ছিল তাহা কে বলিবে? গৌসাইয়ার সর্বসত্তায় সেদিন উহা এক আলোড়ন তুলিয়া দিল।

কিছুকাল চুপ করিয়া থাকিয়া আবেগকম্পিত কণ্ঠে গৌসাইয়া বলিতে লাগিল, “মহারাজ, আমি জীবনে যত কুকাঙ্গ করেছি, কোন মানুষ তা করতে পারে না। এ সব জেনেশুনেও কি সত্যিই তুমি আমায় কৃপা করবে, তোমার চেলা করে নেবে?”

হৃদ্বর্ষ অপরাধীর জীবনে সেদিন পরম লগ্নটি আসিয়া গিয়াছে। রূপাময় মহাপুরুষ স্মিতহাস্যে তাহাকে কহিলেন, “হ্যারে হ্যা। আমি তোকে সত্যিই আমার চেলা করবো। আজই করবো। এখনই বাজার থেকে একগাছা তুলসীর কণ্ঠীমালা নিয়ে আয়।”

গৌসাইয়ার দীক্ষাদান সমাপ্ত হইয়া গেল। সঙ্গে সঙ্গে তাহার অপূর্ব রূপান্তর দর্শনে ব্রজবাসীগণ বিস্মিত হইলেন। তাহার দৌরাণ্য ও লুণ্ঠনের প্রবৃত্তি যেন কোথায় অন্তর্হিত হইয়া গিয়াছে। কাঠিয়াবাবা মহারাজের দিব্য স্পর্শ এই ছর্ব্বৃত্তকে করিয়া তুলিয়াছে এক প্রেমিক সাধু।

যমুনাতটের এক নিভৃত অঞ্চলে গৌসাইয়া তাহার ভজন পূজনে দিন কাটায়। সে যে এবার এক নূতন মানুষ! পুরাতন পাপ-জীবনের কথা সবাইকে অবলীলায় শুনাইয়া দিতে তাহার বাধে না।

শ্রীরামদাস কাঠিয়াবাবা

নিজের চুরি-ডাকাতির নানা কাহিনী স্বরচিত সঙ্গীতে গাঁথিয়া সকলের সঙ্গে সেও বেশ আমোদ উপভোগ করে। দস্যুর রূপান্তর ঘটিয়াছে এক সদানন্দময় মহাবৈরাগী পুরুষরূপে! সাধারণ লোকে ঠাট্টা করিয়া তাহাকে ডাকে—চোর-গোঁসাইয়া।

কুখ্যাত পাষণ্ডীর এই উদ্ধার শ্রীবৃন্দাবনে কাঠিয়াবাবার এক বিস্ময়কর কীর্তিরূপে খ্যাতি লাভ করে।

যমুনার ঘাটে বাবাজীর সভায় বেশ জনসমাগম হইত। ভক্তদের সঙ্গে সঙ্গে গাঁজা-চরস উড়াইবার লোকও কম জুটিত না। বাবাজী মহারাজের নিকট দর্শনার্থীদের ভিড় এবং ভোজ্যবস্তুর আমদানি দেখিয়া চোরের দল সন্দেহ করিত, তাঁহার নিকট বৃষ্টি সঞ্চিত টাকাকড়িও বেশ কিছু রহিয়াছে। এ সন্ধানে মাঝে মাঝে তাহারা রাত্ৰিকালে হানা দিতে ছাড়িত না। বিস্ময়ের কথা, এ দুর্বৃত্তেরাই আবার দিনের বেলায় কাঠিয়াবাবার কাছে বসিয়া তাঁহারই গাঁজা-চরস ধ্বংস করিত।

একবার এইরূপ একদল তস্করের সঙ্গে বাবাজীর প্রবল বিতণ্ডা চলিতেছে। সংখ্যায় ইঁহারা তিনজন। উত্তেজিত, হইয়া দুর্বৃত্তেরা বলিয়া উঠে, “বাবাজী, তুমি আমাদের এমন করে ধমকে কথা বল, তোমার সাহস তো কম নয়! এর প্রতিফল তুমি একদিন রাত্ৰিবেলায় ভাঙ্গ করেই পাবে।”

কাঠিয়াবাবা গর্জিয়া উঠিলেন,—বটে! চোরের দল আশ্চর্য পাইয়া একেবারে মাথায় উঠিয়া গিয়াছে। সাধুদের শাসাইতেও ইহাদের বাধে না।

তিনি বলিয়া উঠিলেন, “দেখবি, আজই তোরা পুলিশের হাতে গ্রেপ্তার হবি।”

দুর্বৃত্তদল উপেক্ষার হাসি হাসিয়া বলিয়া গেল—তাহাদিগকে থানায় পুরিতে পারে এমন শক্তি কাহারও নাই।

কি অদ্ভুত ব্যাপার! ঠিক সেইদিনই পূর্বের এক ছক্খের অভিযোগে এই তিন ব্যক্তি পুলিশ কর্তৃক ধৃত হয়। অভিযোগ গুরুতর, মুক্তি পাওয়া কঠিন। কোনমতে জামিনে ছাড়া পাইয়া ইহাদের দুইজন কাঠিয়াবাবার কাছে ছুটিয়া আসে, চরণ ধরিয়া বারবার তাঁহার ক্ষমা প্রার্থনা করিতে থাকে।

বাবাজী মহারাজের ক্রোধ তিরোহিত হইতে দেৱী হয় নাই। শাস্তস্বরে তিনি কহিলেন, “আচ্ছা বেশ কথা। কিন্তু তোরা প্রতিজ্ঞা কর, আর কখনও চুরি-ডাকাতি করবিনে, আর সাধুদের মৰ্যাদা রেখে চলবি।”

তৎক্ষণাৎ স্বীকৃত হইল। মোকদ্দমার দিন দেখা গেল, কাঠিয়াবাবা মহারাজের আশ্রয়প্রাপ্ত ব্যক্তিদ্বয় মুক্তি পাইয়াছে, আর তৃতীয় অপরাধীটির উপর হইয়াছে সশ্রম কারাদণ্ডের আদেশ।

কিছুদিন পরের কথা। বাবাজী মথুরার রাস্তায় চলিয়াছেন দেখিলেন, তাঁহার পূর্ব-পরিচিত তৃতীয় চোরটির কোমরে শিকল বাঁধা, সরকারী রাস্তা মেরামোতের কাজে তাহাকে নিযুক্ত করা হইয়াছে।

কাঠিয়াবাবাকে দেখিয়াই সে হাউ-হাউ করিয়া কাঁদিয়া উঠিল। সাশ্রনয়নে বারবার ক্ষমা চাহিয়া বলিতে লাগিল, “বাবাজী মহারাজ, আমরা ব্রজবাসী—সবাই তোমার বালক, নিতান্ত অবোধ। রুষ্ট হয়ে আমাদের এ কঠিন দণ্ড দেওয়া কি তোমার উচিত হয়েছে?”

লোকটির ক্রন্দনে কাঠিয়াবাবার হৃদয় বিগলিত হইল। তিনি বলিয়া উঠিলেন, “আচ্ছা, আচ্ছা। সাধুসন্তদের আর কখনো তুই যেন অসম্মান করিসনে। যা, আজ থেকে তিন দিনের মধ্যে তুই জেল থেকে মুক্ত হবি।”

চমকিত হইয়া বন্দী বলিতে লাগিল, “কিন্তু মহারাজ, এ আপনি কি বলছেন? এখন আর তা কি করে সম্ভব হতে পারে? মামলায় আপীল করেছিলাম, তাও যে অগ্রাহ্য হয়েছে। মুক্তি পাবার বিন্দুমাত্র আশা আমার নেই।”

বাবাজী মহারাজ উত্তেজিত স্বরে তিরস্কার করিয়া উঠিলেন, “ক্যা? সন্তানকা বচনমে অব্ভী তেরা বিশ্বাস হোতে নহী। মেরে বচন কভি বুঠে নহী হোগে।” অর্থাৎ, সে কি রে? সাধুর বাক্যে এখনও দেখছি তোর বিশ্বাস হচ্ছে না? ওরে, আমার বাক্য যে কখনো মিথ্যা হতে পারে না।

কয়েদীটি কিন্তু তৃতীয় দিনে ঠিকই মুক্ত হইয়া আসে। সরকার হইতে কি এক বিশেষ কারণে আদেশ বাহির হয়, প্রত্যেক কারাগার হইতে তিনজন করিয়া কয়েদীকে অবিলম্বে খালাস দেওয়া হইবে। দেখা যায়, বাবাজী মহারাজের মার্জনাপ্রাপ্ত লোক ঐ মুক্তি-তালিকার অন্তর্ভুক্ত হইয়াছে।

কাঠিয়াবাবা মহারাজের গাঁজা ও চরস পান ছিল এক নিত্যন্ত অদ্ভুত ব্যাপার। ধূনির আগুনের মত তাঁহার বৈঠকে কল্কের আগুনও নির্বাপিত হইত না। কিন্তু বাবাজী মহারাজের একটি বৈশিষ্ট্য সকলেইর দৃষ্টিতে পড়িত। নিরন্তর গাঁজা-চরসের ধূম পান করার পরও তাঁহার নয়নদ্বয় একটুও আরক্তিম হইত না। প্রশান্তিময় আনন হইতে সর্বদা বিকীর্ণ হইত এক অপূর্ব আনন্দচ্ছটা।

সেবার বৃন্দাবনে কুস্তমেলা হইতেছে। এ উপলক্ষে দিক্‌বিদিক হইতে সহস্র সহস্র বৈষ্ণব ব্রজধামে উপনীত হন এবং পরিক্রমা করিতে থাকেন। মেলায় উপস্থিত সকল বৈষ্ণব সাধুদের সমর্থনে এ সময়ে শ্রীশ্রী ১০৮ স্বামী রামদাস কাঠিয়াবাবাজী বৃন্দাবনের মোহান্ত পদে বৃত্ত হন।

উৎসব ও আনন্দ অনুষ্ঠানের মধ্যে এ মেলাক্ষেত্রে একজন ব্রজবাসী কোতুককর প্রতিযোগিতায় সকলকে আহ্বান করে। একটি বৃহদাকার কল্কে শিকলে বাঁধিয়া বটবৃক্ষের শাখায় ঝুলাইয়া দেওয়া হয়, আর উহার ভিতরে পুরিয়া দেওয়া হয় সওয়া সের চরস। উপরে ও নীচে সাজানো হয় সওয়া সের করিয়া ছুইটি বালাখানা তামাকুর স্তর। এই বৃহৎ কল্কেতে টান দিয়া ছিলিম উড়ানো সত্যিই এক কঠিন

ব্যাপার। ইহা হইতে ধোঁয়া বাহির করিবার মত শক্তি কোন্ সাধুর আছে, প্রতিযোগিতার প্রবর্তক তাহাই দেখিতে চান।

ব্রজভূমির বহু পরাক্রান্ত সাধুই সেদিন পরাজয় স্বীকার করিতে বাধ্য হন। এই বিচিত্র ছিলিম হইতে ধোঁয়া বাহির করা কাহারও সামর্থ্যে কুলায় নাই।

বৃন্দাবনের বিশিষ্ট ব্যক্তিগণ বাবাজী মহারাজকে বিশেষভাবে ধরিয়া বসিলেন, তাঁহাকেই এই বল পরীক্ষায় জয়ী হইতে হইবে নতুবা তাহাদের মাথা যে হেঁট হইয়া যায়। কাঠিয়াবাবাও পরম উৎসাহে এ আনন্দরঙ্গে অবতীর্ণ হইলেন।

তিনি সজোরে এই কল্কেতে দম দিবামাত্রই উহার শীর্ষদেশে দপ্ দপ্ করিয়া অগ্নিশিখা জলিয়া উঠিল। চারিদিকে তখন জয় জয়কার।

আধ্যাত্মিক ও শারীরিক বল, উভয় দিক দিয়াই চিরবাল বাবাজী মহারাজ ছিলেন বৈষ্ণব সাধুসমাজে অপ্রতিদ্বন্দ্বী।

কাঠিয়াবাবাজীর চরস পানের আরও একটি কৌতুককর ঘটনা রহিয়াছে। সেবার ভরতপুর হইতে তিনি শিষ্য গরীবদাসজীসহ বৃন্দাবনে ফিরিতেছেন। উভয়ের সঙ্গে রহিয়াছে প্রায় দুই সের চরস। আইনমতে এই পরিমাণ চরস রাখা নিষিদ্ধ—পথমধ্যে গুরু ও শিষ্য পুলিশ কর্তৃক ধৃত হইলেন।

ম্যাজিস্ট্রেটের সম্মুখে উভয়কে উপস্থিত করা হইল।

সাহেব প্রশ্ন করিলেন, 'এত বেশী পরিমাণ চরস দিয়া সাধু কি করিবে? উত্তর হইল—ইহা তাঁহার মাত্র দুই-এক দিনের খোরাক।

সাহেব এরূপ অবিশ্বাসী কথা মানিয়া নিতে রাজী নহেন। তিনি ইহা চাক্ষুস না দেখিয়া ছাড়িবেন না। এক ছিলিমে প্রায় এক পোয়া চরস সাজিয়া বাবাজী কল্কেতে জোর টান দিলেন। দপ্ করিয়া আগুন জলিয়া উঠিল।

সাহেবের বিষয় ততক্ষণে চরমে উঠিয়াছে। শুধু একটি ছিলেম এ পরিমাণ চরস কোন মানুষ যে সত্যই পান করিতে পারে ইহা তাহার ধারণার অতীত। বুঝিলেন, ইহা এই সাধুর এক দৈবী শক্তি ছাড়া আর কিছু নয়। খুণী হইয়া কহিলেন, “আচ্ছা সাধু, তুমি চলে যাও। কেউ যাতে পথে এই চরসের জন্ত তোমাদের আটকাতে না পারে এজন্য আমি একটি আদেশপত্র দিচ্ছি।”

কিন্তু তাহা কে শুনিতে চায়? বাবাজী মহারাজ আত্মপ্রত্যয়ের সুরে বলিয়া উঠিলেন, “সাহেব, এ হুকুমনার আমার কোন দরকার নেই। কেউ যদি রাস্তায় ধরে, ভয় কি? আবার এমনি করেই ছিলিম উড়িয়ে দেখিয়ে দেব!”

সাহেব হো হো কথিয়া হাসিতে লাগিলেন।

কাঠিয়াবাবাজীর গাঁজা-চরস পানের নানা কাহিনী সাধু ও ভক্তমহলে খুব শুনা যাইত। আবার সকলেই জানিতেন, বিপুল পরিমাণ তীব্র নেশার বস্তু পান করিয়াও তাহার দেহে বা মনে কখনো বিন্দুমাত্র বৈলক্ষণ্য ঘটিতে দেখা যায় নাই! দীর্ঘকালের এ প্রচণ্ড নেশার অভ্যাসটি বাবাজী মহারাজ কিন্তু একদিনে এক মুহূর্তেই ত্যাগ করিয়াছিলেন। উত্তরকালের এক সামান্য অসুস্থতায়, চিকিৎসকের একটিমাত্র কথায় তিনি ইহা ত্যাগ করেন।

একবার বাবাজীর প্রধান শিষ্য সম্ভদাস মহারাজ প্রশ্ন করেন, “বাবা, ছুই-চারবার গাঁজা-চরসের ছিলিম উড়িয়ে অন্যান্য সাধুরা নেশায় একেবারে মত্ত হয়ে উঠে, অথচ আপনি তো অনবরত ছিলিম টেনে এমন স্বাভাবিক অবস্থায় থাকতে পারেন। এ কি করে সম্ভব হয়?”

কাঠিয়াবাবা উত্তরে বলিলেন, “বাবা, জিস্পর ভগওয়ানকা অমল চড় গিয়া উস্পর অওব কোঙ্গি অমল কভি চড়তা নহী।” অর্থাৎ— বাবা, যার সর্বসম্বল ভগবানের নেশা চড়ে গিয়েছে, সংসারের আর কোন নেশাই যে তার উপর ভর করতে পারে না।

উজ্জয়িনীতে সেবার কুস্তমেল। অনুষ্ঠিত হইতেছে। এ সময়ে মেলাক্ষেত্রে এক শক্তিশ্রম শৈব সন্ন্যাসীর প্রভাব বিস্তৃত হইয়া পড়ে। এই সন্ন্যাসীর অলৌকিক শক্তি ও যোগবিভূতিতে আকৃষ্ট হইয়া উজ্জয়িনীর রাজা তাঁহাকে গুরুত্ব বরণ করেন। ইহাতে উৎসাহিত হইয়া শৈব সন্ন্যাসীরা মেলাক্ষেত্রের সর্বময় কর্তৃত্ব গ্রহণ করে। শুধু তাহাই নয়, ইহাদের একদল লোক উদ্ধতভাবে বৈষ্ণব সাধুদিগকে বিতাড়িত করিতে থাকে।

চিরাচরিত প্রথামত বৃন্দাবনের মোহান্তকে কুস্তমেলায় উপস্থিত থাকিতে হয়। কয়েকজন বৈষ্ণব সাধুসহ কাঠিয়াবাবাজী তাই এ সময়ে উজ্জয়িনীর পথে অগ্রসর হইতেছিলেন। পথিমধ্যে কয়েকটি বৈষ্ণব সাধু-জমায়েতের সহিত তাঁহার সাক্ষাৎ হয়। সাধুরা ক্ষুণ্ণ মনে শৈব সন্ন্যাসীদের অত্যাচারের কথা তাঁহাকে নিবেদন করে।

সমস্ত ঘটনা শুনিয়া বাবাজী মহারাজ ক্রোধোদ্দীপ্ত হইয়া উঠিলেন, তাহাদিগকে ধিক্কার দিয়া বলিতে লাগিলেন—বৃথাই তাহারা সাধু হইয়াছে। মৃত্যুভয় যাহাদের এত অধিক, গৃহকোণই তাহাদের উপযুক্ত স্থান। কুস্তমেলার ক্ষেত্রে নিজস্ব অধিকারের জন্ত তাহাদের লড়াই করা উচিত ছিল। মরিলে কিই-বা ক্ষতি হইত—বিষ্ণু নাম করিয়া তাহারা বৈকুণ্ঠে যাইতে পারিত। কাপুরুষের দল! নিজেদের মাথা তো তাহারা হেঁট করিয়াছেই, ইষ্টদেব শ্রীবিষ্ণুর মর্যাদা-হানিও করিয়াছে।

বাবাজী মহারাজের এসব তীক্ষ্ণ বাক্য বৈষ্ণব সাধুদের অন্তরে গিয়া বিঁধিল। মেলাক্ষেত্রে পুনরায় স্থান অধিকারের জন্ত তাঁহারা উদ্বুদ্ধ হইয়া উঠিলেন। একটি হস্তী সংগ্রহ করিয়া সোৎসাহে তাঁহারা মোহান্ত রামদাস কাঠিয়াবাবাজীকে ইহাতে আরোহণ করান। তাঁহার পিছনে চলিতে থাকে কয়েক সহস্র বৈষ্ণব সাধুর এক বিরাট দল।

কাঠিয়াবাবাজীর নেতৃত্বে এই সাধু ‘ফৌজ’ কুস্তমেলায় পৌঁছিলে এক বিস্ময়কর কাণ্ড সংঘটিত হয়। হস্তীপৃষ্ঠে সমাসীন বাবাজী

মহারাজের দিব্য প্রশান্ত মূর্তিটি সেদিন উদ্ধত সন্ন্যাসীদিগকে এক মুহূর্তে
নিষ্ক্রিয় করিয়া দেয়। দ্বন্দ্ব প্রবৃত্ত হওয়া দূরের কথা, ভীত সঙ্কল্প হইয়া
মেলাক্ষেত্রে নিজ নিজ গতিব মধ্যে তাহারা প্রবেশ করিতে থাকে।

কাঠিয়াবাবার ব্যক্তিত্ব ও অধ্যাত্মশক্তি সেদিন লক্ষ লক্ষ সাধু
সন্ন্যাসীর মধ্যে এক ইন্দ্রজালের সৃষ্টি করিয়াছিল।

বাবাজী মহারাজ একবার তাঁহার কয়েকটি শিষ্যসহ কোন এক
সাধু জমায়েতের সহিত পথ চলিতেছেন।

শেষ রাত্রের কৃত্যাদি শেষে, ইষ্টপূজা সমাপনের পর সকলে
যাত্রা করেন, তারপব গ্রাম হইতে গ্রামান্তরে পবিত্রাজনের পালা
আরম্ভ হয়। মধ্যাহ্নে তাঁহারা কোন ছায়াচ্ছন্ন জলাশয়ের ধারে
আসন পাতিয়া বসেন। গ্রামবাসীরা সাধুসন্তদের দর্শন ও দণ্ডবৎ
করিয়া আহাৰ্য্যের যোগাড় করিয়া দেয়। গৃহস্থদের প্রদত্ত ভেট
লইয়া মাঝে মাঝে দুই-একটি ছোটখাট ঝগড়া-বিবাদও যে সাধুদের
মধ্যে না হয় তাহাও নয়।

জমায়েতের সঙ্গে এক পরমহংসজীও পথ চলিতেছেন। একদিন
রামদাস কাঠিয়াবাবাকে ডাকিয়া পরমহংসজী নানা প্লেষাত্মক বাক্য
বলিতে শুরু করিলেন—বৈষ্ণবদের সম্প্রদায়ে প্রকৃত বৈরাগ্য কিছুই
নাই, পেটের চিন্তায় সকলে সব সময়ে অস্থির, আর ইহা নিয়াই
সারাদিন তাহাদের যত ঝগড়া-বিবাদ চলে।

বাবাজী স্থির করিলেন, আত্মাভিমानी পরমহংসজীকে কিছু শিক্ষা
দিবেন। দীনভাবে জোড়হস্তে তাঁহাকে কহিলেন, “মহারাজ, প্রকৃত
বৈরাগ্য কি বস্তু, আপনি আমায় তা বুঝিয়ে দিন। আজ থেকে আপনার
নির্দেশমতই আমি চলবো, আপনার আসনের পাশেই বসবো।”

পরমহংসজী অতঃপর গম্ভীরভাবে বাবাজী মহারাজকে বৈরাগ্য
ও ত্যাগ তিতিক্ষা সম্বন্ধে এক সুন্দর বক্তৃতা শুনাইয়া দিলেন।

চতুর কাঠিয়াবাবাজী কিন্তু ইতিমধ্যে এক চমৎকার কাঁদ পাতিয়া

বসিয়াছেন। বৈষ্ণব সাধুদের ডাকিয়া তিনি চুপি চুপি বলিয়া দিলেন, “তোমরা জেনে রেখো, আজ থেকে জমায়েতের ভোজনের ব্যাপারে ঋদ্ধি সিদ্ধি কিছুই ক্রিয়া আর হবে না—এক মূর্তির খোরাকও এসে পৌঁছুবে না। তোমরা যার যার সুবিধামত গ্রামের ভেতরে যাও, গৃহস্থদের কাছ থেকে ডাল, আটা, ঘি সংগ্রহ করে খাওয়া-দাওয়া সেরে নাও।”

ঘটিল ঠিক তাহাই। দিনের পর দিন চলিয়া যায়, গ্রামবাসীদের যেন কি হইয়াছে, তাহারা আর জমায়েতের জন্ত ব্যস্তসমস্ত হইয়া ভোজ্যদ্রব্য সংগ্রহ করিয়া আনে না। সাধুদের সকলেই গ্রামে গিয়া ভোজন সমাধা করিয়া আসে, কিন্তু কাঠিয়াবাবা মহারাজ ও পরমহংসজী আসন ছাড়িয়া বাহির হন না। তাহাদের সম্মুখে পূর্বের মত ভেট ইত্যাদিও আর উপস্থিত হয় না।

এদিকে পরমহংসজী দিনের পর দিন শুধুমাত্র জল পান করিয়া একেবারে অবসন্ন হইয়া পড়িয়াছেন। কাঠিয়াবাবার কিন্তু এদিকে কোন ক্রক্ষেপই নাই। ছিলিমের পর ছিলিম গাঁজা চরস উড়াইয়া তিনি পরম আনন্দে দিন কাটাইতেছেন।

পরমহংসজী কয়েকদিনের মধ্যেই ভাঙ্গিয়া পাড়লেন। ক্ষুধায় মৃতকল্প হইয়া একদিন তিনি বাবাজী মহারাজকে কহিলেন, “বাবা, আজ যে আমার প্রাণ যায়! তুমি গ্রাম থেকে শীগ্গির কিছু খাবার সংগ্রহ করে নিয়ে এসো, আমায় বাঁচাও।”

কাঠিয়াবাবা জোড়হস্তে সবিনয়ে কহিলেন, “মহারাজ, সোদন বৈরাগ্যতত্ত্ব বুঝাতে গিয়ে আপনি কিন্তু আমায় বলেছেন, কারুর কাছে কোন কিছু প্রার্থনা করা যাবে না। তবে আজ আবার আপনার এই বিরুদ্ধ মত কেন?”

পরমহংসজী ইতিমধ্যে একেবারে নরম হইয়া আসিয়াছেন। কাঠিয়াবাবাজীর নিকট নিজের অপরাধ স্বীকার করিয়া তিনি মার্জনা ভিক্ষা চাহিতে লাগিলেন।

বাবাজী মহারাজ এবার প্রসন্ন হইয়া কহিলেন, “মহারাজ আপনার আর কোন ভয় নেই। আজ এখনই গ্রামের গৃহস্থেরা বহুতর আহাৰ্য্য নিয়ে জমায়েতের সামনে উপস্থিত হচ্ছে। ঋদ্ধি সিদ্ধির ক্রিয়া আবার পূর্ববৎ হতে থাকবে। কিন্তু স্মরণ রাখবেন, বহিরঙ্গ ভাব দেখে বৈষ্ণব সাধকদের বিচার করা কখনো ঠিক নয়। এঁরা বড় চতুর— আর এঁদের লীলাও বড় গোপন, বড় চাতুর্য্যপূর্ণ। কোন্ বৈষ্ণব মূর্তিতে কোন্ সমর্থ পুরুষ অধিষ্ঠিত রয়েছেন, তা সকলের পক্ষে জানা তো সম্ভবপর নয়।”

অল্পকাল পরেই দেখা গেল, একদল গ্রামবাসী বহু সংখ্যক সাধুর উপযোগী আহাৰ্য্য নিয়া সকলকে দণ্ডবৎ করিতেছে।

এইরূপে নানা লীলা ও আনন্দরঙ্গের মধ্য দিয়া কাঠিয়াবাবার যোগৈশ্বর্য্য বহুস্থানে প্রকটিত হইত।

বৃন্দাবনে কেয়ারবন অঞ্চলে একটি পুরাতন বাগিচা ছিল। ইহার মালিকগণ আশ্রম প্রতিষ্ঠার উদ্দেশ্যে কাঠিয়াবাবাজীকে এটি ব্যবহার করিতে দিতে ইচ্ছুক হয়।

বাবাজী তখন যমুনাতীরে গঙ্গাজীর কুঞ্জে বাস করিতেছেন। প্রস্তাবটি শুনিয়া কহিলেন, “আমি যমুনাতীর ছেড়ে ওখানে এসে উঠতে পারি, যদি স্থানটি আমায় একেবারে দান করে দাও।”

মালিকরা রাজী হইল। ঐ বাগিচায় এক খড়ের ছাউনি করিয়া কাঠিয়াবাবা তাঁহার আশ্রম স্থাপন করিলেন, এই ক্ষুদ্র কুটিরের মধ্যেই এক ধুনী প্রজ্জ্বলিত করা হইল। ইহাই হইতেছে শ্রীবৃন্দাবনের বহুখ্যাত ১০০ স্বামী রামদাস কাঠিয়াবাবার নিজস্ব আশ্রমের সূচনা।

আশ্রমিকদের সংখ্যা তখন নিতান্ত সামান্য—শুধু গরীবদাস ও প্রেমদাস এই দুই চেলী, আর এই সঙ্গে রহিয়াছে গঙ্গা নাম্নী একটি পয়স্বিনী গাভী।

সেবক-শিষ্যদের সহিত বাবাজী মহারাজের যে সম্বন্ধ, এ গাভীটির সহিতও যেন তাঁহার সে সম্পর্ক ও যোগসূত্র বর্তমান। সে-বার প্রয়াগে কুস্তমেলা হইতেছে, কাঠিয়াবাবাজী ইহাতে যোগদান করিয়াছেন। সঙ্গে শিষ্যগণসহ আশ্রমের গাভী গজাও সেখানে সেদিন উপস্থিত। তখন মাঘ মাস, নদীর বালুকাসৈকতে শীতের প্রকোপ। একদিন প্রত্যাষে দেখা গেল, বাবাজী মহারাজ নগ্নকায় হইয়া বসিয়া আছেন, আর তাঁহার কন্মলটি জড়ানো রহিয়াছে গাভীটির অঙ্গে।

প্রভুপাদ বিজয়কৃষ্ণ গোস্বামী মহাশয়ের এক শিষ্য এ সময়ে কাঠিয়াবাবাকে দণ্ডবৎ করিতে আসিয়াছেন। বিস্মিত হইয়া জিজ্ঞাসা করিলেন, “মহারাজ, এ তীব্র শীতে আপনি শুধু শুধু এমন কষ্টভোগ কচ্ছেন কেন? গরুটির গায়েই বা নিজের কন্মল কেন চাপিয়েছেন? ওরা তো অনাবৃত থাকতেই অভ্যস্ত।”

উত্তর হইল, “বেটা দেখ্‌ছো তো, এবার কি প্রচণ্ড শীত পড়েছে। এ পশু মৌনী, মুখে কিছু বলতে পারে না। তাই তো আমাকে এর প্রতি এমন দৃষ্টি রাখতে হয়। তাছাড়া আমার তো ধুনী রয়েছে, গায়ে বিভূতি মাখানো আছে। তেমন কিছু শীত লাগে না।”

“কিন্তু বাবা, সুদূর বৃন্দাবন থেকে গরুটিকে আপনি অনর্থক এ কুস্তমেলায় টেনে এনেছেন কেন।”

“সে কি গো, আমি টেনে নিয়ে আসবো কেন? এর জন্ত আমাকে পায়ে হেঁটে কষ্ট করে আসতে হয়েছে—একলা এলে আমি তো রেলগাড়ীতে চড়েই বেশ আরামে আসতে পারতাম। কিন্তু এই গাভীটিই যে যত গোল বাধালো। সে আমার মুখের দিকে চেয়ে করুণভাবে বললে—‘বাবা, তুমি কুস্তমেলায় চলে যাবে, আর আমায় সঙ্গে করে নেবে না? তোমার সঙ্গে আমারও মেলায় যাবার বড় ইচ্ছে করছে।’ কি করি? বাধ্য হয়ে তাই ওকে সঙ্গে করে নিয়েই পদব্রজে আমাকে এতটা পথ আসতে হলো। এতে অবশ্য আমার নিজের তেমন কিছু কষ্ট হয়নি।”

মনুষ্য ও জন্তুজীবনের পার্থক্য এই সমদর্শী ব্রহ্মজ্ঞপুরুষের দৃষ্টি
এমনিভাবে বিলুপ্ত হইয়া গিয়াছিল।

শিষ্য গরীবদাস কাঠিয়াবাবা মহারাজের সেবায় প্রাণপাত পরিশ্রম
করিতেন। একনিষ্ঠ গুরুসেবার মধ্য দিয়াই অধ্যাত্মসাধনের উচ্চ স্তরে
তিনি উন্নীত হন। অথচ এ নিষ্ঠাবান সাধকের সঙ্গে কাঠিয়াবাবাজী
কম কঠোর ব্যবহার করিতেন না।

গরীবদাসের উপর আশ্রমের রন্ধনের ভার ছিল। দেখা যাইত,
বাবাজী মহারাজ তাঁহার অসাক্ষাতে হাঁড়িকুড়ি ও আহাৰ্য্য সমস্ত কিছু
ওলোট-পালোট করিয়া তারপর তাঁহাকে অযথা যানাক্রম তিরস্কার
করিতেছেন। প্রায়ই তিনি ছল করিয়া সমস্ত দোষ এই শিষ্যের ঘাড়ে
চাপাইতেন।

ব্রজ পরিক্রমার কালে গরীবদাসজীর সেবানিষ্ঠা ও ত্যাগ-তিতিক্ষা
দেখিয়া লোকে বিস্মিত হইয়া যাইত।

রৌদ্রতপ্ত সারা দুপুর ভরিয়া গরীবদাস বাবা মহারাজের তৈজস-
পত্রাদি স্নান করিয়া চলিয়াছেন। অথচ সারাদিন তাঁহার উপবাস,
একফোঁটা জলও পেটে পড়ে নাই। তারপর বেলা গড়াইয়া গেলে
বাবাজী মহারাজ ও সঙ্গীয় বৈষ্ণবদের জন্ত তিনি রান্নাবান্না সমস্ত কিছু
শেষ করিলেন।

ইহাই ধৈর্য্য পরীক্ষার উপযুক্ত সময়। কাঠিয়াবাবা তাই আহাৰে
বসিয়া এক মহা অনর্থের সৃষ্টি করিলেন। রুটি প্রস্তুত করিতে কোথায়
কি ত্রুটি হইয়াছে বলিয়া তীব্রভাবে তিরস্কার শুরু করিলেন। অশ্লীল
গালাগালির পালা শেষ হইল, তারপর লাঠি দিয়া গরীবদাসের
মস্তকে করিলেন প্রচণ্ড প্রহার।

এত কিছুতেও কিন্তু শিষ্যের ধৈর্য্যচূতি ঘটে নাই। গুরুর চরণ
ধরিয়া কাঁদিয়া কহিলেন, “মহারাজ, অপরাধ সবই আমার, তাতে
সন্দেহ নেই। কৃপা করে আমায় এবার ক্ষমা করুন।”

বাহিরের এ উদ্ভা কিন্তু বাবাজীর অন্তরের প্রেমবন্ধনকে বিন্দুমাত্র শিথিল করে নাই। প্রহার করার পর গরীবদাসজীর আর্তি দেখিয়া দুই তিন দিন নিজে আহাৰ গ্রহণ করিতে পারেন নাই।

এ সম্পর্কে তিনি বলিয়াছেন, “গরীবদাস এই শেষ পরীক্ষায় উত্তীর্ণ হওয়ার পর আমি তার প্রতি সেদিন অত্যন্ত প্রসন্ন হলাম। বুঝলাম, গুরুর কাছ থেকে বর লাভ করার সময় তার এসে গিয়েছে। আমি এবার তাকে বরদান করবো। কিন্তু তারপর ভেবে দেখলাম, এমন পরম শান্তি সে নিজের ভেতর খুঁজে পেয়ে গিয়েছে যে, তাকে আর এ দুঃখময় সংসারে রেখে ক্লিষ্ট ও তাপিত করা কেন? বৈকুণ্ঠ পাওয়ার উপযুক্ত সে হয়েছে। তবে বৈকুণ্ঠ চলে যাক না কেন? অশ্রু বর দিয়ে আর কি হবে?”

সদগুরু সেদিন ভক্ত গরীবদাসের পরম প্রাপ্তি ও বৈকুণ্ঠ গমনকে বিলম্বিত করিতে চাহেন নাই। শিষ্যও পরম আনন্দে তাই লোকান্তরে চলিয়া গেলেন।

শিষ্যদের প্রতি কটুবক্যে ও কঠোরতায় যে গুরুর প্রেম প্রকাশ পায়, সংসারের সাধারণ মানুষ কিন্তু তাহা সহজে বুঝতে চাহিবে না। বাবাজী মহারাজের প্রধান চেলা সন্তদাস মহারাজ একবার এ সম্পর্কে তাঁহাকে প্রশ্ন করেন। বড় চমৎকার উত্তর শোনা যায়।

তিনি বলেন, “বাবা, এতেই যে সত্যিকারের প্রেম, কল্যাণবহু প্রেম প্রকাশ পায়। গুরু গালিগালাজ ও প্রহার দেন চিত্তকে নিৰ্ম্মল করবার জন্য, ক্রোধ ও অভিমানের মূলোৎপাটনের জন্য। অথচ দয়াল গুরু এজন্য নিজে নিতান্ত কঠোর ও অত্যাচারী বলেই পরিচিত হন। শিষ্যের প্রতি প্রেমের জন্যই এ ছন্দামের বোঝা তিনি মাথায় তুলে নেন না কি?”

এসব কথা বলিতে গেলে এসময়ে স্থায়ী গুরুর স্মৃতি মনে পড়িত, আর কাঠিয়াবাবা মহারাজের চোখ ছল ছল করিয়া উঠিত। ভাব-গদগদ কণ্ঠে তিনি বলিতেন, “আমার গুরুজী ছিলেন পরম দয়াল।

তাঁর কোন মোহ ছিল না। শিষ্যের ওপর, ছিল নির্মল কল্যাণকর প্রেম। জেনে রেখো, প্রেম ও মোহ এক বস্তু নয়।”

কাঠিয়াবাবাজীর অন্যতম ভক্ত প্রেমদাসজীকে নিয়া একবার বড় গোল বাধিল। কোন এক পণ্ডিত সভায় গিয়া ধর্মশাস্ত্রের জ্ঞানমার্গীয় ব্যাখ্যা দি শুনিয়া প্রেমদাস ভক্তিপথ হইতে কিছুটা বিচ্যুত হইয়া পড়িলেন। জ্ঞানী ও স্বাতন্ত্র্যবাদী পুরুষের মত তখন তাঁহার মনোভঙ্গী। খাড়াখাড়া সম্বন্ধে নিয়ম নির্ণায় প্রয়োজনীয়তা তিনি আর মানিতে চাহেন না। সর্বভূতেই তো ব্রহ্ম বিরাজমান, তবে ব্যক্তি বিশেষকে বা বিগ্রহ বিশেষকে শ্রদ্ধা করার দরকার কি—এই শ্রেণীর নানা উক্তি করিয়াও তিনি বেড়ান।

শিষ্যের এ ধরনের কথাবার্তার প্রতি কাঠিয়াবাবার দৃষ্টি আকর্ষণ করা হইল। তিনি শুধু সংক্ষেপে কহিলেন, “ওর কথা আর কি শুনবো, ওতো একেবারে পাগলই হয়ে গিয়েছে।”

বাবাজী মহারাজের মুখ হইতে এই কথা কয়টি নির্গত হইবার সঙ্গে সঙ্গেই কিন্তু প্রেমদাসজীর মধ্যে উন্মাদের লক্ষণ প্রকাশ পায়। আহা! নাই নিদ্রা নাই, দিবারাত্র তিনি বনে-জঙ্গলে ঘুরিয়া বেড়ান আর উন্মত্তভাবে চিৎকার করেন।

পথে চলিতে চলিতে গরীবদাসজী সেদিন এ হতভাগ্য গুরু-ভ্রাতাকে বড় শোচনীয় অবস্থায় দেখিতে পান। বাবাজী মহারাজের নিকট তাঁহাকে ধরিয়া আনিয়া মিনতির সুরে বলিতে থাকেন, ‘মহারাজ, প্রেমদাস নিতান্তই আপনার এক বালক ছেলে—বাল গোপাল। এর প্রতি আপনি কৃপা করুন। এই উন্মাদ রোগের আক্রমণ থেকে একে রক্ষা করুন।’

অনুরোধটি শুনিয়া প্রথমে তো কাঠিয়াবাবা অগ্নিশর্মা! উত্তেজিত কণ্ঠে কহিতে লাগিলেন,—তিনি তো আর চিকিৎসক নহেন, এসব রোগীর ভার তাঁহার উপর তবে চাপানো কেন?

কিন্তু গরীবদাসজীর করুণ আবেদন অবশেষে তাঁহাকে টলাইয়া দিল। এবার অনেকটা কোমল হইয়া তিনি বলিলেন, “বেশ তাই হোক্। ভজন কুঠিরের ঐ কোণে ঠাকুরের প্রসাদ রাখা হয়েছে, তাই ওকে খাইয়ে দাও। ব্যাধির কবল থেকে হতভাগা এখনই মুক্তিলাভ করবে। ও অবশ্য ঠাকুরের প্রসাদের মাহাত্ম্য কিছুদিন যাবৎ মান্ছে না। তবু, ওকে খাইয়ে দেখিয়ে দাও—সত্যই মাহাত্ম্য কিছু আছে কিনা।”

ঐ প্রসাদ প্রেমদাসজীর মুখে তখনই তুলিয়া দেওয়া হইল। কিন্তু উন্মাদ প্রেমদাসের জিহ্বায় এ আশ্বাদ তখন কেন যেন বড় তিক্ত লাগিতেছে, সামান্য একটু গ্রহণ করিবার পর তিনি আর ইহা খাইতে রাজী নন।

কাঠিয়াবাবা তাঁহার দিকে কিছুক্ষণ একদৃষ্টে তাকাইয়া থাকিয়া দৃঢ়স্বরে কহিলেন, “ওরে খা—খা। তুই আর একবার চাখ্, এর স্বাদ কি রকম।”

প্রেমদাসজী ধীরে ধীরে ঐ প্রসাদ গ্রহণ করিতে লাগিলেন। এবার কিন্তু তাঁহার মনে হইল ইহার স্বাদ অমৃতোপম। সমগ্র ভোজন পাত্রটি নিঃশেষিত হইবার সঙ্গে সঙ্গে দেখা গেল, ভক্ত প্রেমদাসের উন্মাদ রোগ একেবারে সারিয়া গিয়াছে।

স্মিতহাস্যে কাঠিয়াবাবা কহিলেন, “ওরে, তুই না কত বলে বেড়াতিস্ সব বস্তুই সমান? কেমন, এবার প্রসাদের মাহাত্ম্য ও তার বৈশিষ্ট্য তো দেখলি? এজন্যই বৈষ্ণবদের এত শুদ্ধাচার, এই জন্যই তাঁরা এত পবিত্র হয়ে শ্রীঙ্গীর ভোগ দেন। অপর খাড়ের সঙ্গে এর কি কোন তুলনা হয় রে? এমন বস্তুর মাহাত্ম্য সবাই বুঝবে কি করে বল্।”

শিষ্যদের উপর মহারাজের দৃষ্টি ছিল তীক্ষ্ণ ও সতত সজাগ। ইঁহাদের রূপান্তর সাধনের প্রয়োজনে নানা অলৌকিকত্বের মধ্য

দিয়াও তাঁহার করুণা-লীলা বিস্তারিত হইত। প্রেমদাসজীর মৌনী জীবনের অধ্যায়কে কেন্দ্র করিয়া ইহার এক অপূর্ব নিদর্শন এক সময়ে দেখা গিয়াছিল।

এই সেবক শিষ্যটি সৎ ও ধর্মনিষ্ঠ হইলেও কিছুটা কোপনস্বভাব ছিলেন। বিশেষতঃ গঞ্জিকা-চরম টানিবার পর তাঁহার ক্রোধের মাত্রা খুবই বাড়িয়া যাইত। একদিন নেশার ঘোরে প্রতিবেশী কয়েকটি ব্রজবাসীকে তিনি যথেষ্টভাবে গালিগালাজ করিতে থাকেন।

মহারাজ তাঁহাকে নিকটে আহ্বান করিয়া কহিলেন, “ওরে, তোর ক্রোধটা বড় বেশী, তুই লোকের সঙ্গে কেবলই ঝগড়া করিস। আজ থেকে মৌনী থাকবি। কারুর সঙ্গে তুই বারো বৎসরের মধ্যে কথা বলবিনে।”

উত্তরকালে মৌনীজী বলিতেন—বাবাজী মহারাজ এ কথা কয়টি বলিবার সঙ্গে সঙ্গে কে যেন তাঁহার জিহ্বাতে তাল লাগাইয়া দিল, আর তাঁহার একটি কথা বলিবারও শক্তি রহিল না। বাধ্য হইয়াই তাঁহাকে সেই সময় হইতে বারো বৎসর কাল মৌনী থাকিতে হয়। মৌনীজী নামেই এষ্ট সাধক শ্রীবৃন্দাবনে প্রসিদ্ধি লাভ করেন।

একবার এক বিষাক্ত সর্প মৌনীজীকে দংশন করে। বিষ্ময়ের বিষয়, বিষের জ্বালায় অস্থির হইয়া পড়িলেও কাঠিয়াবাবার এই শিষ্যের মুখ হইতে যন্ত্রণাসূচক একটি বাক্যও এসময়ে নির্গত হয় নাই। ইহার এই মৌনব্রতের বারো বৎসর অতিক্রান্ত হইলে বাবাজী মহারাজ এক ভাণ্ডারার অনুষ্ঠান করিলেন।

আশ্রমভবনে কয়েক শত ব্যক্তি সেদিন নিমন্ত্রিত। মৌনীজীকে তাঁহারা কহিতে লাগিলেন, “মৌনীজী, আজ তোমার ব্রত সম্পূর্ণ হয়েছে, তুমি সকলের সঙ্গে এবার কথা কও।”

কিন্তু বলিলে কি হইবে? একটি বর্ণ উচ্চারণেরও সামর্থ্য তাঁহার কোথায়? বারো বৎসর আগে, আদেশ প্রদানের সঙ্গে সঙ্গে গুরুজী

তাঁহার বাক্যরোপ করিয়া দিয়াছে, শব্দোচ্চারণের সমস্ত ক্ষমতাই লোপ পাইয়া গিয়াছে।

মৌনীজী ইঙ্গিত দ্বারা সকলকে জানাইলেন, বাবা মহারাজ যদি কৃপা করিয়া বাকশক্তি প্রদান করেন, তবে তাঁহার পক্ষে কথা সম্ভবপর, নতুবা নয়।

এবার কাঠিয়াবাবাজী নিজে আদেশ দিলেন, “মৌনী, তোমার ব্রত উদযাপিত হয়েছে। তুমি কথা বল।”

মৌনীজীর বোধ হইল, কে যেন তাঁহার জিহ্বার কুলুপটি এই মুহূর্ত্তে খসাইয়া দিয়া গেল। বাক্‌ক্ষুর্তি হওয়ার সঙ্গে সঙ্গে তিনি বলিয়া উঠিলেন, ‘শ্রীজী’। ইহার পর নিতান্ত স্বাভাবিকভাবেই সকলের সঙ্গে তিনি কথাবার্তা বলিতে থাকেন।

এক সময়ে মৌনীজী অভিমানভরে কিছুদিনের জন্য কাঠিয়াবাবা মহারাজের সান্নিধ্য পরিত্যাগ করেন। কিন্তু শীঘ্রই অনুশোচনা ও দুশ্চিন্তায় তাঁহার অন্তর দগ্ধ হইতে থাকে। আশ্রমের কাজ কিরূপে চলিতেছে, বাবাজী মহারাজের সেবাই বা কি করিয়া সম্পন্ন হইতেছে—এই সমস্ত ভাবনা তাঁহাকে পাইয়া বসে। মৌনীজী ইহার পর অনুতপ্ত হৃদয়ে আশ্রমে ফিরিয়া আসেন।

বাবাজী মহারাজ এ সময়ে আসনের উপর শয়ন করিয়া বিশ্রাম করিতেছেন। মৌনীজী তাঁহার সান্নিধ্যে আসিয়া বসিয়া ধীরে ধীরে তাঁহার পদসেবা করিতে লাগিলেন। অনুতপ্ত সেবক শিষ্যের নয়ন দুটি অশ্রুভারাক্রান্ত।

বাবাজী তখন এক অপরূপ লীলাভিনয় শুরু করিলেন। ধীর করুণ কণ্ঠে শিষ্যকে কহিতে লাগিলেন, “ওরে আমি বুড়ো হয়েছি, তুই আমার কাছে আর থাকবি কেন? আমি কষ্ট পেয়ে মরে যাবো, তারপর তুই আশ্রমে ফিরে আসবি।”

মৌনীজীর নয়ন হইতে তখন দরদর ধারে অশ্রুধারা ঝরিয়া

পড়িতেছে। এক হাতে চোখের জল মুছিয়া আবার এক হাতে তিনি গুরুজীর চরণসেবা করিয়া চলিয়াছেন।

কিন্তু এ কি অলৌকিক কাণ্ড ! তিনি সবিস্ময়ে দেখিলেন, তাঁহার হস্ত তো বাবাজীর চরণের উপর পড়িতেছে না ! শূন্য শয্যায়ই তাহা বারবাব নিপতিত হইতেছে। বাবাজী মহরোজের দেহটি শয্যা হইতে কোথায় অন্তর্হিত হইয়াছে ! বিস্ময়ের ভাব কাটিয়া গেলে শিষ্যের হৃদয়ে কান্নার ঢেউ উঠিল। গুরুজীর আকস্মিক অন্তর্দানে মুহূর্ত্তান হইয়া তিনি অবিরল অশ্রুপাত করিতে লাগিলেন।

কিছুক্ষণ অতিক্রান্ত হইবার পর আবার এক নূতনতর বিস্ময় ! মৌনীজী দেখিলেন, গুরুমহারাজের দেহ পুনশ্চ শয্যায় ফিরিয়া আসিয়াছে। পূর্ববৎ বিশ্রাম-শয়নে নিশ্চলভাবে তিনি শায়িত।

এইবার কাঠিয়াবাবা তাঁহাকে উদ্দেশ্য করিয়া অভিমানভনে কহিতে লাগিলেন, “কেমন রে ? আমি এভাবে চলে গেলে তুমি যদি খুশী হোস্ তবে বল, আমি চলেই যাই ! এ বুড়োকে ছেড়ে তো .। অন্যত্র গেলে—দেহটাকে কে সেবা-শুশ্রূষা করবে বল দেখি ?”

মৌনীজী নির্বাক বিস্ময়ে শ্রীগুরুকে পবিত্রমণ করিয়া তাঁহার সম্মুখে সাষ্টাঙ্গে প্রণত হইলেন। বুঝিলেন, মহাসমর্থ গুরুদেবের স্বরূপ ও তাঁহার লীলার তাৎপর্য বুঝিবার মত সামর্থ্য তিনি এতটুকুও অর্জন করেন নাই।

কাঠিয়াবাবাজীর শ্রেষ্ঠ শিষ্য ও মানস-সন্তান ছিলেন সন্তদাস মহারাজ। এই শিষ্যের জীবনেও মহাকারণিক গুরুর অজস্র কৃপার ধারা বর্ষিত হয়, অলৌকিক যোগবিভূতির বহুতর লীলা নানাক্ষেত্রে নানারূপে প্রকটিত হইয়া উঠে।

সন্তদাস মহারাজের পূর্বব্রতের নাম তারাকিশোর চৌধুরী। কলিকাতা হাইকোর্টের তিনি ছিলেন একজন লক্ষপ্রতিষ্ঠ আইনজীবী। আধ্যাত্মিক জীবনের পরম প্রাপ্তির আকাঙ্ক্ষা তাঁহার জীবনে এক

সময়ে উদগ্ৰ হইয়া উঠে, সর্বস্ব ত্যাগ করিয়া তিনি কাঠিয়াবাবাজীর চরণে আশ্রয় নিয়া ধন্য হন।

তারাকিশোরবাবু তখনও কলিকাতায় আইন ব্যবসায়ে ব্যাপৃত। ইতিমধ্যে শুধু দুই একবার বাবাজী মহারাজের সহিত তাঁহার সাক্ষাৎ হইয়াছে, দীক্ষা গ্রহণ তখনো হয় নাই।

মহাপুরুষ তাঁহাকে রাত্রির চতুর্থ প্রহরে ধ্যান করিতে বলেন। কিন্তু পূর্ব অভ্যাস বশতঃ সে সময়ে তারাকিশোরবাবুর পক্ষে জাগিয়া উঠা বড় কঠিন হয়। একদিন ঘরের ভিতর জানালার ধারে মশারি টাঙাইয়া তিনি নিদ্রিত রহিয়াছেন। শেষরাত্ৰিতে ঘুমন্ত অবস্থায় তিনি শুনিলেন, কে যেন তাঁহাকে ডাকিয়া উচ্চ স্বরে বলিতেছে, “ওরে ওঠ, ওঠ।” সঙ্গে সঙ্গেই তাঁহার শরীরের উপর একটি ইষ্টকখণ্ড পতিত হইল।

তারাকিশোরবাবু চমকিত হইয়া উঠিয়া বসিলেন। শয্যা হইতে টিলটি কুড়াইয়া নিয়া তাঁহার বিস্ময়ের সীমা রহিল না। মশারির কোথাও কোন ফাঁক নাই, অথচ এই ইষ্টকখণ্ড কোথা হইতে উহার ভিতর দিয়া গিয়া তাঁহাকে স্পর্শ করিল, তাহা মোটেই বুঝিতে পারিলেন না। নির্দেশিত সময়ে ভক্ত তাহার কর্তব্য পালন করিতেছে না—অতন্দ্র-দৃষ্টি, সমর্থ যোগীপুরুষ কি সেইজন্যই তাঁহাকে সাহায্য করিতে আসিয়াছিলেন?

এ ঘটনার পর হইতে রাত্রির শেষ যামে জাগরিত হইয়া সাধন-ভজন করিতে তারাকিশোরবাবুর আর ভুল হয় নাই।

বাবাজী মহারাজের করুণাধারা এই মুমুক্শু সাধকের উপর নানা লীলা-বৈচিত্র্যের মধ্য দিয়া মাঝে মাঝে আত্মপ্রকাশ করিত। সন্তদাস মহারাজ ইহার এক মনোরম কাহিনী বিবৃত করিয়াছেন—“এক দিবস ছাদের উপর শুয়াইয়া আছি; শেষরাত্রে আমার নিদ্রা ভঙ্গ হইল। উঠিয়া বসিলাম এবং বসিবামাত্র দেখিলাম যেন আকাশ ভেদ করিয়া শ্রীযুক্ত বাবাজী মহারাজ আমার দিকে অগ্রসর হইতেছেন।

মুহূর্ত মধ্যে তিনি আমার সম্মুখে ছাদের উপর আসিয়া দণ্ডায়মান হইলেন এবং আমাকে আশ্বস্ত করিয়া তখনই একটি মন্ত্র আমার কর্ণকুহরে উপদেশ করিলেন। মন্ত্রোপদেশ করিয়া তিনি আকাশপথে উড্ডীন হইয়া ক্ষণকাল মধ্যেই অদৃশ্য হইয়া পড়িলেন।”

কলিকাতায় থাকিতে তারাকিশোরবাবু একবার জ্বরে আক্রান্ত হন। রোগ কমিবার তো কোন লক্ষণই নাই, বরং তাহা কেবল বৃদ্ধির পথেই চলিয়াছে। এই সময়ে তাঁহার এক অদ্ভুত খেয়াল হইল। তিনি ভাবিলেন, ‘বাবাজী মহারাজ তো সর্বদাই গাঁজা সেবন করেন আর তাতেই তিনি পরম প্রীত হন। তবে তাঁকে গাঁজাই ভোগ দিই না কেন? তারপর তাঁর সেই প্রসাদী ছিলিম পান করলে নিশ্চয়ই জ্বর নিরাময় হবে।’

অতঃপর বাজার হইতে নূতন কল্কে ও গাঁজা আনিয়া ছিলিম সাজিয়া তাহা নিবেদন করা হইল।

কি জানি কেন, ঐ গাঁজার ছিলিমটির দিকে তাকাইয়া তারাকিশোরবাবুর মনে হইল, গুরুজী উহা পান করিতেছেন। কল্কে হইতে তখন সত্যি বৈশাখ ধূম নির্গত হইতেছিল। কিছুক্ষণ পর তিনি ঐ প্রসাদী গাঁজা নিজে পান করিলেন। বিষ্ময়ের কথা, অল্প সময়ের মধ্যেই তাঁহার জ্বর ত্যাগ হইয়া গেল।

কিছুদিন পরের কথা। তারাকিশোর বৃন্দাবনের আশ্রমে কাঠিয়াবাবাজীর সঙ্গে সাক্ষাৎ করিতে আসিয়াছেন। সেদিন বাবাজী মহারাজ কয়েকজন ব্রজবাসীর সহিত বসিয়া সানন্দে গঞ্জিকা সেবন করিতেছেন। কিছুকাল পরে তিনি অপর প্রকোষ্ঠ হইতে তারাকিশোরবাবুকে ডাকাইয়া আনিলেন, “কই হে এসো, এবার তুমি এ প্রসাদী ছিলিম নিয়ে পান করে ফেল।”

একজন ব্রজবাসী সহাস্ত্রে জিজ্ঞাসা করিলেন, বাবুজীও কি গঞ্জিকায় অভ্যস্ত? কাঠিয়াবাবাজী চতুর হাসি হাসিয়া কহিতে লাগিলেন,

“না, বাবুজী গাঁজা বড় একটা খায় না, তবে জ্বরে আক্রান্ত হলে কখনো কখনো বাবা মহারাজকে স্মরণ করে গাঁজার ভোগ দেয়, তারপর অবশ্য সেই প্রসাদটুকু ভক্তিভরে গ্রহণ করে থাকে।”

তারাকিশোরবাবু উপলব্ধি করিলেন, সর্বজ্ঞ গুরুদেবের নিকট তাঁহার কোন কিছুই অবিদিত থাকে না। তাছাড়া, ইহাও বুঝিলেন, কলিকাতায় থাকাকালীন যে গঞ্জিকা-ভোগ তিনি নিবেদন করেন বাবাজী মহারাজ তাহা সত্যসত্যই গ্রহণ করিয়াছেন।

আশ্রয় দানের পর সদৃশ্যকে শিষ্যের অনেক ভারই বহন করিতে হয়—কাঠিয়াবাবা মহারাজের বেলাতেও তাহার ব্যতিক্রম হয় নাই। একবার তারাকিশোরবাবু কস্মোপলক্ষে শহরের বাহিরে গিয়াছেন। কলিকাতায় তাঁহাদের পাড়ায় সে সময়ে চোরের বড় উপজব। গৃহে এসময়ে লোকজন মোটেই নাই। তাই তাহার স্ত্রী রাত্রিবেলায় বড় ভয়ে ভয়ে থাকিতেন।

তখন প্রচণ্ড গ্রীষ্মের কাল। কিন্তু এত গরমেও তারাকিশোরবাবুর স্ত্রী সাহস করিয়া রাত্রিতে দরজা-জানালা খুলিতে পারেন না। একদিন রাত্রিতে গরমে অতিষ্ঠ হইয়া তিনি ঘরের একটি জানালা খুলিয়া দিলেন। সঙ্গে সঙ্গে বিস্মিত হইয়া দেখিলেন, বাতায়নের অদূরে বাবাজী মহারাজ সহাস্ত্রে দণ্ডায়মান।

মধুর কণ্ঠে বাবাজী বলিয়া উঠিলেন, “মার্জ, তোমার এত ভয় কেন, বল তো? আমি তো সদাই তোমার সঙ্গে সঙ্গে থাকছি।”

পরক্ষণেই দিব্যমূর্তিটি ঐকান্তিক হইয়া গেল।

আপাতকণ্ঠের ও রহস্যময় কাঠিয়াবাবা মহারাজের বহিরঙ্গ আচরণ ছিল বড় ছরবগাহ। আগন্তুক ও স্বল্প পরিচিত লোকের পক্ষে তাঁহার প্রকৃত স্বরূপ অবগত হওয়া কোনমতেই সম্ভব ছিল না। করুণাপরবশ হইয়া বাবাজী মহারাজ যখন নিজের রহস্যাবরণ উন্মোচন করিতেন, তখনই শুধু তাহা সাধারণের বোধগম্য হইত।

কাঠিয়াবাবাজীর বৃন্দাবন আশ্রমে শ্রীরাধাবিহাজীর প্রতিষ্ঠার সময়ে এক বিচিত্র ঘটনা ঘটে। বহু লোক সেদিন এ উৎসব উপলক্ষে প্রসাদ প্রাপ্ত হয় এবং তারপরও প্রচুর লাড্ডু ও কচুরী ভাণ্ডারে জমা থাকে। রাত্রিতে হঠাৎ আরও বহুসংখ্যক সাধু আসিয়া আশ্রম প্রাঙ্গণে আহারার্থ সমবেত হয়। কিন্তু বাবাজী মহারাজ উহাদের দেখিয়াই কেন যেন উগ্রমূর্তী ধারণ করেন। নিশ্চয়মভাবে তিরস্কার করিয়া এই আগন্তুকদের তিনি সেদিন বিতাড়িত করিলেন।

কাঠিয়াবাবাজীর অন্ততম শিষ্য, অভয়চরণ রায় সেখানে দাঁড়াইয়া ছিলেন। অভ্যাগত সাধুদের প্রতি বাবাজী মহারাজের এরূপ ব্যবহার তাঁহার চোখে বড় অযৌক্তিক ও রূঢ় ঠেকিল। মনে মনে ভাবিলেন ‘গুরু মহারাজের এ আচরণ মোটেই ন্যায়সঙ্গত নয়, বিসদৃশও বটে! ভাণ্ডারে তো বহু খাদ্যই বেশী হইয়াছে, তবে এই সাধুদের কিছু কিছু বিতরণ করিতে বাধা কোথায়?’

অন্তর্যামী বাবাজী মহারাজ শিষ্যের অন্তরের কথা সবই জানিয়াছেন, কিন্তু সে সময়ে এ সম্বন্ধে কোন উচ্চবাচ্য করেন নাই।

দিনান্তের কার্যশেষে অভয়বাবুকে তিনি নিজের ধুনির পার্শ্বে আহ্বান করিলেন। গঞ্জিকার কল্কেটিতে টান মারিয়া ধীরে ধীরে কাঠিয়াবাবা মহারাজ শিষ্যকে বালিতে লাগিলেন, “অভয়, তুমি ভাবছো—এ সাধুদের আমি খাবার না দিয়ে কেন তাড়িয়ে দিইয়াছি। বাবা, তুমি নিতান্ত বাণক, একেবারে জ্ঞানহীন। কিছু বোঝবার মত সামর্থ্য তোমার এখনও হয়নি। তুমি জানো না, ওরা কেউ সত্যিকারের সাধু নয়, সাধুবেশধারী মাত্র। ক্ষুধার্তও ওরা নয়, ভোজন ওদের আগেই হয়েছে—এখানে এসেছিল শুধু সঞ্চয়েব জন্ত। আর এজন্য তুমি মোটেই খেদ করো না। যথার্থ ক্ষুধার্ত সাধু কিছুক্ষণ বাদেই আশ্রমে এসে পৌঁছাবে—খুব তৃপ্ত করে তাঁদের ভোজন করাও।”

সত্যই তাহা ঘটিল। অল্প সময়ের মধ্যে সেখানে একদল সাধু দর্শন দিলেন। অভয়বাবু জিজ্ঞাসাবাদ করিয়া জানিলেন, ইহারা নিষ্কিঞ্চন এবং সাধননিষ্ঠ সাধু, আর সত্যসত্যই ক্ষুধার্ত।

এক দরিদ্র ও অসহায় ব্রাহ্মণকে কাঠিয়াবাবাজী আশ্রমে আশ্রয় দান করেন। লোকটি দুরন্ত হাঁপানী রোগে ভোগে, প্রায়ই তাঁহাকে এজ্ঞ কষ্ট পাঠিতে হয়। এই ব্যাধির তাড়নায় বিব্রত থাকিয়াও সে আশ্রমের বহু কার্য সম্পন্ন করে।

একদিন ব্রাহ্মণটি অত্যন্ত অসুস্থ হইয়া ধূনীর সম্মুখে বসিয়া কেবলই ধুঁকিতেছে। বাবাজী মহারাজ হঠাৎ সেখানে উপস্থিত হইয়া তাহাকে নিষ্ঠুরভাবে তিরস্কার করিতে লাগিলেন - “কেন তুই শুধু শুধু এখানে পড়ে আছিস। পেটের জন্ম যারা বৈরাগী, তাদের স্থান এখানে নেই। কোন কাজ না করে, বসে বসে শুধু সাধুর অন্ন ধ্বংস করিস, এতে কি তোর লজ্জা হয় না? যা, এখনই তুই আশ্রম থেকে বেরিয়ে যা!”

পূর্বোক্ত অভয়চরণ এবং তারাকিশোর তখন ঘটনাস্থলে উপস্থিত ছিলেন। উভয়েই এ দৃশ্য দেখিয়া বড় মনক্ষুণ্ণ হইলেন। অভয়বাবুর চোখেমুখে বিরক্তির চিহ্ন পরিস্ফুট হইয়া উঠিল। ব্রাহ্মণটি এষাবৎকাল সাধ্যমত আশ্রমের সেবা করিয়াছে। এখন সে রোগে পঙ্গু, ভগ্ন স্বাস্থ্য। এ অবস্থায় সত্যই আশ্রম হইতে বাহির করিয়া দিলে তাহার কি উপায় হইবে? অভয়বাবুর কাছে এট নিতান্তই হৃদয় হীনের কাজ বলিয়া মনে হইল।

কক্ষান্তরে গিয়া তিনি নিঃশব্দে বিষণ্ণবদনে বসিয়া আছেন। এমন সময় কাঠিয়াবাবা মহারাজ সেখানে আসিয়া উপস্থিত। সন্মুখে তাহাকে বলিতে লাগিলেন, “অভয়রাম, তুমি নিতান্তই এক বালক। আসল ব্যাপার যে কি, তাহা তুমি কি করে বুঝবে? আমার আজকের এ নিষ্ঠুর আচরণের গূঢ় অর্থ রয়েছে। ব্রাহ্মণটি বড় সজ্জন, সাধনারও

সে একজন প্রকৃত অধিকারী। আগে বড় বেশী দুঃখ দুর্দশায় ছিল, সব সময়ে অশ্রুভাবে বিব্রত থাকায় ভগবানের নাম রীতিমত করা তার পক্ষে সম্ভব হতো না। আমি তাই তার অধ্যাত্মপথের বাধাটি সরিয়ে দিয়েছিলাম—আশ্রমের আশ্রয় পেয়ে তার ভজনের সুযোগ ঘটেছিল। কিন্তু দেখছি, অতি সহজে ভোজন পাবার পর প্রকৃত যে কাজ, সেই ভজনকেই সে ভুলে গিয়েছে। এসময়ে আশ্রম বাস করলে তার ভজনকার্যে বিঘ্ন ঘটবে, অধ্যাত্ম-জীবনের খুবই ক্ষতি হবে। এখান থেকে তাড়াতাড়ি বিতাড়িত হলেই সে প্রকৃত কল্যাণকে এবার খুঁজে পাবে, নিরাশ্রয় অবস্থায় পড়ে আবার কাতর হয়ে সে ভগবানকে ডাকবে। ভজন সাধন ঠিক চলতে থাকলে তবে তো তার মুক্তি আসবে? তুমি বালক, এত কথা কি করে বুঝবে? প্রকৃত কল্যাণের যে পথ, তা তো তোমার মোহাচ্ছন্ন দৃষ্টি দিয়ে বোঝা সম্ভব নয়।”

কথাগুলি শুনামাত্রই অভয়বাবুর ভ্রম দূর হইল, তিনি বড় লজ্জিতও হইলেন। বুঝিলেন, তাহার সীমিত দৃষ্টি দ্বারা লোকোত্তর মহাপুরুষের আচরণকে বিচার করিতে গিয়া ধৃষ্টতারই পরিচয় তিনি দিয়াছেন।

মনুষ্যজীবনের প্রকৃত কল্যাণ বলিতে কাঠিয়াবাবা মহারাজ একমাত্র অধ্যাত্ম-জীবনের বিকাশ ও পরিণতিকেই বুঝিতেন। জৈব জীবনের আশা-আকাঙ্ক্ষার পরিপূর্তি, জাগতিক জীবনের সুখসম্পদ, এসব ছিল এই মহাজ্ঞানী পুরুষের দৃষ্টিতে একেবারে অর্থহীন। কোন মানবের জীবনে ভগবৎ-সত্তার স্ফুরণ না হইলে উহাকে তিনি ‘বন্ধা’-জীবনের মতই নিষ্ফল বলিয়া গণ্য করিতেন।

বাবাজী মহারাজ একদিন শিষ্যগণসহ আশ্রমে বসিয়া রহিয়াছেন। কথাপ্রসঙ্গে তিনি বলিলেন, “পরোপকারকে ওয়াস্তে সম্বন্ ধরে শরীর।”

এ কথার তাৎপর্য বুঝাইতে গিয়া এক প্রতিবেশী প্রাচীন সাধু, কল্যাণদাসজীর কথা উঠিল। কেমারবনের দাবানলকুণ্ডের নিকটস্থ এক আশ্রমের ইনি মোহান্ত। বহু অভ্যাগত সাধু-সন্ত ইহার নিকট সর্বদা আশ্রয় পায়। তাছাড়া, পরোপকারী ও দাতা বলিয়া প্রসিদ্ধিও যথেষ্ট রহিয়াছে।

কাঠিয়াবাবাজী কিন্তু সকলকে বিস্মিত করিয়া দিয়া কহিলেন, “সাধুদের অন্তর্থেই যে প্রকৃত উপকার তা কিন্তু মোটেই এ শ্রেণীর নয়। এ তো নিতান্ত সামান্য বস্তু। এ উপকার পেয়ে উপকৃত ব্যক্তির কল্যাণ যা হয়, তা খুবই তুচ্ছ। কারণ, পারমার্থিক সম্পদ তো এর ভেতর দিয়ে কখনো আসে না। তাছাড়া, উপকারী ব্যক্তি বা দানব্রতী কৰ্ম্মকর্তাকে এজন্ম আবার জন্মগ্রহণ করতে হয়। পরজন্মে তাঁর বিষয়বৈভব, মানসসম্মান প্রভৃতি হয়তো অনেক কিছু হয়। প্রকৃত মহাত্মারা কিন্তু এ শ্রেণীর হিতকর্মে কখনো লিপ্ত হন না, তাঁরা বরং জীবের দুঃখতাপের মূলকে বিনাশ করেন—আর এ ধরনের উপকারই নিয়ে আসে মানবের প্রকৃত কল্যাণ। এজন্মই এসব মহাত্মাদের কৰ্ম্মপ্রণালী ও তার মৰ্ম্ম পৃথিবীর সাধারণ লোক সহজে বুঝে উঠতে পারে না।”

অভয়চরণ রায় মহাশয় বাবাজী মহারাজের অন্যতম শিষ্য। শেয়ার বাজারে ও ব্যবসায়ে নানারূপে ক্ষতিগ্রস্ত হইয়া এক সময়ে তিনি খুব মুষড়িয়া পড়েন। এই ছরবস্তার সময় নিতান্ত অযাচিতভাবে কাঠিয়াবাবাজীর কাছে দীক্ষা প্রাপ্ত হন। ইহার পর কিছুকালের জন্ম তিনি অযোধ্যায় বাস করিতে থাকেন। আর্থিক বিপর্যয় ও উত্তমর্গদের আতঙ্কে সদাই তাঁহাকে ত্রিয়মান দেখা যাইত।

এক রাত্রিতে শয়্যায় শুইয়া অভয়বাবু সখেদে নিজের মনে বলিতে লাগিলেন, ‘ভগবানকে অন্তরের বহু মিনতি জানালাম, কিন্তু তিনি তো এসে দেখা দিলেন না, আমার দুঃখমোচনও করলেন না! তাহলে কি তিনি নেই?’ সঙ্গে সঙ্গে সঙ্কল্প স্থির করিলেন, পরদিন সরষুর সেতু

হইতে ঝাঁপ দিয়া পড়িয়া চিরতরে সমস্ত কিছু জালাযন্ত্রণার অবসান ঘটাইবেন !

কিছুক্ষণ মধ্যেই এক বিচিত্র ব্যাপার ঘটিল । কাঠিয়াবাবা মহারাজ অকস্মাৎ তাঁহার সেই কক্ষে সশরীরে আবির্ভূত হইলেন । বাবাজী মহারাজ ধীরে ধীরে তিরস্কারপূর্ণ কণ্ঠে অভয়বাবুকে কহিতে লাগিলেন, “অভয়রাম, তুমি এমনি শুয়ে শুয়ে কাল কাটাবে ও খেদোক্তি করতে থাকবে, আর শ্রীভগবান তোমাকে দর্শন দেবেন,— না ? আমি তো তোমাকে ইষ্টনাম বলেই দিয়েছি । সে নাম তুমি করছো না কেন ? ভগবান হচ্ছেন দুর্লভ বস্তু, পরম ধন—তাঁকে কি অমনি পাওয়া যায় ?”

অভয়বাবু ত্রস্তেব্যস্তে উঠিয়া বসিয়া তখনই গুরুদত্ত নাম জপ করিতে লাগিলেন । এক অপূর্ব আনন্দজ্যোতি তাঁহাকে ঘিরিয়া ফেলিল । ইতিমধ্যে তাঁহার সর্ব দুঃখ ও দুশ্চিন্তা কোথায় অন্তর্হিত হইয়া গিয়াছে, আর তৎস্থলে উদ্ভূত উইয়াছে এক অপূর্ব মানসিক প্রশান্তি ।

কিছুদিন পরের কথা । অভয়চরণ রায় মহাশয় বৃন্দাবনে চলিয়া আসিয়াছেন । কাঠিয়াবাবা মহারাজ তাঁহাকে দেখা মাত্রই বলিয়া উঠিলেন, “কি হে অভয়রাম, ভগবান আছেন—এ বিশ্বাস এখন কতকটা হয়েছে তো ? বাবা, তোমার কোন চিন্তার প্রয়োজন নেই । তুমি আপন ঘরে গিয়ে বাস কর, নাম জপ করে যাও, তোমার পাণ্ডনাদারেরা অসদ্যবহার করবে না ।”

কলিকাতায় ফিরিয়া অভয়বাবু বিস্মিত হইয়া গেলেন । উত্তমর্গগণ তাঁহার প্রতি যথেষ্ট উদারতা ও সহানুভূতিই প্রকাশ করিতে লাগিল । অতঃপর গৃহে বসিয়া তিনি সাধনায় রত হইলেন ।

কাঠিয়াবাবা মহারাজ অভয়বাবুকে একবার স্বপ্নযোগেও দর্শন দান করেন । এই সময়ে তিনি ইঞ্জিত করিয়া একটি জটাজুটসম্বিত সাধুর আলেখ্য তাঁহাকে প্রদর্শন করান । আর এই সঙ্গে বিশেষভাবে

বলিয়া দেন, “ইনি এক মহাত্মা। এঁর সঙ্গে তুমি মাঝে মাঝে বাস করতে পার, তোমার তাতে যথেষ্ট কল্যাণ হবে।”

কিছুকাল পরে অভয়চরণ রায় বৃন্দাবনধামে আসেন এবং একদিন ঘটনাচক্রে কোন এক ভক্তের কুঞ্জে উপনীত হন। এইখানে প্রভুপাদ বিজয়কৃষ্ণের সহিত হঠাৎ তাঁহার সাক্ষাৎ ঘটে। প্রভুপাদকে দেখিয়াই অভয়বাবু চিনিলেন, এ মহাত্মার মূর্তিই কাঠিয়াবাবা তাঁহাকে স্বপ্নযোগে দর্শন করাইয়াছেন।

অতঃপর কাঠিয়াবাবাজীর সহিত তাঁহার সাক্ষাৎ হইলে মহাপুরুষ চকিতে বলিয়া উঠিলেন, “অভয়রাম, স্বপ্নে তোমায় আমি ঠিকই দেখা দিয়েছিলাম। আজ বোধ হয় তার যথার্থতা বেশ বুঝতে পেরেছ। আমার নির্দেশিত সে মহাত্মার সাথেও তোমার দেখা হয়েছে। ওঁর সঙ্গ করে যাবে। সাচ্চা সাধু যাকে বলা হয়, উনি তাই। আচ্ছা চল, আজ এখনি তোমার সাথে গিয়ে আমিও তাঁর সাথে আলাপ করে আসি।”

বাবাজী মহাবাজ তখনি শিষ্যকে সঙ্গে করিয়া প্রভুপাদ বিজয়কৃষ্ণ গোস্বামীর সামনে উপস্থিত হইলেন। এইদিন কিন্তু কাঠিয়াবাবাজীর আচরণ ও চালচলন দেখিয়া অভয়বাবুর বিস্ময়ের সীমা রহিল না। যে প্রভুপাদের সঙ্গে অলৌকিক ইঙ্গিতের মধ্য দিয়া মিলন ঘটাইয়া দিলেন, তাঁহার সঙ্গে যেন কোন পরিচয়ই নাই; অপরিচিত ব্যক্তির মতই কথা কহিতেছেন। কোথায় তাঁহার পূর্বব্রতের দেশ? বৃন্দাবনে আগমন কেন? কি করিয়া ভিক্ষা নির্বাহ হইতেছে? গোস্বামীজীকে এসব প্রশ্নই তিনি কবিত্তে লাগিলেন।

কাঠিয়াবাবা চলিয়া গেলে গোস্বামীজী নিজ পরিকরদের সেদিন কহিয়াছিলেন, “জ্ঞাখো, যে মহাপুরুষ আজ এখানে কৃপা করে এসেছিলেন, তিনি সত্যই অসামান্য। গর্গ ও নারদ শ্রেণীর ব্রহ্মবিদ ইনি।”

শ্রীরামদাস কাঠিয়াবাবা

স্বেচ্ছামত, অলৌকিকভাবে দর্শনাদি দিয়া কাঠিয়াবাবা মহারাজ সাধনার উপযুক্ত অধিকারীদের অনেক সময় উদ্ধুদ্ধ করিয়া তুলিতেন। এ সম্পর্কে প্রচলিত নানা কাহিনীর মধ্যে বিজয়লাল চট্টোপাধ্যায় সম্পর্কিত ঘটনাটি বড় কোতূহলোদ্দীপক। বিজয়বাবু তারাকিশোর চৌধুরী মহাশয়ের (সন্তদাস মহারাজ) এক ঘনিষ্ঠ বন্ধু। অধ্যাত্ম-সাধনার দিক দিয়া তখন তিনি খুব উন্নত।

একদিন তিনি কলিকাতায় তারাকিশোরবাবুর গৃহে গিয়াছেন। বৈঠকখানায় ঢুকিয়াই তো তিনি অবাক! দেয়ালে এক সাধুর ছবি। তিনি ব্যগ্রভাবে এ সাধুর পরিচয় জিজ্ঞাসা করিলেন। উত্তরে জানা গেল, ইনি তারাকিশোরবাবুর গুরুদেব, বৃন্দাবনের প্রসিদ্ধ মোহান্ত—রামদাস কাঠিয়াবাবা।

বিজয়বাবু অতঃপর এ মহাত্মা সম্পর্কে তাঁহার যে অভিজ্ঞতা বর্ণনা করিতে লাগিলেন তাহাতে কক্ষস্থিত ব্যক্তিদের বিস্ময়ের অবধি রহিল না। তিনি কহিলেন, “আমি সম্প্রতি স্বাস্থ্যলাভের জন্য সাঁওতাল পরগনায় গিয়েছিলাম। যেখানে আমি থাকতাম তার নিকটে এক অশ্বখ গাছের তলায় আমি এঁকে দর্শন করে এসেছি। পুরো তিন দিন তিনি ঐ গাছতলায় ধুনী জ্বালিয়ে আসন করে বসেছিলেন। আমি রোজই চরণতলে গিয়ে বসতাম, আর আমায় কত স্নেহ, কত আদর-যত্ন করতেন।”

স্কুলদেহটি নিয়া কাঠিয়াবাবাজী কিন্তু তখন বৃন্দাবনধাম ছাড়িয়া অশ্ব কোথাও গমন করেন নাই। তারাকিশোরবাবু যতই বলেন,—বাবাজী মহারাজের পক্ষে এ সময়ে সাঁওতাল পরগনায় উপস্থিত হওয়া নিতান্ত অবিশ্বাস্য কথা,—বিজয়বাবু ততই জোর দিয়া বলিতে থাকেন, এই মহাপুরুষকে তিনি তিন দিবস ব্যাপিয়া ঘনিষ্ঠ সান্নিধ্যে দেখিয়া আসিয়াছেন, এ বিষয়ে তাঁহার বিন্দুমাত্র সন্দেহ নাই।

কিছুদিন পরে বৃন্দাবনে আসিয়া তারাকিশোরবাবু কাঠিয়াবাবাজীকে প্রকৃত তথ্য সম্বন্ধে প্রশ্ন করেন। বাবাজী মহারাজ স্মিত-

হাস্তে উত্তর দেন, “বাবা, আমি এখানে অবস্থান করলেও অনেক সময় অশ্রু স্থানেও বহুলোক আমার এ মূর্তিকে দর্শন করে থাকে। এ রহস্য এখন তুমি বুঝবে না, পরে বুঝতে পারবে।”

ভক্ত ও আর্তজনেরা কাঠিয়াবাবাকে দেখিত এক করুণাঘন মহাপুরুষরূপে। আবার স্থান-কাল-পাত্র-ভেদে বিপরীত মূর্তির প্রকাশও তাঁহার মধ্যে দেখা যাইত। সন্তদাস মহারাজ এ সম্পর্কিত ঘটনার বর্ণনা দিয়াছেন—

বাবাজী একদিন শিষ্য পরিবৃত্ত হইয়া আশ্রমে বসিয়া আছেন। এমন সময় শ্রীহট্টের এক বিশিষ্ট আইন ব্যবসায়ী সেখানে আসিয়া উপস্থিত। মহাপুরুষ তখন সেখানে এক অদ্ভুত অভিনয় শুরু করিয়া দিলেন। তিনি যেন এক আকস্মিক ব্যাধিতে তখন আক্রান্ত—দৈহিক যন্ত্রণায় অস্থির হইয়া বারবার কেবল কাতরোক্তি করিতেছেন। আগন্তুক ভদ্রলোকটি এ দৃশ্য দেখিয়া বড় ঘাবড়াইয়া গেলেন। চাঞ্চল্য ও বেদনার্ত চিৎকারের মধ্যে বিভ্রান্ত হইয়া তিনি কিছুক্ষণের মধ্যে স্থান ত্যাগ করেন। বাবাজী মহারাজকে প্রণাম করার কথাও তিনি বিস্মৃত হন।

ভদ্রলোকটির বিদায় গ্রহণের সঙ্গে সঙ্গেই কিন্তু কাঠিয়াবাবার কাতরোক্তি ও আর্তনাদ কোথায় অন্তর্হিত হইয়া গেল। প্রিয় ভক্তদের সহিত আবার তিনি পূর্ববৎ নানা হাসিঠাট্টা ও রঙ্গরস করিতে প্রবৃত্ত হইলেন।

সন্তদাসজীর বুদ্ধিতে বাকী রহিল না, আগন্তুক বড় হত্যভাগ্য—বাবাজী মহারাজের চরণ বন্দনা করিবার অধিকারটুকুও সে লাভ করিতে পারিল না। মহাপুরুষ তাহাকে সেদিন ছলনা করিয়াই বিদায় দিলেন।

বাহু আচরণ দেখিয়া এই বিরাট ব্রহ্মজ্ঞ পুরুষকে বুঝিবার উপায় কাহারো ছিল না। লোকচক্ষুর অন্তরালে, লোকোত্তর মহাজীবনের

নিগূঢ় লোকেই তিনি আত্মগোপন করিয়া থাকিতেন। শুধু বিশেষ বিশেষ করুণার ক্ষেত্রে দেখা যাইত, তাঁহার অলৌকিক ষোণৈশ্বর্য্য মুহূর্ত্তমধ্যে ঝলকিয়া উঠিয়াছে। বিস্ময়ে ও সম্মুখে আশেপাশের ভক্ত ও সাধারণ মানুষ তখন এ বিরাট পুরুষের চরণতলে লুটাইয়া পড়িত।

এই শক্তিধর মহাপুরুষের জীবনে সাধারণ ও অসাধারণ—লৌকিক ও অলৌকিক এই দ্বৈতসত্তার এক অপরূপ মিলন সাধিত হইতে দেখি। বহির্জগতের প্রয়োজন ও পরিবেশ অনুযায়ী সহজ সাধারণ আচরণই তিনি করিতেন। সেই সঙ্গে আপন সাধনসত্তার গভীরে ব্রহ্মজ্ঞ পুরুষ লুকাইয়া রাখিতেন এক অপরিমেয় শক্তির উৎস, প্রচ্ছন্ন রাখিতেন দ্বন্দ্বাতীত চৈতন্যলোকের এক অখণ্ড বোধ।

আপন জীবনের দ্বৈতসত্তার এক চমৎকার ব্যাখ্যা কাঠিয়াবাবাজী শিষ্য সন্তদাস মহারাজের নিকট বিবৃত করেন। তিনি বলেন, “বাবা হাতিকো দো দাঁত রহতা হয়—এক বাহারমে দেখানেকি লিয়ে, ছসরা ভিতরমে খানেকি লিয়ে। ভিতরকা দাঁত ছসরা আদমীকো মালুম নহী পড়তা হয়। সন্তকো ইসি তরহ্ দো বৃত্তি রহতী হয়—এক বাহার দেখানেকো, ছসরা আপনা ভিতরমে, উসকা খবর কভি কিসিকো নহী মিলতা হয়।” অর্থাৎ—বাবা হাতীর দুইটি দাঁত রয়েছে—একটি বাইরের লোককে দেখাবার, আর একটি ভেতরের, যা দিয়ে সে তার খাড়াবস্ত্র চিবিয়ে খায়। ঐ ভেতরের দাঁত কিন্তু বাইরের অন্য কোন লোকেরই চোখে পড়ে না। প্রকৃত সমর্থ সাধুদেরও এমনি দুইটি বৃত্তি থাকে। একটি বাহ্য—বাইরের মানুষকে দেখাবার জ্ঞান, দ্বিতীয়টি তাঁর অন্তরস্থ নিগূঢ় সত্তা। এই দ্বিতীয়টির সংবাদ বহিরঙ্গ লোকের অনেকের ভাগ্যেই যে মিলে না।

বাহ্য ও অভ্যন্তরীণ আচরণের এই বৈপরীত্যের মধ্য দিয়াই বাবাজীর লীলা চাতুৰ্য্যের প্রকাশ দেখা যাইত।

কাঠিয়াবাবাজীর খ্যাতি শুনিয়া বাহির হইতে অনেকেই ব্যগ্রভাবে

তাঁহাকে দর্শন করিতে আসিতেন। কিন্তু কেমারবনের আশ্রমে প্রবেশ করিবার পর তাঁহাদের বিস্ময়ের সীমা থাকিত না।

বাবাজী মহারাজের মধ্যে সমাধিবান মহাসাধকের লক্ষণ সহসা খুঁজিয়া পাওয়া কঠিন। প্রশান্ত গম্ভীর মহাযোগীর দিব্য মহিমার যে কথা শুনা যায় তাহা চোখে পড়ে কই? নিতান্ত সাধারণ মানুষের মতই নিজে তিনি দৈনিক বাজারের দ্রব্যাদি ক্রয় করেন। শাক তরকারী কিনিতে গিয়া দর কষাকষিতে প্রকাশ পায় তাঁহার প্রচণ্ড উৎসাহ। আবার আশ্রমের নিত্যপ্রয়োজনীয় জিনিসপত্র অপরে কখনো কিনিয়া আনিলে, খুঁটিয়া খুঁটিয়া পাকা বৈষয়িক গৃহস্থের মত তাহার হিসাব গ্রহণ করেন, এক পয়সা চুরি বা অপব্যয় যেন না হয়। এমনি তাঁহার সতর্কতা।

সেবাকুঞ্জের সম্মুখে গঞ্জিকা-চক্রের মধ্যমনিরূপে বাবাজী রাস্তায় উপবিষ্ট থাকেন। হঠাৎ দেখিয়া কে তাঁহার স্বরূপ বুঝিতে পারিবে? কে সত্য সত্যই ধারণা করিতে পারিবে যে, ইনিই অধ্যাত্মভারতের অন্ততম শ্রেষ্ঠ মহাপুরুষ, অসামান্য যোগ-বিভূতির অধিকারী ১০৮ স্বামী শ্রীকাঠিয়াবাবা?

পথের পার্শ্বে, বৃক্ষের ছায়ায় বাবাজী মহারাজ উপযু্যপরি গাঁজা চরস পান করিয়া চলিয়াছেন। সঙ্গী সাধীদের মধ্যে ভবঘুরে চোর-বদমায়েসও যে দুই-চার জন নাই তাহাও নয়। তীর্থযাত্রীর দল এ গঞ্জিকাসেবীদের সমীপস্থ হইলে দুই-এক জন উঠিয়া দাঁড়াইয়া অঙ্গুলি নির্দেশে কাঠিয়াবাবাকে দেখাইয়া দেয়। বারবার তাহারা হাঁকিয়া বলিতে থাকে, “আরে দেখো দেখো, ইয়ে দুধাহারী বাবা হ্যায়। খালি দুধ পীকুর্ রহ্‌তে হেঁ। ইনকো কুছ প্রণামী তো চড়হাও।”— অর্থাৎ দেখ দেখ ভাইসব, ইনি—দুধাহারীবাবা। কেবল দুধ পান করেই জীবনধারণ করেন। এঁর জন্ত তোমরা কিছু কিছু প্রণামী দাও।

প্রণামীর টাকায় গাঁজা-চরসের ব্যয় সঙ্কুলানটা অন্ততঃ হইবে, এই জন্তই হয়তো বাবার প্রণামী সংগ্রহের জন্ত সঙ্গীদের এমন আগ্রহ।

বাবা মহারাজও তেমনি এই বিচিত্র অভিনয়ের সম্মুখে নিঃশব্দে বসিয়া প্রসন্ন হাসি হাসিতেছেন। ভাবখানা এই—তাহাকে উপলক্ষ করিয়া সঙ্গীদের গাঁজার আসরের খরচ যদি কিছু জুটিয়াই যায় আপত্তি কি ? তাছাড়া, কিছু অর্থ আশ্রমের খরচের জন্য পাওয়া গেলেও মন্দ কথা নয়। তীর্থকামী গৃহস্থেরা সাধুদের জন্য দু-একটা টাকা খরচ করুক না কেন, তাতে তাহাদের কল্যাণই হইবে।

এরূপে সংগৃহীত অর্থ হইতে উদ্ভূত যাহা কিছু থাকে কাঠিয়াবাবা মহারাজ সতর্কতার সহিত কোমরে বাঁধিয়া আশ্রমে নিয়া আসেন। এ অর্থের নিরাপত্তার জন্য তিনি যেন সর্বদাই মহা উৎকণ্ঠিত। আশ্রমিকদের পক্ষে সম্ভব নয় যে এই যত্নরক্ষিত পয়সাকড়ি তাহারা কোনমতে স্পর্শ করে।

সায়ংসন্ধ্যার পর আশ্রমের মধ্যে বসিয়া বাবাজী মহারাজ যে সব কথাবার্তা সাধারণতঃ বলেন তাহাও বড় বিভ্রান্তিকর। কোন ধর্মালোচনা বা তত্ত্বোপদেশ তাহাতে নাই। ভগবৎপ্রসঙ্গের স্থলে প্রায়ই আলোচিত হয় অতি সাধারণ বৈষয়িক কথা। বাজারে খাণ্ডজব্যের দাম কেন চড়িতেছে, গাঁজার সরবরাহ শীঘ্র বাড়িবে কিনা ইত্যাদি কথায়ই বেশী সময় কাটিয়া যায়।

কোন্ রাজা বা লক্ষপতি শেঠ বৃন্দাবনে আসিয়া বাবাজীকে প্রণামী দিয়া গিয়াছে, ইহা নিয়াও তাহার যেন গৌরব প্রকাশের অন্ত নাই। কোথাকার এক দানশীল মহারাজা বৃন্দাবনে আসিতেছেন, আশ্রমের জন্য নিশ্চয় রোজ তিনি পাঁচ মূর্তির খোরাক পাঠাইয়া দিবেন, এ আশার কথা বাবাজী বারবার সবাইকে জানাইতে থাকেন, যেন এই দানের উপর তিনি কত নির্ভর করিয়া আছেন।

কোন্ শেঠ কত টাকার ভাণ্ডারা দিবে, ধুমধাম করিয়া মন্দির প্রতিষ্ঠা করিবে, ইহা নিয়াও বিতর্কে মাতিয়া উঠেন, প্রবল উৎসাহ দেখান। যাহারা আশ্রমে আসিয়া প্রণামীর টাকা বেশী দেয়, তাহাদের প্রশংসায় তিনি একেবারে পঞ্চমুখ। বাহ্য আচরণ দেখিয়া মনে হয়,

বাবাজী নিতান্তই এক অর্থলুপ্ত সাধু, গ্রাম্য পাকা বিষয়ীর মনোবৃত্তি নিয়েই এ ক্ষুদ্র আশ্রমটির পরিচালনা করিতেছেন।

অথচ ধনাঢ্য শেঠ ও রাজারাজড়াদের সম্মুখীন হইবার প্রস্তাব শুনিতেই বাবাজী মহারাজের মধ্যে দেখা যায় এক অদ্ভুত প্রতিক্রিয়া। কেহ আসিয়া হয়তো জানায়, বৃন্দাবনে এক দানশীল মহারাজা আসিয়াছে। শহরের প্রসিদ্ধ মন্দির ও সাধুসন্তদের তিনি দর্শন করিয়া বেড়াইতেছেন—অবশ্যই তিনি বাবাজীর জন্মও ভেট ও পূজা নিয়া শীঘ্র এদিকে আসিবেন।

কথাটি শুনামাত্র ফুটিয়া উঠে বাবাজীর আর এক রূপ, ক্রোধে একেবারে ক্ষিপ্ত হইয়া উঠেন। নবাগত মহারাজার সঙ্গে যেন দীর্ঘ দিনের শত্রুতা রহিয়াছে, এমনই তাঁহার মনোভঙ্গী। সববে উত্তেজিত কণ্ঠে তিনি কহিতে থাকেন, “শালা হঁহা আওয়েগা তো এক চিমটা লাগা দেঙ্গে ! হাম্ ক্যা উস্কা মর্যাদা করেঙ্গে ? হামরা সাধ উস্কা ক্যা মতলব ? চলা যা যমলোকমে। হামারা পিছে কেঁও পড়তা হ্যায় ?” অর্থাৎ—সে শালা এখানে এলে এক চিমটার বাড়ি মেরে দেব। আমি কেন তার সম্মান ও অভ্যর্থনা করতে যাবো ? মরুকগে সে ব্যাটা,—আমার পিছনে ঘুরবার তার কি দরকার।

উগ্ৰা শুধু এখানেই শেষ হয় না, আরও যে সব অশ্লীল ভাষা বাবাজী এই অচেনা অতিথির প্রতি প্রয়োগ করেন, তাহা শুনিতে অনেকেই কানে আঙুল দিবে।

বৃন্দাবনে ভ্রমণকালে ভিজিয়ানাগ্রামের মহারাজ একদিন কেয়ারবন আশ্রমে আসিয়া উপস্থিত। উদ্দেশ্য—ভারত-বিখ্যাত মহাপুরুষ কাঠিয়াবাবাজীর চরণদর্শন।

কিন্তু আশ্রমে সর্বসমক্ষে সেদিন এক শোচনীয় দৃশ্যের অরতারণা হইল। সম্মানীয় অতিথিকে সামান্যতম সৌজন্য ও কৃপা প্রদর্শন করা দূরে থাকুক, বাবাজী মহারাজ তাঁহাকে অকারণে নানা প্রকার গালাগালি দিয়া দূর করিয়া দিলেন। অমাত্য ও সঙ্গীদের সামনে

এ অপ্রত্যাশিত অপমানে মহারাজা একেবারে লজ্জায় মাটিতে মিশিয়া গেলেন।

রাজ-অতিথির কোন্ ক্রটি বা ভুল সেদিন অন্তর্যামী কাঠিয়ারাবাকে এমন রূঢ় করিয়া তুলিয়াছিল তাহা কে বলিবে ?

আশ্রমের শ্রীবিগ্রহ ও কাঠিয়ারাবাজীকে উপলক্ষ করিয়া ভক্তেরা নানা দ্রব্যাদি উপস্থিত করিত। ভেটের এ সমস্ত বস্তুতে যাহাতে আশ্রমবাসী ভক্ত শিষ্যদের ভোগলিপ্সা না জন্মায় সেদিকে বাবাজীর সতর্কতার অন্ত ছিল না। এক শ্রেণীর মোহান্তের ধারণা, তাঁহাদের স্থাপিত বিগ্রহ ও আশ্রমের জন্ত ভোগ্যবস্তুর যোগান দেওয়া গৃহস্থ ভক্তদের এক বড় কর্তব্য। বাবাজী কিন্তু এ মনোভাবকে বড় নিন্দনীয় মনে করিতেন। গৃহস্থদের প্রদত্ত বস্তুর প্রতি আশ্রমিকগণ যাহাতে প্রলুব্ধ না হয়, তাহার ব্যবস্থাও তাঁহাকে কঠোরভাবে, সতর্কতার সহিত করিতে দেখা যাইত। আধ্যাত্মসাধনার ব্যাপারে ভগবৎনিষ্ঠা ও অভ্যন্তরীণ শুদ্ধতার উপরই তিনি সর্ববাধিক গুরুত্ব দিতেন।

দূরে অবস্থিত ভক্তেরা ভেট হিসাবে আশ্রমে কাপড় চাদর ইত্যাদি পাঠাইত। বাবাজী এগুলি লোকচক্ষুর অন্তরালে সযত্নে লুকাইয়া রাখিতেন। দয়া করিয়া কখনো কখনো গৃহস্থ শিষ্যদের ইহার ছই একখণ্ড দান করিলেও আশ্রমবাসী সাধুদের অদৃষ্টে কোন কালেই কিছু জুটিবার উপায় ছিল না। একান্ত প্রয়োজনের সময় বা অর্ধ-উলঙ্গ অবস্থায়ও তিনি তাহাদের ইহা দিতেন না। অনেক সময় দেখা যাইত, রক্ষিত বস্ত্রাদি দীর্ঘদিন বন্ধ থাকার ফলে কীটদষ্ট হইয়া একেবারে অব্যবহার্য্য হইয়া গিয়াছে।

বলা বাহুল্য, শিষ্যদের ভোগেচ্ছা দমনের জন্তই বাবাজী মহারাজের এই ব্যবস্থা। এজন্য অনেকের নিন্দা সমালোচনা তিনি অকুণ্ঠভাবে সহ্য করিতেন।

শেষ রাত্রে জাগিয়া উঠিয়া সাধন-ভজন ও আশ্রম-কর্ম করা সাধু ভক্তদের অবশ্য কর্তব্য। তাহাদের এ কাজকে সহজতর করিয়া তুলিতে বাবাজীর কৌশলের অন্ত ছিল না। অনেক সময় তিনি অযথা হৈ-চৈ তুলিয়া দিতেন,—রাত্রে আজকাল চোরের বড় আনাগোনা, সতর্ক হইয়া সকলে সারা রাত্রি জাগিয়া কাটাও। ফলে, এ সময়ে ধ্যান-ভজনে রত না হইয়া কাহারো উপায় ছিল না।

রাত্রি শেষ হইতে না হইতেই বাবাজী মহারাজ সকলকে আশ্রম-কার্যে লাগাইয়া দিতেন। এজন্ত চল করিয়া শেষ রাত্রিতে তিনি নিজের আহারের প্রথাও প্রবর্তন করেন। তাই বাধ্য হইয়াই সকলে সে সময়ে ঠাকুরসেবা ও ভোগরাগের বন্দোবস্তের জন্ত তৎপর হইত। নিদ্রা দিনরাত্রিতে দুই-তিন ঘণ্টা, আর অন্নাহার দিবারাত্রির মধ্যে মাত্র একবার, ইহাই ছিল শিষ্যদের উপর বাবাজী মহারাজের নির্দেশ। লঘু ও অনলস দেহ নিয়া সাধনায় অগ্রসর হওয়ার উপরই তিনি জোর দিতেন। অধ্যাত্মজীবনের শুদ্ধতা ও শুচিতা সম্পাদনে সর্বদা তাঁহার সতর্কতার অন্ত ছিল না। সিদ্ধিকামী প্রকৃত সাধকদিগকে কুচ্ছ্র ও ত্যাগ-তিতিষ্কার দহনে পরিশুদ্ধ করিয়া নেওয়াই ছিল তাঁহার শিক্ষাদানের মূল নীতি।

বাবাজী ভারতবিশ্রুত মহাপুরুষরূপে কীৰ্ত্তিত, কিন্তু তাঁহার আশ্রমটি নিতান্ত সাধারণ ও ক্ষুদ্রায়তন। উহার ভিতরকার ভজন প্রকোষ্ঠ ও তাহার পরিবেশও বড় অদ্ভুত। হনুমানজীর এক পরম পবিত্র বিগ্রহ আশ্রমে স্থাপিত রহিয়াছে। এ বিগ্রহের কক্ষটি অতি অপরিসর। ইহার পাশে দুইটি ক্ষুদ্র অন্ধকারময় চোরকুঠরী। স্থানে স্থানে বহুতর গর্ভ, গোখরা ও রক্তবংশী সাপের দল সেখানে স্বেচ্ছামত ঘুরিয়া বেড়ায়। সম্মুখস্থ এক ফালি ছোট বারান্দার উপর রহিয়াছে বাবাজী মহারাজের নিজের শয়নের স্থান। প্রতিবেশী সর্পদলের সহিত তাঁহার ঘনিষ্ঠ বন্ধুত্ব। উহাদের গতিবিধি ও মনোভাব এই ব্রহ্মজ্ঞ মহাপুরুষ

যেমন বৃত্তিতে পারেন, উহারাও তেমন তাঁহার নির্দেশাদি নির্বিচারে মানিয়া নেয়।

প্রভাতে উঠিয়া কাঠিয়াবাবা হনুমানজী বিগ্রহের গায়ে সিঁহুর লেপন করেন, তারপর মালা পরাইয়া দেন। কিন্তু প্রতিদিনই প্রত্যুষে দেখা যায়, একটি প্রকাণ্ড দুর্দ্বর্ষ রক্তবংশী সাপ হনুমান-বিগ্রহের দেহটি জড়াইয়া পরমানন্দে নিদ্রিত রহিয়াছে। একটি লাঠির মাথায় কাপড় জড়াইয়া বাবাজী সন্মুখে এ সাপটিকে ধীরে ধীরে ঠেলিয়া বলিতে থাকেন, “আরে জলদি হঠ্ যা, হঠ্ যা।”

স্বপ্নস্মৃতি ভঙ্গের পর নাগপ্রবর ধীরে স্তম্বে নামিয়া গিয়া তাহার নিজ গর্ভে অন্তর্ধান করে। বাবাজী মহারাজের নিত্যকাব কৃত্যাদি ইহার পর শুরু হয়।

শুধু সর্পদল কেন, গ্রাশ্মের বৃক্ষলতাদি হইতে শুরু করিয়া চড়ুই পাখীগুলিও যেন তাঁহার পরম বান্ধব। কোন মানুষের সখ্য হইতে ইহাদের সখ্য এই মহাপুরুষের কম কাম্য নয়। প্রাতঃকৃত্য সমাপনান্তে স্নেহসক্তি হৃদয়ে তিনি ইহাদের সান্নিধ্যে গিয়া বসেন। বৃক্ষলতাদির গোড়ার মৃত্তিকা সময়ে খুঁড়িয়া তাহাতে জল সিঞ্চন করেন, আবার পোশু চড়ুইদলের নস্মুখে রুটির টুকু বা ছড়াইয়া বসিয়া থাকাও তাঁহার এক নিত্যকার বড় কাজ।

এই বিরাট ব্রহ্মজ্ঞ পুরুষের প্রজ্ঞানঘন দৃষ্টিতে ক্ষুদ্র ও বৃহৎ, চেতন ও অচেতন সব কিছু যেন একাকার হইয়া গিয়াছে। এক ও অখণ্ড বোধ সেখানে ওতপ্রোত, তাই সমস্ত কিছু ভেদবিভেদের গতিরেক্ষা একেবারে বিলুপ্ত হইয়াছে।

কাঠিয়াবাবাজীর বাহ্যিক আচরণ, বিশেষতঃ টাকাকড়ি বিষয়ে তাঁহার কৃপণতার অভিনয়, বহু লোককেই বিভ্রান্ত করিত। কেহ কেহ সত্য সত্যই ভাবিত, বাবাজী মহারাজ অর্থাৎ সম্পর্কে সর্বদা ষেরূপ সচেতন, নিশ্চয়ই তাঁহার নিকট গোপন ধন সঞ্চয় বেশ কিছু

রহিয়াছে। আশ্রমের রহুইয়া পুষ্করদাস বড় অর্থলোভী, বহুদিন তাহারও এমনি এক সন্দেহ বর্তমান ছিল। গুপ্তধন চুরি করার জন্ত এ লোকটি তিন-চারবার কাঠিয়াবাবার প্রাণনাশের চেষ্টা করে।

সে-বার মঠে তিনজন বিশিষ্ট মোহান্তের আগমন হয়। বাবাজী মহারাজ ইঁহাদের সঙ্গে বসিয়া প্রচুর পরিমাণ ভাঙের সরবৎ পান করেন। স্ত্রযোগ বুঝিয়া পুষ্করদাস ইঁহাদের পানীয়ের সহিত এ সময়ে বেশ খানিকটা আসেনিক বিষ মিশ্রিত করিয়া দেয়। মোহান্ত তিনজন কিছুক্ষণ বাদেই অচেতন হইয়া ভূমিতে লুটাইয়া পড়েন। অথচ প্রচুর বিষসহ ভাঙের সরবৎ পান করিয়া কাঠিয়াবাবা মহারাজের কোন নেশা বা ভাব বৈলক্ষণ্য প্রকাশ পায় নাই।

সংজ্ঞাহীন এই মোহান্তদের দেহে তাড়াতাড়ি নিজ কমণ্ডলুর জল ছিটাইয়া দিয়া তিনি কি যেন এক প্রক্রিয়া করিলেন। কিছুক্ষণ পর তাহাদের চেতনা ফিরিয়া আসিল।

অভ্যাগতেব দল সন্দেহ কবিলেন যে, পুষ্করদাসই সকলের অর্থ লুণ্ঠন ও প্রাণনাশের জন্ত গোপনে বিষ দিয়াছে। ছফ্তকে তখনি তাঁহারা পুলিশের হাতে দিতে বদ্ধপরিকর।

কিন্তু কাঠিয়াবাবাজী কিছুতেই রাজী নহেন। তিনি বলিলেন, “তোমরা সবাই তো চেতনা লাভ করেছো, কোন অনিষ্টই তোমাদের হয়নি। যে ছুষ্ট, সে নিজেই কৃতকর্মের জন্ত ফল ভোগ করবে। তবে তাকে পুলিশের হাতে দেবার কি প্রয়োজন?”

ক্রুদ্ধ মোহান্তগণ কিন্তু পুষ্করদাসকে ছাড়িয়া দিতে রাজি নন, তাঁহারা বারবার জোর করিতে লাগিলেন।

বাবাজী মহারাজ এবার দৃঢ়কণ্ঠে বলিয়া উঠিলেন, “বেশ, তোমাদের যা অভিরুচি হয় তাই কর। কিন্তু পুলিশের হাঙ্গামা বাধিয়ে কোন ফল হবে না, এ কথা নিশ্চয় জেনো। আমি পুলিশকে বলবো, এক সাথে বসে একই ভাঙের সরবৎ আমিও পান করেছি। তোমাদের চাইতে অনেক বেশী পরিমাণেই পান করেছি। অথচ আমার তো কোন

অনিষ্ট হয়নি। দেখবে, তোমাদের অভিযোগ মোটেই টিকবে না, ফলে তোমরাই বরং উল্টো বিপদে পড়বে।”

অগত্যা মোহান্তেরা নিরস্ত হন। নির্বোধ, অর্থলোভী সেবককে কৃপাময় বাবাজী সেবার এমনি করিয়াই রক্ষা করেন।

ইহার পরও আর একবার এই রসুইয়া ব্রাহ্মণ কাঠিয়াবাবাজীকে হত্যার চেষ্টা করে। সেবার সে বাবাজী মহারাজের রুটিতে বিষ গুলিয়া দেয়, আর নীরবে এ তীব্র বিষ হজম করিয়া ফেলিয়া বাবাজী পুষ্করদাসের অপচেষ্টা ব্যর্থ করিয়া দেন। ঘটনাটি ঘটান বছর পরে শিষ্যদের তিনি এ কথাটি বলিয়াছিলেন।

একবার বাবাজী মহারাজ তাঁহার শিষ্যবর্গসহ আগ্রায় গিয়াছেন। পুষ্করদাসের জন্মভূমি এই অঞ্চলে। এখানকার পূর্ব-পরিচিত কয়েকটি ছর্ব্বন্তের সহযোগিতায় পুষ্করদাস আবার একদিন কাঠিয়াবাবাকে হত্যার সঙ্কল্প করে।

বাবাজী মহারাজ সেদিন গভীর রাত্রে আসনের উপর নিদ্রিত রহিয়াছেন। এ সময়ে পুষ্করদাসের নিয়োজিত ছর্ব্বন্তগণ এক উচ্চ স্থান হইতে নিদ্রিত দেহের উপর খুব ভারী একটি প্রস্তরখণ্ড গড়াইয়া ফেলে। বাবাজী আহত হইয়াও লাঠি হস্তে এই ছুষ্টদের পশ্চাদ্ধাবন করিতে থাকেন, ভয়ে তাহারা পলায়ন করে।

প্রস্তরের আঘাতে কাঠিয়াবাবার বাহুর একটি শিরা কাটিয়া যায় এবং দীর্ঘদিন তাহাকে ইহার যত্নগা সহ করিতে হয়।

দুর্ঘটনার পরক্ষণেই কিন্তু ছুষ্ট পুষ্করদাস তাহার গোপন স্থান হইতে আত্মপ্রকাশ করে, বাবাজী মহারাজকে সে বারবার সমবেদনা জানাইতে থাকে। ক্ষমাসুন্দর মহাপুরুষ হত্যার ষড়যন্ত্রে লিপ্ত এই পাচককে একটি কথাও সেদিন বলেন নাই। অতঃপর তাহাকে সঙ্গে নিয়া অবিলম্বে তিনি আগ্রা ত্যাগ করেন।

আশ্চর্যের বিষয় যে, এত কিছু পরও কাঠিয়াবাবা মহারাজ

তাহার এ কুখ্যাত রত্নইয়াটিকে ত্যাগ করেন নাই। শুধু তাহাই নয়, পাপকার্যের জগৎ এই দুষ্কৃতিকারীকে নিজে তিনি কোনদিন ভৎসনাও করেন নাই। পূর্বসং সহজভাবে সে আশ্রমে চলাফেরা করিত, আর রক্ষনকার্যের ভারও বরাবর তাহার উপরই গুরু ছিল।

পুষ্করদাসের এ সব জঘন্য অপরাধের প্রতি বাবাজী মহারাজের ছিল এক উদাসীন ও নির্বিকার ভাব। অন্তরঙ্গ ভক্তদের কাছে এটা কিন্তু বড় দুর্বোধ্য ছিল। এ পাপাচারীকে কেন তিনি উপযুক্ত শাস্তি দিতেছেন না, ভক্ত তারাকিশোর (সন্তুদাসজী) একবার এ প্রশ্নটি উত্থাপন করেন।

কাঠিয়াবাবাজী উত্তরে বলেন, “আচ্ছা বাবা, কেউ কি কাউকে সত্যি সত্যিই দুঃখ দিতে পারে? আপন আপন কর্ম অনুসারেই আমাদের সুখ-দুঃখ ভোগ করতে হয়। তাছাড়া, ভেবে দেখ, পুষ্করদাস আমার কি কোন ক্ষতি সাধন করতে পেরেছে? আমি তো এক ও অখণ্ড সর্বদাই রয়েছি। সেই যে সত্যিকার ‘আমি’, পুষ্করদাস তা-কোন অনিষ্ট করবার ক্ষমতা রাখে?—তবে আমি ওকে আশ্রম থেকে বার করে দেব কেন? তিরস্কারই বা কোরবো কেন? বাবা, তোমায় আমি সত্যি বলছি—আমার শরীবে সুখ দুঃখের কোন কিছু খবর নেই, কোন কিছু বৈলক্ষণ্যও এতে নেই।”

হতবাক হইয়া তারাকিশোরবাবু এই দেব-মানবের দিকে এক দৃষ্টিতে চাহিয়া রহিলেন।

পুষ্করদাসের অর্থগুরুতা ক্রমেই কিন্তু বাড়িয়া চলিল। তাহার দৃঢ় ধারণা—কাঠিয়াবাবাজীর কোমরের আড়বন্ধের মধ্যেই সঞ্চিত ধন লুকায়িত রহিয়াছে, তাহার প্রাণনাশ করিলেই সে উহা হস্তগত করিতে পারিবে।

শেষ চেষ্টা হিসাবে একদিন সে বাবাজী মহারাজের রুটির সঙ্গে আর্সেনিক বিষ মিশাইয়া দিল। পরিমান প্রায় দুই ভরি। এবারকার

পরিস্থিতিটি বড় জটিল হইয়া পড়ে। বাবাজী মহারাজ এ বিষক্রিয়ার ফলে মাটিতে পড়িয়া যান ও মস্তকে গুরুতর আঘাত পান। পাকস্থলীর গোলযোগও চরমে উঠে।

পেট ফাঁপিয়া উঠিবার ফলে বাবাজী মহারাজ কোমরের কাঠের আড়বন্ধের চাপ সহ্য করিতে পারিতেছিলেন না। সেবকেরা সেদিন তাঁহার অনুমতি নিয়া ঐ আড়বন্ধটি করাত দিয়া চিরিয়া ফেলে। বলা বাহুল্য, খণ্ডিত কাষ্ঠ-বন্ধনীর মধ্যে গুপ্ত সোনাদানার কোন সন্ধান না পাইয়া পুষ্করদাসকে হতাশ হইতে হয়।

কাঠিয়াবাবার গুরুতর পীড়ার সংবাদে তারাকিশোরবাবু কলিকাতা হইতে বৃন্দাবনে ছুটিয়া যান।

বাবাজীর সংবাদ কলিকাতায় পৌঁছামাত্র প্রভুপাদ বিজয়কৃষ্ণ তাঁহার শিষ্যদের বলেছিলেন, “সে কি কথা? কাঠিয়াবাবাজীর সিদ্ধ দেহে রোগ হবার তো কোন সম্ভাবনা নেই। নিশ্চয়ই কোন সাধু তাঁকে বিষপ্রয়োগ করেছে।” তারাকিশোর গৌসাইজীর এই কথা শুনিয়া আসিয়াছেন, বড় উৎকণ্ঠিতও হইয়াছেন।

বাবাজী মহারাজের রোগশয্যার পাশে পৌঁছিয়াই তারাকিশোরবাবু তাঁহাকে গৌসাইজীর ঐ মন্তব্যটির কথা বলেন। বাবাজী সহাস্রো কহিতে থাকেন, “দেখো দেখো, কলকাতায় হি ব্যয়টে মহাত্মাকে ক্যায়সা ইঁহাকা খবর মিল্ গিয়া। হাঁ বাবা পুষ্করদাসনে ইস বার দো ভরি সঁখিয়া হাম্‌কো রোটিকে সাথ দে দিয়া। অব্‌ হাম্‌রা শরীর বুঢ়া হো গিয়া। ইস্‌ ওয়াস্তে সঁখিয়া ভি শরীরকে ইয়ে বখৎ বড়া ছুখ্‌ দিয়া”—অর্থাৎ, দ্যাখো, কলকাতায় বসে থেকেও মহাত্মা এখানকার খবর কেমন পেয়ে গিয়েছেন। ঠিক কথাই তিনি বলেছেন এবার পুষ্করদাস আমার রুটির সঙ্গে ছ-ভরি শঙ্খিয়া বিষ (আসেনিক) দিয়েছিল। আজকাল আমার শরীর বৃদ্ধ ও অপটু, কাজেই শঙ্খিয়া বিষ এটাকে কষ্ট দিতে পেরেছে।

কিন্তু সর্বাপেক্ষা বিস্ময়ের বিষয়, এত কিছু অপকর্মের নায়ক,

পুষ্করদাস তখনও আশ্রমের রক্ষনকার্যে পূর্ববৎ নিযুক্ত রহিয়াছে। শুধু তাহাই নয়, রোগশয্যায় শায়িত কাঠিয়াবাবার পথ্যাদি দিবার সব কিছু দায়িত্বও তাহারই উপর শ্রুস্ত।

ভারাকিশোর ও অন্যান্য শিষ্যগণ এ ব্যবস্থার বিরুদ্ধে এবার জোর আন্দোলন চালান—এ ছরাত্মাকে এখনই আশ্রম হইতে দূর করিয়া দিতে হইবে। বাবাজীকে ভারাকিশোর সকলের এ অভিমত স্পষ্টরূপে জানাইয়া দিলেন।

কাঠিয়াবাবা উত্তরে বলিলেন, “বেটা, অব্ ইস্কা ভ্রম সব মিট গিয়া। ইস্কা মন্মে থা কি হমারি আড়বন্ধকা ভিতর বহুৎ সোনেকো আশরফি হয়, আর হামকো মার্কর্ উহ সব লে লেগা। অব্ আড়বন্ধ কাট গিয়া—উসকা ভ্রম ভি মিট্ গিয়া! লেकिन তুমহারী মজ্জি হোয় তো ইসকো অবাহি নিকাল দেও।” অর্থাৎ—বাবা, এর ভ্রম এবার একেবারে দূর হয়েছে। এ মনে ভেবেছিল, আমার কোমরের আড়বন্ধের ভেতর বহু মোহর লুকানো আছে। আমায় মেরে ফেলে সব কিছু অধিকার করে বসবে—এই অভিসন্ধিই এর ছিল। আড়বন্ধ কেটে ফেলার পর সে ধারণা এখন আর নেই। তবে তোমাদের সকলের যদি অভিমত হয়, তবে একে এখনি এই আশ্রম থেকে বার করে দাও।

ইহার পর কি যেন কি ভাবিয়া কাঠিয়াবাবা নিজেই পুষ্করদাসকে বিতাড়িত করিতে গেলেন। উত্তেজিত স্বরে কহিলেন, “তুম্‌সে রসোই কুছ নহি বন্তা হয়। হর বখৎ তুম্‌ রসোই মে জ্যাদা রামরস ডাল্‌ দেতে হো—ঔয় তুম্‌ হামকো জহর ভি পিলায়া। তুম্‌ আশ্রম্‌মে আওর মৎ‌ রহনা। আভি ইঁয়াসে নিকাল যাও ?” অর্থাৎ তোমাকে দিয়ে রান্না ঠিকমত হবার যো নেই। সর্বদা তুমি রান্নার অত্যধিক মুন দাও—তাছাড়া তুমি আমায় বিষও খাইয়েছ। এ আশ্রমে তুমি থাকতে পাবে না, এখনই বিদায় হও।

পুষ্করদাস বুঝিল, আশ্রমের সকলে এবার তাহার উপর ক্রোড়িয়া

গিয়াছে, আর এখানে তাহার থাকিবার উপায় নাই। নতশিরে সকলের সম্মুখ দিয়া সে বাহির হইয়া গেল।

আশ্রমিকগণ তখন সবিস্ময়ে কেবলই বাবাজীর কথাগুলি ভাবিতে-ছিলেন। আহাৰ্য্যের মধ্যে অত্যধিক নুন মিশ্রণ ও বিষ প্রয়োগ যাহার নিকট সমান, সে মহাপুরুষের মহিমা ও অধ্যাত্মশক্তির পরিমাপ কে করিবে ?

বাবাজীর সমদর্শিতার আরও নানা বিচিত্র কাহিনী রহিয়াছে। একবার এক তীর্থকামী দেশীয় নৃপতি বৃন্দাবনে আসিয়া কিছুদিন বাস করেন। বাবাজী সম্বন্ধে বহুতর অলৌকিক কাহিনী শুনিয়া ইনি তাঁহার দর্শনাকাজক্ষী হন।

এই মহারাজটি খুব ভক্তিপরায়ণ। তাছাড়া, সাধুসেবায় তাঁহার আন্তরিকতার অবধি নাই। সাদর আমন্ত্রণ পাইয়া বাবাজী সেদিন তাঁহার ভবনে গিয়া উপস্থিত। সমারোহের সহিত মহারাজা তাঁহার সম্বর্দ্ধনা করিলেন, শ্রদ্ধাভরে বহু বস্তু ভেট দিলেন।

রাজঅতিথি বাবাজী মহারাজকে কিন্তু কিছুক্ষণ পর এক অদ্ভুত আচরণ করিতে দেখা গেল। বিদায় নিয়া প্রাসাদ হইতে তিনি বাহির হইতেছেন, হঠাৎ নৃপতির এক দারোয়ানের প্রতি তাঁহার দৃষ্টি পড়ে। লোকটি বড় ধর্ম্মনিষ্ঠ ও ভক্তিমান—ভাগ্যবানও সে বটে, কারণ অযাচিতভাবে সেদিন কাঠিয়াবাবা তাহাকে যে কৃপা প্রদর্শন করেন, সবাই তাহা দেখিয়া বিস্মিত হয়।

লোকটি ভক্তিভরে বাবাজীকে প্রণাম করিল। সদানন্দময় মহাপুরুষ অমনি তাহার পাশে রাজভবনের দ্বারদেশে বসিয়া পড়িলেন। খলিয়া হইতে কল্কে ও গাঁজার মোড়ক খুলিয়া ছিলিম সাজা হইল। তারপর দারোয়ানের সঙ্গে বসিয়া বাবাজী ছিলিমের পর ছিলিম উড়াইতে লাগিলেন। সকলে তো অবাক। খোসগল্প ও হাসি-তামাসা দেখিয়া মনে হইবে, লোকটি তাঁহার অন্তরঙ্গ বয়স্ক।

কিছুক্ষণ এইভাবে গঞ্জিকা সেবন ও আনন্দরঙ্গে কাটানোর পর তিনি সে স্থান ত্যাগ করিলেন।

রাজবাহাদুর এবং উপস্থিত ব্যক্তিবর্গ চুপচাপ দাঁড়াইয়া এতক্ষণ বাবাজী মহারাজের এই বিচিত্র লীলা দেখিতেছিলেন। বলা বাহুল্য, কাহারো বৃথিতে বাকী রহিল না, সমদর্শী মহাপুরুষের দৃষ্টিতে রাজা ও রাজভৃত্যের মধ্যে পার্থক্য কিছুই নাই।

ব্রহ্মবিদ কাঠিয়াবাবার বালকবৎ ভাবটিও ছিল বড় মনোহর। একদিন স্নানান্তে তিলক কাটিবার পর বাবাজী মহারাজ একখণ্ড শুভ্র বস্ত্র পরিয়াছেন। নিকটস্থ এক ভক্ত তাঁহারদিকে তাকাইয়া বলিলেন, “বাঃ বাঃ ! মহারাজ, আজ আপনাকে বড় খুবসুরত দেখা যাচ্ছে।”

শিশুসুলভ আনন্দে বাবাজী যেন গলিয়া গেলেন। সোৎসাহে বারবার সবাইকে শুনাইয়া শুনাইয়া কহিতে লাগিলেন, “এছাড়া আমার একটা বনাতির আল্ফি আছে, সেটা যখন আমি পরি, তখন যে কি খুবসুরত আমায় দেখায়, তা তো কেউ দেখনি। একবারটি দেখলে বুঝতে পারতে—কি চমৎকার !”

ত্রিপুরার রাজবাড়ীর মেয়েরা সূচীশিল্প সমন্বিত একটি সুদৃশ্য বস্ত্রখণ্ড কাঠিয়াবাবাকে ভেট পাঠাইয়াছেন। রঙীন চটকদার বস্ত্রটি দেখিয়া বাবাজীর আনন্দ আর ধবে না। প্রচণ্ড উৎসাহেব চোটে উহা শালের মত করিয়া গায়ে দিয়া তিনি বলিতে লাগিলেন, “আমি এটা এমনি গায়ে জড়িয়ে রাখবো—আর বৃন্দাবনের সবাইকে এখনই দেখিয়ে আসবো।”

ব্রজবাসীমাত্রেই তাঁহার পরম সখা। তাই এ বস্ত্র তাহাদের না দেখালেই বা চলিবে কেন ? যে কথা সেই কাজ। বাবাজী বালকের মত আহ্লাদে আটখানা হইয়া ছুটিতে ছুটিতে নিকটস্থ বাজারে উপস্থিত হইলেন।

এবার গর্ব করিয়া সকলকে বলিতে লাগিলেন, “জাখো জাখো,

এই সুন্দর কাপড়খানা আমার জন্ত ভেট এসেছে। আর জানো ? ত্রিপুরার রাজবাড়ীর মেয়েরা এটা আমার জন্ত বুনে দিয়েছে ! হ্যাঁ, তারা নিজ হাতে বুনেছে।”

বাজারের ব্রহ্মবাসীরাও বাবাজী মহারাজের এই বালকপনায় পরম আনন্দিত। বারবার আশ্বাস দিয়া মাথা নাড়িয়া তাহারা কহিতে লাগিল, ‘সত্যি মহারাজ, এ কাপড়খানা বড় চমৎকার হয়েছে। এ রকমটি আর কোথাও দেখা যায় না।’

সেদিন ভোরে আশ্রম সীমানায় গোলমাল শুনিয়া সকলে ছুটিয়া আসিল। দেখা গেল, প্রতিবেশী আখড়ার কোন একটি বালক-সাধুর সঙ্গে কাঠিয়াবাবা মহারাজ তুমুল ঝগড়া শুরু করিয়া দিয়াছেন। বাবাজীর আশ্রম হইতে সে কিছু ডালিম পাতা নিতে আসিয়াছে, কি এক ঔষধে নাকি তাহা ব্যবহার করা হইবে। কিন্তু বাবাজীর ধমুর্ভঙ্গ পণ—কিছুতেই তিনি ডালিম পাতা ক’টি নিতে দিবেন না। বালকের সঙ্গে সমভাবে প্রচণ্ড ঝগড়া করিয়া চলিলেন, যেন এই পাতা ক’টির উপরই সেদিন তাহার আশ্রমের বাঁচা-মরা সব নির্ভর করিতেছে।

বাবাজী চৈচাইয়া বলিতে লাগিলেন, “কেন তুমি এ পাতা ছিঁড়বে ? আমার গাছ ছোট—কিছুতেই এ দেওয়া হবে না। চোখের মাথা খেয়ে বসেছো ? অন্য কোথাও যেতে পারো না।”

বালকটিও ছাড়িবার পাত্র নয়। উত্তেজিত হইয়া সে গালাগালি শুরু করে, বাবাজীও সঙ্গে সঙ্গে দ্বিগুণ অশ্লীল গালি দেন।

বাগানের প্রান্ত হইতে তাহাকে তাড়াইয়া দিয়া নিজ কক্ষে ফিরিয়া আসিয়া বসিয়া এবার তিনি ছিলিম সাজিলেন। আশ্রমের ভক্তদের শুনাইয়া শুনাইয়া সোৎসাহে বলিতে লাগিলেন, ‘আমার ডালিম গাছের পাতা নিয়ে চলে যাবে ! ইস্, এত সহজেই নেওয়া আর কি ? দেখলে তো। আমিও ওকে ছেড়ে দিইনি। জোর গালি দিয়ে তাড়িয়ে দিয়েছি !’

এখনি একটা যুদ্ধ জয় করিয়া ও প্রকাণ্ড সম্পদ বাঁচাইয়া তিনি গৃহে ফিরিয়াছেন—ভাবটা ঠিক এমনই !

আবার তাঁহাতে দেখা যায়, এই বালক ভাবেরই এক বিপরীত রূপ ! অধ্যাত্ম-শক্তির ধারক ও বাহক—এক মহাশক্তির যোগীরূপে তিনি তখন ক্ষিপ্রবেগে বিরাজমান ।

এর শিষ্য, সম্ভদাস মহারাজ সে সময়ে আধ্যাত্মিক সাধনার নানা স্তর অতিক্রম করিয়া চলিয়াছেন । কুণ্ডলিনী শক্তির উর্দ্ধগতির প্রতিবর্তী ক্রিয়ায় বিভ্রত হইয়া বাবাজীকে একদিন তিনি কহিলেন, “মহারাজ, আমার বুকের ভেতর শক্তি যেন বেধে যাচ্ছে !”

বাবাজী মহারাজ, নিতান্ত সহজ কণ্ঠে উত্তর দিলেন, “হাঁ—হাঁ, উহা কমল রহতা হ্যায়, উহ্ রোক্ দেতা হ্যায় ।” অর্থাৎ ঐ স্তরে চক্র বিরাজিত রয়েছে, শক্তির উর্দ্ধগতিতে তাই তো এমন করে আজ ওখানে বাধা পড়ছে ।

সাধক তারাকিশোর ব্যাকুলভাবে প্রশ্ন করিলেন, গ্রন্থি এ বাধা কি গুরুদেব কৃপা করিয়া ছাড়াইয়া দিবেন না ?

কাঠিয়াবাবা অমনি শিষ্যকে তিরাস্কর করিয়া উঠিলেন । কহিলেন, তিনি কিছুতেই ইহা করিতে এখন রাজী নন । ইহার কারণও তিনি কিয়ৎপরে তাঁহাকে জানাইয়া দেন—এখনি যদি এ গ্রন্থি ছাড়াইয়া দেন তবে শিষ্যের পক্ষে ঈশ্বরনির্দিষ্ট কাজ করা যে আর সম্ভব হইয়া উঠবে না । অথচ সংসারে এই শিষ্যের যে যথেষ্ট কর্ম রহিয়াছে গুরুজীর তাহা অজানা নাই । সময় আসিলেই তিনি এই গ্রন্থিভেদ করাইয়া দিবেন, এ আশ্বাসও তাঁহাকে দিলেন ।

রঙীন কাপড় ভেট পাইয়া বালকের মত আনন্দে যিনি বাজারে ছুটিয়া যান, কয়েকটা কচি ডালিম পাতার জন্য প্রতিবেশী বালকের সঙ্গে যিনি মুহূর্ত্তে তুমুল বিরোধ বাধাইয়া বসেন—এ আবার তাঁহার কোন্ অলৌকিক রূপ !

শ্রীরামদাস কাঠিয়াবাবা

শক্তিধর গুরুরূপে তাঁহার এ প্রকাশটি বড় মহিমময়। চিন্ময় লোকের চাবিকাঠিটি এ ক্ষেত্রে রহিয়াছে তাঁহারই হাতে, তাই সাধক-শিষ্যের গ্রন্থিভেদ অবলীলায়ই তিনি করাইতে পারেন।

কাঠিয়াবাবাজীর এই বালকবৎ ভাব^১ লীলা অভিনয় দেখিয়া তাঁহার প্রকৃত স্বরূপ ও তৎ বৃত্তি^২ সাধ^৩ কাঠি ছিল। তিনি যে এক অসাধারণ যোগবিভূতিসম্পন্ন মহাপুরুষ তাঁ^৪ অনেকেরই ধারণায় আসিত না। আবার এই মহাসমর্থ যো^৫ প্রেমযমুনার অমৃত ধারাটি যে সদা তরঙ্গিত রহিয়াছে, সে সংবাদই বা কয়জন রাখিত ?

সন্তদাসজীর লেখনীতে ইহার এক অপরূপ আলোখ্য ফুটিয়া উঠিয়াছে।—সেদিন আশ্রমের ঠাকুর শ্রীবিহারীজী ও শ্রীরাধিকাজীকে নিয়া বৃন্দাবনধামে শোভাযাত্রা হইতেছে। হঠাৎ দেখা গেল কাঠিয়াবাবাজীর প্রতি রোমকূপ হইতে অবিশ্রান্ত ধারায় বাহির হইতেছে ঘর্মস্রোত। সন্তদাসজী তাড়াতাড়ি পাখা নিয়া গুরুদেবকে ব্যঞ্জন করিতে বসিলেন।

বাবাজী তাঁহাকে নিরস্ত করিয়া হাস্তভরে বলিতে লাগিলেন, “বেটা, যা ভাবছো তা নয়। এ কিন্তু গ্রীষ্মের ঘাম নয়, হাওয়া করে একে নিবারণ করা যাবে না। আসলে এ হচ্ছে এক প্রকার প্রেমজ্বর। শ্রীরাধিকাজী বিগ্রহের চারিদিকে বৃন্দাবনের গোপীদের দর্শন করাতেই এ প্রেমজ্বরের উৎপত্তি। এরূপ প্রেমজ্বর আমার প্রথম নয়, আরও অনেকবার হয়েছে। একবার এ দেহে এটা প্রায় একমাস কাল অবধি ছিল, কিন্তু তখন শরীর থেকে জল বিন্দুমাত্রও নির্গত হয়নি, সমস্ত শরীর আগুনের মত উত্তপ্ত থাকতো। তাছাড়া, শরীরের রোম আর জটা অহর্নিশি কাঁটার মত খাড়া হয়ে থাকতো।”

চাক্ষুষভাবে সেদিন প্রেমের এ সাত্ত্বিক বিকার দর্শনে সন্তদাসজীর বিশ্বয়ের সীমা রহিল না।

বৃন্দাবনে যোগবিভূতিসম্পন্ন এক ক্ষুদ্রকায় সাধু বাস করিতেন। ইঁহার বয়সের প্রাচীনত্ব সম্বন্ধে সাধকসমাজে প্রসিদ্ধি ছিল এবং এজ্ঞ অনেকে তাঁহাকে কল্লান্তী নামে অভিহিত করিতেন। বিভিন্ন মঠ ও সাধুর আখড়ায় এ মহাপুরুষের তখন খুব মর্যাদা। কিন্তু ইঁহার সহিত কাঠিয়াবাবার আচরণ ছিল নিতান্ত সহজ ও স্বাভাবিক। আর পাঁচজন লোকের সঙ্গে যেমন ব্যবহার তিনি করিতেন, এই মহাত্মার সহিতও ছিল তেমনই ব্যবহার।

কাঠিয়াবাবার সহিত পরিচিত হইবার পর, বৃন্দাবনে থাকা কালে প্রভুপাদ বিজয়কৃষ্ণ মধ্য মধ্য আশ্রমে উপনীত হইতেন। উদ্দেশ্য, বাবাজীর চরণ দর্শন করা। কিন্তু বিশ্বয়ের বিষয়, উভয়ের মধ্য কোন কথাবার্তা প্রায়ই হইত না। গোস্বামী-প্রভু বাবাজী মহারাজকে ভক্তিভরে দণ্ডবৎ করার পর আর সকলের সঙ্গে নিঃশব্দে বসিয়া থাকিতেন। তারপর আবার প্রণামান্তে তেমনই মৌনভাবে তাঁহাকে চলিয়া যাইতে দেখা যাইত।

উভয়ের মধ্য কোন কথাবার্তা বা তত্ত্বালোচনা হয় না, ইহা লক্ষ্য করিয়া জনৈক ভক্ত গোস্বামীজীকে প্রশ্ন করেন।

উত্তরে তিনি বলিলেন, “আমি তো বাবাজী মহারাজের সঙ্গে রোজই আলাপ করে যাচ্ছি? তিনি মৌনী থেকেই আমার সব প্রশ্নের উত্তর দেন, আমায় প্রেরণা যোগান। বাইরের কোন লোকের

শ্রীরামদাস কাঠিয়াবাবা

কথোপকথন যেমন আমি শুনি, বাবাজীর নীরব বাণী আর অন্তরে সঞ্চারিত তাঁর নির্দেশ আমি তেমনি স্পষ্টরূপে বুঝতে পারি।”

পরমহংসজী নামে এক প্রাচীন সিদ্ধপুরুষ ব্রজভূমি অঞ্চলে বাস করিতেন। অলৌকিক শক্তিসম্পন্ন সাধু, লম্বা ইঁহার বিরাট খ্যাতি ছিল। একবার ব্রজপরিক্রমার সময়ে দেখি জন্মসংসারের সঙ্গে এই পরমহংসজীও আসিয়া উপস্থিত। বসন্ত ঋতু ও সাধকদের নিকট ইঁহার ছিল অসামান্য মর্যাদা। একদিন কাঠিয়াবাবার তাঁধুতে শ্রীবিহারীজীর আরতি হইতেছে, এমন সময় ঐ পরমহংসজীকেও সেখানে দেখা গেল। আরতি অন্তে তিনি কাঠিয়াবাবা মহারাজকে প্রদক্ষিণ করিয়া সাষ্টাঙ্গ প্রণাম করিলেন।

আশ্রমের শিষ্যদের মধ্যে দু-একজন এসময়ে এই পরমহংসজীকে উপযুক্ত আদর আপ্যায়ন করিতে ইচ্ছুক হন। বাবাজী মহারাজের নিকট এ প্রস্তাব তখনি জানানো হইল। নিতান্ত নীরস ভঙ্গীতে তিনি বলিলেন, “বেটা, পরমহংসজীকে সমাদর জ্ঞাপনে আমার নিজের দিক দিয়ে কোন প্রয়োজন নেই। তিনি কেন, তাঁর গুরুদেব এলও তাঁকে আমার আসনের কাছে সম্বন্ধনা করে আনতে আমি যেতুম না। তবে তোমাদের যদি তাঁকে ভাল লেগে থাকে, তাহলে ডাকতে পার। এখানে তো তামাক, গাঁদা, ফুল্ফা, ভাঙ সব কিছুই রয়েছে, তাঁর আপ্যায়ন কর। আমার দিক দিয়ে কোনই বারণ নেই।”

এ কথার পর পরমহংসজীকে সম্বন্ধনা জানানোর উৎসাহ আর কাহারো রহিল না। দেখা গেল, ঐ মহাসমর্থ সাধু অগ্রাগ্র সাধারণ ভক্তদের মতই দূর হইতে কাঠিয়াবাবার আশ্রমের দিকে তাকাইয়া থাকিয়া, আর একবার তাঁহাকে দণ্ডবৎ করিয়া চলিয়া গেলেন।

বাবাজী মহারাজ সে-বার কলিকাতায় আসিয়াছেন। এ সময়ে কয়েকজন শিষ্যসহ ভোগাগিরিজী তাঁহাকে দর্শন করিতে আসেন। গিরিমহারাজের খ্যাতি প্রতিপত্তি তখন দিগ্বিদিকে পরিব্যাপ্ত। কিন্তু এই বহুখ্যাত মহাপুরুষের আগমনে কাঠিয়াবাবার আচরণে কোন

ভারতম্যই লক্ষিত হইল না। নির্বিকারভাবে বিপরীত দিকে মুখ করিয়া তিনি নিঃশব্দে শয়ন করিয়া রহিলেন।

ভোলাগিরিজী কক্ষে ঢুকিয়াই করজোড়ে তাঁহাকে স্তুতি কবিত্তে লাগিলেন। বাবাজীর : ত তাঁহার সামান্য কিছু কথাবার্তা হইল। অতঃপর দুই-চারিজন ^{সম্ভ্রম} অমুরোধে গিরিমহারাজ তাঁহাদের কিছু ভদ্রোপদেশ দিলেন। কাঠিয়াবাবা এসময়ে স্মিতহাস্তে সংক্ষেপে শুধু বলিলেন, “এ-রকম উপদেশের ফল কিছু আছে কি? শ্রোতাদের জীবনে এসব কি ভেমন কার্য্যকরী হবে?”

মাননীয় অতিথির এবার বিদায় গ্রহণের পালা। কাঠিয়াবাবা শয্যা ছাড়িয়া উঠিয়া দাঁড়াইলেন। এবার ভোলাগিরিজীর কাঁধে হাত রাখিয়া তিনি তাঁহার সাথে নানা হাস্যকৌতুক করিতে লাগিলেন – গিরিমহারাজ যেন তাঁহার এক ঘনিষ্ঠ বয়স্ক।

কুস্তমেলার সময় কাঠিয়াবাবা মহাবাজের তাঁবুতে অগণিত সাধুর সমাবেশ হইতে দেখা যাইত। বহু সিদ্ধদেহ সাধক এ মহাপুরুষের চরণ দর্শনে অভিলাষী হইয়া সেখানে উপস্থিত হইতেন এই সব সমর্থ সাধুদের উপস্থিতিতেও বাবাজীর আচরণে কিন্তু কোন বৈলক্ষ্য দেখা যাইত না। সাধারণ দর্শনার্থীদের তিনি যেমন হস্ত উত্তোলন করিয়া আশীর্ব্বাদ জানাইতেন, আগন্তুক মহাপুরুষদের বেলায়ও ছিল তেমনি কল্যাণকামী আচরণ।

১৩১৬ সালের ৮ই মাঘ। প্রচণ্ড শীতের কুহেলীতে সারা ব্রজধাম ছাইয়া গিয়াছে। গভীর রাত্রিতে চারিদিক স্তম্ভিমগ্ন। কাঠিয়াবাবাজীর প্রতীক্ষিত মহাপ্রয়াণের লগ্ন সেদিন সমাগত।

মধ্য রাত্রিতে উঠিয়া বাবাজী মহারাজ তাঁহার সেবক রামফলকে ডাকিয়া একবার পানীয় জল চাহিলেন। পান শেষে সংক্ষেপে শুধু কহিলেন, “রামফল, লে ভাই। তোরা হাথ্কা জলভি অব্ পী লিয়া। তু শো যা, হামভি অব্ যায়েঙ্গে ”

শ্রীরামদাস কাঠিয়াবাবা

মহাপুরুষের মহাযাত্রার এই প্রচ্ছন্ন ইঙ্গিত রামফল কি করিয়া বুঝিতে পারিবে ? সেবাক্রান্ত দেহে কিছুক্ষণের মধ্যেই সে নিজায় ঢলিয়া পড়িল ।

একটু পরেই আশ্রমের দুইটি ভক্ত সাধক হঠাৎ নিদ্রাভঙ্গের পর জাগিয়া উঠিয়াছেন । উভয়ে সর্বস্বয়ে দেখিলেন, আশ্রমের অঙ্গনে এক অপূর্ব দিব্য জ্যোতিতে পূর্ণ হইয়া গিয়াছে । তখনই বাবাজী মহারাজের কক্ষে তাঁহারা ছুটিয়া গেলেন । দেখিলেন, চিরতরে তিনি নিত্যলীলার আনন্দধামে প্রবিষ্ট হইয়াছেন ।

কাঠিয়াবাবা মহারাজের মানস সন্তান, পরমপ্রিয় শিষ্য সন্তদাসজী এ সংবাদ পাইয়া দুই দিন পরে বৃন্দাবনে পৌঁছিলেন ।

আসিয়া দেখিলেন, গুরু মহারাজ দেহরক্ষা করিবার পর সমগ্র আশ্রমটি যেন প্রাণশক্তিহীন ও শ্রীভ্রষ্ট হইয়া গিয়াছে । আশ্রমপতির অদর্শনে গাভীগুলিও শোকাকুল হইয়া পড়িয়াছে ? চোখে তাহাদের নিরন্তর অশ্রু বহিতেছে । আশ্রমের বিগ্রহ—শ্রীরাধিকাজীর নেত্রদ্বয় হইতেও ঝরিতেছে নয়নবারি ।

আর একটি অলৌকিক দৃশ্যের কথাও সন্তদাস মহারাজ লিখিয়া গিয়াছেন,—“স্থানীয় প্রথানুসারে ত্রয়োদশ দিবসে শ্রীযুক্ত বাবাজী মহারাজের উদ্দেশ্যে ভাঙারা করা হয় । সেই দিবস হইতে আশ্রমস্থ শ্রীরাধিকাজীর নেত্র হইতে অশ্রুর ঞ্চায় রসধারা প্রবাহিত হওয়া বন্ধ হয় এবং উভয় দেবমূর্তির মলিন ভাব অদৃশ্য হয় । পূর্বোক্ত প্রকার রসধারা কয়েক দিবস ধরিয়া বিগলিত হওয়াতে শ্রীরাধিকাজীর নেত্র কিঞ্চিৎ বিরূপ হইয়া যায় । তজ্জন্ম তাহা পরিবর্তন করিয়া অগ্র নেত্র বসাইতে আমরা বাধ্য হইয়াছিলাম ।”

বামা ক্ষেপা

নিঝুম নিশীথ রাত্রি। নাটোরের রাজপ্রাসাদে রাণী গভীর নিদ্রায় মগ্ন রহিয়াছেন। এক দুঃস্বপ্ন দেখার পর তাঁহার ঘুম ভাঙ্গিয়া গেল। ভয়ে বিহ্বল হইয়া পালঙ্কে উঠিয়া বসিলেন। ভাবিতে লাগিলেন—একি ভয়ঙ্কর কথা! তারাপীঠের অধিষ্ঠাত্রী দেবী—মা-তারা আজ চারদিন উপবাসী।

স্বপ্নযোগে দেবী এইমাত্র তাঁহার সম্মুখে আবির্ভূতা হইয়াছেন। আননে তাঁহার বিষাদের ছাপ, সকাতির বলিলেন, “যুগযুগান্ত ধরে এ সিদ্ধপীঠে আমি বিরাজ করছি। কিন্তু এবার দেখছি, বিদায় না নিয়ে আর উপায় নেই। মন্দিরের পুরোহিত আর তোমার দারোয়ান আমার প্রিয় পুত্র ক্ষেপাকে নিষ্ঠুরভাবে প্রহার করেছে। তাদের এ আঘাত পড়েছে আমারই গায়ে—এই ছাখো, আমার পিঠে রক্তের দাগ। আর এ প্রহার বড় তুচ্ছ কারণে। মন্দিরে আমার বিগ্রহের কাছে তখন ভোগ নিবেদন করা হয়েছে। আমার পাগল ছেলেকে ডেকে বললাম—ক্ষেপা আয়, আমার সঙ্গে খাবি। তাই সে মন্দিরে ঢুকে খেতে বসেছিল। এই তার অপরাধ! ক্ষেপাকে আজ চারদিন প্রসাদ দেয়নি, অনাহারে সে শ্মশানে ঘুরে বেড়াচ্ছে। ওরে, ছেলে না খেলে কি মা খেতে পারে? তাই আমিও রয়েছি উপবাসী।”

রাণী বেদনার্ত্ত কণ্ঠে কাঁদিয়া উঠিলেন। তারপর তাঁহার মিনতি শুনিয়া দেবী কহিলেন, “আচ্ছা, আমি তারাপীঠ ছেড়ে যাবো না। কিন্তু এখন থেকে ব্যবস্থা কর, রোজ আমার ভোগের আগে আমার প্রিয় পুত্র ক্ষেপাকে খেতে দেওয়া হবে।”

বলা বাহুল্য, রাণী তৎক্ষণাৎ স্বীকার করিলেন—এখন হইতে তারাপীঠে ভোগ নিবেদনের আগে দেবীর এই নির্দেশই পালিত

হইবে। তাছাড়া ক্ষেপার সেবা-পরিচর্যায়ও আর কখনো কোন ক্রটি হইবে না।

ভয়ে বিস্ময়ে সে রাত্রির মত রাণীর ঘুম টুটিয়া গিয়াছে। শয্যায় শুইয়া বারবার কেবলই এই স্বপ্নের কথা তিনি মনোমধ্যে আলোড়ন করিতেছেন। তাছাড়া, আরও ভাবিতেছেন—কে এই ক্ষেপা? কি মহা ভাগ্যবান সাধক সে! ব্রহ্মময়ী তারামায়ের সে আদরের ছলনা হইয়া উঠিয়াছে। অপূর্ব একাত্মতা এই ক্ষেপার সহিত জননী তারাদেবীর! নহিলে তাহার পিঠের আঘাত মায়ের দিব্য অঙ্গে কেন এমন করিয়া লাগে?

প্রত্যুষেই নাটো? প্রাসাদে দেওয়ানজীকে আহ্বান করা হইল। অশ্রু ছলছল চোখে রাণী তাহার স্বপ্নের কাহিনী বিবৃত করিলেন। তারপর কহিলেন, “কত ক্ষতি স্বীকার করে নাটরের নিজস্ব মোজার বিনিময়ে রাজা আসাছুয়া খাঁর মোজা তারাপীঠকে এই রাজসরকারের অন্তর্ভুক্ত করা হয়েছে। এই সিদ্ধ পিঠের কোন অবমাননা না হয়, মায়ের সেবার কোনরূপ বিঘ্ন না হয়, সেজ্ঞাই এটা করা হয়েছিল। অথচ আমাদেরই সেবা-ব্যবস্থার মধ্যে থেকে মা আমার আজ চারদিন যাবৎ উপবাসী!

রাজসরকারের হুকুম ও নির্দেশাদসহ দুইজন বিশিষ্ট কর্মচারী ভোরবেলায়ই তারাপীঠে রওনা হইয়া গেলেন। সঙ্গে চলিল পূজা ও ভোগের প্রচুর উপকরণ।

দেবীর স্বপ্নাদেশ আর রাণীর হুকুম শুনিয়া তারাপীঠের একলের বিস্ময়ের সীমা রহিল না। মন্দিরের পুরোহিত ও দারোয়ান সেদিনই পদচ্যুত হইল।

কিন্তু এত কিছু কাণ্ডের যিনি নায়ক, সেই ক্ষেপা বাবা কোথায়? রাজপুরুষদের আগমনের কথা শুনিয়া বালকবৎ মহাসাধক ভয়ে কোথায় সরিয়া রহিয়াছেন। অনেক খোঁজাখুঁজি করিয়া তবে তাঁহাকে পাওয়া গেল।

কর্ষচারীদ্বয় তখন জোড়হাতে নাটোর-রাজের তরফ হইতে এই মহাপুরুষের নিকট ক্ষমা প্রার্থনা করিতে লাগিলেন। ষোড়শোপচারে তারামায়ের পূজা ও ভোগ দেওয়া হইল। ক্ষেপা প্রধান কৌন্সের পদে বৃত্ত হইলেন। স্থায়ী নির্দেশ রহিল—এখন হইতে তারামায়ের ভোগের আগে মায়ের ছেলে ক্ষেপাকে ভোজন করাইতে হইবে।

আর একবারের ঘটনা। ক্ষেপাবাবা তখন প্রায়ই ঞানাবস্থা ও সমাধিতে মগ্ন থাকেন। কখনো বাহুজ্ঞানহীন, কখনো বা একেবারে বালকবৎ ভাব। একদিন তো ভাবোন্মত্ত অবস্থায় তিনি মন্দির বিগ্রহের গায়ে মূত্রত্যাগ করিয়াই বসিলেন।

পুরোহিত ও পাণ্ডার দল তখন 'হায় হায়' করিয়া চারিদিক হইতে ছুটিয়া আসিল। ক্ষেপাকে অনুযোগ ও গালাগালি দেওয়া হইলে তিনি পরমানন্দে বলিয়া উঠিলেন, “বেশ করেছি, আমার মায়ের গায়ে আমি মুতেছি, তোদের তাতে কিরে শালারা।”

সকলে এক মহাসঙ্কটে পড়িলেন। তাবাদেবীর পবিত্র বিগ্রহ অপবিত্র করা হইয়াছে। বিশেষ শাস্ত্রীয় অনুষ্ঠান ও পূজা-পদ্ধতির মধ্য দিয়া আবার তাঁহার পুনঃপ্রতিষ্ঠা করা দরকার। নাটোর রাজ-সরকারে সেদিনই সংবাদ পাঠানো হইল।

এবার আসে মায়ের আর এক প্রত্যাদেশ! কর্তৃপক্ষ তারাপীঠে লোক পাঠাইয়া জানাইয়া দিলেন—মায়ের পূজা পূর্ববৎই চলিতে থাকিবে, ক্ষেপাবাবা স্বেচ্ছাময় স্বতন্ত্র পুরুষ, মায়ের আদরের ছল্লাল। তাঁহার কোন কাজেরই ক্রটি ধরিবার প্রয়োজন নাই। এক্ষেত্রে দেবী বিগ্রহ অপবিত্র করার প্রশ্ন উঠে না, মায়ে-পোয়ের ব্যাপারে অপরের মাথা ঘামাইবার দরকার নাই।

তারামায়ের এ প্রিয় পাগলা ছেলেই বহুবিশ্রুত তত্ত্বসিদ্ধ মহাপুরুষ বামাক্ষেপা। ঊনবিংশ শতাব্দীর বাংলায় শক্তিসাধনার এক অগ্নি-শিখারূপে ক্ষেপার যে মহাজীবন প্রজ্জ্বলিত হয়, তাহার আলোকে উদ্ভাসিত হইয়া উঠে বহু ভাগ্যবান সাধকের জীবন।

মন্দির চত্বরের শেষে বিস্তীর্ণ বালুতটে তারাপীঠের মহাশ্মশান ।
ধরশ্রোতা দ্বারকানদী অর্দ্ধচন্দ্রাকারে এটি বেষ্টন করিয়া রহিয়াছে ।
এ শ্মশানই শিবকল্প মহাসাধক বামার বিচরণভূমি তাঁহার তপোক্ষেত্র ।
এই পটভূমিকায় দিনের পর দিন ফুটিয়া উঠিয়াছে তারাপীঠের এ
মহাকৌলের মহিমময় রূপ ।

অমাবস্তার নিশি দ্বারকতটে ঘনাইয়া আসে । নিবিড় অন্ধকারের
বুক চিরিয়া ধন ঘন বাহির হয় শকুনী গৃধিনীর বুকফাটা আর্তনাদ ।
চিতাধুম ও পুতিগন্ধ চারিদিকে ছড়ানো । লোকের বিশ্বাস তারাপীঠ-
শ্মশানে মৃতের দেহাস্থি রাখিলে মুক্তি অবধারিত । চিতাগ্নি এখানে
তাই কখনো নিভিবার অবসর পায় না । তাছাড়া, এ শ্মশানের প্রথা-
মত শবকে প্রায়ই চিতায় অর্দ্ধদগ্ধ করিয়া রাখা হয়—অবশিষ্টাংশ
টানিয়া ছিঁড়িয়া উদরস্থ করে শকুনি, শৃগাল ও কুকুরের দল । অর্দ্ধদগ্ধ
পচা শব ও কঙ্কাল করোটিতে এস্থান সমাচ্ছন্ন—আর সম্মুখে শিমূল-
তলায় বশিষ্ঠদেবের পঞ্চমুণ্ডী আসনের কোল ঘেঁষিয়া শায়িত
রহিয়াছেন বামা ক্ষেপা -এই শক্তিপীঠের জাগ্রত ভৈরব ।

ক্ষেপা একেবারে দিগম্বর । দীর্ঘ কৃষ্ণকায় দেহটি ভূমিতে এলায়িত ।
সারা অঙ্গে তাঁহার ফুটিয়া উঠিয়াছে ভীম ভৈরব কান্তি । সুরা ও
গঞ্জিকার প্রসাদে আয়ত চোখ দুটিতে রক্তজবার রং । কিন্তু সত্যকার
অনুসন্ধানী সাধকের দৃষ্টিতে ধরা পড়ে—ঐ ভীমকান্তি দেহের ভিতরে
উকি নারিয়া ফিরিতেছে এক আত্মভোলা দেবশিশু, নয়নে তাঁহার
বিচ্ছুরিত স্বর্গীয় আনন্দের ছাতি ।

ক্ষেপাবাবার কোল ঘেঁষিয়া খেলিয়া বেড়ায়—কালো ভুলো,
লালি, শ্বেতফুলি -তাঁহার প্রিয় পার্শদ, কুকুরের দল । বাবার ভক্তেরা
শ্মশানে ইহাদের খাবার ঢালিয়া দেয়, শুরু হয় চিংকার ও ছুটাছুটি ।
মৃতের হাড় মাংসেও ইহাদের রুচি কম নয়—টানাটানিতে কখনো
দু-একটা ক্ষেপার আসনের কাছেই ছিট্কাইয়া পড়ে ।

মহাপুরুষ কখনো ইহাদের আদর করিয়া কোলে টানিয়া নেন,

কখনো বা সরোষে তাড়াইয়া দেন। এই সারমেয় বয়স্কাগণ মাঝে মাঝে বিগড়াইয়া গিয়া আঁচড় কামড়ও তাঁহাকে দেয়। শুধু খুব বেশী রক্তপাত হইলেই ক্ষেপা চটিয়া যান। শাসাইয়া বলেন,—“বোদে শালারা, তোদের দেখছি বাড় বেড়েছে!”

ভক্ত ও দর্শনার্থীর দল আশেপাশে দণ্ডায়মান। পিশাচবালকবৎ এই ব্রহ্মজ্ঞের দিকে তাকাইয়া তাহাদের বিস্ময়ের সীমা নাই।

কাহারও প্রতি প্রসন্ন হইলে ক্ষেপাবাবা মাঝে মাঝে বলিয়া বসেন, “এই শালা, মাল্টাল্ কিছু এনেছিস্ তো বার কর্!”

কারণ বা গঞ্জিকা—একটা কিছু মিলিলেই তাঁহার আনন্দের আর সীমা থাকে না। খেয়ালী পুরুষের সবই ছুজ্জের! আচরণের অর্থ বুঝা দায়। হয়ত দেখা গেল, সেই একই সময়ে মদ গাঁজা ভেট দিতে উত্তত অপর ব্যক্তিকে অকারণে গালি দিয়া তাড়াইতেছেন।

তারামন্দিরের আরতি অনুষ্ঠান শেষ হইয়া যায়। মন্দিরের পাণ্ডা ক্ষেপাবাবার জন্ত শ্মশানে বালুর উপর পাতায় করিয়া ভোগ প্রসাদ রাখিয়া যান। বাবার রোজকার আহারের সঙ্গী তাঁহার প্রিয় বয়স্কাগোষ্ঠী, কেলো-ভুলোর দল। কুকুরের দল যে পাতে ছটোপুটি করিয়া খায়, মহামানব বামাক্ষেপাও তাহাতেই মহানন্দে হন ভোজন-রত। সে এক অদ্ভুত দৃশ্য!

শব-শিবা-সারমেয় পরিবৃত, শ্মশানচারী ক্ষেপাবাবার মহাজীবনে রহিয়াছে নানা বিপরীত ভাবের সমাবেশ। কখনো তিনি উন্মাদ, কখনো বালক, আবার কখনো বা আচরণ করেন পিশাচবৎ। কিন্তু শক্তিদর মহাপুরুষের অন্তস্থলে সদাই বহিতেছে প্রজ্ঞা ও প্রেমের অন্তঃসলিলা ফল্গুধারা। এ রস-সম্পদের সন্ধান পায় শুধু সেই সাধকের দল—ক্ষেপার কুপায় যাঁহাদের দৃষ্টি খুলিয়াছে। মহাতান্ত্রিকের বহিজ্জীবনের আবরণটি বড় বিভ্রান্তিকর; শুধু ক্ষেত্রবিশেষে কখনো কখনো উহাকে খসিয়া পড়িতে দেখা যায়।

তারাপীঠে সত্যকার সাধনার অধিকারী এসময়ে অনেকে উপস্থিত হইতে থাকেন। কোলবরিষ্ঠ মহাপুরুষ ক্ষেপাবাবার কৃপা ও তত্ত্বসিদ্ধি লাভ করিয়া তাঁহারা ধন্য হন।

ক্ষেপার আবির্ভাব-ভূমি বীরভূমের আধ্যাত্মিক ঐতিহ্য বহুকালের। একদিকে বেগবতী তত্ত্বসাধনার ধারা এখানে বহিয়া চলিয়াছে, তেমনি আর একদিকে উচ্ছলিত হইয়া উঠিয়াছে প্রেমরসের তরঙ্গ-ভঙ্গ। জয়দেব, চণ্ডীদাস বীরভূমেরই সন্তান। এখানকারই একচাকা গ্রামে ভূমিষ্ঠ হন অবধূত নিত্যানন্দ। শাক্ত ও বৈষ্ণব উভয়েরই সাধনক্ষেত্র এই বীরভূম, কিন্তু তত্ত্বসাধনার মধ্য দিয়াই এখানকার অধ্যাত্মপ্রতিভা ফুটিয়া উঠিয়াছে বেশী।

পুরাণোক্ত একান্ন শক্তিপীঠের ভিতর পাঁচটিই বহিয়াছে এই অঞ্চলে। তা ছাড়া, নানা সিদ্ধপীঠ ও উপপীঠও ইতস্ততঃ এখানে কম ছড়ানো নাই। বশিষ্ঠদেব হইতে শুরু করিয়া, বামা ক্ষেপা অবধি—কৌলাচার্য্যদের নিরবচ্ছিন্ন সাধনার ধারা এখানকার তারাপীঠে রহিয়াছে প্রবহমান। যুগ যুগ ধরিয়া তত্ত্বসাধনার শ্রেষ্ঠ কেন্দ্ররূপে এস্থান কীর্তিত হইয়া আছে।

পুরাণ-শাস্ত্রমতে বশিষ্ঠ, ভৃগু, দত্তাত্রেয় ছর্ব্বাসা—ইঁহারা সবাই তারা-সিদ্ধ। সারা ভারতে মহাবিজ্ঞা তারাদেবীর আটটি সিদ্ধপীঠ চিহ্নিত রহিয়াছে এবং শাক্ত-সাধকদের তপস্যা-ধারার মধ্য দিয়া পীঠগুলি আজো রহিয়াছে জাগ্রত।

জনশ্রুতি আছে, ব্রহ্মার মানসপুত্র বশিষ্ঠদেব তারা-সিদ্ধ হইয়া দেবীর শিলাময়ী প্রতীক এখানে প্রতিষ্ঠা করিয়া যান।

তারাপীঠ কিন্তু পুরাণোক্ত একান্ন পীঠের অন্তর্ভুক্ত নয়, সিদ্ধপীঠ-রূপেই ইহা গণ্য। মহাতাত্ত্বিক ঋষি বশিষ্ঠদেবই ইহার প্রাণ প্রতিষ্ঠা করেন। তারপর যুগযুগান্তের ধারা বাহিয়া তারাপীঠের মহাশ্মশানে উপস্থিত হইয়াছে সমর্থ শক্তিসাধকের দল। ইঁহাদের অনেকেরই

স্মৃতি আজ লোকচৈতন্য হইতে বিলুপ্ত। কিন্তু কোলসাধনার অন্তঃ-
সলিলা ধারাটি বরাবরই এখানে বহিয়া চলিয়াছে।

প্রায় দুইশত বৎসর পূর্বের কথা। তারাপীঠে তখন বিশেষ ক্যাপা
নামে এক বিরাট শক্তিসাধকের আবির্ভাব হয়। ইহার পর আসেন
কৌলাচার্য আনন্দনাথ, রাজা রামকৃষ্ণের সমসাময়িক। নানা
ঘটনাচক্রের ভিতর দিয়া তারাপীঠের সেবা ও পরিচালনার ভার
নাটোররাজের উপর পতিত হয়, রাজা রামকৃষ্ণও পরম আগ্রহভরে
এই সিদ্ধপীঠের সমস্ত কিছু দায়িত্বের ভার গ্রহণ করেন। শুনা যায়
তারা-সিদ্ধ মহাপুরুষ আনন্দনাথের নিকট হইতে রাজা রামকৃষ্ণ নানা
সাধন-নির্দেশ গ্রহণ করিতেন। কিছুকাল এখানে বসিয়া তিনি
তপস্যাও করিয়াছিলেন।

আনন্দনাথের প্রশিষ্য ছিলেন আচার্য মোক্ষদানন্দ, তাঁহার সময়েই
তারাপীঠে স্বনামধন্য সাধক কৈলাসপতি বাবার আবির্ভাব ঘটে।
এই শক্তিমান মহাপুরুষের সাধনার জ্যোতিতেই মহাসাধক ক্ষেপা
উদ্ভাসিত হইয়া উঠেন। তাঁহার শুদ্ধসত্ত্ব আধারে কৈলাসপতি-বাবা
নিজের সাধন-জীবনের ঐশ্বর্য্য অকুপণ করে ঢালিয়া দেন। বামা
ক্ষেপা হন তারাসিদ্ধ। তন্ত্রসাধনার অগ্রতম শ্রেষ্ঠ ধারক ও বাহকরূপে
তাঁহার অভ্যুদয় ঘটিতে আমরা দেখি।

তারাপীঠের সন্নিকটে আটলা গ্রামে বামা ক্ষেপার জন্ম। ক্ষুদ্র
এই গ্রামটিতে বহু ব্রাহ্মণের বাস। যজন-যাজন ও ক্ষেত-খামারের
আয়ে তাহাদের দিন চলিয়া যায়।

ক্ষেপার পিতা সর্বানন্দ চট্টোপাধ্যায় একজন অতি সাধারণ গৃহস্থ
ব্রাহ্মণ। ঘরে তাঁহার স্বচ্ছলতা না থাকিলেও অভাব-অনটন ভেমন
বেশী নাই। সর্বানন্দ বড় ধর্ম্মভীরু, পবিত্রচেতা ও সরল মানুষ। অল্প
বয়সে কুলগুরুর কাছে দীক্ষা নিয়া তারা-মায়ের আরাধনায় তিনি
ডুবিয়া যান। ধর্ম্মপ্রাণা পত্নী রাজকুমারী ও কয়েকটি পুত্র-কন্যা নিয়া
তাঁহার সংসার। এই সর্বানন্দের দ্বিতীয় পুত্রই বামা ক্ষেপা।

১২৪৪ সনের ১২ই ফাল্গুন। ক্ষেপা এই শুভ দিনটিতে ভূমিষ্ঠ হন। শৈশব হইতেই তিনি আপনভোলা, পবিত্রতা ও সরলতার প্রতিমূর্তি। এত সরল বলিয়াই প্রতিবেশীরা বলে ‘হাউড়ে’—নিবুঁকি। বিন্দুমাত্র সাংসারিক বোধই যাহার নাই, সংসারী লোকের চোখে বোকা ও পাগল ছাড়া সে আর কি হইতে পারে? তাহার সরলতা যে জন্মান্তরের তপশ্চাকল তাহাই বা কে বুঝিতে চায়?

স্বভাবভক্ত বামাচরণের আচরণ বড় অদ্ভুত। প্রতিবেশীদের ঠাকুর-ঘরের যত বিগ্রহ সব গোপনে সরাইয়া আনিয়া নদীতীরে সে পূজার অভিনয় করে। এই খেলাধুলা সাজ হইবার পর কোন্ বিগ্রহ কোথায় হারাইয়া যায় তাহার ঠিক থাকে না। তাই কাহারও বাড়ীতে বিগ্রহ কখনো হারাইয়া গেলে অমনি খোঁজ পড়ে বামাচরণের। ‘হাউড়ে’কেই সকলে চাপিয়া ধরে, আর প্রায়ই ভাগ্যে তাহার জুটে তিরস্কার ও নানা লাঞ্ছনা।

বালককালে বামের অন্তমনস্কতার নানা অদ্ভুত কাহিনী শুনা যায়। একবার তো তাহার আগুনে পুড়িয়া মরিবার যো-ই হইয়াছিল। গ্রামের প্রান্তে এক খড়ের গাদায় তাহার প্রিয় খেলার স্থান। ভাব-তন্ময় ‘হাউড়ে’ পরম নিশ্চিন্তে সেদিন সেখানে বসিয়া আছে, হঠাৎ এক সময় খড়ের গাদার নীচে আগুন লাগিয়া যায়। পাড়ার লোকে সন্ত্রস্ত হইয়া পড়ে, আগুন কোন্‌দিকে ছড়ায় কে জানে? চারিদিকে মহা সোরগোল। নীচ হইতে খড় সব পুড়িয়া যাইতেছে, কিন্তু বামাচরণের সেদিকে কোন হুঁশই নাই। আগুন নিভাইতে আসিয়া সকলে দেখিল, ‘হাউড়ে’ এ সময়ে এই খড়ের গাদার উপর মনের আনন্দে বসিয়া আছে। সৌভাগ্যক্রমে এ অগ্নিদাহে সেদিন তাহার কোন ক্ষতি হয় নাই।

পাঠশালার পাঠ শেষ হইয়া যায়। কিন্তু বামাচরণের ভাগ্যে উচ্চ বিদ্যালয়ে যাওয়ার সুযোগ হয় কই? ঘরে যে বড় অর্থান্ধার।

পিতা সর্বানন্দের সংসার বড় হইয়াছে, অনটনও বাড়িয়াছে। তাই অর্থাগমের জন্য এক নূতন উপায় তাঁহাকে উদ্ভাবন করিতে হয়। তাঁহার নিজের বেশ সঙ্গীত-প্রতিভা রহিয়াছে। সুমিষ্ট গান যেমন করিতে পারেন, বেহালা বাজাইতেও তেমনই পারদর্শী। পুত্রদ্বয় বাম ও রামেরও সঙ্গীতে দখল কম নয়। ইহাদের নিয়া সর্বানন্দ এক কৃষ্ণাঙ্গার দল গঠন করিলেন।

অভিনয়ে বামাচরণ কখনো কৃষ্ণ কখনো রাম প্রভৃতি সাজেন। ঠাকুর-দেবতার বেশে সজ্জিত হইয়া রামায়ণ, কৃষ্ণকীর্তন ও চণ্ডীর গাথা তিনি গান করেন। অভিনয়ের মধ্য দিয়া স্বভাবভক্ত বামের মধ্যে জাগ্রত হয় এক অপূর্ব আনন্দাবেশ, ভাবতন্ময় বালক এক একদিন বাহ্যজ্ঞান হারাইয়া ফেলে।

বামাচরণের পড়াশুনার তেমন বেশী সুযোগ হয় নাই। কিন্তু অভিনয় করিয়া ও অভিনয় দেখিয়াই ক্রমে ক্রমে ব্যাস-বাল্মীকির পুরাণে তাঁহার ব্যুৎপত্তি হইতে থাকে। তাছাড়া, পাঁচালী কানীরাম-কৃষ্ণবাসের কাব্য প্রভৃতির মাধ্যমে স্বচ্ছ দৃষ্টিভঙ্গীটি তাঁহার গড়িয়া উঠে। কবিকঙ্কণ, রামপ্রসাদ আর কমলাকান্তের সঙ্গীতঝঙ্কার বালক-হৃদয়ে সদাই তোলে অনুরণন। উত্তরকালে এইসব সঙ্গীত ও লীলা-আখ্যান ক্ষেপা ভক্তদের কাছে সোৎসাহে গাহিতেন।

বামের বড় ভগ্নী, জয়কালী দেবী বড় ভক্তিমতী। ইঁহার প্রভাবও গোড়ার দিকে তাঁহার জীবনে অনেকটা পড়িয়াছিল। দিদি ছিলেন সত্যকার এক সাধিকা। অল্প বয়সে বিধবা হইয়া তিনি সন্ন্যাসিনী হন, যৌবনে তারাপীঠে গিয়া কিছুকাল সাধনাও করেন। তারপর আটলা গ্রামে মায়ের কাছে আসিয়া বসবাস করিতে থাকেন। শুনা যায় তারা-সাধিকা এই নারী একটি নির্দিষ্ট দিনে নিজের দেহরক্ষার ইচ্ছা ব্যক্ত করেন। তারাপীঠে তাঁহাকে বহন করিয়া আনার পর তারা-নাম জপিতে জপিতে তাঁহার লোকান্তর ঘটে।

উত্তরকালে কখনো একধার উল্লেখ করিলে বামের আয়ত চোখ দুটি

উজ্জলতর হইয়া উঠিত। বলিতেন, “দিদি আমার বড় আশ্চর্য্য মেয়ে ছিলেন গো, তাঁর মরণটাও ঘটলো আশ্চর্য্য রকমে।”

দিদির ধর্ম্মজীবনের স্পর্শ বালক বামাচরণের জীবনে সেদিন নূতন পথের ইঙ্গিত আনিয়া দিয়াছিল।

প্রতিবেশী দুর্গাদাস সরকার ছিলেন নাটোর-রাজের কন্মচারী। তারা-মন্দিরের তত্ত্বাবধানের ভার তখন তাঁহার উপর অর্পিত। তারা-পীঠের তত্ত্বসাধক, কৈলাসপতি বাবার পায়ের ধূলা প্রায়ই তাঁহার বাড়ীতে পড়িত। সিদ্ধ মহাপুরুষরূপে তখন কৈলাসপতির খ্যাতির সীমা নাই। সরকার মহাশয়ের গৃহে তিনি আসলেই বাম কি যেন এক অজ্ঞাত আকর্ষণে সেখানে ছুটিয়া যাইতেন। এই মহাপুরুষের ছোটখাট সেবায়ত্ত্বের ভার পাইলে তাঁহার আনন্দের অবধি থাকিত না। তিনিও বালককে প্রায়ই ডাকিয়া পাঠাইতেন—স্নেহসন্তাষণ ও আদরযত্ন করিতেন। সার্থক শক্তিসাধনার যে অঙ্কুর বামাচরণের মধ্যে রহিয়াছে, তাহা কৈলাসপতি বাবার চোখ সেদিন এড়ায় নাই।

বামাচরণ যখন পিতৃহারা হন তখন তাঁহার বয়স আঠার বৎসর। কৃষ্ণযাত্রার দলটি ভাঙ্গিবার সাথে সাথে জননী রাজকুমারীর মাথায়ও আকাশ ভাঙ্গিয়া পড়ে। সর্ব্বানন্দের চেষ্টায় কোন প্রকারে এতদিন দিন গুজরান হইতেছিল, এইবার তাঁহার অভাবে এতগুলি পোষ্য নিয়া রাজকুমারী বিষম বিপাকে পড়িলেন। সামান্য জোতজমি যাহা বহিয়াছে তাহাতে মোটেই কুলায় না। তছপরি ‘হাউড়ে’ বামার সাংসারিক বুদ্ধির অভাবে বিপদ বাড়িয়াই চলে।

কৃষাণেরা জমিতে কাজ করিতে আসে। মা বামাকে মাঠে পাঠাইয়া দেন, সে তাহাদের খাবার দিয়া আসিবে, তত্ত্বাবধান করিবে। বাম কাজে উপস্থিত হন ঠিকই, কিন্তু তাঁহার দৃষ্টি নিবন্ধ থাকে আকাশের দূর দিগন্তে। আকাশ-তারা খুঁজিয়া বেড়াইয়া বালকের দিন কাটে। মাঠের কাজ মাঠেই পড়িয়া থাকে, কৃষাণদের খাবার প্রায়ই সময়মত

পৌঁছায় না। ফলে, রুষ্ট হইয়া মায়ের কাছে তাহারা রোজ অভিযোগ জানাইতে আসে। মা বুঝিতে পারেন, এ হাউড়ে ছেলেকে দিয়া তাঁহার কোন কাজই চলিবে না।

সংসার চালানো কঠিন হইয়াছে, রাজকুমারী তাই নিরুপায় হইয়া ছুই ছেলেকে তাহাদের মাতুলমায়ে পাঠাইয়া দিলেন। মাতুল পাকা বিষয়ী, ভাগিনেয়দের বিড়ালয়ে পড়িতে দিয়া নিজের অর্থ অপচয় করিতে তিনি রাজী নন। ইহাদের তাই গোচারণে লাগাইয়া দিলেন।

মাঠে গিয়া বামাচরণ আপন ভাবে বিভোর হইয়া বসিয়া থাকেন, আর তাঁহার এ অন্তমনস্কতার সুযোগ নিয়া গরুগুলি নির্বিচারে শস্য নষ্ট করে। দিনের পর দিন লোকের অভিযোগে মাতুল অস্থির হইয়া উঠেন। বামের উপর চলিতে থাকে নির্যাতন।

ছঃধিনী মা সব কথাই শুনিলেন; হতভাগ্য পুত্রদের গৃহে ফিরাইয়া না আনিয়া আর উপায় রহিল না। ভাইকে নিয়া বামাচরণ স্বগ্রাম আটলায় ফিরিয়া আসিলেন। কিন্তু এখানে পৌঁছিয়া তাঁহার ভাবান্তর দেখা দেয় আরও ব্যাপকভাবে—জাগতিক সকল কিছু কাজেই দেখা দেয় কৰ্মবিমুক্ততা। গোচারণ, চাষবাস, হাটবাজার কোনকিছুই আর তাঁহার দ্বারা হইবার নয়। সাংসারিক জীবনের উপর এক প্রবল নিরাসক্তি তখন আসিয়া পড়িয়াছে

শুধু দেখা যায়, দেবী পূজাতে বামাচরণের পরম উৎসাহ। ইহাতে কোন বিধিবিধান, শুদ্ধাচার অথবা মন্ত্রতন্ত্রের বালাই তাঁহার নাই। টাঙ্গা, করবী, ঘেঁটুফুল—পথ চলিতে যাহা মিলে তাহাই কচুপাতায় সাজাইয়া সানন্দে তিনি তারা মায়ের নামে অর্ঘ্য নিবেদন করিয়া দেন। ‘মা-তারা’ নিনাদে গ্রামের পথঘাট মুখরিত হয়। স্বভাব-সরল হাউড়ে বামার জীবনের সাথে, তাঁহার সারা অস্তিত্বের সাথে ওতপ্রোত হইয়া উঠে তারা-মায়ের দিব্য সত্তা। সবার অলক্ষিতে, নিজেরও অজ্ঞাতে তরুণ সাধক এবার তারা-ময় হইয়া যাইতেছেন।

বামা ক্ষেপা

আপন খেয়াল খুশীতে বামাচরণ গ্রামময় ঘুরিয়া বেড়ান, কখনও বা আচম্বিতে তারাপীঠে তারামায়ের মন্দিরে ছুটিয়া চলিয়া যান। যুগ যুগ ধরিয়া এখানকার শিলাসনে মায়ের পাদপদ্ম দুটি অঙ্কিত রহিয়াছে, পাগল বাম তাহার উপর রাশি রাশি বুনোফুল আর বেল-পাতার অঞ্জলি ঢালিয়া দেন।

তারাপীঠের শ্মশানে তখন বহু তত্ত্বসাধকের আনাগোনা। তাছাড়া, এখানকার প্রধান কোলপদে রহিয়াছেন মোক্ষদানন্দ। সিদ্ধ মহাপুরুষ কৈলাসপতি বাবাও এখানে উপস্থিত। তারাপীঠে গেলেই বামাচরণ এই মহাত্মাদের স্নেহ ও সাহচর্য লাভ করিয়া ধন্য হন।

কৈলাসপতি বাবার দিব্য দৃষ্টি সজাগ সতর্ক প্রহরীর মত নিরন্তর তাঁহাকে যেন বেঁটন করিয়া রাখে। স্নিগ্ধমধুর মমত্বে ও আদর-যত্নে কৈলাসপতি বামাচরণের হৃদয় অধিকার করিয়া বসিয়াছেন, তারাপীঠ শ্মশানে না আসিলে তাই তাঁহার স্বস্তি নাই। অজানা অমোঘ এক আকর্ষণে বারবার তিনি এই মহাশ্মশানে ছুটিয়া আসেন, মন্ত্রমুগ্ধের মত কৈলাসপতির কাছে বসিয়া তাঁহার কথা শ্রবণ করেন। প্রাণ ঢালিয়া রত হন মহাপুরুষের সেবায়।

কিছুদিন পরের কথা। তারা মায়ের জন্ম বাম ক্ষেপিয়া উঠিয়াছেন। হাউড়েকে লোকে এবার ডাকিতেছে ‘ক্ষেপা’ নামে। জন্মান্তরের সাত্ত্বিক সংস্কার ধীরে ধীরে জাগিয়া উঠিতেছে, অন্তরে দেখা দিয়াছে তীব্র ব্যাকুলতা। মাতৃদর্শনের জন্ম তিনি অধীর। জননী রাজকুমারীর শঙ্কার অবধি নাই, সতর্কভাবে বামকে তিনি ঘরের ভিতর আবদ্ধ করিয়া রাখেন। পাগল ছেলে কখন কোথায় উধাও হইয়া যায়, কে জানে ?

ক্ষেপা কখনো আপন ঘরে বসিয়া নিভৃতে তারাদেবীর ধ্যানে নিমগ্ন থাকেন, কখনো বা ধ্যান টুটিয়া জাগে ইষ্ট বিচ্ছেদের দুঃসহ যন্ত্রণা। ‘তারা—তারা’ রবে এক এক সময়ে জ্ঞানহারী হন।

বড় অদ্ভুত এই দিব্যোন্মাদের অবস্থা। কখনো দেখা যায় চক্ষুতারকা দুইটি উর্দ্ধে স্থির হইয়া গিয়াছে। দেহটি নিঃসাড়। মুখ দিয়া অবিরত ফেনা নির্গত হইতেছে। ভীত হইয়া জননী তাড়াতাড়ি প্রতিবেশীদের ডাকিয়া আনেন।

পুত্র সম্মিৎ পাইলে বামাচরণকে কত অনুনয় করিয়া বুঝান, “ওরে, এই সংসারের ভার আর কে বহিবে বল? তোদের সবাইকে নিয়ে এবার যে অন্নাভাবে মরতে হবে।”

মাতৃভক্ত বাম মাঝে মাঝে সজাগ হইয়া উঠেন। মাকে প্রবোধ দেন, “বামুনের ছেলে, কোথাও কি একটা ঠাকুর পূজোর কাজ জুটবে না? ঘুরে এলে রোজগার হবেই—তুমি ভেব না।”

কাজের চেষ্টায় বাম বাহির হইলেন। কিন্তু সংসার-জীবনে তিনি যেমন অনভিজ্ঞ, তেমনই নিরাসক্ত। অন্তরে সদাই তৈলধারাবৎ চলিতে থাকে মা-তারার স্মরণ-মনন-ধ্যান। আপনভোলা এ পাগল কি করিয়া পূজা অর্চনা যথানিয়মে করিবে?

এক জায়গায় দুই-চারিদিন পূজারীর চাকুরি করিলেন। তারপর কাজ ছাড়িয়া দিয়া আটলায় ফিরিয়া আসিতে হইল।

ইষ্টদেবীর অবিরাম স্মরণ-মননে বাম এক উন্মাদ সাধকে পরিণত হইয়া গিয়াছেন। জগজ্জননীর অমৃতসত্তা হইয়াছে তাহার সারা অস্তিত্বে ওতপ্রোত। ইষ্টদেবী তারা-মা এবার তাই এ পরম অধিকারী সাধককে জানাইলেন আহ্বান। ফেপা বামের পূর্বজন্মের সাধন-সংস্কার জাগিয়া উঠিয়াছে, আন্তর সাধনার ফলটিও হইয়াছে পরিপক্ব। বৈরাগ্যের পাগল হাওয়ায় তাই অচিরে সংসারের যোগসূত্রের শীর্ণ বোঁটা এবার খসিয়া পড়িল। সব কিছু ঠেলিয়া ফেলিয়া তিনি সেদিন তারাপীঠের মহাশ্মশানে ছুটিয়া চলিলেন।

বালুকাময় শ্মশানভূমি বিধৌত করিয়া খরশ্রোতা দ্বারকের জল ছুটিয়া চলিয়াছে। বস্তার জলোচ্ছ্বাসে সেদিন তাহার বুকে নামিয়াছে এক উত্তাল উদ্দামতা। বৈরাগ্যচঞ্চল বামাচরণের হৃদয়ও আজ তেমনি

হইয়া উঠিয়াছে তরঙ্গায়িত। অধীর হইয়া তিনি নদীতে ঝাঁপ গিলেন
সাঁতার কাটিয়া পৌঁছিলেন ওপারে।

বালুচরের ভাঙ্গা ঘাটের নিকটেই কৈলাসপতিবাবার কুটির।
বামাচরণ তাঁহার চরণে নিপতিত হইলেন।

তন্ত্রসিদ্ধ মহাপুরুষ সেদিন যেন তাঁহারই অপেক্ষায় ছিলেন।
গৃহত্যাগী তরুণকে আশ্বাস দিয়া কহিলেন, “বাবা বামাচরণ, অস্থির
হয়ো না। যে পরম ধন পাবার জন্ম তুমি ব্যাকুল হয়েছ, তা শীগ্গিরই
মিলিবে। তুমি যে তারা ব্রহ্মময়ীর কুপার এক উত্তম অধিকারী!”

এখন হইতে ক্ষেপা তারাপীঠের মহাশ্মশানেই রহিয়া গেলেন।
কৈলাসপতির সান্নিধ্যে দিনগুলি তাঁহার মধুময় হইয়া উঠিল। শ্মশানে
ও দ্বারকতটে দিনের পর দিন মনের আনন্দে ঘুরিয়া বেড়ান, কৈলাস-
পতির কাছে নির্দেশাদি নিয়া মা-তারার ধ্যানে মগ্ন হন। মাঝে মাঝে
তাঁহার মাতৃনামের আরাবে দিগ্দিগন্ত মুখরিত হইয়া উঠে।

কৈলাসপতি ছিলেন ঋদ্ধি-সিদ্ধিযুক্ত সাধক। নানা চমকপ্রদ
বিভূতিলীলা প্রায়ই ক্ষেপা তাঁহার মধ্যে দেখিতেন। একবার সবিস্ময়ে
দেখিলেন, বন্যা-বিক্ষুব্ধ দ্বারক নদীর ওপার হইতে কৈলাসপতি
অবলীলায় কাষ্ঠপাছুকা যোগে হাঁটিয়া এপারের সৈকতে অবতরণ
করিতেছেন।

আর একবারের কথা। কৈলাসপতি বাবা সেদিন সত্ত্ব ধ্যান হইতে
ব্যুখিত হইয়াছেন। শ্মশানের পাশেই রহিয়াছে এক মৃততুলসীর ঝাড়।
এটি দেখাইয়া ক্ষেপাকে কহিলেন,—“ক্ষেপা, এটা মৃত না জীবিত?”

“বাবা, এ যে একেবারে শুকনো,—মরা গাছ।”

“জীবন আর মৃত্যু কিন্তু একই বাবা—তুলসী জিউ, তুলসী জিউ।”
একথা বলিয়াই মহাপুরুষ কমণ্ডলু হইতে জল ঢালিয়া দিলেন। কথিত
আছে, এই প্রাণহীন শুষ্ক তুলসীর ঝাড় সিদ্ধ তন্ত্রসাধকের মুখনিঃসৃত
বাণীর ফলে সেদিন ধীরে ধীরে মুঞ্জরিত হইয়া উঠিয়াছিল। উত্তরকালে
এ ঘটনার উল্লেখ করিয়া ক্ষেপা তাঁহার গুরুদেবের অলৌকিক শক্তির

কাহিনী সকলকে শুনাইতেন, আর তাঁহার আয়ত নয়নছটি পুলকাক্রান্তে ভরিয়া উঠিত।

সাধক হিসাবে বামাচরণ অনন্যসাধারণ—এক পরম শুদ্ধ আধার। নিবিড় স্নেহে কৈলাসপতিবাবা তাই তাঁহাকে বুকে টানিয়া নিয়াছেন। কোলমার্গের নিগূঢ় মন্ত্র ও ক্রিয়াদির ভিতর দিয়া শুরু করাইয়াছেন বামাচরণের শক্তি-সাধনা।

এদিকে পাগলা ছেলের জন্ম রাজকুমারীর দুশ্চিন্তার অবধি নাই—আহাব-নিদ্রা প্রায় ত্যাগ হইয়াছে। ক্ষেপা তারাপীঠে গিয়া সন্ন্যাস নিয়াছেন এ সংবাদ শুনিয়া তিনি ত্রস্তপদে ছুটিয়া আসিলেন। বাববার বুঝাইতে লাগিলেন, নিতান্ত অপরিণত বয়স তাঁহার—শুধু শুধু কেন এই দুশ্চর তপস্যার পথে আসা? তাছাড়া ভূতপ্রেত-শব-শিবা সঙ্কুল এই শ্মশানে কে প্রতিদিন তাঁহার দেখাশুনা করিবে? কে আহার যোগাইবে? অস্থখে বিস্থখে শুশ্রূষাই বা করিবে কে? এদিকে সংসারের অভাব-অনটন চরমে পৌঁছিয়াছে। মা ও ভাই-বোনেরা প্রায়ই থাকে অর্দ্ধাশনে, তাহাদের ভাবই বা কে নিবে?

শ্মশানচাবী ক্ষেপা তখন তারা-ধ্যানে তন্ময় হইয়া গিয়াছেন, তাঁহার দেহ, মন ও প্রাণ সাধনার গভীরে নিমজ্জিত। জননীর ক্রন্দন কতক কানে পৌঁছিল কতক পৌঁছিল না।

এবার প্রিয় শিষ্য ক্ষেপার সমর্থনে কৈলাসপতিবাবা আগাইয়া আসিলেন। সমগ্র বীরভূম অঞ্চলে তখন এই মহাপুরুষের বিরাট প্রতিষ্ঠা ও প্রভাব। ক্ষেপার জননীও তাঁহাকে কম সমীহ করেন না।

কৈলাসপতি দৃঢ় কণ্ঠে কহিতে লাগিলেন—“মা, তোমার এ ছেলে যে—নিভ্যমুক্ত, পরম বৈরাগ্যবান পুরুষ। দেখছো তো, আজ অবধি তোমার সংসারে সে কোন কাজেই আসেনি। কারণ, সংসার তার জন্ম নয়। এখন ঘরে ফিরে গেলেও তোমার কোন কাজেই সে লাগবে না। অধ্যাত্মসাধনার পথে যে বিরাট সম্ভাবনা তার রয়েছে, তা যে তাকে ফলাতে হবে। অগণিত মুমুক্শুকে তোমার এই ছেলে মুক্তিদান করবে

বহুজনের কল্যাণ তার এ সাধক-জীবনের ভেতর দিয়ে নিহিত রয়েছে। এ ছেলের সাধনা ও সিদ্ধিতে তোমার কুল পবিত্র হবে, ধন্য হবে। কোন ভয় নেই মা, তোমার হাউড়ে ছেলের তার আজ থেকে আমিই নিয়ে নিলাম।” জননী সাশ্রনয়নে ঘরে ফিরিয়া আসিলেন।

ক্ষেপা তো ঘর-সংসার সব কিছু ছাড়িয়া দিলেন। কিন্তু জননী ও ভাই-ভগিনীদের কি উপায় হইবে? কি করিয়াই বা তাহাদের ভরণ-পোষণ চলিবে? প্রতিবেশী দুর্গাদাস সরকার তারা-মন্দিরের কর্মচারী, নিঃসহায়া রাজকুমারীর সংসার যাহাতে চলে সেজন্য তিনি উদ্যোগী হইলেন। স্থির হইল, বামাচরণ তারাদেবীর অর্চনার জন্য রোজ ফুল সংগ্রহ করিবেন, এজন্য মাসে তাঁহাকে কয়েকটা টাকা দেওয়া যাইবে। তবু তো ইহা দিয়া মায়ের কিছুটা সাহায্য হইবে।

কিন্তু ক্ষেপাকে নিয়াই যত গোল বাধিল। বাহু জীবনের সমস্ত কিছু কাজকর্মের যে তিনি অতীত। ফুলের সাজি নিয়া রোজ বাগানে যান, কোন কোন দিন ফুল তোলার কাজ করেন বটে, কিন্তু প্রায়ই দেখা যায়—বেলুঁশ হইয়া ঘণ্টার পর ঘণ্টা রাঙাজবার ডালটি ধরিয়া তিনি দাঁড়াইয়া আছেন। রক্তজবা দেখিলেই মনে পড়ে তারামায়ের রাতুল চরণ; অমনি ভাববিহ্বল ও বাহুজ্ঞানহীন হইয়া পড়েন। মন্দিরের পূজারীর হইয়াছে বিপদ। ত্রুদ হইয়া তিনি গালাগাল দেন, তারপর নিজেই পুষ্পচয়ন করিয়া আনিয়া কাজ চালান।

দুর্গাদাস ভাবিলেন, ক্ষেপার হয়তো এ কাজ ভাল লাগিতেছে না, তারা-মায়ের মন্দিরের কাজে তিনি বেশী আনন্দ পাইবেন, মনোযোগও হয়তো দিবেন। নূতন কাজ শুরু হয়। এবার হইতে তাঁহাকে মন্দিরের কাজের জন্য উপচার সংগ্রহ, চন্দন, নৈবেদ্য ইত্যাদির জোগাড় করিতে হইবে।

কিন্তু আত্মসমাহিত সাধকের পক্ষে একাজই বা সম্ভব হইয়া উঠে কই? মাতৃধ্যানে সদা বিভোর বাম কোন কাজই করিতে পারে না।

বেহঁশ অবস্থায় পূজার উপকরণ এক একদিন নষ্ট করিয়া ফেলেন—
অদৃষ্টে জুটে তাঁর ভৎসনা।

দুর্গাদাস বুঝিলেন, বাহিরের বন্ধন টুটিবার সঙ্গে সঙ্গে ক্ষেপার
বাহিরের কাজও ঘুচিয়া গিয়াছে—তাই এই কর্মবিমুক্ততা। সবাইকে
বলিয়া দিলেন, এখন হইতে ক্ষেপার কোন নির্দিষ্ট কাজ থাকিবে না।
কেউ কোন কাজের ভার যেন তাহাকে না দেয়, সে ইচ্ছামত কাজ
করিবে ও মায়ের কাছে পড়িয়া থাকিবে।

তারামায়ের ছেলে তারামায়েরই সঙ্গে মহাশ্মশানে চিরদিনের জন্য
রহিয়া গেলেন। ইহার পর আপনভোলা ক্ষেপার সাধন-জীবনে দেখা
দিল চরম বৈরাগ্যের পালা।

শরীরের দিকে বিন্দুমাত্র দৃষ্টি নাই, আহার-বিহারেও দেখা যায়
যদৃচ্ছাচার। মাথা গুঁজিবার জন্য যে একটা পর্ণকুটিরের প্রয়োজন,
সে বোধও তাঁহার আজ আর নাই। নীচে তারা-মায়ের সিদ্ধপীঠ
মহাশ্মশান, আর উপরে উদার আকাশের মহাবিস্তার। মুক্ত বিহঙ্গের
মত ক্ষেপা এখানে স্বেচ্ছাবিহার করিতে থাকেন। মাথার উপর দিয়া
শীত, গ্রীষ্ম ও বর্ষার প্রকোপ অলক্ষ্যে চলিয়া যায়। আনন্দময়ী মায়ের
ধ্যানানন্দে তিনি দিন-রজনী যাপন করিতে থাকেন।

ইতিমধ্যে দেখা দিল এক ছুঁদেব। কিছুদিন রোগভোগের পর
জননী রাজকুমারী দেহত্যাগ করিলেন।

ক্ষেপা সেদিন শ্মশানঘাটে স্নান করিতে নামিয়াছেন। দেখিলেন,
ওপারে আত্মীয়স্বজনদের ভীড়। কনিষ্ঠ ভ্রাতা রামচরণ জননীর মৃতদেহ
নিয়া উপস্থিত হইয়াছে। বর্ষাবিক্ষুব্ধ উত্তাল নদী পার হওয়া সহজ
নয়, তাই নদীর অপর তীরেই দাহকার্যের ব্যবস্থা চলিতেছে।

মুহূর্তমধ্যে ক্ষেপার অন্তরে খেলিয়া যায় চিন্তার বিদ্যুৎচমক। সে কি
কথা? জননীর সৎকার তারামায়ের সিদ্ধপীঠের এই শ্মশানে সম্পন্ন
হইবে না? দেহাস্থি তাঁহার তারাপীঠের পবিত্র ক্ষেত্রে রক্ষিত হইবে

না? তীব্র উদ্বেজনায বামাচাণের ভিতরকার ক্ষেপা এবার জাগিয়া উঠিল।

ব্যাকুল কণ্ঠে চোঁচাইয়া উঠিলেন, “মা-তারা, দেখিস্ জননী যেন তোমার এ শ্মশানে ঠাই পায়।” সঙ্গে সঙ্গে খরশ্রোতা নদীতে দিলেন ঝাঁপ। শবদেহ আজ যে তাঁহাকে এপারের এই পবিত্র সিক্কপীঠে নিয়া আসিতেই হইবে।

শবযাত্রীরা অপর তীরে চিতায় অগ্নিসংযোগে উত্তপ্ত হইয়াছেন। এ সময়ে ক্ষেপাকে সাঁতরাইয়া আসিতে দেখিয়া সকলে প্রমাদ গণিলেন। কি কাণ্ড সে আজ ঘটাইয়া বসে তাহা কে জানে।

ক্ষিপ্ৰ গতিতে সাঁতরাইয়া ক্ষেপা ওপারে পৌঁছিলেন। মায়ের শবদেহটি কাড়িয়া নিতেও তাঁহার বিলম্ব হইল না। তারপর একখণ্ড বস্ত্র দিয়া উহা পিঠে বাঁধিয়া খরশ্রোতা দ্বারকের জলে দিলেন ঝাঁপ। আত্মীয় স্বজন ও শ্মশানবন্ধুর দল এ দৃশ্য দেখিয়া বিস্ময়ে ভয়ে একেবারে হতভম্ব হইয়া গিয়াছেন।

উদ্ভাল তরঙ্গবক্ষে সন্তরণ করিয়া নয়, তারানামের তরীতেই যেন ক্ষেপা সেদিন বন্যা-বিক্ষুব্ধ নদী পার হইয়া আসে।

তারাপীঠের পবিত্র ভূমিতে জননীর দেহ দাহ করার পর তবে তিনি শান্ত হন।

মায়ের সৎকারের পর কিছুদিন কাটিয়া গিয়াছে। ক্ষেপা পূর্বের মতই আনন্দে শ্মশানে স্বেচ্ছাবিহার করিয়া চলিয়াছে। আগ্রশ্রাব্দের আর মাত্র দুই দিন বাকী। হঠাৎ সেদিন কনিষ্ঠ রামচরণকে আদেশ দিয়া বসিলেন, “ওরে ছাখ্, মায়ের শ্রাদ্ধ কিন্তু অমনি ফাঁকি দিয়ে করবিমে। ক’খানা গাঁয়ের লোক নেমন্তন্ন করে খাইয়ে দে।”

রামচরণ চমকিয়া উঠিলেন। দাদার এ আবার কোন্ পাগলামী? ঘরে এক কানাকড়িও নাই, অতিকষ্টে দিন চলিতেছে। তবে এত লোক খাওয়ানোর প্রশ্ন কি করিয়া আসে?

দাদার খেলালীপনা তিনি জানেন। তাই কথার কোন উত্তরই দিলেন না। প্রতিবেশীরাও অর্থহীন প্রলাপ বলিয়া একথা উড়াইয়া দিলেন, অনেকে শ্রেষ্টের হাসিও হাসিলেন। কিন্তু ক্ষেপার একেবারে ধনুর্ভঙ্গ পণ, জননীর শ্রাদ্ধে সমারোহ করিতে হইবে, বহু লোককে ভোজন করাইতে হইবে। আটলাতে গৃহের সংলগ্ন একখণ্ড পতিত জমি রহিয়াছে, ক্ষেপা নিজ হাতে একদিন তাহা পরিষ্কার করিয়াও রাখিয়া আসিলেন। ভাবখানা এই—সমাজ-খাওয়ানোর সিদ্ধান্ত তাঁহার দিক দিয়া একেবারে স্থির, নড়চড় হইবার জো নাই।

শ্রাদ্ধকার্যের দিন কিন্তু এক অদ্ভুত কাণ্ড ঘটিল। ক্ষেপা পূর্ববৎ শ্মশানে বসিয়া আছেন, আর এদিকে ভারে ভারে বহু উপচার ও খাণ্ডসস্তার অটলায় রামচরণের নিকটে আসিয়া পৌঁছিতেছে। ক্ষেপার জানা অজানা স্ত্রীদ ও ভক্তজনের স্বতঃস্ফূর্ত সাহায্যের যেন বান ডাকিয়াছে। প্রচুর ভোজ্য দ্রব্যের সমাবেশে গৃহ অঙ্গন ভরিয়া উঠিল। এ যেন এক ইন্দ্রজাল।

শ্রাদ্ধের দিন গৃহে শত শত অতিথি আসিয়া জড়ো হইয়াছেন। রামচরণ শাস্ত্রীয় অনুষ্ঠানাদি সব শেষ করিয়া ফেলিলেন। এইবার ব্রাহ্মণ ভোজনের পালা।

বর্ষার মেঘগন্তীর আকাশ হঠাৎ এ সময়ে বড় বিকল্প হইয়া উঠিল। প্রবল ঝড়বৃষ্টি আসন্ন। নিমন্ত্রিত অতিথিদের ভোজন অসম্পূর্ণ থাকিবে? মায়ের শ্রাদ্ধানুষ্ঠানে তবে কি বিঘ্ন ঘটিবে? আশঙ্কায় রামচরণ মুষড়িয়া পড়িলেন।

এদিকে তারাপীঠের শ্মশানে বামাক্ষেপা রহিয়াছেন ধ্যানাবিষ্ট। আকাশে হঠাৎ মেঘসমারোহ দেখিয়া তিনি উচ্চকিত হইয়া উঠিলেন। জননীর পারলৌকিক কার্য্য সুসম্পন্ন হইবে না, সে কি কথা? দ্রুতপদে তিনি শ্রাদ্ধবাসরে উপস্থিত হইলেন।

ক্ষেপাকে দেখিয়াই রামচরণ কাঁদিয়া উঠিলেন। কহিলেন, “দাদা,

শ্রাকের এ বিরাট আয়োজন তোমার জগুই সম্ভব হয়েছে। ঐ ঠাখো, ঝড়-বৃষ্টি তেড়ে আসছে। মায়ের কাজ কি পও হবে?”

ভাতাকে সাস্থনা দিয়া ক্ষেপা বলিয়া উঠিলেন, “ওরে, আমার তারামায়ের প্রসাদে অভ্যাগতদের ভোজনে কোন বিঘ্ন হবে না, তুই শান্ত হ’।”

উচ্চ স্বরে তারা-মন্ত্র উচ্চারণ করিতে করিতে ক্ষেপা ধ্যানস্থ হইয়া পড়িলেন। সর্বসমক্ষে সেদিন তরুণ শক্তিসাধকের এক অলৌকিক বিভূতি প্রকাশিত হইতে দেখা গেল। আটলা গ্রামের নিকটে ও দূরে সর্বত্র তখন ঝড়-বাদলের প্রচণ্ড মাতামাতি। অথচ শ্রাদ্ধবাসরে এক ফোঁটা বারিপাতও হইল না। কয়েকখানা গ্রামের লোক ভোজনে বসিয়াছে; ইহাদের ভূরিভোজনের মধ্য দিয়া ক্ষেপার মায়ের কাজ সুসম্পন্ন হইয়া গেল। ক্ষেপার এ অলৌকিক সিদ্ধাই সেদিন জনসাধারণের মধ্যে চাঞ্চল্যের সৃষ্টি করিয়াছিল।

সন্ন্যাসের পর হইতেই শ্মশানে পঞ্চমুণ্ডির আসনে বসিয়া ক্ষেপা তন্ত্র সাধনায় নানা অভিচার ও ক্রিয়া-পদ্ধতি আয়ত্ত করিতে থাকেন। তন্ত্রসিদ্ধ, শক্তিধর মহাপুরুষ কৈলাসপতিবাবা ও মন্দিরে প্রধান কৌলাচার্য্য মোক্ষদানন্দের পদতলে বসিয়া তাঁহার সাধনা অগ্রসর হইয়া চলে। ক্রমপর্যায়ে তত্ত্বোক্ত সমস্ত কিছু ক্রিয়া ও অনুষ্ঠান তিনি শেষ করিতে থাকেন। শক্তির পব শক্তির স্তর অবলীলায় তিনি অতিক্রম করিয়া যান। তাঁহার সাধনার এ অগ্রগতি প্রবীণ আচার্য্যদ্বয়কে বিস্মিত করিয়া তোলে।

ক্ষেপা শুদ্ধসত্ত্ব, জীবমুক্ত মহাপুরুষ, শক্তিসাধনার পথে সবেগে তিনি আগাইয়া চলেন। কিন্তু বাহু মৈথুনাতির প্রয়োজন এ দিব্যচারী সাধকের কখনো হন নাই। সিদ্ধদেহের ভিতরে উদ্গত হইয়াছে যে অমৃতময় রসধারা তাহাই করিয়াছে তাঁহাকে সাহায্য। ক্ষেপাকে তাই বলিতে শুনা যাইত, “তারা-মা বড় আশ্চর্য্য ভৈরবী।”

মানুষের ভীড় এড়ানোর জন্য ক্ষেপা প্রায়ই এক অদ্ভুত পরিমণ্ডল সৃষ্টি করিয়া রাখিতেন। কিন্তু তাঁহার আচার-বিচারহীন ভীম-ভৈরব ভঙ্গীর অন্তস্তলে লুকায়িত থাকিত এক পরম দিব্যভাব ও দিব্যাচার। তাঁরা ব্রহ্মময়ীর আসনটি ছিল তাঁহার হৃদয়ে চিরস্থায়ী। জন্মান্তরের সাধিক সংস্কারের মধ্য দিয়া মহাসাধকের জীবন এবার এক অপরূপ মহিমায় ফুটিয়া উঠিতে থাকে।

ক্ষেপার কারণ-পান ছিল যেন কুলকুণ্ডলিনীতে কারণ হোম। কিন্তু কারণের দাস কখনও তিনি ছিলেন না। ভক্তেরা সম্মুখে উপস্থিত হইলেই সুরা আনয়নের জন্য হুকুম হইত। এজন্য ব্যগ্রতাও হয়তো দেখাইতেন। কিন্তু অপর্যাপ্ত পরিমাণে এ বস্তু পান করিলেও কখনো তাঁহার ভাববৈলক্ষণ্য দেখা যায় নাই।

ক্ষেপা চিরকুমার—সন্ন্যাসী। সাধনজীবনে কখনো বাহ্য ভৈরবী গ্রহণের আবশ্যকতা তিনি বোধ করেন নাই। সে-বার কিন্তু তারাপীঠে এক ভৈরবী আসিয়া উপস্থিত। ভৈরবীটি তরুণী ও রূপলাবণ্যবতী। ক্ষেপার উপর এই নারী এক তীব্র আকর্ষণ বোধ করিতে থাকে, তাঁহাকে বশ করার জন্য নানা ছলনারও আশ্রয় নেয়।

একদিন নিশীথ রাতে রমণী তাঁহার কুটিরে নিভৃতে উপস্থিত হয়, নীরবে পদসেবা শুরু করিয়া দেয়। ক্ষেপা চমকিয়া উঠেন, তারপর দৃঢ় কণ্ঠে বলিয়া দেন, “মা, আমার ভৈরবী দরকার নেই। আমার এখানে তোমার ইচ্ছা পূর্ণ হবে না। তুমি এখান থেকে যাও।”

সাধিকা রমণীটি কিন্তু চুপ করিয়া বসিয়া আছে। সেখান হইতে নড়িবার কোন আগ্রহ তাহার দেখা গেল না। ক্ষেপা এবার নিজের উগ্রমূর্তি প্রকাশ করিলেন, রোষদগ্ধ স্বরে চীৎকার করিয়া বলিলেন, “দাঁড়া তো বেটি, আমার চিমটা নিয়ে আসছি।” এই রুদ্রমূর্তি দেখিয়া ভৈরবী ভীত হইয়া চরণে লুটাইয়া পড়ে। কপালু ক্ষেপার আশীর্ব্বাদে অতঃপর তাহার জীবনে ঘটে আধ্যাত্মিক রূপান্তর।

বামাক্ষেপা সত্যসত্যই কামজয়ী পুরুষ কিনা, ইহা পরীক্ষার জন্য

তারাপীঠের তহশীলদার একবার এক সুন্দরী বারাজনাকে নিয়োজিত করে। কিন্তু মহাপুরুষকে লুক করার এ চেষ্টা ব্যর্থ হয়।

সেদিন গভীর রাত্রে ক্ষেপা শাশানে রহিয়াছেন, এমন সময় এই গণিকা হঠাৎ আসিয়া তাঁহাকে জড়াইয়া ধরে। নির্লজ্জা নারী ক্ষেপার পুরুষাঙ্গটি খোঁজ করিতে গিয়া কিন্তু বিস্ময়ে বিহ্বল হইয়া পড়ে। সে দেখে, মহাপুরুষের এ অঙ্গটির কোন চিহ্নই নাই। ইন্দ্রজাল-বলে দেহ হইতে উঠা যেন বিলুপ্ত হইয়া গিয়াছে।

ক্ষেপা এতক্ষণ ঘুমের ভান করিয়া পড়িয়া ছিলেন। এবার চোখ মেলিয়া চাহিলেন। তারপর ‘আমার মা এসেছি, মা এসেছি’, বলিয়া বালকবৎ উৎসাহে নারীর স্তন্য পান করা শুরু করিলেন। সে কি তীব্র শোষণ। ফলে স্তন হইতে কেবলই ঝরিতে থাকে রক্তধাবা, ক্ষণপরে “মলাম মলাম” বলিয়া চিৎকার করিয়া রমণী মূর্চ্ছিতা হইয়া পড়িয়া যায়।

গণিকাটির জ্ঞান ফিরিয়া আসিলে ক্ষেপাবাবা সন্নেহে তাহাকে কাছে ডাকিলেন, শান্তস্বরে কহিলেন, “নে মা, এখন যা! ছেলের সঙ্গে আর কখনো এমনটা করিস নে।”

মহাপুরুষের চরণতলে লুটাইয়া পড়িয়া ভয়বিহ্বল। রমণী বলিতে থাকে, “বাবা, আমার পাপের যে অন্ত নেই, বলে দাও আমার কি গতি হবে? আমায় তুমি কৃপা করে উদ্ধার কর।”

ক্ষেপা আশ্রিতের করুণ ক্রন্দনে বিগলিত হইয়া গেলেন। কহিলেন, “আচ্ছা, এখন য মা, তারা-মা তোকে কৃপা করবে।”

মহাপুরুষের অঙ্গ স্পর্শের পর হইতে ঐ গণিকা পবিত্র জীবন যাপন শুরু করে।

শিমূলতলার পঞ্চমুণ্ডী আসনে ক্ষেপা প্রায়ই থাকেন ধ্যানরত। শক্তিধর আচার্য্যদ্বয়ের নির্দেশে অগ্রসর হইয়া তারামন্ড্রে তিনি সিদ্ধ হইয়াছেন। ইষ্টদেবীর সঙ্গে এখন তাঁহার বড় অন্তরঙ্গতা।

ইতিমধ্যে একদিন মহাশয়শানের ধারে এক নাটকীয় ঘটনা ঘটয়া গেল। তদ্ব্যচাৰ্য্য কৈলাসপতিকে ক্ষেপা প্রায়ই গঞ্জিকা সাজিয়া দেন। সজ্জিত কল্কেটি প্রতিদিনের অভ্যাসমত বাবা-মহারাজ প্রথমে তাঁহার ইষ্টদেবীকে নিবেদন করেন, তারপর নিজে গ্রহণ করেন। ক্ষেপা তাঁহার প্রসাদ পান।

সেদিন আদেশমত ক্ষেপা গুরুর কল্কেটি সাজিয়া আনিয়াছেন, কৈলাসপতিও চক্ষু মুদিয়া উহা ইষ্টদেবীকে নিবেদন করিতেছেন। এই অবসরে ক্ষেপা নিশ্চিন্ত আরামে গঞ্জিকার কল্কেটি উঠাইয়া সেবন শুরু করিয়া দিলেন।

এ কি কাণ্ড! কৈলাসপতি চমকিয়া উঠিলেন। একনিষ্ঠ শিষ্য ক্ষেপা তো এভাবে কখনো গুরুর মর্যাদা লঙ্ঘন করিতে পারে না! এ যে অসম্ভব। এই বিপরীত আচরণের কারণ খুঁজিতে গিয়া তিনি ধ্যানস্থ হইলেন। ধ্যানদৃষ্টির সম্মুখে দৈব সঙ্কেতটি ভাসিয়া উঠিল। গুরু বুঝিলেন, যে বীজ তিনি রোপণ করিয়াছিলেন আজ তাহা লাভ করিয়াছে বনস্পতির পূর্ণ পরিণতি।

কৈলাসপতি মনে মনে বিচার করিলেন—কথাটা সত্যই এবার ভাবিবার। বাম সিদ্ধি লাভ করিয়াছে। হুই সিদ্ধি কোলের এক শক্তি-পীঠে থাকার তো প্রয়োজন নাই। বেশ তো, শক্তিদ্বর ক্ষেপার সাধনা এবার নিজস্ব পথে চলুক, গুরুশিষ্যে একত্রে আর বাস কেন?

আননে আত্মতৃপ্তির হাসি টানিয়া কৈলাসপতি শুধু বলিলেন, “বাবা, তা হলে তোমাকেই যে এখানকার ভার নিয়ে এবার বসতে হয়! আমি আজ তবে চলি।”

ক্ষেপা উত্তরকালে বলিতেন, “গুরু আমার যেন পাখীর মতন আকাশে উড়ে চলে গেলেন।” সন্ধ্যাকাশের অপম্রয়মান রক্তিম আভা তখন দিগ্দিগন্তে ছড়াইয়া পড়িয়াছে—মহাসাধক কৈলাসপতিবাবা তারাপীঠ হইতে কোথায় অন্তর্হিত হইলেন। অনেকে বলিত, তিনি কৈলাসের পথে গিয়াছেন; কিন্তু কোন সন্ধান তাঁহার আর মিলে নাই।

মোক্ষদানন্দও ইহার পর বিদায় নিলেন। অতঃপর ক্ষেপাবাবাই বৃত্ত হন তারাপীঠের প্রধান কৌলপদে। পীঠস্থলীর অধিনায়কত্ব তিনি করিতেন বটে, কিন্তু এই ব্রহ্মজ্ঞ মহাপুরুষের শুদ্ধাশুদ্ধ, খাড়াখাড়া, জাত-বেজাতের কোন বালাই ছিল না। দেবতা ও মানুষে, মানুষ ও কুকুরে তাঁহার যেমন ভেদজ্ঞান ছিল না, দেবভোগ্য প্রসাদে আর পশুর খাড়েও তেমনি রুচি অরুচির প্রশ্ন কখনো উঠিত না। সমগ্র সত্তা তাঁহার তখন এক দিব্য চেতনায় উদ্ভূত—পরম অখণ্ড বোধে সব কিছু একাকার হইয়া উঠিয়াছে।

ভাবাবিষ্ট ক্ষেপাকে দেখা যাইত—প্রিয় কুকুরদের সঙ্গে কাড়াকাড়ি করিয়া তাহাদেরই খাওয়া তিনি খাইয়া যাইতেছেন। আবার নিজের জন্ত রক্ষিত প্রসাদান্ন তাঁহার বন্ধু ও প্রিয় পরিষদ-দল কেলো-ভুলো প্রভৃতি কুকুরদের সঙ্গে ভাগ করিয়া খাইতেও তাঁহার কম উৎসাহ নয়। আচমনের যেমন বালাই নাই, স্নানশুদ্ধির প্রয়োজনও তাঁহার কাছে তেমনই নিরর্থক হইয়া গিয়াছে।

তারামন্দিরের অভ্যন্তরে বসিয়া সারা রাত্রি ক্ষেপা ‘তার-তার’ আরাবে আকাশ-বাতাস কাঁপাইয়া তুলেন। আবার মাঝে মাঝে দেবীবিগ্রহের সম্মুখে হইয়া পড়েন সমাধিমগ্ন। সমাধি ভাঙ্গিয়া যায়, ক্ষেপা অনেকক্ষণ অবসন্ন দেহে জড়বৎ বসিয়া থাকেন। এ অবস্থায় শুচি-অশুচির ভেদজ্ঞান কিছুই নাই। এক একদিন এই অবস্থায় মন্দির প্রকোষ্ঠে ক্ষেপার মলমূত্র ও থুতুতে নোংরা হইয়া উঠিত, দুর্গন্ধে কাহারো কাছে যাইবার উপায় থাকিত না। খণ্ড ও অখণ্ডের সীমারেখা তাঁহার কাছে বিলুপ্ত, ভেদবুদ্ধির পরপারে নিরন্তর তিনি করেন অবস্থান। তারামায়ের কোলের আদরের সন্তান তিনি। তাই তো বাহ্য আচার-আচরণের প্রতি ক্রক্ষেপ মাত্র নাই।

কিন্তু মহাপুরুষের এ বালকপিশাচবৎ ভাব সংসারের সাধারণ জীব বৃষ্টিতে চাহিবে কেন? মন্দিরের ছই একটি কর্মচারী ক্ষেপাকে সেদিন বড় কুৎসিৎ ভাষায় গালিগালাজ করিতে থাকে। তারাপীঠের

একদল লোক তুমুল আন্দোলন শুরু করিয়া দেয়,—ক্ষেপা তারামায়ের মন্দির অপবিত্র করিয়া দিয়াছেন।

নাটোররাজের কর্মচারীদের মনে অনুরূপ ঘটনার স্মৃতি জাগরুক আছে, আন্দোলনকারীদের উৎসাহ তাই তাঁহারা থামাইয়া দিলেন। আপনভোলা ক্ষেপা কিন্তু অকুতোভয়, পরমানন্দে স্বেচ্ছামত তিনি শ্মশানে বিহার করিয়া চলিয়াছেন।

তারামায়ের সিদ্ধ সাধক বামা ক্ষেপা ! এবার হইতে তাঁহার শক্তি-বিভূতির কথা প্রচারিত হইতে থাকে। সঙ্গে সঙ্গে তারাপীঠের জমিতে থাকে শোক-দুঃখ-ক্লিষ্ট মানুষ ও মুমুকুর ভীড়। শক্তিধর ক্ষেপা সদাই ভরপুর খেয়ালখুশীতে, স্বাভাবিক আনন্দের উচ্ছ্বাসে দুই হাতে কল্যাণ ছড়াইয়া চলিয়াছেন। হতভাগ্য নরনারী আশ্রয় চাহিয়া কাঁদিলেই ঝরে তাঁহার কৃপাবারি—অমনি তাহাদের দুঃখকষ্ট তিনি মোচন করিতে বসেন। বাক্‌সিদ্ধ মহাপুরুষের পদতলে বসিয়া এ সময়ে কত জননী যে মৃতকল্প পুত্র ফিরিয়া পাইয়াছে, কত নারী এড়াইয়াছে বৈধব্য, তাহার হিসাব কে রাখে ?

ব্রহ্মজ্ঞ মহাপুরুষ ক্ষেপার বালকবৎ আচরণের নানা কৌতুককর কাহিনী প্রচলিত রহিয়াছে। দূর-দূরান্ত হইতে তাঁহার কাছে বহু ভক্ত ও দর্শনার্থী আসিতেন। শ্রদ্ধাভরে অনেকে তাঁহাকে কিছু কিছু টাকাও ভেট দিতেন। ভক্তদের এইসব প্রণামী সঞ্চয় করিয়া রাখার জন্য তিনি তাঁহার এক নিত্যসঙ্গী ভক্তকে ভার দেন। ক্ষেপার ইচ্ছা, এই অর্থে তারামায়ের পীঠস্থানের খানিকটা উন্নতি সাধন করা হইবে। ভক্তটি কিন্তু লোভের বশে এই গচ্ছিত অর্থ ধীরে ধীরে অপহরণ করিয়া বসে।

বাবার এক ভক্ত স্থানীয় উকিল। তাঁহার উৎসাহে এই ব্যক্তিটি আদালতে অভিযুক্ত হয়।

হাকিম ক্ষেপাবাবাকে শ্রদ্ধা করিতেন, তাই কঠোরভাবেই মামলাটি তিনি বিচার করিতেছেন। হঠাৎ একদিন ক্ষেপা নিজেই

এজলাসে আসিয়া উপস্থিত। করুণ কণ্ঠে বলিলেন, “হাকিম বাবা, তুমি ওকে এবারকার মত ছেড়ে দাও।” হাকিম ও আদালতে উপস্থিত ব্যক্তিদের বিস্ময়ের সীমা রহিল না। তদ্বিরকারী উকিল ভক্তটি তো প্রমাদ গণিলেন। কিন্তু মুক্তি দানের কারণ কি? আদালত হইতে ক্ষেপাকে এ প্রশ্ন করা হইলে তিনি করুণ কণ্ঠে বলিয়া উঠিলেন, “বাবা, ওর জেল হলে আমার সিদ্ধি আর কারণ কে তৈরী করে দেবে? তাছাড়া, আমি কথা কইব কার সঙ্গে?”

বলা বাহুল্য ক্ষেপার আগ্রহাতিশয্যে এবং ভক্ত উকিল-মোক্তারদের চেষ্টায় অপরাধীটি মুক্তি লাভ করে। ক্ষেপার কেলো-ভুলো কুকুরদের সঙ্গে এই ভক্তের পার্শ্বদহ অব্যাহত রহিয়া যায়।

রামপুরহাটের ডাঃ হরিচরণ ব্যানার্জি ক্ষেপার এক ভক্ত। সেদিন তিনি বড় ত্রস্তব্যস্ত বাড়ী ফিরিতেছেন। শিবিকাটি তারাপীঠের নিকটে পৌঁছিলে বাবাকে প্রণাম করিতে গেলেন।

ক্ষেপা বারবারই সেদিন তাঁহাকে তারাপীঠে বিশ্রাম করিয়া বাড়ী ফিরিতে বলিতেছেন।—দারুণ গ্রীষ্ম! পথে এখন অসহ্য রৌদ্রের উত্তাপ। তাঁহার যে বড় কষ্ট হইবে! ডাক্তারের জ্ঞান বাবার স্নেহ সেদিন যেন উথলিয়া উঠিয়াছে। এই ভক্তের সমাদর ও সেবার জ্ঞান আগ্রহের তাঁহার অবধি নাই।

সঙ্গীয় ভক্তেরা ক্ষেপার এ আচরণে মহা বিস্মিত হইলেন। সর্ব বিষয়ে যিনি নিরাসক্ত, তাঁহার পক্ষে এ ধরনের জাগতিক অনুরোধ যে বড় অস্বাভাবিক! ডাক্তারবাবুও কিছুটা ভড়কাইয়া গেলেন। বাড়ীতে তাঁহার কণ্ঠা ডিপ্‌থেরিয়ায় আক্রান্ত, দেরী করিবার উপায় নাই, তাই তাড়াতাড়ি রওনা হইতে হইল।

ক্ষেপা কোনমতেই তাঁহাকে ছাড়িতে চান না। শিবিকার পশ্চাৎ পশ্চাৎ যাইতেছেন, বারবার কহিতেছেন, “বাবা, সামান্য কিছু খেয়ে যাও!” ভক্তটিকে ধরিয়া রাখিতে না পারিয়া সেদিন তাঁহার কি ছঃখ!

বাড়ী ফিরিয়া ডাক্তার শুনিলেন, তাঁহার কণ্ঠাটির মৃত্যু হইয়াছে। বুঝিলেন, তাঁহার এ পারিবারিক দুর্দৈবের কথা অন্তর্য্যামী ক্ষেপার অজানা ছিল না। তাই সেদিন তাঁহাকে এমন ব্যাকুল হইয়া ছুটিতে দেখা গিয়াছিল।

ক্ষেপা ছিলেন স্বেচ্ছাময়। গালাগালি দিয়াই কত ছুরারোগ্য ব্যাধি তিনি সারাইয়াছেন। তাঁহার প্রদত্ত তারামায়ের চরণামৃত ও শ্মশানের মাটি কত মানুষকে বাঁচাইয়াছে তাহার ইয়ত্তা নাই।

মন্দিরের সোপানে বসিয়া মরণাপন্ন এক ব্যক্তি সেদিন ধুঁকিতেছে আর অবিরাম করিতেছে অশ্রুপাত। ক্ষেপা কাছ দিয়া যাইতেছিলেন, সন্মুখে জিজ্ঞাসা করিলেন, “কিগো বাবু, আনন্দময়ীর ছয়ারে এসে এমনতর নিরানন্দ কেন?”

রুগ্ন লোকটি দেবীর প্রসাদ পাইতে বড় ব্যাকুল হইয়া উঠিয়াছে। কিন্তু দুঃসহ রোগযন্ত্রণায় সে কাতর, প্রসাদ নিবার মত অবস্থা তাহার কই? ক্ষেপার হৃদয় বিগলিত হয় এবং সেদিন তাঁহার স্পর্শে মৃত্যু-পথযাত্রী এই রোগীটি একেবারে রোগমুক্ত হয়, আকণ্ঠ পুরিয়া তারামায়ের প্রসাদ সে গ্রহণ করে।

সুস্থ হইবার পর লোকটি ক্ষেপাবাবাকে কহিল, “বাবা, তুমি কি সাক্ষাৎ ভগবান? তোমার ছোঁয়া পাবার পরমুহূর্তেই আমার মৃত্যুসম যন্ত্রণা কোথায় যেন মিলিয়ে গেল।”

“ভগবান তোকে ছুঁলে তুই শালা কি খাবার জন্ত এমন করে ছটফট করতিসু রে? তোর সব যে একাকার হয়ে যেত। আমি হলাম তারামায়ের পায়ের ধুলোর ধুলো।

নন্দ হাড়ি ক্ষেপার একজন অনুগত ভক্ত। দুই হাতে তাহার জঘন্য কুষ্ঠরোগ। ইহা নিয়াই রোজ সে ক্ষেপাবাবার পরিচর্যা করে। তাঁহার পানীয় জল আনা হইতে আরম্ভ করিয়া কেলো-ভুলো কুকুর-গোষ্ঠীর দেখাশোনা নন্দই করিয়া থাকে।

সেদিন এক ভক্ত প্রশ্ন করেন, “বাবা, এ ব্যাটা জাতে হাড়ি, তাতে আবার কুষ্ঠরোগী। আপনি কেন ওর হাতের জল খাচ্ছেন?”

ফেপা চটপট উত্তর দিলেন, “আমি ওর হাতের জল খাই— আমার ইচ্ছে। তাতে তো শালাদের কি?”

বিশ্বয়ের বিষয়, নন্দের উপর এত স্নেহ থাকা সত্ত্বেও বাবা তাহার এই ঘৃণ্য রোগটি উঠাইয়া নিতেছেন না। নন্দও এ সম্বন্ধে তাঁহাকে কোনদিন কিছু বলে না।

সে-বার নন্দ হাড়ির এ ব্যাধির আক্রমণ খুব বাড়িয়া উঠিল। প্রায় পাঁচ সাতদিন যাবৎ সে তারাপীঠ শ্মশানে আসিতেছে না, ফেপাবাবা তাহার জন্ম বড় চিন্তিত হইয়া পড়িলেন। কয়েকজন ভক্ত ধরিয়া বসিল, “বাবা, নন্দ আপনার এমন অনুগত ভক্ত, এবার বড় কষ্ট পাচ্ছে, তাকে রোগমুক্ত আপনাকে করতেই হবে।” অনুমতি পাইয়া সকলে নন্দকে নিয়া আসিলেন।

সম্মুখে উপস্থিত হওয়া মাত্র ফেপাবাবা উত্তেজিত কণ্ঠে তাহাকে ভৎসনা করিতে লাগিলেন, “শালা! পাপ করবার সময় মনে থাকে না? যেমন কর্ম তেমন ফল। যা বেটা এখান থেকে! তোর ঐ হাত পচে গলে খসে খসে পড়বে।”

করুণাময় ফেপাবাবার একি কঠোর ব্যবহার! নন্দ হাড়ি তো অভিমানে ফোঁপাইয়া ফোঁপাইয়া কাঁদিতে লাগিল। কিছুক্ষণ পরেই দেখা গেল মহাপুরুষের আর এক মূর্তি। নন্দকে নিকটে ডাকিয়া বৃকে জড়াইয়া ধরিলেন, সান্ত্বনা দিয়া স্নেহে কহিলেন, “বাবা, এখন থেকে পাপ পথে আর যাবিনে, কেবল তারামায়ের নাম করবি। যা তোর রোগ সেরে যাবে, ঐ শ্মশানের মাটি রোজ দু-হাতে মাখবি।” নন্দের কুষ্ঠরোগ মাসখানেকের মধ্যেই নিরাময় হইয়া গেল।

বেলেগ্রামের নিমাই দীর্ঘদিন যাবৎ হার্নিয়া রোগে ভুগিতেছে। একে নিজের রোগযন্ত্রণা, তছপরি দারিদ্র্যের বিতীষিকা। কোনরকম কাজকর্মই সে করিতে পারে না, স্ত্রী-পুত্রের ভরণপোষণ কি করিয়া

করিবে ? শেষকালে মরীয়া হইয়া সে স্থির করিয়া ফেলিল, গলায় দড়ি দিয়ে আত্মহত্যা করিবে ।

ঘোর অন্ধকার রাত্রি । নিমাই সেদিন তারাপীঠ শ্মশানের পাশে এক জঙ্গলে আসিয়া দাঁড়াইয়াছে, হাতে তাহার একগাছি রজ্জু । নিকটে জনমানব কোথাও নাই । বট গাছের ডালে রজ্জুটি লাগাইয়া সে আজ এখনি ঝুলিয়া পড়িবে, নতুবা এই জ্বালা-যন্ত্রণার হাত হইতে নিষ্কৃতি নাই ।

গলায় ফাঁসি লাগাইতে যাইবে, ঠিক সেই মুহূর্ত্তে শোনা গেল এক হৃদকম্পকারী নিনাদ, ‘তারা—তারা !’ নিমাই-এর হাত হইতে তৎক্ষণাৎ দড়িটি খসিয়া পড়িয়া গেল । সভয়ে চাহিয়া সে দেখে, ক্ষেপাবাবা তাহার সম্মুখে দণ্ডায়মান ।

গম্ভীর কণ্ঠে মহাপুরুষ বলিয়া উঠিলেন, “ওরে শালা, আত্মঘাতী হওয়া যে মহাপাপ ! শীগ্গির এখান থেকে পালা—পালা ।”

নিমাইর মরা আর হইল না । কিন্তু সেদিন হইতে স্থির করিল, আর সে গৃহে ফিরিয়া যাইবে না, তারামায়ের মন্দিরচত্বরে থাকিয়া দর্শনাধীদের কাছে ভিক্ষা করিবে ও দিন কাটাইবে ।

একদিন ক্ষেপাবাবা নিকটেই কোথায় গিয়াছেন, শিমূলতলায় তাঁহার আসনের সম্মুখস্থ ধুনীটি তখনও জ্বলিতেছে । নিমাই ভাবিল, এই ফাঁকে ধুনী হইতে গাঁজার কল্কেতে একটু আগুন নেওয়া যাক । এক টুকরা অঙ্গার টানিয়া নিবার সাথে সাথেই ঘটিল ভীম-ভৈরব-কাণ্ডি ক্ষেপার আবির্ভাব ! সম্মুখে আসিয়াই নিমাইয়ের তলপেটে সজোরে তিনি এক লাথি মারিয়া বসিলেন । তৎক্ষণাৎ সে একেবারে মূর্চ্ছিত হইয়া পড়িল ।

বাহ্যজ্ঞান হওয়ার পর নিমাই সবিস্ময়ে দেখে, তাহার প্রাণান্তকর হার্নিয়া রোগ আর নাই । ইহার পর বহুদিন সুস্থ শরীরে থাকিয়া সে সংসারের কাজকর্ম করিয়া গিয়াছে ।

শিমূলতলায় কেপা সেদিন নীরবে শুইয়া আছেন । একটি খাটিয়া

বহন করিয়া এ সময়ে কয়েকজন লোক তাঁহার নিকটে উপস্থিত হইল। খাটিয়াটি নামানোর পর দেখা গেল এক করুণ দৃশ্য! একটি যক্ষ্মারোগী মৃতকল্প হইয়া ধুঁকিতেছে।

ক্ষেপাবাবা বলিয়া উঠিলেন, “কিরে, এটাকে আবার শ্মশানে নিয়ে এলি কেন? জ্যান্ত পোড়াবি নাকি? তা, শালা পাপ করেছে অনেক, জ্যান্তই ঠেঙিয়ে ঠেঙিয়ে ওকে পোড়া।”

রোগীর এক আত্মীয় আগাইয়া কাতর স্বরে কহিল, “সে কি বাবা! একে যে আপনার চরণতলে ফেলে রাখবার জন্তেই নিয়ে এসেছি। কোনো চিকিৎসায়ই আজ অবধি ফল হয়নি। মায়ের একমাত্র সন্তান। দয়া করে আজ ওকে বাঁচান, বাবা।”

“দূর হ’ বোদে শালারা! আমি কি ডাক্তার না কবরেজ? আনার কাছে আনা কেন?”

ভক্তেরা ছাড়িবেন না। উত্থিত হইয়া ক্ষেপাবাবা আসন ছাড়িয়া উঠিয়া আসিলেন। হঠাৎ রোগীর উপর বুঁকিয়া পড়িয়া দুই হাত দিয়া তাহার গলা চাপিয়া ধরিলেন। ত্রুণ কণ্ঠে বলিতে লাগিলেন, “বল শালা! আর কখনো পাপ করবি?”

এদিকে তো শ্বাসরুদ্ধ হইয়া রোগীর প্রাণ বাহির হওয়ার উপক্রম। সকলে আতঙ্কিত হইয়া তখন খাটিয়ার কাছে ছুটিয়া গেল। সে কি? শেষটায় ক্ষেপাবাবা কি খুনের দায়ে পড়িবেন? ইতিমধ্যে রোগীটি মূর্চ্ছিত হইয়া পড়িয়াছে। তাহাকে মাটিতে নিক্ষেপ করিয়া মহাপুরুষ বলিয়া উঠিলেন, “যা শালা! এবার বেঁচে গেলি।”

কিছুক্ষণ পরেই কিন্তু লোকটির মূর্চ্ছা ভাঙ্গিয়া যায়। সে উঠিয়া বসিয়া সকলকে বলিতে থাকে, তাহার প্রচণ্ড ক্ষুধা পাইয়াছে, এখনই কিছু খাবার না পাইলে ে বাঁচিবে না। দীর্ঘদিন যে রোগী শয্যায় একটু পাশ ফিরিতে পারেনি, এভাবে আজ তাহাকে উঠিয়া বসিতে দেখিয়া সকলে তো অবাক।

ক্ষেপাবাবা কহিলেন, “ও শালাকে পেটভরে ঠেসে মায়ের প্রসাদ

খাইয়ে দে। কিছুদিনের জন্য এখানে ওকে রেখে যা, তারামায়ের দয়ায় একেবারে ভাল হয়ে যাবে।”

লোকটি ইহার পর সম্পূর্ণভাবে রোগমুক্ত হয়।

কেপা একদিন ভক্তদল পরিবৃত্ত হইয়া শিমুলতলায় বসিয়া আছেন। হঠাৎ আপন মনে বলিয়া উঠিলেন, “বদ্ শালারা সব আসছে, বদ্ জিনিস নিয়ে।”

কিছুক্ষণ পরেই দেখা গেল, দুইটি যুবক কয়েক বোতল বিলাতি মদ, এক হাঁড়ি সন্দেশ ও বাজ্যদ্রব্যাদি নিয়া সেখানে উপস্থিত। কেপাবাবাকে তাহারা পানভোজন করাইয়া, সঙ্গীত শুনাইয়া তুষ্ট করিতে চায়।

কেপা হঠাৎ রুদ্ধরোষে জলিয়া উঠিলেন। তারপর শ্মশান হইতে একটা পোড়া কাঠ নিয়া আসিয়া তৎক্ষণাৎ মদের বোতল ও মিষ্টির হাঁড়িটি ভাঙ্গিয়া ফেলিলেন। যুবক দুইটি ভয় পাইয়া তাড়াতাড়ি পলায়ন করিল। পরে জানা গেল, ডার্বি-লুইপের প্রথম পুরস্কার লাভের আশায় কেপাকে তাহারা প্রসন্ন করিতে আসিয়াছিল।

অনেকের মনের কথা ফাঁস করিয়া দিয়া কেপা তাহাদের চৈতন্য আনিয়া দিতেন। সেবার এক জমিদার তারাপীঠে পূজা দিতে আসিয়াছেন। মন্তু সমারোহের ব্যাপার! প্রত্যুষে দ্বারকনদীতে স্নান সমাপন করিয়া তটে দাঁড়াইয়া তিনি জপতপ করিতেছেন। কেপা ঠিক এ সময়ে জলে নামিতেছিলেন, জপে নিরত ভক্তলোকটির দিকে চোখ পড়িতেই তিনি হাসি চাপিতে পারিলেন না। ছুটামি করিয়া বারবার তাঁহার গায়ে জল ছিটাইয়া দিতে লাগিলেন।

ভক্তলোক ক্রোধভরে চোঁচাইয়া উঠিলেন, “কোথাকার অসভ্য পাগল। জপ করছি, দিলে আমায় অপবিত্র করে।”

কেপা উত্তর দিলেন, “তারামায়ের কাছে আশ্রয় নিতে এসেছো, তাঁর নাম জপছো, এর ভেতর আবাহন-হাম্পানীর জুতোর কথা ভাবা কেন, বাবা।”

ভক্তলোকটি চমকিয়া উঠিলেন! সত্যিই যে তাই। কলিকাতায়

গিয়া ঐ কোম্পানীর একজোড়া দামী জুতা কেনার কথা হঠাৎ তাঁহার মনে ঊকি দিয়াছিল। কে এই অন্তর্যামী পুরুষ, মনের সামান্যতম চকিত চিন্তাও তাঁহার দৃষ্টিকে ফাঁকি দিতে পারে নাই!

মন্দিরে ফিরিয়া পাণ্ডাদের কাছে এ ঘটনা জানানোর পর তাহারা বলিল, “ইনি সাধারণ পাগল নন—ইনিই হচ্ছেন তারাপীঠের শিবকল্প মহাপুরুষ বামা ক্ষেপা।”

ভদ্রলোকটি ব্যাকুল হইয়া আবার ক্ষেপার দর্শন লাভের চেষ্টা করিলেন। কিন্তু সেদিন আর তাঁহার কোন সন্ধান পাওয়া গেল না। ক্ষুব্ধ মনে তিনি কলিকাতায় ফিরিয়া গেলেন।

ক্ষেপা একদিন তারামন্দিরের আঙিনায় বসিয়া আছেন। সম্মুখে একদল দর্শনার্থী শিক্ষিত ভদ্রলোক, তিনি তাঁহাদের সহিত দু-একটি কথা বলিতেছেন। পাশেই একটা পাতায় তারা-মায়ের প্রসাদ রক্ষিত। ক্ষেপা মাঝে মাঝে উহা হইতে প্রসাদ গ্রহণ করিতেছেন। তাঁহার প্রিয় পার্শদ, কুকুরেরাও ঐ পাত্র হইতে খাও তুলিয়া নিতেছে।

উপস্থিত ব্যক্তিদের মধ্যে সাঁইথিয়ার কয়েকটি তরুণও উপবিষ্ট। কুকুরদের সঙ্গে ক্ষেপাবাবাকে একত্রে আহার করিতে দেখিয়া তাঁহাদের বড় ঘৃণাবোধ হইতেছিল। অন্তর্যামী ক্ষেপাবাবার দৃষ্টিতে ইহা এড়াই নাই। ঐ যুবক কয়েকটিকে ডাকিয়া তিনি নিকটে বসাইলেন। তারপর নিজ হস্তদ্বারা তাঁহাদের পৃষ্ঠদেশ স্পর্শ করিয়া বলিয়া উঠিলেন, “বাবারা, এবার কি দেখছেন?”

যুবকদল বিস্ময়ে একেবারে হতবাক হইয়া গিয়াছে। ক্ষেপা একি ইন্দ্রজালের সৃষ্টি সেখানে করিয়া বসিলেন? তাহারা দেখিল মায়ের প্রসাদভোজী ক্ষেপা ও তাঁহার বয়স্ক কুকুরদেরই কেবল মানবাকৃতি, আর সব দর্শনার্থী ভদ্রলোকদের আকার মনুষ্যেতর জীবের। সাপ, কুকুর, বিড়াল রূপে এক মুহূর্তে তাহারা পরিণত হইয়া গিয়াছে। শক্তিধর মহাপুরুষ যেন প্রত্যেকের নিজস্ব বৃত্তিকে জন্তু ও সরীসৃপে রূপায়িত করিয়া তুলিয়াছে।

বলা বাহুল্য, যুবকদের স্বাভাবিক দৃষ্টি ক্ষণপরেই ফিরিয়া আসে। সেদিনকার এই অলৌকিক অভিজ্ঞতার স্মৃতি ফলিয়াছিল, তাহাদের চৈতন্যোদয় হইয়াছিল।

বাক্‌সিদ্ধ মহাপুরুষ ক্ষেপাবাবা। একবার কোনমতে তাঁহার মুখের কথাটি আদায় করিতে পারিলে মৃতকল্প রোগী সম্পর্কে লোকের আর ভাবনা থাকিত না। আবার এ ব্যাপারে মাঝে মাঝে ক্ষেপাবাবাকে নিয়া বিপদে পড়িতেও হইত।

সে-বার তারাপীঠের নগেন পাণ্ডা ক্ষেপাবাবাকে খুব ধরিয়া বসেন। তাঁহার পরিচিত এক রোগীকে নিরাময় করিতেই হইবে। রোগীটি হইতেছেন স্থানীয় এক জমিদার, নাম পূর্ণচন্দ্র সরকার। ক্ষেপাকে পাক্কী করিয়া সঘরে নিয়া যাওয়া হইল।

পথ চলিতে চলিতে নগেন পাণ্ডা তাঁহাকে বুঝাইতে লাগিলেন, “বাবা, আপনি রোগীর কাছে গিয়ে শুধু বলবেন—এই শালা, উঠে বোস্, তোর রোগ সেরে গিয়েছে। আপনাকে আর কিছু করতে হবে না।”

বালকবৎ মহাপুরুষ কহিলেন, “আচ্ছা নগেনকাকা, তাই বলবো। মাঝে মাঝে কথাগুলো শিখিয়ে দেবেন, ভুলে না যাই।”

রোগীর ঘরে গিয়াই কিন্তু তাঁহাকে বলিতে শোনা গেল বিপরীত কথা। বলিলেন, “ও নগেনকাকা, এ শালা তো এখনি ফট”—অর্থাৎ, আর কোন আশা নাই, এখনই জীবনান্ত হবে।

কথা কয়টি বলার সঙ্গে সঙ্গেই ক্ষেপা পাক্কীতে আসিয়া বসিলেন, রোগীও শেষ নিশ্বাস ত্যাগ করিল।

নগেন পাণ্ডা বড় হতাশ হইয়া পড়িয়াছেন। রোগীর আত্মীয়স্বজন সবাই তাঁহার অনুগত লোক, তাহারা তাঁহাকে বড় ধরিয়াছিল। তিনিও বাবার ভরসাতেই আশ্বাস দিয়াছিলেন। পথে যাইতে যাইতে ক্ষুব্ধ মনে ক্ষেপাকে অনুযোগ দিতে লাগিলেন, “বাবা, ছি-ছি, এখানে আমার আর মানমর্যাদা কিছু রইলো না। এমন জানলে আপনাকে আমি আনতাম না।”

করুণ মিনতিপূর্ণ স্বরে ক্ষেপা বলিলেন, “নগেনকাকা, রাগ করবেন না, সত্যিই আমার কোন দোষ নাই। আমি তো আপনার শেখানো কথাই বলতে চেয়েছিলাম, কিন্তু তারা-মা এসে কানে কানে যে বললে—ক্ষেপা, ও কথা মোটেই তুই বলিসনে, বলে দে—ফট্। আমিও তাই বলে ফেললুম।”

বালক-স্বভাব এই বাকসিদ্ধ মহাপুরুষের অহেতুক আশীর্বাদ মাঝে মাঝে ভক্তদের বিস্মিত করিত। সে-বার একটি তরুণী তাহার পিতার সঙ্গে তারাপীঠ ও তারাপীঠভৈরব ক্ষেপাবাবার দর্শনে আসিয়াছে। ইহাদের বাড়ী রামপুরহাটে। শুদ্ধ মনে, পবিত্রভাবে কিছু ক্ষীরের খাবার মেয়েটি তৈরী করিয়া আনিয়াছে।

প্রণাম করিয়া ভক্তিভরে উহা নিবেদন করামাত্রই ক্ষেপা পরম আনন্দে আশীর্বাদ করিয়া বলিলেন, “বেশ মা বেশ। তোব ধনেপুত্রে লক্ষ্মীলাভ হবে।”

কথা কয়টি শুনিয়াই মেয়েটি কাঁদিতে আরম্ভ করিল। তুই নয়নের অশ্রুধারা আর খামিতে চায় না। ক্ষেপা বিব্রত হইয়া ভক্তদের জিজ্ঞাসা করিলেন, “হ্যাঁরে, ও কাঁদছে কেন?”

“বাবা, আপনি তো ঢালাও আশীর্বাদ করে বসলেন, কিন্তু ও যে বিধবা। পুত্র হবার আশা আর কই?”

“কাঁদিস্নে মা, থাম্। যা বলেছি, তা সবই হবে। তারা-মা আমাকে বলছেন—তোর ছেলে হবে, লক্ষ্মীও ঘরে থাকবে।”

ক্ষেপার একথা ফলিতে দেৱী হয় নাই। কয়েক বৎসর পর এক ধনবান বণিক বৈষ্ণবমতে এই তরুণীর পাণিগ্রহণ করে। সন্তান-সন্ততি বিস্ত-বিষয় সবই এ মেয়েটির হইয়াছিল।

দ্বারভাঙ্গার মহারাজা সে-বার তারাপীঠে আসিয়া ক্ষেপাবাবার শরণ নেন। মহারাজা অপুত্রক, সেইজন্যই মহাপুরুষের আশীর্বাদ

নিতে আসিয়াছেন। সিপাইশাস্ত্রী ও জঁকজমক দেখিয়া, ক্ষেপা সসঙ্কোচে কহিলেন, “নগেনকাকা, এরা সব কারা?”

“বাবা, ইনি দ্বারভাঙ্গার মহারাজা, আপনাকে খুব ভক্তি করেন, তাই দর্শন করতে এসেছেন।”

“সেকি কথা? আমি শ্মশানের ভিক্ষুক, সামান্য লোক। আমার এখানে আবার রাজা-রাজড়া কেন? তবে তো এখান থেকে আমায় সরে যেতে হয়।”

সকলে প্রমাদ গণিলেন। অতঃপর মহারাজা সাধারণ বেশে সজ্জিত হইয়া একাকী বাবার চরণ দর্শনে আসেন। মহাপুরুষের আশীর্ব্বাদে তাঁহার মনস্কামনা পূর্ণ হয়, উত্তরকালে তিনি পুত্র লাভ করেন।

ক্ষেপা বলিতেন, “আমি বাবু তাদের শাস্ত্র-টাস্ত্র বুঝিনে— শুধু তারা-মাকে নিয়েই আমার কারবার।” সত্যই তাই! ক্ষেপার সমস্ত সত্তায় তাঁহার তারা-মা, আত্মশক্তি ছিলেন ওতপ্রোত। সিদ্ধকাম এই মহাসাধকের সমগ্র জীবন ছিল এক অখণ্ড চৈতন্যে বিধৃত।

খেয়াল-খুশীমত এক একদিন ক্ষেপা তারামায়ের পূজায় আসিয়া বসেন। কিন্তু কোথায় তাঁহার উপচার-উপকরণ? শাস্ত্রসম্মত প্রথায় পূজার ধার তিনি কোনকালেই ধারেন না। ভাবোন্মত্ত অবস্থায় কোন কোনদিন মন্দিরে গিয়া তারা-মায়ের বিগ্রহের সম্মুখে পূজায় বসেন। চারিদিকে দণ্ডায়মান থাকে উৎকণ্ঠিত ভক্ত ও দর্শনার্থীর দল, আর থাকে তাঁহার প্রসাদলোভী অনুচর কুকুরগোষ্ঠী। ক্ষেপার পূজায় আসনশুদ্ধি, ভূতশুদ্ধির বালাই নাই—মন্ত্রতন্ত্র ও শাস্ত্রীয় অনুষ্ঠান অবাস্তব। আসল উপচার তাঁহার মুখের ‘তারা-তারা’ রব, আর ভাববিহ্বল আকুতি। কম্পিত হস্তে বিষপত্র ও পুষ্পরাজি অঞ্জলি দেন আর সজ্জল নয়নে বলিতে থাকেন, “এই বেলপাতা লে মা, এই অন্ন লে, এই জল লে, এই ফুলচন্দন আর বলি লে।”

এই পূজা তিনি নিজের খেয়াল-খুশীতেই সমাপ্ত করেন। দেবীর

পূজা নয়, এ যেন মায়ের উপর তাঁহার ছেলের সহজ অধিকারের এক অপূর্ব বাণ্য-লীলা।

বাহিরের বস্তু অবস্তু, ক্রিয়া-প্রতিক্রিয়ার দিকে দৃষ্টি দেওয়া আত্ম-সমাহিত ব্রহ্মজ্ঞ পুরুষের পক্ষে কোনদিনই সম্ভব ছিল না, তাহার প্রয়োজনও হইত না। মন্দিরে, শিমূলতলায় ও শ্মশানে সর্বপাশমুগ্ধ ক্ষেপা দিগম্বররূপে সর্ব সমক্ষে পাড়য়া থাকিতেন। কেহ এ দৃষ্টান্তে কিছু বলিলে উত্তর দিতেন, ‘আমার বাবা নেওটা, মা নেওটা, আমারও তো অভ্যাসটা হওয়া চাই! তা ছাড়া, বাপু, আমি তো লোকালয়ে থাকিনে, থাকি আমাব মায়ের সঙ্গে, মায়ের শ্মশানে। আমার আবার কাকে ভয়—কাকে সঙ্কোচ।’

তত্ত্বসিদ্ধ মহাশক্তিধর সাধকরূপে বামা ক্ষেপার প্রতিষ্ঠা এসময়ে দিগ্বিদিকে ছড়াইয়া পড়ে। তারাপীঠের পুণ্যভূমিতে নীরে ধীরে সমাগত হইতে থাকে অগণিত মুক্তি-কামী শক্তিসাধক ও দর্শনাধীদল। ইঁহাদের অনেকেরই কাছে ক্ষেপার বাহিরে রূপটি ছিল কঠোর। তাহার ভীমভৈরব মূর্তি আব আচার-বিচারহীন বহিরাবরণটি প্রায়ই জাগাইয়া তুলিত বিস্ময় ও ভীতিপূর্ণ সন্ত্রম। কারণচক্রে গঞ্জিকার ধূমকুণ্ডলী হইতে সত্যকার ব্রহ্মবিদ বামা ক্ষেপাকে চিনিয়া নিবার সৌভাগ্য কিন্তু অনেকেরই হইত না।

নিজের চারিদিকে কুহেলিকার এক বহুমুখীয় আবরণ টানিয় দিয়া ক্ষেপা অবাঞ্ছিত আগন্তুকদের হাত হইতে আত্মরক্ষা করিতেন। আপন অন্তরসত্তার গভীরে, নিভৃত আনন্দে মহাপুরুষ থাকিতেন একান্তভাবে ভরপুর। আত্মসমর্পণের মনোভাব নিয়াও বহু সাধক আসিতেন, তাঁহার পদপ্রান্তে পড়িয়া থাকিতেন। শুধু ইঁহাদের ভাগ্যেই মিলিত ক্ষেপার তত্ত্বসাধনার গূঢ়তম পথনির্দেশ।

সমসাময়িক বাংলার বিশিষ্ট শক্তিসাধকের ভিতর এমন লোক খুব কমই ছিলেন, যিনি তারাপীঠের পবিত্র পঞ্চমুণ্ডীর আসনে বসিয়া

সিদ্ধির পাথেয় সঞ্চয় করেন নাই—আরক্ষেপার বিশাল বক্ষপুটে আশ্রয় গ্রহণ করিয়া হন নাই কৃতার্থ। তত্ত্বসিদ্ধ মহাপুরুষ নিগমানন্দ স্বামী এই তারাপুরেরই শ্মশানে আসিয়া ক্ষেপার শরণ নেন, তাঁহার কৃপায় ইষ্টদেবীর সাক্ষাৎলাভে সমর্থ হন। প্রচারিত ও অপ্রচারিত আরও বহু তত্ত্বসাধক ক্ষেপাবাবার নির্দেশে মহাশক্তির আরাধনায় ব্রতী হন, লাভ করেন পরমা সিদ্ধি।

কৌলমার্গের দুশ্চর তপস্যা ক্ষেপাকে উত্তীর্ণ করে এক বিরাট ব্রহ্মজ্ঞরূপে। যে বিপুল যোগবিভূতি ও আধ্যাত্ম-শক্তি তিনি আহরণ করেন, সাধন জগতে তাহার তুলনা খুব কমই মিলে। অথচ এ অপরিমেয় শক্তিকে ক্ষেপা নিভান্ত সহজ ও স্বাভাবিক ভঙ্গীতেই চিরদিন বহন করিয়া বেড়াইয়াছেন। যোগবিভূতি সংহরণের এ থামর্থ্য ছিল তাঁহার এক অতুলনীয় বৈশিষ্ট্য।

১৩১৮ সালের শ্রাবণ মাস। প্রায়ই চলিয়াছে অবিরাম বর্ষণ। আজকাল ক্ষেপাবাবা বড় ঘন ঘন সমাধিস্থ হইয়া পড়েন। সেদিন সারা দিন-রাতের সমাধি হইতে ব্যুথিত হইয়া শান্ত স্বরে ভক্তদের ডাকিয়া কহিলেন, “দেখুন বাবারা, সেবারে মোক্ষদানন্দবাবাকে যেখানে সমাধি দিয়েছেন, সেইখানেই যেন এ দেহের সমাধি দেওয়া হয়।”

একি হৃদয়ভেদী কথা বাবা আজ কহিতেছেন। ভক্তেরা বুঝিলেন, তাঁহার তিরোধান আসন্ন। সকলে বড় মুষড়িয়া পড়িলেন।

দেহের অবস্থা দিনের পর দিন খারাপের দিকে ঘাইতেছে। ২রা শ্রাবণের রাত্রিতে উদ্বেগের আর সীমা বহিল না। নিত্যসঙ্গী ভক্ত, সেবক ও সারমেয় পার্শ্বদল, সবারই চোখে মুখে এক বিষাদের ছায়া। ক্ষেপা শেষবারের মত ‘তারা-তারা’ রবে পীঠস্থান উচ্চকিত করিয়া সমাধিস্থ হইয়া পড়িলেন। এ সমাধিই তাহার মহাসমাধি।

অর্দ্ধশতাব্দী ব্যাপিয়া শক্তিসাধনার পুত শিখাটিকে বশিষ্ঠদেবের আসনে জ্বলাইয়া রাখার পর মহাতান্ত্রিক তাঁহার মরগীলায় সেদিন ছেদ টানিয়া দিলেন।

বালানন্দ ব্রহ্মচারী

“পীতাম্বর, পীতাম্বর ! আর কবে তুই মানুষ হবি ?”

জননীর ক্রুদ্ধস্বর প্রায়ই পঞ্চমে উঠে, কত গালাগালি করিতে থাকেন। কিন্তু কে তাঁহার কথা শোনে ? ছদ্দান্ত ছেলেকে নিয়া জননী নন্দদাবাঈর হুশিয়ার অবধি নাই। পতির মৃত্যুর পর ছঃখকষ্টের মধ্য দিয়া তিনি পুত্রকে মানুষ করিতেছেন। কিন্তু এ চঞ্চল বালকের দৌরাণ্যে স্বস্তিতে তাঁহার নিশ্বাস ফেলিবার যো কই ?

উজ্জয়িনীর এক সারস্বত ব্রাহ্মণকুলে এ বালকের জন্ম, শাস্ত্রপাঠ ও গুরুগিরি হইতেছে তাহার কুলগত বৃত্তি। গৃহের কাছেই এক পণ্ডিতের বিড়ালয়, এখানে তাহাকে ভর্তি করিয়া দেওয়া হইয়াছে। কিন্তু পুস্তকের একটি পাতাও তাহাকে উল্টাইতে দেখা যায় না।

অবশ্য পীতাম্বরের সময়ই বা কোথায় ? সিংহার জলধারার বাঁকে বাঁকে, ভর্তৃহরি গোরখনাথের গুহাগুলিতে নিরন্তর তাহার আনাগোনা। কখনো মহাকালের কুণ্ড, কখনো বা সন্দীপন মুনির জঙ্গলাকীর্ণ আশ্রমে স্বেচ্ছামত সে ঘুরিয়া বেড়ায়। ভগ্ন পরিত্যক্ত পুরাতন প্রাসাদ—ভূতের ভয়ে যাহার কাছ দিয়া কেহ ঘেঁষে না, সেখানেই রাতের পর রাত কাটাইয়া বালক বাড়ী ফিরে। এ ছরস্তু ছেলেকে নিয়া নন্দদাবাঈ বড় বিপদে পড়িয়াছেন।

মায়ের উগ্ৰা একদিন চরমে পৌঁছিল। অবাধ্য ছেলেকে ধরিয়া আনিয়া খুব খানিকক্ষণ তিনি গালাগালি দিলেন। তারপর উত্তেজিত স্বরে কহিতে লাগিলেন, “ওরে ছ-চার ঘর যজমান আর ছ-এক বিঘা জমি, সম্বলের মধ্যে তো এই। তাও দেখবার কোন লোক নেই। নিতান্ত অভাগা তুই, নইলে এ শিশুকালে তোর বাপেরই বা মৃত্যু

হবে কেন। তোর ওপরই সব কিছু আশা-ভরসা রেখে আমি বসে আছি। কিন্তু আমার ছরদৃষ্ট, সংসারের কোন কাজকর্মই তুই দেখবিনে। বংশের সবাই করে এসেছে লেখাপড়া, শাস্ত্রপাট, তাও তুই করবিনে। হ্যাঁরে, বল দেখি, তবে কি তুই—সাধু হবি?”

পীতাম্বর এতক্ষণ অভ্যাসমত নীরব ঔদাসীতে ভৎসনাগুলি হজম করিতেছিল। কিন্তু মায়ের শেষ বাক্যটি তাহার অন্তরে এক বিপ্লব বাধাইয়া দিল।

‘সাধু হবি?’—এক বিচিত্র সম্মোহন এ কথা ছুইটিতে! বালকের অন্তর্লোকের দ্বারে কে যেন হঠাৎ এক অদৃশ্য চাবিকাঠি ঘুরাইয়া দেয়, উন্মোচিত হয় বিশ্বতলোকের এক অর্ক-আলোকিত দৃশ্যপট। পূর্ব-জন্মের সাত্ত্বিক সংস্কার উদ্গত হইয়া উঠে, নূতনতর জীবনের আশ্বাদ গ্রহণে করে তাহাকে প্রলুব্ধ। পীতাম্বর মাতার সম্মুখ হইতে তৎক্ষণাৎ দূরে ছুটিয়া পালায়।

বালক অতঃপর এক অদ্ভুত কাণ্ড করিয়া বসে। যাহা কিছু জামাকাপড় ছিল সব পোড়াইয়া ফেলিয়া শরীরে সে ভস্ম লেপন করে, তারপর পরিধানে আঁটে কোপীন। জননীকে বলিতে থাকে, “মা—মা, ত্যাখো, সত্যিই আমি কেমন সাধু হয়েছি।”

পাগল ছেলের কাণ্ড দেখিয়া মায়ের হাসি চাপা দায় হয়।

বালক পীতাম্বরের সেদিনকার এই সাধুবেশ কিন্তু শুধু তামাসাতেই পর্যাবসিত হয় নাই। জননীর অসতর্ক মূর্ত্তের বাক্যটি অন্তরে তাহার কেবলই গুঞ্জন তুলিতে থাকে।

অল্প কয়েকদিন পরের কথা। শুভদিন দেখিয়া জননী পীতাম্বরের উপনয়ন সংস্কার করান, ইহার তিন চারদিনের মধ্যেই বালক কিন্তু চিরতরে গৃহত্যাগ করিয়া বসে। সংসারের কোন আকর্ষণ, কোন বন্ধনই তাহাকে সেদিন আটকাইয়া রাখিতে পারে নাই। বয়স তাহার তখন মাত্র নয় বৎসর—নিতান্তই এক অবোধ বালক। কোথায় কোন্ দেশে সেদিন সে চলিয়া গেল, কে জানে? জীবনের একমাত্র ভরসাস্থল,

নয়নের মণি এই পুত্রের বিহনে জননীর ছুই চোখে সেদিন নামিয়া আসিল ঘন অন্ধকার।

দ্বাদশ জ্যোতির্লিঙ্গের অগ্রতম—মহাকাল-বিগ্রহ এই উজ্জয়িনী নগরের উপাশ্তে প্রতিষ্ঠিত। পুত্রহারা নর্মদাবাগ্নি হাঁহারই মন্দির-দ্বারে দিনের পর দিন মাথা খুঁড়িতে থাকেন। শুদ্ধাত্মা সাধিকার আকৃতি মহাকাল কিন্তু সেদিন গুনিয়াছিলেন।

চল্লিশ বৎসর ব্যবধানের পরে আর এক দৃশ্য উদ্ঘাটিত হয় দেওঘরের উপাশ্তে, তপোবন পাহাড়ে। বেলা সেদিন গড়াইয়া পড়িয়াছে, আকাশের বুকে ভাসিয়া আসিতেছে কুলায়গামী পাখীর ঝাঁক। বৃদ্ধা নর্মদাবাগ্নি পাহাড়ের সান্নিধ্যে দাঁড়াইয়া আকুল কণ্ঠে উচ্চৈঃস্বরে ডাকিতেছেন, “পীতাম্বর! আমার পীতাম্বর—বালানন্দ।”

কার এ মর্ম্ম আলোড়নকারী আহ্বান! চঞ্চল চরণে সম্মুখে আসিয়া দাঁড়ান এক বর্ষীয়ান সুদর্শন সন্ন্যাসী। আননে তাঁহার গুণ্ফ-শুশ্রূষাজি, শিরে প্রকাণ্ড জটীর ভার। মুহূর্ত্তে কোথা দিয়া কি ঘটিয়া গেল, ভাবাবেগে কম্পিত সন্ন্যাসী বৃদ্ধার চরণে পতিত হইলেন। মধুর কণ্ঠে ডাকিলেন—‘মা’।

চল্লিশ বৎসর পরে জননীর কানে এ হৃদয়-জুড়ানো ডাক আবার পৌঁছিল। সন্ন্যাসীর চিবুকে হাত দিয়া নর্মদাবাগ্নি তাঁহার চোখের দিকে দৃষ্টি নিবদ্ধ করিলেন। এই তো তাঁহার পীতাম্বর! এই তো তাঁহার গৃহত্যাগী উদাসী পুত্র।—আজিকার দিনে সে হইয়াছে বহু-বিশ্রুত যোগী, বালানন্দ ব্রহ্মচারী।

মাতা পুত্রের মিলনে নিস্তরঙ্গ গিরিশিখরে সেদিন আনন্দের তরঙ্গ খেলিয়া গেল। পুষ্কাক্রান্ত নর্মদাবাগ্নি তাঁহার এ হারানো রত্ন উদ্ধারের কাহিনী কহিতে লাগিলেন—

ধ্যানধারণা ও শিবার্চনার মধ্য দিয়া উজ্জয়িনীতে তাঁহার দিন কাটিয়া যাইতেছিল। শুদ্ধসত্ত্ব সাধিকা একদিন বৃষ্টিতে পারিলেন,

অন্তিম সময় তাঁহার এবার কাছে আসিয়া গিয়াছে। অন্তরে অভিলাষ জাগিল, শেষ নিশ্বাস ত্যাগ করিবার আগে একবার তিনি জীবন-সর্বস্ব পুত্র পীতাম্বরকে দেখিয়া যাইবেন। ইষ্টদেব তাঁহার সে ইচ্ছা পূরণ করিয়াছেন।

সেদিন তিনি শিবাজীর চরণে মনোবাঞ্ছা নিবেদন করিয়া ক্রন্দন করিতেছিলেন। প্রভু তাঁহার সম্মুখে জ্যোতির্ময় মূর্তি পরিগ্রহ করিয়া এসময়ে উপস্থিত হন—বলিতে থাকেন, ‘বেটি, তোরা প্রার্থনা অচিরে পূর্ণ হবে। বৈষ্ণনাথধামের অনতিদূরে, তপোবন পাহাড়ে বসে তোমার পুত্র পীতাম্বর রয়েছে তপস্চারত। তার এখনকার নাম—বালানন্দ। সেখানে চলে যা হারানো পুত্রকে আবার ফিরে পাবি।’

জমিজমা যাহা কিছু অবশিষ্ট ছিল বিক্রয় করিয়া নন্দাবাসী এক-দল তীর্থযাত্রীর সঙ্গে উজ্জয়িনী ত্যাগ করেন। বহুস্থানে পর্যটনের পর পুত্রের সঙ্গে আজ তাঁহার এই মিলন।

জননীর মনে সঙ্কল্প ছিল ইষ্টদেব যদি তাঁহার শেষ অভিলাষ পূরণ করেন, প্রিয় পুত্র পীতাম্বরের সহিত যদি আবার তাঁহার সাক্ষাৎ হয়, তবে ভক্তিভরে সওয়া লক্ষ বিশ্বপত্র উৎসর্গ করিয়া তিনি দেবাদিদেব মহেশ্বরের পূজা দিবেন।

বালানন্দজী সোৎসাহে সকল কিছু বন্দোবস্ত করিয়া দিলেন। সঙ্কলিত পূজার শেষে পুত্রের সেবা-পরিচর্যা কিছুদিন গ্রহণ করিয়া নন্দাবাসী সাধনোচিত ধামে প্রস্থান করিলেন।

“পীতাম্বর!” বলিয়া স্নেহাঙ্গুষ্ঠে বালানন্দকে ডাকিবার আর কেহ রহিল না।

উনবিংশ শতকের দ্বিতীয় পাদের কথা। সুদীর্ঘ বৎসর পূর্বে জননীকে ত্যাগ করিয়া তিনি অধ্যাত্মসাধনার পথে বহির্গত হন। বয়স তখন তাঁহার মাত্র নয় বৎসর। তপস্চার পথে পথে আসে কত বিচিত্র অভিজ্ঞতা—তারপর সাধন জীবনের চরম স্তরে ষটে তাঁহার উত্তরণ। উজ্জয়িনী ত্যাগের সেই বিশ্বতপ্রায় দিনটির দিকে বালানন্দ দৃষ্টিপাত

করেন। সাধন-পরিক্রমার কত কথা একের পর এক সন্ন্যাসীর মনে আসিয়া ভীড় করে।

—বালক পীতাম্বরের উপনয়ন সংস্কার মাত্র কয়েকদিন হয় সমাপ্ত হইয়াছে। ইতিমধ্যেই গৃহত্যাগের সঙ্কল্প তিনি স্থির করিয়া ফেলিয়াছেন। জননী ও আত্মীয়-বন্ধুদের অজ্ঞাতসাবে এক সময়ে তাই পথ বাহির হইয়া পড়িলেন।

কোথায় কোন্‌দিকে চলিবেন, কিছু ঠিক নাই। একমনে শুধু পথের পর পথ অতিক্রম করিয়া চলিয়াছেন।

অনির্দেশ্য চলা ও উদাসীন ভাবভঙ্গী দেখিয়া এক ব্যক্তি সম্মুখে আগাইয়া আসিল। উপনয়নের সময় যে সব স্বর্ণালঙ্কার দেওয়া হয়—বালা, হার, মাকড়ি, সবকিছু তখনও পীতাম্বরের পরিধানে রহিয়াছে। এলোকটি বড় চতুর, বালক যে ঘর ছাড়িয়া পথ বাহির হইয়াছে ইহা বুঝিতে তাহার দেরী হয় নাই।

ভয় দেখাইয়া সে কহিল, “বাছা, যাচ্ছে। তো তুমি অনেক দূরে, দেশ-দেশান্তরে—কিন্তু এসব অলঙ্কার পরে থাকলে চোর-ডাকাত যে পিছু লাগবে। প্রাণহানির আশঙ্কা রয়েছে। এগুলো বরং আমার কাছে গচ্ছিত রেখে যাও, ফেরবার পথে আবার নিয়ে যেও।”

নির্বিকার চিন্তে পীতাম্বর অলঙ্কারগুলি খুলিয়া দেন। আবার নিরুদ্দেশের যাত্রা শুরু হয়।

পশ্চিমধ্যে সৌভাগ্যক্রমে এক সাধুর সঙ্গে বালকের দেখা। ইনি নর্যদা-পরিক্রমার এক যাত্রী। ইঁহার সঙ্গে তখনি তিনি ভিড়িয়া পড়িলেন। নর্যদার তীর ধরিয়া চলিয়া উভয়ে উপনীত হইলেন গঙ্গোনাথে ব্রহ্মানন্দ মহারাজের আশ্রমে।

বরোদা শহর হইতে প্রায় চল্লিশ মাইল দূরে নর্যদাতটে স্বয়ম্ভুলিঙ্গ গঙ্গোনাথজী বিগ্রহ বিরাজিত। ইঁহারই এক পাশে মহাযোগী ব্রহ্মানন্দ মহারাজের আসনটি পাতা রহিয়াছে। সম্মুখে অখণ্ড ধুনী ও অখণ্ড দীপক প্রজ্জ্বলিত। মহাপুরুষের চরণোপাঙ্গে একটিবার বসামাত্র

বালক পীতাম্বরের জন্ম-জন্মান্তরের সাধ্বিক সংস্কার জাগিয়া উঠিল। ব্যাকুলভাবে তিনি প্রার্থনা জানাইলেন, “মহারাজ, কৃপা করুন, আপনার পরমাশ্রয় আমায় দিন।”

দেখা গেল, বালকের এখানে আগমনের রহস্য, নাম-ধাম কিছুই যোগীবরের অজানা নয়। প্রসন্নমধুর হাস্তে তিনি কহিলেন, “বেটা, এ তো খুব ভালো কথা। আসুছে শ্রাবণী পূর্ণিমার দিনটি শুভ, ঐ দিনই তোমায় আমি দীক্ষা দেব। কিন্তু তার আগে তুমি গ্রামাঞ্চলে গিয়ে ভিক্ষা সংগ্রহ করে আনো। তোমার দীক্ষার দিনে গ্রামবাসীদের ও নর্মদা পরীক্রমাকারী সাধুদের ভোজন না করালে চলবে কেন ?

মহাপুরুষের কৃপা ও আশ্রয় পাওয়া যাইবে, এ যে পীতাম্বরের পরম সৌভাগ্যের কথা। তাছাড়া, তিনি শুনিয়াছেন, আজ অবধি ব্রহ্মানন্দ মহারাজ কাহাকেও শিষ্যরূপে গ্রহণ করেন নাই। তাই এ আশ্বাসবাণী শুনিয়া তাঁহার আনন্দের অবধি রহিল না। আবার এসঙ্গে হুশিচুতাও খুব হইল। দীক্ষার দিন বহু লোককে যোগীবর খাওয়াইতে চাহেন। কিন্তু সে সামর্থ্য তাঁহার কোথায় ?

বালকের মনোভাব বুঝিতে ব্রহ্মানন্দজীর দেরী হয় নাই। সহাস্তে নিজের ভিক্ষার ঝুলিটির দিকে অঙ্গুলি প্রসারিত করিয়া কহিলেন, “বাচ্চা, তুমি তো জানো না, আমার এ ভিক্ষার ঝুলিটির ভেতর ঋদ্ধি ও সিদ্ধি ছই-ই রয়েছে। কিছু চিন্তা করো না।”

সত্যই তাই। ব্রহ্মানন্দজীর এই ঝুলিটির অলৌকিক শক্তি বড় বিস্ময়কর। অনেকের দৃঢ় বিশ্বাস, এই ঝুলির কল্যাণেই গঙ্গোনাথ আশ্রমের অধিবাসী ও এখানকার অভ্যাগত সাধুসন্তদের ভোজনের ব্যবস্থা অবলীলায় সম্পন্ন হইয়া যায়।

পীতাম্বর এবার গ্রামে গ্রামে ঘুরিয়া ভিক্ষা করিতে থাকেন। নবীন সাধকের সুন্দর স্তূঠাম রূপ ও ত্যাগ-বৈরাগ্য দর্শনে সকলেই মোহিত হয়। সাধারণ গ্রামবাসী হইতে শুরু করিয়া বড় বড় পাটিদারেরা আগাইয়া আসে। ভাৱে ভাৱে আটা-ময়দা-ঘি ব্রহ্মানন্দজীর শিষ্যের

এই দীক্ষা অনুষ্ঠানে পাঠাইতে থাকে। মহাত্মার ভিক্ষা-ঝুলির প্রতাপ পীতাম্বর এবার উপলব্ধি করিলেন।

নির্দিষ্ট শুভলগ্নে ব্রহ্মানন্দ মহারাজ তাঁহাকে নৈষ্ঠিক ব্রহ্মচর্য্য ব্রতে দীক্ষা দান করিলেন—নূতন নামকরণ হইল বালানন্দ। জ্যোতিঃমঠের আনন্দ উপাধিকারী সাধুকুলের তিনি অন্তর্ভুক্ত হইলেন।

এবার গুরুদক্ষিণার পাল্লা। বালানন্দ করজোড়ে জানিতে চাহিলেন, কোন্ বস্তু তিনি গুরুদেবের চরণে নিবেদন করিবেন? উত্তর হইল, “বৎস, সদগুরু থাকেন সব কিছু চাওয়া-পাওয়ার উর্দ্ধে, তাঁকে তুমি কোন্ জাগতিক বস্তু দিয়ে খুশী করবে, বলতো? স্মরণ রেখো, প্রকৃত গুরুদক্ষিণা ঋদ্ধিতে নেই, রয়েছে সিদ্ধিতে। আমার প্রদত্ত এই বীজমন্ত্র সাধন করে যে সিদ্ধি তুমি অর্জন করবে, তা-ই তুমি আমার উদ্দেশ্যে নিবেদন করো। এই হবে প্রকৃত গুরুদক্ষিণা। এতেই আমি প্রসন্ন হবো।”

নবীন ব্রহ্মচারী এবার সাধন-ভজনে রত হইলেন। শক্তিধর গুরুর প্রকৃত স্বরূপ চেনা ভার। এই মহাপুরুষের ঘনিষ্ঠ সান্নিধ্যে আসিয়া, তাঁহার যোগবিভূতির লীলা দেখিয়া শিষ্যের শ্রদ্ধা ক্রমেই বাড়িতে থাকে। পশ্চিম ভারতে, বিশেষতঃ বরোদা, আমেদাবাদ ও বোম্বাই অঞ্চলে এই সিদ্ধ মহাপুরুষের তখন খ্যাতি-প্রতিপত্তির অন্তঃ নাই। নন্দদা পরিক্রমাকারী সাধুদের চোখেও তাঁহার মর্যাদা অসামান্য।

গঙ্গোনাথ আশ্রমে সাধুসন্ত অতিথিদের সেবা ও অন্ন বিতরণ লাগিয়াই আছে। প্রতি বৎসরই দুই একটি সমারোহপূর্ণ যজ্ঞ সেখানে অনুষ্ঠিত হয়। তাছাড়া, অন্নকষ্ট ও দুর্ভিক্ষের সময় আশ্রমের দ্বার নিরন্নদের জন্য সর্বদাই থাকে উন্মুক্ত। বলা বাহুল্য, এসব সঙ্কটের সময়ে প্রয়োজনীয় যত কিছু দ্রব্য সরবরাহ করেন ব্রহ্মানন্দ মহারাজের গুণমুগ্ধ ভক্তের দল।

যোগসিদ্ধ শক্তিধর মহাপুরুষের ঋদ্ধি ও সিদ্ধির নানা চমকপ্রদ কাহিনী এ অঞ্চলে সে সময়ে প্রায়ই শুনা যাইত।

একবার মহা সমারোহে ভাঙারা চলিতেছে। ভোজন-পর্ব প্রায় শেষ হইয়া আসিল, এমন সময় হঠাৎ কোথা হইতে কয়েক শত লোক আসিয়া উপস্থিত। আশ্রম ভাঙারের কর্তা ভীত হইয়া অভ্যাগতদের জগ্গ ছোট ছোট খিচুড়ির গোলা তৈয়ার করা শুরু করিলেন। ব্রহ্মানন্দ মহারাজ তো ইহা দেখিয়া চটিয়া আগুন।

কর্মকর্তাকে ডাকিয়া কহিলেন, “মুঝে মালুম হোতা হায়, তুম্ বাঙ্গালীকা লেড়কা, কম্‌তি খানেওয়ালা। কাহে অন্ন ইত্‌নি কম্‌তি দেতে হো? তুম্ পুরা পুরা দেও, তুমহারি কুছ চিন্তা নেহি।”

একথা বলিয়া মহারাজ তখনি নিজ হাতে বাঁধিয়া দেখাইলেন, গোলার আকার কতটা বড় হইবে। কাজকর্মের শেষে সকলে কিন্তু সাবিস্ময়ে দেখিলেন, যোগীবরের স্পর্শের প্রভাবে এত লোককে খাওয়ানোর পরেও ভাঙারে প্রচুর খাদ্য মজুত রহিয়াছে।

স্থানীয় অঞ্চলে ছুঁড়ি হইলেও ব্রহ্মানন্দ মহারাজ তাঁহার বুলিটি নিয়া বাহির হইতেন। সাধারণের চোখে ইহা ছিল—অন্নপূর্ণা-মায়ীর সিদ্ধ ঝোলা। সকলে সোৎসাহে এ বুলির সামনে টাকাকড়ি ও আহাৰ্য্যের উপকরণ ঢালিয়া দিত। তারপর মহারাজের খিচুড়ি-গোলা চারিদিকের আট-দশখানি গ্রামের বুড়ুদের ক্ষুধা মিটাইত।

বরোদার গায়কোয়াড় ও মহারাণী এই মহাপুরুষের খুব ভক্ত ছিলেন। সদানন্দময় ব্রহ্মানন্দজী এক একদিন বরোদা প্রাসাদে গিয়া হাসির তুফান ছুটাইতেন। একবার গায়কোয়াড় শিউজী রাওকে তিনি হাসিতে হাসিতে বলেন, “মহারাজ, আপনার নাকি একটা চাঁদির তোপ আছে, তার গোলা একমাইল অবধি যায়!”

গায়কোয়াড় কহিলেন, “হাঁ বাবা, যা শুনেছেন তা সত্য, ঐ গোলা এক মাইল যায় বটে।”

‘আপনার গোলার দৌড় মাত্র এক মাইল, অথচ আমার গোলা যায় দশ ক্রোশ! তবে এটাও শুনে নিন, আপনার গোলা চাঁদির তোপের আর আমার গোলা—খিচুড়ির।’

উপস্থিত সকলেই ব্রহ্মানন্দ মহারাজের এ কৌতুকে হো-হো করিয়া হাসিয়া উঠিলেন।

বরোদার রাণী যমুনাবাই একবার তাঁহাকে রাজপ্রাসাদে আমন্ত্রণ জানান। নবদীক্ষিত বালানন্দজীও গুরুর সঙ্গে চলিয়াছেন। পথিমধ্যে এক পরিচিত গ্রাম্য ভক্ত বাবা মহারাজকে ধরিয়া ফেলিল। অনেক দিন সে তাঁহার দেখা পায় নাই, তাই উৎসাহের সহিত ভিক্ষার বুলিটি ভর্তি করিয়া একগাদা শাকসব্জী দিয়া দিল।

প্রাসাদে পৌঁছিবামাত্র রাণী যমুনাবাই সহাস্ত্রে বলিয়া উঠিলেন “দেখে মনে হচ্ছে, আজ আমাদের ভাগ্য খুব ভাল। বাবা মহারাজের ঝোলা একেবারে ভর্তি। নিশ্চয় আমরা অনেক কিছু উপাদেয় বস্তু আজ খেতে পারবো।”

“মাই, ঠিক বলেছ। অনেক প্রসাদ তোমরা আজ এ বুলি থেকে পাবে। বল দেখি, কার কি চাই।”

“মহারাজ, আঙুর খেতে আমাদের বড় ইচ্ছে হয়েছে, ঝোলা থেকে তাই বার করে দিন।”

রাণী যমুনাবাই ভাবিয়াছিলেন, ‘আঙুরের সময় এখন মেটেই নয়, দেখি যোগীবর তাঁর অন্তর্পূর্ণার ঝোলা থেকে এখনি তা বার করে দিতে পারেন কিনা।’

ব্রহ্মানন্দ মহারাজ সেই মুহূর্তেই এক থোলা আঙুর উহার ভিতর হইতে টানিয়া তুলিলেন। সহাস্ত্রে কহিলেন, “এই ঝাঞ্ঝো, আমার মাইর জন্তু তো আঙুর ঠিকই মিলেছে।”

শিষ্য বালানন্দজী সঙ্গে আসিবার সময় স্বচক্ষে দেখিয়াছেন, বাবা মহারাজের গ্রাম্য ভক্তটি তাঁহার এ বুলি কেবল শাকসব্জী দিয়াই ভরিয়া দিয়াছে। তাছাড়া, এ ঋতুতে আঙুর পাওয়ার কোন প্রশ্নই উঠে না। এ সময়ে বুলিতে ঐ ছুপ্রাপ্য ফলের আবির্ভাব দেখিয়া তাঁহার বিস্ময়ের সীমা রহিল না।

পরিহাসপ্রিয়তা ও আনন্দ-রঙ্গের অন্তরালে ব্রহ্মানন্দ মহারাজ

তাঁহার অসামান্য যোগশক্তিকে রাখিতেন সংগোপিত, তাই নশ্বদার এই বরপুত্রের স্বরূপ উদ্ঘাটন করা বড় সহজ ছিল না।

এই শক্তিধর যোগীর আশীর্ব্বাদ ও কৃপা কত মুমুকু জীবনকে যে সার্থক করিয়া তুলিয়াছে তাহার ইয়ত্তা নাই।

কিশোর বালানন্দের মধ্য তখন পরিক্রমা সমাপ্ত করার বৌক চাপিয়া বসিয়াছে। গঙ্গোনাথ আশ্রমে সাত-আট মাস থাকার পর তিনি আবার নশ্বদার তীর ধরিয়া অগ্রসর হইলেন।

এই যাত্রাপথেই গৌরীশঙ্কর মহারাজের সহিত তাঁহার সাক্ষাৎ ঘটে। বৎসরের পর বৎসর এই মহাত্মা নশ্বদা পরিক্রমা করিয়া বেড়াইতেন। অপরিমেয় ঋদ্ধি ও সিদ্ধি ছিল তাঁহার করতলগত। যোগ-বিভূতির লীলা প্রায়ই তাঁহার চলাফেরার মধ্যে প্রকট হইয়া উঠিত।

সঙ্গে তাঁহার সর্বদা চলিতেছে অজস্র শিষ্য, ভক্ত ও অনুরাগী দল। সদাব্রত ও ভাঙারা জমায়েতের মধ্যে লাগিয়াই আছে—যেখানেই তিনি যান ‘দীয়তাং ভূজ্যতাং’ রবে নদীতট মুখরিত হইয়া উঠে।

যোগীবর ব্রহ্মানন্দের সহিত এই মহাপুরুষের নিবিড় সখ্য। কিশোর বালানন্দকে তাঁরই দীক্ষিত শিষ্য জানিয়া পরম সমাদরে তিনি তাঁহাকে আশ্রয় দান করিলেন।

এই শক্তিধর যোগী ছিলেন বালানন্দ ব্রহ্মচারীর শিক্ষাগুরু। তরুণ সাধক ইহার সহিত সাত আট বৎসর অতিবাহিত করেন।

অতঃপর বালানন্দজীর জীবনে শুরু হয় দীর্ঘ পরিব্রাজনের পালা। অর্দ্ধ শতাব্দীরও বেশী সময় ভারতের অগণিত তীর্থ ও জনপদে তিনি ঘুরিয়া বেড়াইতে থাকেন। পর্য্যটনের ফাঁকে ফাঁকে মাঝে মাঝে দীক্ষাগুরু ব্রহ্মানন্দ মহারাজের চরণোপাশ্বেও উপনীত হইতেন। যোগীবরের কাছে যোগসাধনার নানা নিগূঢ় পদ্ধতি শিক্ষার সুযোগ এসময়ে তাঁহার মিলিত। গুরুদেবের দেহরক্ষার কাল অবধি গঙ্গোনাথে এভাবে তিনি যাতায়াত করিতেন।

নশ্বদার পরিক্রমণ ছিল বালানন্দজীর জীবনের এক পবিত্র ব্রত । ব্রত উদ্‌যাপন করিতে গিয়া তাঁহাকে বহু কষ্ট বরণ করিতে হয়, জীবনও বিপন্ন হয় বারবার ।

একবার নশ্বদাতীরের মাওলা নামক স্থানে বালানন্দজী উপনীত হইয়াছেন । সঙ্গে তাঁহার রহিয়াছেন একটি উদাসী সাধু । উভয়েরই হাতে একটি করিয়া ঝোলা এবং বস্ত্র-কম্বলের পুঁটলী । সে সময়ে ঐ অঞ্চলে প্রায়ই চুরি-ডাকাতি হইতেছিল, কমিশনার সাহেব স্বয়ং এজন্য পরিদর্শন কার্যে আসিয়াছেন । বাংলোর সম্মুখে তরুণ সাধু দুইটিকে দেখিয়া তখনি তাঁহাদের ধরিয়া আনাইলেন । তাঁহার সন্দেহ, এইসব অল্পবয়স্ক সাধুরাই সুযোগ পাইলে চুরি-ডাকাতি করে, তারপর বনাঞ্চলে উধাও হইয়া যায় ।

সাধুদ্বয়ের ঝোলার ভিতর খুঁজিয়া পাওয়া গেল ছোট ছোট শাবল ও কুঠার । সাহেব রক্তচক্ষু হইয়া কহিলেন, “এবার প্রমাণ মিলেছে, তোমরা এসব দিয়ে সিঁদ কাট, আর চুরি-ডাকাতি কর ।”

বালানন্দ বার বার বুঝাইতে থাকেন, “সাহেব, তা নয়, এ শাবল দিয়ে আমরা কন্দমূল খুঁড়ে বার করি, আর এ লোহার টাঙ্গীর প্রয়োজন হয় পর্ণকুটির বাঁধবার জন্য ।”

কিন্তু এ যুক্তিতে কর্ণপাত করে কে ? সাহেবের হুকুমে চাপ্রাণীরা সাধুদের পৌটলা তন্নতন্ন করিয়া খুঁজিয়া দেখিতে লাগিল । তন্নাসীর ফল ফলিল । দেখা গেল, একটি মোড়কে বেশ কিছু পরিমাণ গাঁজা ও শঙ্খবিষ বাঁধা রহিয়াছে ।

সাহেব গর্জিয়া উঠিলেন, “দেখছি তোমরা শুধু চোর ডাকাতই নও, খুনী দস্যুও বটে । এত বেশী পরিমাণ শঙ্খবিষ সঙ্গে নিয়ে চলবে কেন ? নিশ্চয়ই গোপনে এ খাইয়ে তোমরা মানুষ খুন করছো । দাঁড়াও, তিন বৎসর করে তোমাদের জেল খাটাচ্ছি ।”

বালানন্দ তাঁহাকে প্রাণপণে বুঝাইতে লাগিলেন, গাঁজা ও শঙ্খবিষ পরিব্রাজন-রত সাধুদের প্রায়ই দরকার হয় । বিশেষতঃ তীব্র শীতের

রাতে নশ্বদার অনাবৃত তটে এ বস্তু ছাড়া মোটেই চলে না, শীত নিবারণে শঙ্খবিষ বড় কার্যকরী।

সাহেব কিন্তু কিছুতেই একথা মানিয়া নিতে রাজী নন। ধমকাইয়া কহিলেন, সাধু, এ শঙ্খবিষ এখনি আমার সামনে খেয়ে দেখাতে হবে, নইলে জেল খাটতে হবে পুরো তিন বৎসর।

বালানন্দজী প্রমাদ গণিলেন। জেল ভোগ করার চাইতে বরং শঙ্খবিষ খাওয়াই ভাল। প্রাণ যায় যাইবে, কয়েদখানার অনাচারের মধ্যে তো আর মৃতকল্প হইয়া থাকিতে হইবে না! মোড়কের মধ্যে বেশ কিছু পরিমাণ বিষ ছিল, সাহেবের সম্মুখে দাঁড়াইয়া সবটাই তিনি একবারে উদরস্থ করিলেন।

সঙ্গে সঙ্গে বুঝিয়া নিলেন, এ বিষের ক্রিয়ায় মৃত্যু তাঁহার অনিবার্য। বাংলোর সীমানার বাহিরে এক বৃক্ষতলে বসিয়া তিনি সঙ্গী সাধুটিকে বলিলেন, “ভাই, আমার কণ্ঠ তালু শুকিয়ে আসছে, চোখে অন্ধকার দেখছি। শীগ্গিরই দেহত্যাগ ঘটবে তোমার কাছে আমার অনুরোধ, মৃত্যুর পর এ দেহটাকে নশ্বদার পবিত্র জলে ফেলে দেবে। তারপর তুমি যেথায় ইচ্ছে চলে যেও।”

বালানন্দের বাহুজ্ঞান কমিয়া আসিতে লাগিল। কিন্তু হঠাৎ এ সময়ে অন্তরে উদ্ভাসিত হইয়া উঠিল নশ্বদামঙ্গির জ্যোতির্ময়ী মূর্তি। স্নেহপূর্ণ বচনে অভয়দান করিয়াই দেবী অন্তর্হিতা হইলেন। কিছুক্ষণের মধ্যে তাঁহার সম্মুখ হইয়া দেহটি ভূতলে লুটাইয়া পড়িল।

ইতিমধ্যে সাহেবের বাংলায় এক ছলস্থল পড়িয়া যায়। তাঁহার অল্পবয়স্ক পুত্রটি শিকার হইতে খানিকটা আগে ফিরিয়া আসিয়াছে। সঙ্গীদের সহিত বসিয়া এক কাপ চা খাওয়ার পরই অকস্মাৎ তাহার ভেদবমি শুরু হয়। নিকটস্থ শহর হইতে ডাক্তার ডাকিয়া আনার পূর্বেই যুবকটি প্রাণত্যাগ করে।

কমিশনারের পুত্রের অসুখ শুনিয়া স্থানীয় এক সম্ভ্রান্ত ভদ্রলোক এসময়ে দেখা করিতে আসেন। সাধুটিকে অচৈতন্য অবস্থায় বৃক্ষতলে

দেখিয়া তিনি চমকিয়া উঠিলেন। শুনিলেন, সাহেব তাহাকে আটক করিয়াছেন' এবং শয্যাবিষ পান করিয়া সে মৃতকল্প হইয়া আছে।

সাহেবকে তিনি বুঝাইলেন, সর্বভাগী সাধুটিকে এভাবে নির্যাতন করা মোটেই ভাল নয় নাই। চিকিৎসাদ্বারা তাঁহাকে সুস্থ করিয়া অগৌণে মুক্তি দেওয়া উচিত। বলা বাহুল্য, সাহেব ইতিমধ্যে নরম হইয়া গিয়াছেন। সন্ন্যাসী ছটিকে তখন তিনি মুক্তি দিলেন। ডাক্তারী ঔষধদ্বারা বালানন্দজীকে বমন করানো হয় এবং ক্রমে তাঁহার বাহুজ্ঞান ফিরিয়া আসে।

পূর্বোক্ত ভদ্রলোকটির গৃহে কয়েকদিন বিশ্রাম করিয়া তবে তিনি কন্মক্ষম হইয়া উঠেন। আবার শুরু হয় নর্যদা পরিক্রমা।

অনেকদিন পরে ঐ সাহেবের সঙ্গে নদীতীরের এক বনে তাঁহার সাক্ষাৎ হয়। তিনি তখন হাতে একটি শাবল নিয়া কন্দমূল উঠাইতে ব্যস্ত ছিলেন। সাহেব চিনিলেন, এই সেদিনকার শয্যাবিষ-ভোজনকারী সাধু। বালানন্দ হাসিয়া কহিলেন, “সাহেব, এবার তো নিজের চোখে দেখতে পাচ্ছে, শাবল দিয়ে আমরা সিঁদ কাটিনে—বনজঙ্গল থেকে আমাদের আহাৰ্য্য, কন্দমূল খুঁড়ে বার করি।”

সাহেবের মনোভঙ্গীর এবার পরিবর্তন ঘটিয়াছে, সলজ্জভাবে তিনি হাসিতে লাগিলেন। বালানন্দকে কিছু অর্থ ভেট দিবার জ্ঞান তিনি এসময়ে খুব পীড়াপীড়ি করিতে থাকেন, কিন্তু তাহা সম্ভব হয় নাই। বালানন্দজী স্মিতহাস্যে উহা প্রত্যাখ্যান করিয়া বলেন, ‘সাহেব, আমরা অরণ্যচারী সাধক,— টাকা নিয়ে কি করবো? টাকা নেবার ইচ্ছেই নেই— আর তা দিয়ে এ অঞ্চলে কিছু কেনাও যায় না।’

সাহেব—সসম্মে টুপী উঠাইয়া স্থান ত্যাগ করিলেন।

নর্যদা পরিক্রমাকারী সাধুসন্তদের বিশ্বাস, এপথের জলে-জঙ্গলে সর্বত্র নর্যদা-মার্গের করুণা ও অলৌকিক শক্তি বিস্তারিত। দেবী সর্বদা তাঁহার ভক্ত সাধুদের রক্ষা করেন। পরিব্রাজক বালানন্দের

জীবনে নর্যদা পরিক্রমণ ছিল এক বিশিষ্ট অধ্যায়। প্রথমে গোদীশ্বরজীর জমায়েতে, তারপর সাধুদের সঙ্গে ঘুরিয়া বহু বিচিত্র অভিজ্ঞতা তিনি সঞ্চয় করেন, দেবীর ঐশী শক্তির নানা প্রকাশও তাঁহার সাধক-জীবনকে প্রভাবিত করে।

একবার বালানন্দজী কয়েকজন সঙ্গী সাধুসহ নদীতটের এক অরণ্য দিয়া চলিয়াছেন। সায়ং-সন্ধ্যা তখন অতিক্রান্ত, চারিদিকে অন্ধকার ঘনাইয়া আসিয়াছে। সারাদিনের পথশ্রমে যাত্রীদল কাতর, ক্ষুৎপিপাসায় তাঁহারা আর নড়িতে পারিতেছেন না। হঠাৎ সকলে দেখিলেন, বৃক্ষতলে এত ভীলরমণী তাহার গাভীটি সঙ্গে নিয়া দাঁড়াইয়া রহিয়াছে।

বালানন্দজী সম্মুখে আগাইয়া গিয়া কহিলেন, “মাদ্রি, আমরা সবাই ক্ষুধাতৃষ্ণায় মৃতপ্রায় রাত্রির মত এই বৃক্ষতলে আশ্রয় নেব স্থির করেছি। এখানকার পথঘাট আমাদের জানা নেই। আমাদের জগ্ন শীগ গির তুমি তোমার গা থেকে কিছু আহাৰ্য্য নিয়ে এসো। আমাদের সকলের প্রাণ বাঁচাও।

ভীলরমণীর নয়নে হাসির ঝলক। কহিল, “বাছা তোমাদের কিছু চিন্তা নেই। আমার এই গরুর দুধ থেকেই তোমাদের আজকের ক্ষুৎপিপাসা সব মিটে যাবে। পাত্র নিয়ে এসে একে-একে দাঁড়াও, আমি দুধ ছুয়ে দিচ্ছি, তোমরা ইচ্ছেমত পান কর।”

জলপাত্র হিসাবে সাধুদের সঙ্গে আছে একটি লাউয়ের তুচ্ছ। রমণী এটি ভরিয়া দুধ যোগান দিতেছে, আর সাধুদের দল একের পর এক আকণ্ঠ পান করিতেছেন। সকলে তৃপ্তিপূর্বক দুধ পান করার পর ভীলরমণী গাভীটিসহ অরণ্যে অদৃশ্য হইয়া যায়।

পরক্ষণেই সাধুদের হুঁশ হইল। তাঁহারা সংখ্যায় নিতান্ত কম নন, এতগুলি লোকের ক্ষুৎপিপাসা কি করিয়া এই গাভীর দুধে মিটিয়া গেল? এ তো সত্যই বড় বিস্ময়ের কথা। তাছাড়া, এই ভীলরমণীই বা কে? কি জগ্নই বা দুগ্ধবতী গাভীটিসহ রাত্রিতে এই অরণ্যমধ্যে সে

অপেক্ষা করিতেছিল ? নিকটে কোথাও গ্রামের চিহ্ন তাঁহারা দেখেন নাই। নারী তবে কোথায় গেল ?

প্রবীণেরা কহিলেন, ভীলরমণীর ছদ্মবেশে স্বয়ং নন্দাদামাঙ্গ-ই আজ এভাবে সবাইকে কুপা করিয়া গিয়াছেন।

পরিক্রমাকালে বালানন্দ মহারাজ আরও কয়েকবার নন্দাদামাঙ্গের অলৌকিক আবির্ভাব উপলব্ধি করিয়াছিলেন। দেবীর কল্যাণহস্ত একাধিকবার গহন অরণ্যে তাঁহার প্রাণ রক্ষা করিয়াছে।

সে-বার বালানন্দজী কামাখ্যা তীর্থে উপনীত হন। দেবীবিগ্রহ দর্শনের পর একদিক্রমে কয়েকদিন তিনি পাহাড়ের উপর সাধন-ভজনে অতিবাহিত করেন। তারপর এ অঞ্চলে পর্যটন করিবার কালে হঠাৎ একদিন মারাত্মক কলেরায় আক্রান্ত হইয়া পড়েন। জ্বর ভেদবমি শুরু হয়। তিনি ভাবিতে থাকেন, এবার তবে এ দেহপাত না হইয়া আর যায় না।

শরীর একেবারে অবসন্ন। সারা অন্তর পরমাত্মাধ্যানে নিবিষ্ট করিয়া নিষ্পন্দভাবে তিনি শয়ন করিয়া আছেন। হঠাৎ দেখিলেন, এক দিব্য কুমারী মূর্তি তাঁহার সম্মুখে। মুহূর্ত্তে তিনি কহিতেছেন, “ব্রহ্মচারী, তুই ভাবিস্নে। এবার তোর মরা হবে না। বেঁচে উঠবি। কিন্তু শীগ্গির এখান থেকে প্রস্থান করিস্।”

এ দৈবী নির্দেশের পর মূর্ত্তিটিকে আর দেখা গেল না। অতঃপর বালানন্দ গভীর স্তপ্তিতে মগ্ন হইয়া পড়িলেন।

পরের দিন নিদ্রাভঙ্গের পর দেখিলেন, ঐ মারাত্মক রোগ এক রাত্রির মধ্যে একেবারে নিরাময় হইয়া গিয়াছে। প্রবল ক্ষুধা-তৃষ্ণায় এখন তিনি অস্থির। দুর্বল দেহটি নিয়া গড়াইতে গড়াইতে নিকটস্থ এত কূপের সম্মুখে গিয়া কোনমতে উপস্থিত হইলেন।

তাঁহার অনুরোধে মেয়েরা মাথায় জল ঢালিয়া দিল, দেহটিও স্নিগ্ধ হইল। ক্ষুধায় পেট জলিয়া যাইতেছে, অথচ কাহারও প্রদত্ত অন্ন

ভোজন করিবার তাঁহার উপায় নাই। স্বহস্তে পাক করা অন্ন ছাড়া তিনি কিছু গ্রহণ করেন না।

এক ব্যক্তি এ সময়ে দয়া করিয়া একটি ইটের চুলার উপর তাঁহার লোটায় খিচুড়ি চড়াইয়া দেয়। স্বহস্তে উহা নামাইয়া নিয়া বালানন্দ ভোজন সমাপ্ত করেন। কলেরার পরদিনই এ কি কাণ্ড। শীতল জলে স্নান ও খিচুড়ি পথ্যের ব্যবস্থা দেখিয়া চারিদিকের লোক শঙ্কিত হইয়া উঠে। বালানন্দজী কিন্তু একেবারে গুপ্ত হন।

কামাখ্যা হইতে ফিরিয়া আসিয়া বালানন্দজী তারকেশ্বর এবং অন্যান্য তীর্থাঞ্চলে পর্যটন করিতে থাকেন। একবার হুগলী জেলায় ঘুরিতে ঘুরিতে তিনি শুনিতে পান, জলেশ্বরে এক জাগ্রত ও প্রাচীন শিবলিঙ্গ রহিয়াছে। জলেশ্বর-শিব নামে উহা পরিচিত।

দীর্ঘ বনপথ অতিক্রম করিয়া তিনি এই বিগ্রহ দর্শন করিতে আসিলেন? সন্ধ্যা তখন উত্তীর্ণ হইয়া গিয়াছে। মন্দিরটি অত্যন্ত প্রাচীন, ভিতরে গৌরীপটের উপর অর্দ্ধহস্ত পরিমাণ একটি শিবলিঙ্গ। পাশেই কিছুটা উচ্চ স্থানে এক প্রাচীন পঞ্চমুণ্ডীর আসন।

সন্নিহিত কূপের জলে হস্তপদ প্রক্ষালন করিয়া বালানন্দজী ভিতরে প্রবেশ করিলেন? কিছুক্ষণ জপ ধ্যানে কাটিয়া গেল। তারপর দেখা দিল এক অলৌকিক অদ্ভুত অভিজ্ঞতা। চারিদিক হইতে মন্দিরের দেওয়াল যেন তাঁহাকে চাপিয়া ধরিতেছে। আকাশে বাতাসে এক প্রচণ্ড হা-হা রব। এক অদৃশ্য শক্তি জুলিয়াছে ঝটিকার আলোড়ন।

হঠাৎ সেখানে দৈববাণী শোনা গেল, “ওরে, তুই পঞ্চমুণ্ডীর আসনে বসে অঘোর মন্ত্র জপ কর।

বালানন্দ নিবিষ্টমনে জপ আরম্ভ করিলেন। এক দিব্য প্রশান্তি ও আনন্দে সারা অন্তর তাঁহার ভরপুর হইয়া উঠিল। উপলব্ধি করিলেন দেবাদিদেবের কৃপা মিলিয়াছে।

রাত্রি প্রভাত হইয়া গেল। পরদিন তাঁহাকে এই মন্দির হইতে

বাহির হইতে দেখিয়া গ্রামের লোকের বিস্ময়ের সীমা রহিল না। তাহারা বলাবলি করিতে লাগিল, কে এই শক্তিমান সাধক? এ শিব মন্দিরে রাত্রিযাপন করা তো সকলের পক্ষে সম্ভব নয়।

সেবার তিনি উত্তরাখণ্ডে ভ্রমণ করিতেছেন। এমন সময় এক শক্তিমান অন্তরীক্ষচারী সাধকের সহিত তাঁহার সাক্ষাৎ হয়। বালানন্দজীর শিষ্য শ্রীহেমচন্দ্র বন্দ্যোপাধ্যায় ইঁহার এক বর্ণনা দিয়াছেন—
“কাঙ্রা উপত্যকায় ভাক্সুতে যাইয়া গুরুদেব গোমতী স্বামীর নিকট কিছুদিন অবস্থান করিতেছেন। সেখানে উভয়ে একদিন নিজ নিজ আসনে উপবিষ্ট আছেন, এরূপ সময়ে এক মহাত্মা আসিয়া তাঁহাদিগকে দর্শন দিলেন। কিছুক্ষণ বাক্যালাপের পর এ সাধুটি বিদায় লইলেন। একটু তফাতে যাইবার পরেই তিনি ‘জয় গুরুদেব, জয় গুরুদেব’ বলিয়া হাততালি দিতে লাগিলেন। ইহা শুনিয়া গুরুদেব ও গোমতী স্বামী বাহিরে আসিলেন ও উক্ত সাধুটিকে দেখিতে লাগিলেন। উভয়েই দেখিলেন যে, তিনি জয় গুরুদেব, জয় গুরুদেব বলিতেছেন ও হাততালি দিতেছেন, অমনি তাঁহার পা দুখানি ভূমি হইতে কিছু কিছু উপরে উঠিতেছে।

“এরূপ করিতে করিতে তিনি শূন্যমার্গে খেচরগামী হইয়া এক উচ্চ পর্বত শিখরের দিকে উঠিতে লাগিলেন ও কিছুক্ষণ পরে তথায় অদৃশ্য হইয়া গেলেন। এই দৃশ্য দেখিয়া গুরুদেব চমৎকৃত হইলেন ও উক্ত মহাত্মার সহিত উত্তমরূপে আলাপ-পরিচয় করিতে না পারায় দুঃখিত হইলেন। নিজ নিজ আসনে ফিরিয়া আসিয়া গুরুদেব গোমতী স্বামীকে ইঁহার বিষয় জিজ্ঞাসা করিলেন। স্বামীজী জানাইলেন যে, তাঁহার সহিতও বিশেষভাবে ইঁহার পরিচয় হয় নাই। তবে আরও ২১ বার ইঁহাকে নিম্নে আসিতে ও খেচরগামী হইতে দেখিয়াছেন। উপরের কোন্ শিখরে তিনি অবস্থান করেন, সেখানে কিভাবে অবস্থান করেন ও মধ্যে মধ্যে নিম্ন প্রদেশেই বা কেন আসেন, ইহা জিজ্ঞাসা করা হয় নাই।

“পরে এই খেচর সিদ্ধির বিষয়ে বাক্যালাপ হওয়ায় গোমতী স্বামী বলিলেন যে, এরূপ অদ্ভুত শক্তি এক যোগপ্রভাববলে ও দ্বিতীয়তঃ দ্রব্যবলে লাভ হয়। যোগবিভূতির বিষয় শাস্ত্রে উল্লেখ আছে। দ্রব্যশক্তি বিষয়ে তিনি অবগত আছেন যে, পারদ মিলিত একপ্রকার ‘গুটকা’ কোন কোন সাধু প্রস্তুত করিতে পারেন। ইহা মুখে রাখিলে খেচরও লাভ হয়। এ সাধুটির এ খেচরও কি উপায়ে লাভ হইয়াছে জানিতে পারেন নাই।”

শক্তিধর যোগী ব্রহ্মানন্দ মহারাজের যে দীক্ষা বীজটি বালানন্দের জীবনে রোপিত হয়, উত্তরকালে তাহা হইয়া উঠে পরিণত ও সার্থক, এক অসামান্য সিদ্ধ যোগীরূপে ভারতবর্ষের যোগীসমাজে বালানন্দ কীর্তিত হন। তাঁহার এ সাফল্যের মূলে একদিকে রহিয়াছে গুরু ব্রহ্মানন্দজীর কৃপা, অপরদিকে বিশিষ্ট মহাপুরুষদের শিক্ষাদান ও সহযোগিতা।

বালানন্দ ব্রহ্মচারীজী উত্তরকালে নিজ শিষ্যদের উপদেশ দিতেন, ‘মক্ষিকা বন্ যাও’—অর্থাৎ সেখানে যা কিছু অধ্যাত্ম-অমৃতের সঞ্চয় দেখ, তাহা হইতেও তোমার ভাণ্ডার সমৃদ্ধ করিয়া তোল।

অধ্যাত্মপথের এ আদর্শটি তাঁহার নিজের সাধন-জীবনেও অনুমৃত হইতে দেখা গিয়াছে।

ব্রহ্মানন্দজী ও গৌরীশঙ্কর মহারাজ ছাড়াও বালানন্দের জীবনে আর কয়েকটি মহাপুরুষের প্রভাব বিস্তারিত হইয়াছিল। নর্মদাতীরের মার্কণ্ডেয় মহারাজের নিকট তিনি হঠযোগের ছরুহ ক্রিয়াসকল আয়ত্ত করেন। তেমনি কাশী কুবের মঠের মণ্ডলেশ্বর রামগিরিজীর কৃপায় বেদান্তের নানা সূক্ষ্ম তত্ত্ববিচারে তিনি পারদর্শী হইয়া উঠেন। উত্তরাখণ্ডের ত্রিযুগীনারায়ণস্থিত প্রসিদ্ধ মহাত্মা মনসাগিরির নিকট বালানন্দজী এক সময়ে নিগূঢ় মন্ত্রাদি লাভ করিয়াছিলেন। যোগীরাজ শ্যামাচরণ লাহিড়ীর কৃপাও তাঁহার সাধন-জীবনের এক বিশিষ্ট

অধ্যায়কে উন্মোচিত করিয়া দেয়, উচ্চতর যোগসাধনার ক্রিয়াদি ইঁহার নিকট তিনি শিক্ষা করেন।

সিদ্ধ সাধক বালানন্দ ব্রহ্মচারীর জীবনে অতঃপর দেখা যায় গুরুসন্তার এক মহিমময় প্রকাশ। বহু সন্ন্যাসী ও সাধক এই যোগীগুরুর সাধন-নির্দেশ লাভ করিয়া ধন্য হয়। প্রথম দীক্ষিত শিষ্য রামচরণ বন্দ্যোপাধ্যায় মহাশয়কে আশ্রয় দানের পর হইতেই তাঁহার কুপার ধারাটি দিগবিদিকে বিস্তারিত হইতে থাকে। রামবাবুর সহিত বালানন্দজীর সাক্ষাৎ ও দীক্ষাদানের কাহিনীটি বড় মনোজ্ঞ।

কামাখ্যা হইতে ফিরিবার পর তিনি বাংলার নানা অঞ্চলে ঘোরাফেরা করিতেছেন। এসময়ে একদিন তিনি রাণাঘাটে উপস্থিত হন। রামচরণবাবু সেখানকার সাবডিভিশনাল অফিসার। ব্যবহারিক জীবনে তিনি ছিলেন সাহেবী রুচিসম্পন্ন। ধর্মজীবনের দিকে ঝোঁক তখন বেশী না থাকিলেও রামবাবু ছিলেন সৎ ও কর্তব্যনিষ্ঠ।

এ সময়ে তিনি এক বিপদে পড়িয়াছেন। রাণাঘাটের নিকট একটি ট্রেন দুর্ঘটনায় বহুলোক হতাহত হয়। সাবডিভিশনাল অফিসার রামবাবু এসময়ে তাঁহার কর্তব্য যথাযথভাবে পালন করেন নাই বলিয়া অভিযোগ উঠে। সংবাদপত্রে তাঁহার বিরুদ্ধে আন্দোলনও চলে। গভর্নমেন্ট বাধ্য হইয়া তাঁহার কৈফিয়ৎ তলব করেন, তাঁহার চাকুরি নিয়া টান পড়িবে বলিয়াও এ সময়ে অনেকের আশঙ্কা হয়। বলা বাহুল্য রামবাবুর সমগ্র পরিবারে তখন এক ছশ্চিন্তার মেঘ ঘনাইয়া আসিয়াছে।

রামচরণবাবুর মাতা বড় ভক্তিমতী। একদিন তিনি ইষ্টদেবের চরণে পুত্রের মঙ্গল কামনায় প্রার্থনা জানাইতেছেন, হঠাৎ অন্তর হইতে কে যেন বলিয়া দিল, ‘তোদের ভয় নেই। ঈশ্বরপ্রতিম এক সাধক এ গৃহে আসছেন, বিপদ এবার কেটে যাবে।’

ক্ষণপরেই বৃদ্ধা জানালা দিয়া তাকাইয়া দেখিলেন, জটাজুটসম্বিত এক দিব্যকান্তি সাধু তাঁহাদের বাংলোর হাতায় ঢুকিতেছে।

সাধু রামচরণবাবুকে কহিলেন, “বাবা, আমার একটা বাঘছালের বড় দরকার পড়েছে। এখানকার লোকেরা বললে, আপনি নাকি এক বড় শিকারী। ভাবলাম, আপনার কাছে হয়তো এ বস্তু পাওয়া যাবে। সেজন্যই আমি এলাম।”

সাধুর দিব্য কাস্তি ও প্রশান্ত মূর্তি দেখিয়া রামচরণবাবুর মন ভিজিয়া গেল। তুই একটি ব্যাঘ্রচর্ম তাঁহাকে দেখাইলেন, কিন্তু পছন্দ-মত নয় বলিয়া সাধু ইহা গ্রহণ করিলেন না।

সামান্য একটুমাত্র দর্শন, কিন্তু রামচরণবাবুর জন্মান্তরের সাত্বিক সংস্কার যেন সঙ্গে সঙ্গেই জাগিয়া উঠিল। রাত্রিতে নিদ্রার ঘোবে এ সাধুর স্বপ্ন তিনি দেখিলেন। তাছাড়া, অন্তরাত্মা হইতে কে যেন বারবার ডাকিয়া কহিতেছে, ‘ওরে, এ সাধুর দ্বারাই তোমার অভীষ্ট সিদ্ধ হইবে, এঁরই চরণে তুই আশ্রয় গ্রহণ কর।’

রামবাবু সপবিবারে মহাত্মার শরণ নিলেন। রেল দুর্ঘটনার সংশ্লিষ্ট গোলমাল তাঁহার আশীর্ব্বাদে একেবারে চুকিয়া গেল। কিছুদিনের মধ্যে রামবাবু ও তাঁহার স্ত্রীর সনির্ব্বন্ধ অনুরোধে বালানন্দজী তাঁহাদের উভয়কে দীক্ষা প্রদান করিলেন।

গুরুর প্রতি রামচরণবাবুর ভক্তি ক্রমে দৃঢ় একৈকনিষ্ঠায় পরিণত হয়, সমগ্র জীবনটি হইয়া ওঠে গুরুময়। একবার তাঁহার পৃষ্ঠদেশে কার্বাকল্ হওয়ায় উহাতে অস্ত্রোপচার করা হয়, রামবাবু কিন্তু তাঁহার উপর ক্লোরোফর্ম প্রয়োগ করিতে দেন নাই। সার্জন যখন অস্ত্রোপচার করিতেছে, ভক্তপ্রবর তখন একান্তমনে গুরু বালানন্দ মহারাজের চরণ ধ্যান করিয়া চলিয়াছেন। বিষয়ের বিষয়, এ সময়ে তিনি কোন জ্বালাযন্ত্রণাই অনুভব করেন নাই।

এ ঘটনার অব্যবহিত পরেই বালানন্দ মহারাজের এক পত্র তাঁহার কাছে আসিয়া পৌঁছে। তিনি তখন গীর্ণার পাহাড়ে বসিয়া তপস্তা করিতেছেন। একদিন ধ্যানস্থ অবস্থায় রামবাবুর অস্ত্রোপচারের দৃশ্যটি ছায়াচিত্রের মত তাঁহার সম্মুখে বার বার ভাসিয়া উঠিতে থাকে।

তিনি দেখেন, শিশুর পৃষ্ঠদেশে ছুরি চালানো হইতেছে, কিন্তু তাঁহার কিছুমাত্র বেদনা বোধ বা কাতরতা নাই, গুরুর দিকে স্থিরভাবে দৃষ্টিটি নিবদ্ধ করিয়া আছেন। এবার মহারাজের আশীর্ব্বাদপূত পত্রটি পাইয়া রামচরণবাবুর আনন্দের সীমা রহিল না।

বালানন্দজীর এক প্রবীণ শিষ্য ছিলেন, তাঁহার নাম দয়ানিধি ঝা। দেওঘরে স্বামীজীর করণীবাদ আশ্রম প্রতিষ্ঠিত হইলে পুত্রসহ তিনি সেখানে বাস করিতে থাকেন। একদিন গভরী রাত্ৰিতে এক বিষধর সর্প তাঁহার পুত্রকে দংশন করে! অবস্থা তখনি বড় সঙ্কটাপন্ন হইয়া উঠে। দয়ানিধি ঝাকে কিন্তু মোটেই বিচলিত হইতে দেখা গেল না, গুরুর চরণে এগাম জানাইয়া নির্বিকার চিত্তে তিনি তাঁহার নিয়মিত জপসাধনায় বসিয়া গেলেন।

এই প্রবীণ শিষ্যটি এ সময়ে ধ্যানাবস্থায় এক অলৌকিক দৃশ্য দর্শন করিয়া চমকিয়া উঠেন। তিনি দেখেন, যমদূতের মত কতকগুলি বিকটাকার মূর্ত্তি আশ্রমে প্রবেশ করিতে উদ্ভত হইয়াছে, আর বালানন্দ মহারাজ ত্রিশূল হস্তে তাহাদিগকে বিতাড়িত করিতেছেন। ঝা'র পুত্রটি কিন্তু সে রাত্ৰিতে বিস্ময়কররূপে রক্ষা পায়।

দেওঘরের সন্নিহিত তপোবন পাহাড়ে বালানন্দ মহারাজ এক সময়ে তীব্র তপস্যায় রত থাকেন। অধ্যাত্ম-সাধনার পরগতির মধ্য দিয়া তাঁহার যোগীজীবনটি সার্থক হইয়া উঠে। বালানন্দজীর এ সময়কার সাধনজীবনের বহু মনোজ্ঞ কাহিনী রহিয়াছে।

হেমচন্দ্র বন্দ্যোপাধ্যায় মহাশয় এ সম্পর্কে লিখিয়াছেন—
“একদিন তিনি গুহার মধ্যে একান্তে আসনে উপবিষ্ট ছিলেন। কতক্ষণ ধ্যানাবস্থায় ছিলেন মনে নাই। কিন্তু যখন চক্ষু উন্মীলন করিলেন তখন দেখিলেন, এক বিচিত্র রং-বিশিষ্ট সর্প তাহার বিশাল ফণাটি বিস্তার করিয়া তাঁহার সম্মুখে রহিয়াছে। এ সর্পের আর একটু বিশিষ্টতা ছিল এই যে, মানুষের গোঁফের মত অনেকগুলি দীর্ঘ দীর্ঘ রোম তাহার মুখে ছিল। ইহাকে দেখিয়া মহারাজ কিছুমাত্র ভীত

হইলেন না। তাঁহার ধারণা হইল যে, ইহা কখনও সর্প নহে, সর্পের বেশে কোন মহাত্মা তাঁহাকে পরীক্ষা করিতেছেন। এইরূপ মনে হইতেই মহারাজ ত্রাটক মুদ্রা অবলম্বন-পূর্বক এ সর্পের চক্ষুর সহিত নিজ চক্ষু সংযোগ করিলেন। ইহা করিতেই সাপটি ফণা সংকোচনপূর্বক ধীরে ধীরে গবাক্ষ দিয়া বাহির হইয়া গেল।

“অপর ঘটনাটি এইরূপ। মহারাজ নিম্নে ধুনীর কাছে রাত্রিতে একাকী শয়ন করিয়া আছেন। তখন শীতকাল, এজন্য একখানি কম্বল তাঁহার গায়ে ছিল। রাত্রি আন্দাজ ১টা ২টার সময় তিনি বোধ করিলেন যে, কে যেন তাঁহার পা হইতে কম্বলখানি ফেলিয়া দিল। ইহা করিতেই তিনি সজাগ হইয়া উঠিলেন। দেখিলেন যে, কম্বলখানি বাস্তবিকই ধুনীর নীচে পড়িয়া আছে। এমন সময় দেখিলেন যে, কে যেন তাঁহার সম্মুখে দাঁড়াইয়া আছে ও তাঁহাকে পাহাড়ের উপরে যাইবার জন্ত ইঙ্গিত করিতেছে। মহারাজ এ আহ্বানে কিছুমাত্র ভীত না হইয়া বা কেন ডাকিতেছে জিজ্ঞাসা না করিয়া তাহার পিছনে পিছনে যেন একটা আবেশভরে উপরে চলিতে লাগিলেন। এরূপভাবে উপরের গুহা পর্যন্ত তাঁহাকে লইয়া গেল। গুহা দিনের বেলায় তালা বন্ধ করিয়া ছিলেন, ইহা মহারাজের বেশ মনে ছিল। কিন্তু সেখানে যাইতে দেখিলেন, গুহার দ্বার খোলা রহিয়াছে। যে তাঁহার আগে ডাকিয়া আনিয়াছিল, তাহাকে গুহার মধ্যে প্রবেশ করিতে দেখিলেন। মহারাজ স্বপ্নাবিষ্টের মত গুহার মধ্যে প্রবেশ করিলেন।

“গুহা অতিশয় অন্ধকারময় ছিল। এজন্য পূর্বোক্ত আহ্বানকারীকে আর দেখিতে পাইলেন না। গুহার ভিতর একটি নির্দিষ্ট-স্থানে মহারাজের দিয়াশলাই ও বাতি থাকিত, এজন্য অন্ধকারে হাত বাড়াইয়া উহাদের তল্লাস করিতেছেন, এরূপ সময়ে গুহাতে এক পরম উজ্জ্বল অথচ স্নিগ্ধ বিজলীর আলোর মত আলো হঠাৎ জলিয়া উঠিল। এ আলো এত পরিষ্কার যে, মেঝেতে সূচ পড়িয়া থাকিলেও

দেখা যাইত ! পূর্বোক্ত আহ্বানকারীকে কিন্তু দেখিতে পাইলেন না । মহারাজের চিন্তা আসিতে লাগিল যে, তিনি তখন জাগ্রত না স্বপ্নাবিষ্ট এরূপ ভাবিতেই তিনি যেন সমাধিস্থ হইয়া গেলেন ।

“সকালে নীচের ধুনীতে মহারাজকে না দেখিয়া প্রথমে সকলে মনে করিয়াছিল যে, মহারাজ বোধ হয় বেড়াইতে গিয়াছেন । অধিক বেলা হইলেও তাঁহাকে ফিরিতে না দেখিয়া সকলে উপরের গুহায় গেল । তখন প্রায় মধ্যাহ্ন বেলা । কিন্তু তাহারা যাইয়া দেখিল, মহারাজ তখনও ধ্যানস্থ ! সকলের আহ্বানে তাঁহার ধ্যান ভগ্ন হইল ও তিনি রাত্রির বিবরণ প্রকাশ করিলেন ।”

তপোবন পাহাড়ের এই তপস্ব্যাময় জীবনেই জননী নন্দদাম্পত্যের সহিত বালানন্দজীর সাক্ষাৎ হয় । দেবাদিদেব মহেশ্বরের প্রত্যাদেশ পাইয়া চল্লিশ বৎসর পর আবার মাতাপুত্রের মিলন ঘটে । জননীর সেবা-পরিচর্যা ও শেষ কৃত্যের মধ্য দিয়া বালানন্দজীর ব্যবহারিক জীবনের সব কিছু কৰ্ম্ম ও কর্তব্যের অবসান ঘটয়া যায় ।

রামচরণ বসুর তিরোধানের পর তাঁহার পত্নী গুরুমহারাজকে এক আশ্রম ভবনে প্রতিষ্ঠিত করিতে ব্যগ্র হন । এই ভক্তিমতী শিষ্যার আগ্রহাতিশয্যে ও অর্থানুকূল্যে করণীবাদ আশ্রম স্থাপিত হয় । তারপর এ আশ্রমকে কেন্দ্র করিয়া যোগীবরের কৰুণাধারা দিকে দিকে বিস্তারিত হইতে থাকে । সর্বভ্যাগী সন্ন্যাসী শিষ্যদ্বয়, মৌজগিরি ও পূর্ণানন্দ স্বামী অতঃপর এখানে আসিয়া বাস করিতে থাকেন । কৃষ্ণ বন্দ্যোপাধ্যায়, প্রাণগোপালমুখোপাধ্যায় প্রভৃতি ভক্ত সাধকদের আগমনের মধ্য দিয়া ধীরে ধীরে শিক্ষিত সমাজে বালানন্দ মহারাজের প্রভাব-প্রতিপত্তি ছড়াইয়া পড়ে ।

শিষ্যদের অধ্যাত্ম-প্রস্তুতি সম্বন্ধে বলিতে গিয়া বালানন্দজী কখনো কঁাক বা কঁাকির অবকাশ রাখিতেন না । তিনি কহিতেন—

চারো পরীক্ষামে যব্ শিষ্য উত্তরে ।

তব্ হি গুরু উস্কো পাকা ঠহরে ॥

তাঁহার এ চার পরীক্ষাকে তিনি বলিতেন—ঘর্ষণ, তাপন, ছেদন ও তাড়ন । গুরুদেব যেন পাকা স্বর্ণকার, শিষ্যদের জীবন দ্বারা অলঙ্কার তৈরী করিতেছেন । প্রথম কষ্টি পাথরে ঘর্ষণ করিয়া তিনি বুঝিয়া নেন—খাতুটি প্রকৃত সোনা, না কোন মেকি বস্তু । তারপর তাপন—ত্যাগ-তিতিক্ষার অগ্নিপরীক্ষার মধ্য দিয়া বুঝা যায়, খারাপ ধাতুর মিশ্রণ, ময়লা ও গলদ কতটা কাটিয়াছে । সবটা সহজে নিষ্কাশিত হয় না, তাই স্থল বিশেষে প্রয়োজন হয় ছেদনের । শেষটায় খাঁটি সোনা পরীক্ষার জন্য আসে হাতুড়ির আঘাত বা তাড়ন ।

নিজ জীবনে যে কৃচ্ছ্রত, তপস্যা ও ইষ্টনিষ্ঠা বালানন্দজী অনুসরণ করেন, এ যুগের সাধারণ মানুষের পক্ষে তাহা সহজসাধ্য নয় । একথা তিনি জানিতেন, তাই সন্ন্যাসী ও ব্রহ্মচারী শিষ্যদের জন্য কঠোরতার পক্ষপাতী হইলেও মুমুকু গৃহস্থদের জন্য সহজসাধ্য সাধনার কথাই তিনি বলিতেন । অপার স্নেহ ও সহানুভূতিভরা তাঁহার কল্যাণ হস্তটি শিষ্যদের সাহায্যার্থ প্রসারিত থাকিত ।

বালানন্দজী সে-বার কলিকাতায় আসিয়া বরানগরে কিছুদিন বাস করেন । মহাপুরুষকে দর্শনের জন্য বাসস্থানের সম্মুখে লোকের ভীড় লাগিয়াই আছে । এসময়ে মহারাজা যতীন্দ্রমোহন ঠাকুর এক-দিন তাঁহার এক প্রতিনিধিকে প্রেরণ করেন । অনুরোধ জানান বালানন্দজী যদি কৃপা করিয়া তাঁহার ভবনে একবার পদার্পণ করেন তিনি কৃতার্থ হইবেন ।

যোগীবর পরিহাস করিয়া কহিলেন, “যতীন্দ্রমোহন যে ‘মহারাজ’ তা আমি শুনেছি । এদিকে আমাকেও আবার বহুলোক ‘মহারাজ’ বলে সম্বোধন করে । এক মহারাজের কাছে অপর মহারাজ এলে তাতে আর নিন্দা কি ? মহারাজা যতীন্দ্রমোহন নিজে একবার এখানে এলেই তো ভাল হয় ।”

উপরোক্ত কথা কয়টি বলিয়াই বালানন্দজী এক সিদ্ধ মহাপুরুষের গল্প সকলকে শুনাইয়া দিলেন। —নগরের প্রকাশ্য রাজপথে মহাত্মাটি সেদিন আসন বিছাইয়া বাসিয়াছেন। এদিকে হঠাৎ বড় হৈচৈ পড়িয়া গেল। বহু লোকলস্কর সঙ্গে নিয়া সে অঞ্চলের অধিপতি সেখান দিয়া আসিতেছেন। সন্ন্যাসী একেবারে রাজপথের মধ্যস্থলে উপবিষ্ট। অগ্রগামী রক্ষীরা তাঁহাকে সতর্ক করিয়া দিল—এভাবে বসিয়া থাকা তাঁহার চলিবে না, রাজা আসিতেছেন।

চক্ষু উন্মীলন করিয়া সংক্ষেপে সাধু শুধু বলিলেন, “রাজাকে বল, এখানেও এক মহারাজ বসে আছেন।”

মহা বিপদ। সন্ন্যাসীর নড়িবার যে কোন লক্ষণই নাই। ভয়ে ভয়ে সকলে গিয়া রাজাকে এ সংবাদ নিবেদন করিল। শিবিকা হইতে অবতরণ করিয়া রাজা সেদিকে আগাইয়া আসিলেন।

সন্ন্যাসীর চরণে প্রণাম করিয়া সহাস্ত্রে কহিলেন, “শুনলাম, প্রভু নাকি এক মহারাজ। কিন্তু আপনার ফোজ কোথায়?”

“ফোজের কি দরকার? কেউ তো আমার দুঃখমন নয়।”

রাজা কহিলেন, “খুব ভাল কথা, কিন্তু বলুন দেখি, আপনার তোষাখানা কোথায়?”

“কোন খরচের বালাই নেই—তবে আর তোষাখানায় কি কাজ? আমার যে ‘স্বদেশ ভুবনত্রয়’—রাজত্বও আমার রয়েছে ত্রিভুবন জুড়ে, তাহলে মহারাজা নই তো কি?”

মহাত্মার বাণীর মর্ম্ম রাজা বুঝিলেন, তাঁহাকে সাষ্টাঙ্গে প্রণাম করিয়া রাস্তার একপাশ দিয়া তিনি চলিয়া গেলেন।—

বালানন্দ ব্রহ্মচারীজীর গল্প বলা শেষ হইল। প্রেরিত কর্ম্মচারীটি এবার ফিরিয়া গিয়া সমস্ত কথা মহারাজা যতীন্দ্রমোহনকে জানাইলেন। বলা বাহুল্য, এই বিবরণ শোনার পর মহারাজা কিছুটা লজ্জিত হন। ইহার পর ভক্তিপূর্ণ হৃদয়ে নিজেই তিনি বালানন্দ মহারাজের চরণতলে উপস্থিত হন।

যতীন্দ্রমোহন স্বামীজীকে জিজ্ঞাসা করিলেন, তাঁহার মত সংসারীর কর্তব্য কি ? এত কিছু বন্ধনের জালে জড়িত রহিয়াছেন, মুক্তির জন্ত কোন পন্থায় তিনি অগ্রসর হইবেন ?

বালানন্দজী কহিলেন, “মহারাজ, আপ অব্ উল্ট যাইয়ে।”

কথাটির মর্ম বুঝিতে না পারিয়া মহারাজা তাঁহার দিকে জিজ্ঞাসু নেত্রে চাহিয়া আছেন। বালানন্দজী বুঝাইয়া কহিলেন, “মহারাজ, এখন আপনার যা কিছু আছে সবই এমনি থাকবে, শুধু আপনার বুদ্ধি ও দৃষ্টিভঙ্গীটিকে বদলাতে হবে। ‘সব মেরা’ এ মনোভাবটিকে ঘুরিয়ে নিয়ে করতে হবে—‘সব তেরা’—অর্থাৎ নিজের অহং বোধটির স্থলে স্থাপিত করতে হবে ভগবানকে। আপনি যে মালিক—এ বোধটি ত্যাগ করে হতে হবে ম্যানেজার। কোন মার্গকে এ কথা বোঝাতে হলে, আমি তাঁকে বলতাম,—মার্গ অব্ ঝি বন্ যাইয়ে।”

১৯০৬ সালের কথা। বালানন্দজী গুরুধাম গঙ্গোনাথ আশ্রমে উপস্থিত হইয়াছেন। গুরু ব্রহ্মানন্দ মহারাজ এ সময়ে মহাসমারোহে পর পর মহারুদ্র যজ্ঞ ও মহামৃত্যুঞ্জয় যজ্ঞ অনুষ্ঠান করিলেন। একদিন হাসিতে হাসিতে তিনি বালানন্দজীকে কহিলেন, “বালী, আমি এ মরদেহ ত্যাগ করবো।”

“সে কি কথা গুরুজী—আপনি ইচ্ছা করলে আরও বহুকাল যে এ দেহ ধারণ করতে পারেন।”

সংক্ষিপ্ত উত্তর আসিল, “আউর নহি, বহুৎ পুরাণা হো গয়া।”

মাঘ মাসের পূণ্যতিথি। সেদিন প্রত্যুষকাল হইতেই নর্মদার বরপুত্র, ব্রহ্মানন্দজী আপন কুটিরে ধ্যানস্থ হইয়া পড়েন, এ ধ্যান আর তাঁহার ভাঙ্গে নাই। আশ্রমের এক প্রান্তে নর্মদাতটে বসিয়া বালানন্দ জপ করিতেছেন। হঠাৎ দেখিলেন, ব্রহ্মানন্দ মহারাজ যে স্থানে আসন পাতিয়া বসেন তাহার সন্নিহিত কুটিরটি ধু-ধু করিয়া জ্বলিয়া উঠিয়াছে। তারপর একটি অগ্নিশিখা চকিতে সে স্থান হইতে উর্দ্ধে

উঠিয়া দূর আকাশে মিলাইয়া গেল। বুঝিলেন, যোগীবরের জ্যোতিঃ-
সত্তা চিরতরে মরদেহ ত্যাগ করিয়া চলিয়া গেল।

গুরুদেহের দেহত্যাগের পর আর সেখানে অবস্থান করিতে
তাঁহার ইচ্ছা হয় নাই। মহাযোগী ব্রহ্মানন্দ মহারাজের তিনি প্রথম
শিষ্য, প্রিয় শিষ্য। গঙ্গোনাথের গদি বুদ্ধি মহারাজ তাঁহাকেই দিয়া যান
কিন্তু গুরুভ্রাতা কেশবানন্দজীকে ঐ গদিতে স্থাপন করিয়া তিনি
দেওঘরে প্রত্যাবর্তন করেন।

ইহার পর দীর্ঘ দিন গত হইয়াছে। করণীবাদ আশ্রমের প্রসার ও
শ্রীবৃদ্ধির সঙ্গে সঙ্গে যোগীবরের ভক্ত শিষ্যের সংখ্যাও কম বৃদ্ধি প্রায়
নাই। আনন্দ ও কল্যাণের এক পূর্ণকুস্তুরূপে পবিত্র বৈদ্যনাথধামে
বালানন্দ মহারাজ তখন অবস্থান করিতেছেন। অতঃপর ধীরে ধীরে
একদিন এই জীবন-লীলানাট্যের শেষ দৃশ্যটি আসিয়া পড়িল।

১৩৪৪ সালের ২৬শে জ্যৈষ্ঠের মধ্যরাত্রে যোগীবর পরমাত্মায়
লীন হইয়া গেলেন। নয় বৎসর বয়সে উজ্জয়িনীর মহাকাল জ্যোতিঃ-
লিঙ্গের পাদপীঠ হইতে শুরু হয় যে মহাজীবনের অভিযাত্রা, বৈদ্যনাথ
জ্যোতির্লিঙ্গের পরম সন্তায় সেদিন ঘটে তাহারই পরিসমাপ্তি।

‘ধামী নিগমানন্দ

রাত্রি তখন প্রায় আটটা। সুপাবভাইজাব নলিনীবাবুর দপ্তরের কাজকর্ম তখনও সমাপ্ত হয় নাই। জমিদারী সেরেস্তার কাগজপত্রগুলি সম্মুখে ছড়ানো, নিবিষ্ট মনে তিনি ব্যেকটি জটিল বিষয়ের কথা ভাবিতেছেন। হঠাৎ গৃহের বাতি একটু নিম্প্রভ হইয়া গেল।

ব্যাপার কি! দৃষ্টি ফিরাইতেই নলিনীকান্ত সবিস্ময়ে দেখিলেন, তাঁহার স্ত্রী অদূরস্থিত টেবিলটির সম্মুখে দণ্ডায়মান। কিন্তু এ যে একেবারে অসম্ভব। প্রায় তিন মাস পূর্বের স্ত্রীকে তিনি স্বগ্রামে বহুদূরে পাঠাইয়া দিয়াছেন। অকস্মাৎ সে এখানে কি করিয়া আসিবে? পরক্ষণেই বুঝিলেন, প্রকৃতপক্ষে তাঁহার স্ত্রী সশবীরে এখানে উপস্থিত হয় নাই, তাঁহারই এক অশরীরী মূর্তি আজ এখানে, কি জানি কেন, আল্পপ্রকাশ করিয়াছে।

কিন্তু এ ছায়ামূর্তিই বা তাঁহার সম্মুখে এভাবে আসিয়া দাঁড়াইবে কেন? দৃষ্টিবিলম্বের জন্ম এরূপ দেখা যায় নাই তো? বারবার ছুই চোখ রগড়াইয়া আবার সেদিকে তিনি দৃষ্টি নিবদ্ধ করিলেন। মূর্তিটি কিন্তু তেমনি অবিচলভাবে দাঁড়াইয়া রহিয়াছে। ভ্রমই যদি তাঁহার হইবে, তবে এ ছায়ামূর্তি এমন স্থির হইয়া থাকিবে কেন? তীক্ষ্ণ দৃষ্টিতে চাহিয়া দেখিয়া তাঁহার মনে হইল, এ অশরীরী মূর্তির মুখটি বড় বিষাদাচ্ছন্ন।

হঠাৎ নলিনীকান্ত সজাগ হইয়া উঠিলেন, তাঁহার অন্তরে এক অজানা ভয়ের সঞ্চার হইল। ‘কে তুমি, কে তুমি!’—বলিয়া তিনি উচ্চ স্বরে চিৎকার করিয়া উঠিলেন। ভূতটি পাশের কক্ষেই থাকে, ব্যস্তসমস্ত হইয়া তখন সে ছুটিয়া আসে। উভয়ে তলতল করিয়া সব

খুঁজিয়া দেখিলেন। কই? কেহই তো কোথাও নাই। অশরীরী নারী ইতিমধ্যে অদৃশ্য হইয়া গিয়াছে।

নলিনীকান্ত বড় চিন্তায় পড়িলেন। এ ছায়ামূর্তি তাঁহার প্রাণ-প্রিয়া পত্নীর মৃত্যুর ইঙ্গিত বহন করিয়া আনে নাই তো! চিঠিপত্রে অবশ্য এ কয়দিনের মধ্যে কোন ছঃসংবাদ তিনি পান নাই। তাঁহার বর্তমান কর্মস্থানটির নাম নারায়ণপুর, উত্তরবঙ্গের দিনাজপুর জেলার অন্তর্গত। এখান হইতে তাঁহার স্বগ্রাম, নদীয়ার কুতুবপুর কম দূরের পথ নয়। চিঠি এখানে পৌঁছিবার পূর্বেও অনেক কিছু ঘটিয়া থাকিতে পারে। নলিনীকান্ত বড় উদ্বিগ্ন হইয়া পড়িলেন, তবে কি তিনি অবিলম্বে দেশে রওনা হইবেন?

কিন্তু তাহাই বা কি করিয়া পারা যায়? জমিদারের বহুসংখ্যক আমিনের কাজ তত্ত্বাবধানের ভার এখানে তাঁহার উপর স্তম্ভ রহিয়াছে। কর্মদক্ষতা ও সততার জ্ঞাত তাঁহার উপর কর্তৃপক্ষের অগাধ বিশ্বাস। সর্বোপরি তাঁহার উপর আজকাল ইহারা বড় বেশী নির্ভর করিতেছেন। এ অবস্থায় হঠাৎ কাজকর্ম ফেলিয়া চলিয়া যাওয়া নিতান্ত অসঙ্গত। তাছাড়া, বিশ-বাইশ দিন পরেই তো দুর্গাপূজা আসিতেছে। ভাবিলেন, হাতের কাজগুলি তাড়াতাড়ি শেষ করিয়া পূজার সময়ই বরং একবারে বেশী ছুটি নিয়া বাড়ী যাইবেন।

পরদিনের ডাকেই কিন্তু এক পত্র আসিল, নলিনীকান্তের স্ত্রী খুব অসুস্থ। সংবাদটি পাইয়া তাঁহার চিন্তিত্ব আরও অধিক রহিল না, তবে কি ইতি মধ্যে স্ত্রীর প্রাণবিয়োগ হইয়াছে? মৃত্যুর পরেই কি তাই তাঁহার ছায়ামূর্তিটি এভাবে সেদিন দর্শন দিয়া গেল? কিন্তু পরলোক, পুনর্জন্ম, আত্মা প্রভৃতিতে তাঁহার মোটেই বিশ্বাস নাই। তেমন কিছু দুর্ঘটনা ঘটে নাই বলিয়া মনকে প্রবোধ দিতে লাগিলেন।

নলিনীকান্ত স্ত্রীকে বড় নিবিড়ভাবে ভালবাসেন। নিজেকে নিজে যতই তিনি বুঝান না কেন, চিন্তিত্ব আর জ্বালা হইতে কোন মতেই আর

নিষ্কৃতি পাইতেছিলেন না। কাজকর্ম সব সমাপ্ত করিয়া পূজার ছুটিতে তিনি স্বগ্রাম কুতুবপুর রওনা হইলেন। কিন্তু গৃহে উপস্থিত হইয়াই শুনিলেন, জীবনসঙ্গিনী আর ইহজগতে নাই। পত্নীগতপ্রাণ নলিনীকান্ত শোকে মুহুমান হইয়া পড়িলেন।

প্রকৃতিস্থ হইবার পর হিসাব করিয়া দেখিলেন, তাঁর কর্মস্থান নারায়ণপুরে যে সময়ে তিনি স্ত্রীর ছায়ামূর্তি দর্শন করেন কুতুবপুরের বাড়ীতে উহার ঠিক চার দশ পূর্বে তাহার লোকান্তর ঘটে।

ঐ অশরীরী মূর্তি আরও দুইবার এ সময়ে তাঁহার সম্মুখে আসিয়া উপস্থিত হয়। বিরহবিধুর নলিনীকান্তের কাছে কোন জাগতিক বস্তুর আকর্ষণই সেদিন আর নাই। কিন্তু পরলোকবাসিনী পত্নীর সহিত সাক্ষাতের জন্ত, তাঁহার সহিত যোগাযোগ স্থাপনের জন্ত অন্তর তাঁহার বড় ব্যগ্র হইয়া উঠিল। হেতুতত্ত্ব বিষয়ক গ্রন্থাদি পাঠ, মাদ্রাজের আদেয়ারে গিয়া থিয়সফিস্টদের সাহায্যে প্রেতলোকের সহিত যোগাযোগ স্থাপন ইত্যাদি অনেক কিছুই করিলেন কিন্তু সবই বৃথা। কোন কিছুতেই শান্তি লাভ হইল না। মৃত্যু পত্নীর সহিত মিলনের তীব্রতা কেবলই বাড়িয়া চলিল।

নলিনীকান্ত এখন শুধু পরলোক ও অলৌকিক রাজ্যের তত্ত্ব উদ্ঘাটনের জন্ত পাগল। দিবারাত্র এই উদ্দেশ্যেই ঘুরিয়া বেড়ান। কে তাঁহাকে সূক্ষ্মতম লোকের বার্তা আনিয়া দিবে, প্রিয়তমা পত্নীর সহিত বহুবাঞ্ছিত যোগাযোগ সাধন করিয়া দিবে,—কোথায় সেই শক্তিমান পথপ্রদর্শক? এই চিন্তায়ই তিনি সদা ব্যাকুল।

এ সময়ে একদিন কলিকাতায় আসিয়া তিনি স্বামী পূর্ণানন্দ পরমহংসের কথা শ্রবণ করেন। এই মহাপুরুষ পূর্বব্রাহ্মে ছিলেন ডাফ কলেজের বিজ্ঞান বিভাগের অধ্যাপক। তত্ত্বসাধনায় সিদ্ধ বলিয়া এসময়ে তাঁহার খুব প্রসিদ্ধি—নলিনীকান্ত তাই তাড়াতাড়ি তাঁহার নিকট ছুটিয়া গেলেন।

সকল কথা শুনিয়া পূর্ণানন্দ স্বামী সস্নেহে কহিলেন, “বাবা, তুমি তোমার স্ত্রীকে পেতে ব্যস্ত হয়েছ, কিন্তু সেই স্ত্রী এবং বিশ্বের যে কোন স্ত্রীলোকমাত্রেই যে আত্মশক্তির ছায়া। তুমি শুধু এ ছায়ার সন্ধানে যে শক্তি ব্যয় করবে, তা দিয়ে মহামায়াকে লাভ করতে পারো। সিদ্ধি লাভ করলে দেখবে, সব কিছুই তোমার করায়ত্ত।”

মহাপুরুষের এই বাণী নলিনীকান্তের দক্ষ প্রাণে শান্তিবারি সিঞ্জন করিয়া দিল। সকাতরে তিনি তাঁহার কাছে দীক্ষা প্রার্থনা করিলেন। স্বামীজী উত্তর দিলেন, “না বাবা, আমি তোমার গুরু নই। তোমার গুরু নির্দিষ্টই রয়েছেন। সময়মত তুমি তাঁহার দেখা পাবে।”

এবার গুরুস্নাতের জন্ম নলিনীকান্তের মনে তীব্র ব্যাকুলতা জাগিয়া উঠিল। যে করিয়াই হউক সৎগুরুর সন্ধান করিয়া দীক্ষা তাঁহাকে নিতেই হইবে। এসময়ে কার্যস্থল নারায়ণপুরে থাকিতেই তাঁহার আর এক অলৌকিক অভিজ্ঞতা লাভ হয়।

তিনি নিজেই এ অভিজ্ঞতার এক মনোজ্ঞ বর্ণনা দিয়াছেন,—“সে এক আশ্চর্য্য ব্যাপার। এক রাত্রিতে ঘরের মধ্যে শুয়ে আছি, জানালা দরজা সব বন্ধ, ঘুম হয়নি, তন্দ্রা এসেছে মাত্র, এমন সময় এক জ্যোতির্ময় সৌম্যমূর্তি মহাপুরুষ আমায় ডেকে বললেন,—‘নাও বৎস, এই মন্ত্র নাও। তুমি মন্ত্রস্নাতের জন্ম ব্যাকুল হয়েছে, এই আমি তোমার জন্ম মন্ত্র নিয়ে এসেছি, ধর।’ কি গস্তীর সে স্বর! আমি হাত পেতে সেটা নিলাম। মহাপুরুষের অঙ্গজ্যোতিতে অন্ধকার গৃহ তখন আলোকিত হয়ে উঠেছে। সেই আলোকে স্পষ্ট দেখা যাচ্ছিল—একটা পাতায় কি যেন লেখা আছে; কাছে দেশলাই ছিল, তাড়াতাড়ি আলো জ্বালিয়ে দেখি, বিশ্বপত্রে রক্তচন্দনে লেখা একাক্ষরী এক মন্ত্র!

“এটি কি মন্ত্র, কেমন করে জপ করতে হয়—তা জেনে নেবার জন্ম যেমন মন্ত্রদাতার উদ্দেশ্যে মুখ তুলে তাকিয়েছি, দেখি তিনি আর নেই। দিব্যমূর্তি অদৃশ্য হয়েছেন। ঘরের দরজা-জানালা সব পূর্ববৎ

বন্ধ ! ছয়ার খুলে পাঁতি পাঁতি করে সব জায়গা খুঁজলাম, পেলাম না, অবাক্ হলাম, মন যেন কেমন হয়ে গেল। ঘরে এসে মেজের পড়ে আকুলি বিকুলি করতে লাগলাম চোখের জলে আমার বুক ভেসে যেতে লাগলো। আমার মনে হলো—একি স্বপ্ন ? না—স্বপ্ন হলে বেলপাতা আসবে কোথা হতে ? আর ঘরের দরজা যখন ভেতর হতে বন্ধ কি করে তখন অন্নের পক্ষে প্রবেশ করা সম্ভব হতে পারে ? মনে হল—অমি কি অন্নায় করলাম ! তখন বিদ্বপত্রে কি লেখা আছে, জানতে ব্যাকুল না হয়ে যিনি আমায় বিদ্বপত্রটি দিলেন, তাঁহাকে ধরলাম না কেন ?”

ঘটনাটির প্রকৃত তাৎপর্য না বুঝিয়া নলিনীকান্তের মন বড় চঞ্চল হইয়া উঠিল। ভাবিয়া চিন্তিয়া স্থির করিলেন, কাশীধামে বরং একবার যাইবেন। বহু সাধুমহাত্মা ও সিদ্ধপুরুষ সেখানে থাকেন, মন্ত্রপ্রাপ্তির রহস্য সেখানে হয়তো উদ্ঘাটিত হইতে পারিবে। তাই কাশীতেই প্রথমে ছুটিয়া গেলেন। কিন্তু কোথাও প্রশ্নের উত্তর মিলিল না।

উৎকণ্ঠার আবেগে একদিন স্থির করিলেন প্রাপ্ত মন্ত্র সম্বন্ধে প্রকৃত নির্দেশ কাহারো কাছে না পাইলে এ জীবন আর রাখিবে না। গঙ্গাগর্ভে ঝাঁপাইয়া পড়িয়া প্রাণ বিসর্জন দিবেন।

সেই দিনই গভীর নিশীথে তিনি এক বিচিত্র স্বপ্ন দেখিলেন। দিব্য লাবণ্যশ্রীমণ্ডিত এক ঋষিকল্প পুরুষ তাঁহাকে বলিতেছেন, “বৎস, তুমি দিগ্‌বিদিকে কোথায় গুরু খুঁজে হারান হচ্ছো ? তোমার গুরু তো তোমার দেশের নিকটেই রয়েছেন। বীরভূম জেলার তারাপীঠে তুমি যাও। সেখানে গিয়ে মহাতান্ত্রিক বামাক্ষেপার শরণাপন্ন হও অভীষ্ট লাভের পথ তিনিই দেবেন।”

এ স্বপ্নাদেশ নলিনীকান্তের হৃদয়ে অমৃত-প্রলেপ বুলাইয়া দিল। অবিলম্বে তারাপীঠে উপনীত হইয়া ক্ষেপার চরণোপান্তে তিনি উপবেশন করিলেন। তারামায়ের সিদ্ধসাধক বামার অমোঘ আশীর্ব্বাদ

স্বামী নিগমানন্দ

তাহার জীবনে রূপায়িত হইয়া উঠে। সমর্থ ভক্তসাধক স্বামী নিগমানন্দরূপে উত্তরকালে তিনি আত্মপ্রকাশ করেন।

নদীয়া জেলার মেহেরপুর মহকুমার অন্তর্গত কুতুবপুর। এক ধর্ম-পরায়ণ ও নিষ্ঠাবান ব্রাহ্মণরূপে ভুবনমোহন চট্টোপাধ্যায় এ গ্রামে পরিচিত ছিলেন। ইনিই নলিনীকান্তের পিতা। জননী মাণিকসুন্দরী ছিলেন মূর্ত্তিমতী করুণা। নিরাশ্রয়কে আশ্রয় ও নিরন্নকে অন্নদানে এই মহীয়সী নারীর উৎসাহের সীমা থাকিত না। সে অঞ্চলের সবাই জানিত, কুতুবপুরের ‘বামুন বাড়ীতে’ একবার উপস্থিত হইলে, এই করুণাময়ীর শরণ নিলে ছুই মুষ্টি অন্ন মিলিবেই।

১২৮৬ সালের বুলন পূর্ণিমা তিথি। চারিদিকে হরিধ্বনি ও আনন্দোচ্ছ্বাসের মধ্যে মাণিকসুন্দরীর অঙ্কে এক স্নদর্শন শিশু আবির্ভূত হয়। পিতামাতা আদর করিয়া নাম রাখেন নলিনীকান্ত।

বড় হইয়া প্রতিবেশীদের ঘরে ঘরে বালক সদাই দৌরাত্ম্য করিয়া ফিরে। কিন্তু বিড়ালয়ে গেলে দেখা যায় অশ্রু এক রূপ, তাহার মেধা বিস্মিত করে সবাইকে। পূর্বজন্মের সাত্ত্বিক সংস্কার বড় প্রবল—মাঝে মাঝে এগুলি তাহার জীবনের দ্বারে আসিয়া উকি দেয়, তাহাকে উচ্চকিত করিয়া তোলে।

নলিনীকান্ত তখন বালক। অন্তঃপুর হইতে একদিন সন্ধ্যাবেলায় সে চণ্ডীমণ্ডপে চলিয়াছে। হাতে একটি সাঁঝ-প্রদীপ, এইটি দিয়া দেখানে আলো জ্বলাইতে হইবে। সেদিন মণ্ডপে প্রবেশ করিবামাত্র এক দৃশ্য দেখিয়া সে কিন্তু হতবাক্ হইয়া যায়। অকস্মাৎ কি জানি কেন, মেজের উপর একস্থানে দপ. করিয়া খানিকটা আগুন জলিয়া উঠে, সঙ্গে সঙ্গেই এই অগ্নিমণ্ডলের মধ্যে আবির্ভূত হয় দশভুজার এক মূর্ত্তি। এ কি অদ্ভুত কাণ্ড? এ অলৌকিক দৃশ্য দেখিয়া বালক বিস্ময়ে বিহ্বল হয়। হাতের প্রদীপটি ভূতলে ফেলিয়া দিয়া দৌড়িয়া সে মায়ের কোলে আশ্রয় গ্রহণ করে।

এই বালক বয়সেই আর একদিন আসে তাহার এক বিচিত্র অভিজ্ঞতা। নলিনীকান্ত সেদিন শয্যায় শয়ন করিয়া আছে। গভীর নিশীথে হঠাৎ তাহার নিদ্রা ভাঙ্গিয়া যায়। সে চাহিয়া দেখে, শয়ন গৃহের সংলগ্ন ছাদটি চাঁদের আলোয় একেবারে ভরিয়া উঠিয়াছে। কি আশ্চর্য্য। আজ তো ঘোর অমাবস্তা রাত্রি, চাঁদ উঠিবার তো কথা নয়। বালক বিপরীত দিকে চাহিয়া দেখে, সেদিকও চন্দ্রালোকে উদ্ভাসিত। বারবার এদিকে ওদিকে দৃষ্টি সঞ্চালনের পর বিস্ময় তাহার একেবারে চরমে পৌছিল। একি! এ আলোক যে তাহারই নয়ন হইতে বিচ্ছুরিত হইতেছে।

যৌবনে পদার্পণের সঙ্গে সঙ্গে নলিনীকান্তের মধ্যে জাগ্রত হইয়া উঠে এক স্মৃতীক্ল নীতিবোধ ও পৌরুষ। সামাজিক কোন অশ্রায় বা অবিচার সহ্য করা তাঁহার পক্ষে কঠিন ছিল। ইহার ফলে মাঝে মাঝে নানা জটিলতার সৃষ্টিও হইত।

একবার নলিনীকান্ত কোন প্রতিবেশীর বাড়ীর সম্মুখ দিয়া চলিয়াছেন। বাহির হইতে এক বৃদ্ধার ক্রন্দন রব শুনিয়া তিনি তখনই অন্তঃপুরে ঢুকিয়া পড়িলেন। দেখিলেন, এক হৃদ্যন্ত তরুণী বধূ তাহার বৃদ্ধা শ্বশুরীকে ধরিয়া নির্বিবচারে প্রহার করিতেছে। নলিনীকান্ত সেখানে কোন ঔচিত্যবোধেরই ধার ধারিলেন না। বধূটিকে তখনই স্বহস্তে উপযুক্ত উত্তম-মধ্যম দিয়া সে গৃহ হইতে নিষ্কাশিত হইলেন।

ফলে এ সময়ে তাঁহার বিরুদ্ধে একটি ফৌজদারী মোকদ্দমা আনীত হয়। কিন্তু অপর পক্ষ তাহাদের নিজেদের ক্রটি বুঝিতে পারিয়া অবশেষে এই মামলা প্রত্যাহার করে।

সামাজিক অত্যাচার ও নানা গোঁড়ামীর বিরুদ্ধে নলিনীকান্ত এভাবে প্রায়ই ক্রিয়া দাড়াইতেন। এই ছেলেকে নিয়া তাই পিতার স্বস্তি ছিল না।

পুত্র বড় হইয়া উঠিয়াছে, এবার তাঁহার উপর সংসারের দায়িত্ব

চাপানো দরকার। ভুবনমোহন তাঁহার বিবাহের জন্ত উদ্যোগী হইলেন। সৎপাত্রীও সত্বরই মিলিল। সুরূপা সুলক্ষণা বধূ সুধাংশুবালাকে তিনি পরম সমাদরে গৃহে আনিলেন। নলিনীকান্তের বয়স এ সময়ে আঠারো বৎসর।

ওভারসিয়ারী পরীক্ষা পাশ করিবার পর তাঁহার চাকুরি-জীবন আরম্ভ হয়, এবং পরবর্ত্তীকালে রাসমণি এস্টেটের অধীনে তিনি এক কর্ম গ্রহণ করেন। এখানকার চাকুরিস্থল নারায়ণপুর হইতেই দেখা যায় তাঁহার অধ্যাত্মজীবনের সূচনা। প্রিয়তমা পত্নীর অশরীরী আবির্ভাব সেদিন যে আলোড়নের সৃষ্টি করে, অতীন্দ্রিয় রাজ্যের দ্বার উন্মোচনে তাহাই একদিন হইয়া উঠে পরম সহায়ক।

বামা ক্ষেপার সাধনস্থল তারাপীঠে নলিনীকান্ত উপস্থিত হইলেন। দ্বারকের তটে বালুকাময় মহাশ্মশান, চারিদিকে ইহার কঙ্কাল করোটি ইতস্ততঃ বিক্ষিপ্ত। অর্দ্ধদগ্ধ শবদেহ নিয়া চলিতেছে শকুনি ও শৃগালের অবিরাম কাড়াকাড়ি। অদূরে বশিষ্ঠের আরাধিতা তারাদেবীর মন্দির। নলিনীকান্ত ধীর পদবিক্ষেপে সোদকে অগ্রসর হইলেন।

মন্দিরের সম্মুখে করবী গাছের শাখাটি নোয়াইয়া কে এই উলঙ্গ অবধূত দণ্ডায়মান? দর্শনের সঙ্গে সঙ্গে কে যেন তাঁহার অন্তর হইতে অক্ষুটস্বরে ডাকিয়া বলিল—‘ওরে, ইনিই যে তোরা পথপ্রদর্শক—তারাপীঠের ভৈরব, বামা ক্ষেপা। তোরা জন্ত যে এতদিন ইনি প্রতীক্ষমাণ রয়েছেন।’

কাহাকেও আর কোন কিছু জিজ্ঞাসা করিবার তর সহিল না। উন্মত্তের মত নলিনীকান্ত নগ্ন অবধূতের সম্মুখে গিয়া তাঁহার চরণ দুইটি বক্ষে জড়াইয়া ধরিলেন। নয়নে তখন তাঁহার অব্যোম ধারে অশ্রুর বন্যা নামিয়াছে।

ভৈরবের মধ্যে ফুটিয়া উঠিয়াছে এক করুণাঘন রূপ। পরম স্নেহে হাতে ধরিয়া তিনি এই ভূপতিত আগন্তুককে উঠাইলেন। স্মৃষ্টাম

গুঁগোর কান্দি এই যুবক কে, কি সে চায়, মহাপুরুষের তাহা অজানা নয়। তাঁহার বৈরাগ্যের তীব্রতা বুঝিয়া নিতেও ক্ষেপার সেদিন ভুল হয় নাই। তবুও আয়ত আরক্ত নয়ন দুইটি তাঁহার দিকে নিবদ্ধ করিয়া ধীর কণ্ঠে কহিলেন, “ওরে, তুই কি চাস্ ?”

নলিনীকান্ত তাঁহার সমগ্র কাহিনীটি বিবৃতি করিলেন। কহিলেন, দয়াল ক্ষেপাবাবার নিকট তিনি কৃপার ভিখারী। দিব্য লক্ষণসমূহ এই স্তূর্দর্শন তরুণের সারা অঙ্গে বর্তমান—মুমুক্ষার সহজাত সংস্কার নিয়া সে জন্মিয়াছে, ইহা উপলব্ধি করিতে সর্বজ্ঞ ক্ষেপার দেবী হইল না। আশ্বস্ত করিয়া কহিলেন, “ওরে, আমার তারামায়ের মধ্যেই যে সব। তার দেখা পেলেই সব পাবি। পরম ভাগ্যবান তুই, তারামন্ত্র পেয়েছিস্। তুই মায়ের ছেলে, তোকে আমি সাধন শিখিয়ে দেব, ভাবিসনে।”

বামা ক্ষেপার সান্নিধ্যে কিছুদিন থাকিয়া নলিনীকান্ত তত্ত্বসাধনার নানা নিগূঢ় ক্রিয়া-পদ্ধতি আয়ত্ত করিলেন। তারপর নিশীথ রাত্রির এক নির্দিষ্ট শুভক্ষণে ক্ষেপা তাঁহাকে ইষ্ট দর্শনের জগ্ন তারাপীঠের মহাশ্মশানে বসাইয়া দিলেন।

চারিদিকে নিরঙ্ক অন্ধকার। শিমুল-শেওড়া-বুনোজামের ঘন অরণ্যে মাঝে মাঝে শুনা যায় শকুনি, গৃধিনী আর বাছড়ের ডানা ঝাপ্টানোর আতঙ্ককর শব্দ। কঙ্কাল, করোটি ও খর্পরের উপর শিবা সারমেয়ের পদধ্বনি উথিত হয়, খচ্-খচ্ শব্দে কাহারো যেন চতুর্দিকে নাচিয়া বেড়ায়। হি-হি-হি অটুহাস্তে সমগ্র শ্মশানভূমি প্রকম্পিত হইয়া উঠে। চারিদিকে কাহাদের যেন তপ্ত নিশ্বাস। একি অশরীরী না উয়াল স্বাপদ সরীসৃপের বিচরণক্ষেত্র !

মুদিতনেত্রে ধ্যানাসনে উপবিষ্ট হইয়া নলিনীকান্ত নিষ্ঠাভরে তারামন্ত্র জপ করিয়া চলিয়াছেন। মাঝে মাঝে যখনই তিনি উচ্চকিত হন, মন টলিয়া উঠিতে চায়, এমনি কানে আসিয়া পশে মহাসিদ্ধ

ক্ষেপাবাবার হুঙ্কার । তারা-তারা-তারা—উচ্চ আরাব এক অজস্র ঘণ্টার মত তাঁহার সমস্ত ভয় বিদূরিত করিয়া দেয় ।

একদিকে তারাপীঠ-ভৈরব বামার শক্তি সঞ্চার, অপরদিকে তরুণ সাধকের একনিষ্ঠ জপের ক্রিয়া । মহিমময়ী তারা মায়ের কৃপার ধারা সেদিন ঝরিয়া পড়িল ।

রাত্রির শেষ যামে ইষ্টদেবী তারা নবীন সাধকের সম্মুখে আবির্ভূতা হইলেন । নলিনীকান্ত নিজেই ইহার বিবরণ দিয়াছেন—

আমি দেখে বিস্মিত হলাম । বললাম, ‘তুমি কে ?’

সে উত্তর দিল, ‘আমি তোমার ইষ্টদেবী ।’

আবার প্রশ্ন করলাম—‘এ মূর্তিতে কেন ? এ মূর্তি তো আমার গুরুপদিষ্ট মূর্তি নয় !’

‘সে মূর্তি দেখলে তুমি ভয় পাবে, তাই ।’

কি সুন্দর সে মূর্তি ! দেবী অতঃপর বলিলেন,—‘বৎস, বর জও ।’

আর আমি কি বর চাইব ? আমার তো চাওয়ার কিছুই ছিল না, সেই মূর্তি দেখেই আমি মুগ্ধ হয়ে গিয়েছিলাম । তাই বললাম—‘যখন ইচ্ছে হবে, তখন যেন তোমাকে এই ভাবে দেখতে পাই ।’

‘আচ্ছা তাই হবে’—বলে তিনি তাতে সম্মতি জ্ঞাপন করিলেন । তারপর তাঁর স্বরূপ মূর্তি দেখতে চাইলে, শেষে ষাবার সময় তাঁর বিশ্বময় মূর্তি দেখিয়ে দিয়ে গেলেন । সেই মূর্তি দেখে ভয়ে বিস্ময়ে আনন্দে আমি অচেতন হয়ে পড়লাম । তারপর জ্ঞান হলে চেয়ে দেখি—আমি বামা ক্ষেপার কোলে —

ইষ্টদর্শনের পর নলিনীকান্ত তারাপীঠ শ্মশান হইতে প্রত্যাবর্তন করিলেন । এবার তিনি স্পর্শমণির ছোঁয়ায় রূপান্তরিত । এ অবস্থায় চাকুরি করা অথবা সংসারে বসবাস করার আর উপায় রহিল না । কয়েক মাসের মধ্যেই তাঁহাকে ব্যবহারিক জীবনের সমস্ত কিছু ত্যাগ করিতে হইল । কিন্তু ইষ্টদর্শনের পরেও যে তাঁহার অন্তরে শান্তি ও আনন্দ আসিতেছে না ! তাছাড়া, আত্মসাক্ষাৎকারই বা তাঁহার

হইল কই ? সাধক নলিনীকান্ত ব্যাকুলচিত্তে আবার তারাপীঠে ছুটিয়া আসিলেন । বামা ক্ষেপার চরণতলে পড়িয়া খেদোক্তি জানাইতে লাগিলেন, “বাবা, আমার প্রতি কৃপা কি হবে না ? আমি সিদ্ধকাম আছো হইনি । মনে হচ্ছে—আমি তো কিছু পেলাম না ।”

ক্ষেপাবাবা গর্জিয়া উঠিলেন, “আমি স্বচক্ষে দেখলাম, তোর কত কি হয়ে গেল । আর তুই শালা এখনো বল্ছিচ্ছিস্ তোর কিছুই মেলেনি ? হতভাগা, লক্ষ্মীছাড়া !”

পরদিন প্রভাতে ক্ষেপা তাঁহাকে কাছে ডাকিয়া কহিলেন, “ওরে, তুই সন্ন্যাস নে । আর একটা কথা সর্বদা মনে রাখিস, মা তোকে দিয়ে অনেক কিছু করাবেন ।”

সংসারত্যাগী হইয়া নলিনীকান্ত এবার গুরুর অশেষণে দিবারাত্র দূরদূরান্তে উদ্ভ্রান্তভাবে ঘুরিয়া বেড়ান । কোন কোন দিন একমুষ্টি আহাৰ্য্য হয়তো জুটে, কোনদিন কিছুটা কাদা ও একঘটি জল খাইয়াই দিন অতিবাহিত হয় । এমনি চরম কষ্টের মধ্য দিয়া কিছুকাল পরে তিনি আজমীড়ে উপস্থিত হন ।

শহরের প্রান্তে সাড়ম্বরে সেদিন এক ধর্ম্মসভা অনুষ্ঠিত হইতেছে । নলিনীকান্ত দূর হইতে দেখিলেন—দীর্ঘবপু, দিব্যকান্তি এক সন্ন্যাসী বেদীতে বসিয়া বেদান্ততত্ত্বের ব্যাখ্যা করিতেছেন । তাঁহার চারিদিকে বহুলোকের ভীড় । নিকটে আসিয়া এই মহাত্মার দিকে দৃষ্টি নিবদ্ধ করিতেই চমকিয়া উঠিলেন । এ কি ! এই তো তাঁহার সেই চিহ্নিত গুরুদেব, জ্যোতির্স্বয় মূর্তিতে আবির্ভূত হইয়া যিনি তাঁহাকে একাক্ষরী মন্ত্র দিয়া আসিয়াছিলেন । “চিনেছি চিনেছি—আমার গুরু পেয়েছি” বলিয়া ভাবাবিষ্ট নলিনীকান্ত তখনি ছুটিয়া গিয়া সন্ন্যাসীর চরণতলে পড়িলেন ।

ভূতলে পতিত, সঙ্বিৎহারা কে এই মুমুকু যুবক ? আচার্য্য সচ্চিদানন্দ পরমহংস একবার তাঁহার দিকে দৃষ্টিপাত করিয়া স্মিতহাস্তে সেদিনকার ধর্ম্মপ্রসঙ্গ বন্ধ করিলেন । নলিনীকান্তের বহুপ্রার্থিত

আশ্রয় অবশেষে মিলিল। ইহার পর কিছুদিনের মধ্যেই তিনি আচার্যদেবের সহিত পুষ্কর আশ্রমে আসিয়া উপস্থিত হইলেন।

সচ্চিদানন্দজীর আশ্রয়েই নলিনীকান্ত বাস করিতে থাকেন। আশ্রম জীবনের গোড়ার দিকটায় এই বৈদান্তিক সন্ন্যাসীর কাছে তাঁহাকে কম কঠোর পরীক্ষার সম্মুখীন হইতে হয় নাই। ধূনির কাঠ সংগ্রহ ও কাঠ চেলাই হইতে শুরু করিয়া গরুর পরিচর্যা, ঘাস কাটা, আশ্রমিকদের রন্ধন ও বিগ্রহের পূজা প্রভৃতি অনেক কাজই তাঁহাকে করিতে হইত। ইহার উপর ছিল সচ্চিদানন্দ সরস্বতীর অশ্লীল গালাগালি ও গঞ্জন। কোথাও সামান্যমাত্র ক্রটি দেখিলেই তিনি সঙ্গে সঙ্গে গজ্জিয়া উঠিতেন—“শালা ভোগী, বাপ-মাকে ছেড়ে এখানে সুখ করতে এসেছ!”

কঠোর জীবনে নলিনীকান্ত একেবারেই অনভ্যস্ত। এক একদিন তাঁহার মনে হয়—নাঃ আর নয়, এখান হইতে পলাইয়া যেকিছু ছুই চক্ষু যায় সেদিকেই চলিয়া যাইবেন।

এ সময়ে প্রবীণ গুরুভাই ব্রহ্মানন্দজী তাঁহাকে নানারূপ প্রবোধ বাক্যে শান্ত করিতে থাকেন। বারবার তিনি বুঝান, “দেখ ভাই, সন্ন্যাস নিতে এখানে তুমি এসেছ, এ হচ্ছে জীবনের অবসান ঘটানো। গুরুদেবের এত কিছু শাসন ও তিরস্কার সব কিছুই উদ্দেশ্য তাই। নির্ঘাতন ও কঠোর পরীক্ষার মধ্য দিয়ে, মান-অভিমানের সংস্কার সমূলে উৎপাটন করতেই তিনি চাচ্ছেন। আরো কিছুদিন সহ্য করে চলো, তখন বুঝতে পারবে গুরুজী কি গভীরভাবে ভালোবাসতে পারেন।”

ঠিকই তাই। নলিনীকান্ত দেখিলেন, আশ্রম জীবনের কঠোরতায় যত বেশী তিনি অভ্যস্ত হইয়া উঠিতেছেন, সচ্চিদানন্দজীর রুক্ষতা ততই কমিয়া যাইতেছে। পূর্বেরকার সে রুদ্রমূর্তি আর নাই, ক্রমেই তাহা কমণীয় হইয়া উঠিতেছে। কদর্য ভাষা প্রয়োগ এখন তিনি কমই করেন। সাধনকামী তরুণ শিষ্যকে লাঞ্ছিত করার মনোভাবও আর

সেই ব্যক্তি না। সন্ন্যাসীর করুণাময় ও কল্যাণময় রূপটিই প্রধানতঃ এক আশ্বস্তিকারক করিতেছে।

এ শব্দ বৈদান্তিককে নলিনীকান্ত কিন্তু ক্রমে ক্রমে বড় নিবিড়ভাবে ভালবাসিয়া ফেলিলেন। তিনি উত্তরকালে বলিতেন, “আমি সচ্চিদানন্দকে বড় ভালবেসেছিলাম। তিনি আমাকে ভালবাসতেন, তাই তাঁর অকথ্য অত্যাচারও অনেক সহ্য করতাম। শিষ্যদের ভেতর আমি ছিলাম ব্রহ্মচারী। কাজেই আশ্রম জীবনের শেষের দিকে প্রায়ই আমাকেই রান্না করতে হতো। একদিন উরুনে হাঁড়ি চাপিয়ে দিয়ে অন্তরাল থেকে আমি তাঁর ব্রহ্মজ্যোতি বিভাসিত মুখের দিকে নির্নিমেষে তাকিয়ে বসে আছি, রান্নার কথা মনেই নেই। এদিকে ভাত পুড়ে গন্ধ বার হয়ে গিয়েছে। তারপরই চললো গুরুজীর তিরস্কার। আমি আর তাঁকে মুখে কিছু বললাম না, শুধু মনে মনে বললাম—ওগো তুমি যদি জানতে কেন আজ ভাত পুড়ে গেল !... ঠাকুর যেমন আমায় অকথ্য ভাষায় গাল দিতেন, তেমনি আবার খুব আদরও করতেন। এমন ব্রহ্মজ্ঞানী বৈদান্তিক, জ্ঞান-সাধনায় সিদ্ধপুরুষ আর দেখলাম না।”

স্বামী সচ্চিদানন্দ সরস্বতীর আশ্রমে এক নারায়ণ মূর্তি প্রতিষ্ঠিত ছিল। এক এক সময়ে তাঁহার সেবা পূজার ভার নলিনীকান্তের উপর আসিয়া পড়িত। কিন্তু তরুণ সাধক তখন বেদান্ত পাঠ ও তত্ত্ব-বিচারে আকণ্ঠ নিমগ্ন। দেব-বিগ্রহের প্রতি তাঁহার তেমন ভক্তি-বিশ্বাস নাই। রোজ পূজার ঘরে গিয়া দুই চারটি পুষ্প নিবেদন করিয়া কোনমতে কাজ সমাধা করিয়া আসিতেন।

শিষ্যের এই মনোভাব কিন্তু গুরু মহারাজের দৃষ্টি এড়ায় নাই। একদিন তাঁহাকে নিকটে ডাকিয়া প্রশ্ন করিলেন, “ও কিরে ? তুমি কি যেমন-তেমন করে, তাচ্ছিল্যের ভাব নিয়ে ঠাকুরের পূজা করিস্ নাকি ?

নলিনীকান্ত উত্তর দিলেন, “ও আবার পূজার বস্তু কি, এতো নিষ্প্রাণ—শুধু একটা ধাতুমূর্তি।”

সচ্চিদানন্দ স্বামী ভৎসনা করিতে করিতে সেখান হইতে চলিয়া গেলেন। নলিনীকান্তের অভিমানও কম নয়, তিনি ধাতুময় বিগ্রহটিকে আসন হইতে নামাইয়া আনিয়া তখনি উহার গাঙ্গে কষিয়া এক চপেটাঘাত করিলেন। তারপর ক্রুদ্ধ স্বরে আপন মনে কহিতে লাগিলেন “তোমার কণ্ঠই তো মহারাজের এত তিরস্কার আজ আমায় সহ্য করতে হলো।”

কিছুক্ষণ পরেই সচ্চিদানন্দ মহারাজের সহিত তাঁহার সাক্ষাৎ। তিনি স্মিতহাস্তে বলিয়া উঠিলেন, “তুই না বলেছিলি, বিগ্রহের প্রাণ নেই, তবে তখন অত কথা বলছিলি কার সঙ্গে?” বুঝা গেল, সর্বজ্ঞ গুরুর দিব্যদৃষ্টির সম্মুখে কোন কিছুই অজানা থাকে না। উভয়ের কথাবার্তা শুনিয়া আশ্রমিকগণ হাসিতে লাগিলেন।

নানা পরীক্ষা ও কঠোর শাসনের পর গুরু মহারাজ ক্রমে কোমল হইয়া উঠিয়াছেন। নলিনীকান্তও মাঝে মাঝে নিজের স্নেহের দাবি নিয়া তাঁহার সম্মুখে উপস্থিত হইতে ছাড়েন না। একদিন তিনি সাহস সঞ্চয় করিয়া দীক্ষার কথাটি পাড়িলেন।

স্বামীজী কিন্তু বলিয়া বসিলেন, পিতামাতার অনুমতি না নিয়া আসিলে তিনি তাঁহাকে দীক্ষা দিবেন না।

নলিনীকান্ত এবার প্রমাদ গণিলেন। তবুও সাহসে ভর করিয়া প্রতিবাদ জানাইয়া কহিলেন, “এ আপনার কি রকম কথা, মহারাজ? কোন্ পিতামাতা সহজ স্বাভাবিকভাবে পুত্রকে সংসার ত্যাগের অনুমতি দেয়? স্বয়ং ব্যাসদেবও শূকের সম্মুখে অনুমতি দিতে চাননি। আচার্য্য শঙ্করকে চতুরতা করেই মাতার কাছ থেকে অনুমতি আদায় করতে হয়েছিল। শাস্ত্রের বিধানের কথা আমি জানিনে, কিন্তু এসব নজীরের গুরুত্ব কোন অংশে কম?”

সচ্চিদানন্দ সরস্বতী স্মিতহাস্তে উত্তর দিলেন, “আরে তুমি

বচনসে কোই নহী সাকোগা ! আচ্ছা যাও, তুমহারা দীকৃষা ইহা মিল্ জায়গা ।”

কিছুদিন মধ্যে নলিনীকান্তের সন্ন্যাসদীক্ষা হইয়া গেল । নূতন নামকরণ হইল নিগমানন্দ সরস্বতী । ভগবৎ কৃপায় তাঁহার বহুদিনের আশা এবার পূর্ণ হইয়াছে, আনন্দে তিনি আত্মহারা হইয়া গেলেন ।

আশ্রমে বাস করার কালে সচ্চিদানন্দজীব পূর্ব্বাশ্রমেও নানা কাহিনী নিগমানন্দ এদময়ে শ্রবণ করিতেন । উত্তরকালে নিজ ভক্তদের নিকট তাঁহাকে ইহা বিবৃত করিতে দেখা যাইত ।

—বহুদিন পূর্ব্বের কথা । কাবুলের আমীর দোস্ত মহম্মদ খাঁর সহিত ইংরেজ সরকারের তখন সংঘর্ষ বাধিয়াছে । হার্ড অকল্যাণের নেতৃত্বে ব্রিটিশ ভারতের সেনাবাহিনী যুদ্ধরত । সেদিন পেশোয়ারের অদূরে এক সেনাদলের ছাউনী পড়িয়াছে । চারিদিকেই মতর্ক পাহারা ও প্রতিরক্ষার ব্যবস্থা । জনৈক দেশীয় হাবিলদার হঠাৎ একদিন দূর হইতে দেখিতে পায়, নিকটস্থ পাহাড়ের এক গুহা হইতে বারংবার একটি আলোকবস্ত্তিকা আন্দোলিত হইতেছে ।

কে এই দুজ্জৈয় ব্যক্তি ? কি উদ্দেশ্য তাহার এ বিচিত্র আলোক-সঙ্কেতেব ? সমগ্র ছাউনীতে চাঞ্চল্য পড়িয়া গেল । অস্ত্রগস্ত্রে সজ্জিত হইয়া হাবিলদারটি তাহার কাপ্তান ও কয়েকজন সঙ্গীসহ ঐ আলোকের অনুসন্ধানে বাহির হইল । অনেক খুঁজিয়াও এই রহস্যময় আলো বা গুপ্ত সঙ্কেতকারীর কোন সন্ধান পাওয়া গেল না ।

অতঃপর উৎসাহী হাবিলদারটি একাই বন্দুক ঘাড়ে করিয়া একদিন ইহার উদ্দেশ্যে বাহিব হইয়া পড়ে ।

আলোক লক্ষ্য করিয়া কেবলি সে অগ্রসর হইয়া চলিয়াছে । কয়েকটি পাহাড়ের চূড়া অতিক্রম করিয়া অবশেষে এক উচ্চ পর্ব্বতের গুহার কাছে আসিয়া সে থমকিয়া দাড়াইল । সম্মুখে এক শীর্ণকায় বৃদ্ধ সাধু । লগ্নন হস্তে নীরবে তিনি বসিয়া আছেন ।

হাবিলদারকে দেখিয়াই সাধু বলিতে লাগিলেন, “এসো বেটা ! তোমার প্রতীক্ষায়ই যে আমি এখানে বসে আছি, জরাগ্রস্ত মরদেহটি ত্যাগ করিতে পারিনি। তোমায় এ পর্বতগুহায় আনবার জন্যই প্রতিদিন আমি বারাবার এই আলোক সঙ্কেত পাঠাচ্ছিলাম। অবশেষে এবার তুমি এসে পড়েছ। বাচ্চা, আমার এ আসন তোমাকেই গ্রহণ করতে হবে। সৈনিকবৃত্তি আজ এখনি ত্যাগ করে তোমায় নিতে হবে সন্ন্যাস-দীক্ষা।”

পর্বত গুহার এ প্রাচীন সাধুটি ছিলেন এক বৈদান্তিক, আত্মজ্ঞানী মহাপুরুষ। এই মহাত্মার আশ্রয় গ্রহণ করিয়া হাবিলদারের জীবনে অধ্যাত্মরসের প্রবাহটি উন্মুক্ত হয়, এক নূতন মানুষে সে রূপান্তরিত হইয়া উঠে। সেদিনকার এ ভাগ্যবান সৈনিকই উত্তরকালের স্বামী সচ্চিদানন্দ সরস্বতী—নিগমানন্দের দীক্ষাগুরু।

সন্ন্যাস গ্রহণের কিছুদিন পর গুরুজীর নির্দেশে নিগমানন্দ তীর্থ পরিক্রমায় বাহির হন। প্রথম পর্য্যায়ে বদরিকাশ্রম ও মানস সরোবর প্রভৃতি ভ্রমণকালে সচ্চিদানন্দ মহারাজ স্বয়ং তাঁহার সঙ্গে ছিলেন। এই সময়কার কিছু কিছু অলৌকিক অভিজ্ঞতার কথা নিগমানন্দজীর বর্ণনায় পাওয়া যায়।

একদিন মানস সরোবরের নয়নাভিরাম দৃশ্য দেখিয়া নিগমানন্দজী বিস্ময়বিমুক্ত হইয়া চাহিয়া আছেন। হঠাৎ তাঁর দৃষ্টিসমক্ষে এক অপ্রাকৃত দৃশ্য উদ্ঘাটিত হইল। তিনি দেখিলেন, হৃদের এক কোণে যেন অপরূপ রূপের মেলা বসিয়া গিয়াছে। আনন্দ-চঞ্চল একদল পরমাসুন্দরী তরুণী সেখানে জলবিহারে রত।

নিগমানন্দ কোতূহলভরে গুরুজীকে প্রশ্ন করিলেন, “মহারাজ, ইয়ে কঁওন সব্ আশ্রান করতে হেঁ?”

সচ্চিদানন্দ স্বামী উত্তর দিলেন, “আরে, তুম্হারা আঁখ তো খুল্ গিয়া! দেখলেও, অণ্ডর ভি বহুত দেখনেকো চীজ্ ছায়। ইয়ে সব তো অঙ্গরা ছায়।”

একবার পথমধ্যে তাঁহারা একটি অতিকায় সর্পের সাক্ষাৎ পান।
তখন কুণ্ডলী পাকাইয়া পরম নিশ্চিন্তে সেখানে অবস্থান
করিতেছে। সাধুসন্তের দল তখন সর্পটিকে আটা ময়দা খাওয়াইতে
ব্যস্ত, আর সে কিন্তু নিতান্ত নির্বিকার ও উদাসভাবে তাকাইয়া
আছে—হিংসার লেশ মাত্র নাই।

সর্পটির এ শান্ত স্বভাব ও আচরণ সম্বন্ধে নিগমানন্দ প্রশ্ন করিলে
সচ্চিদানন্দজী উত্তর দিলেন, “আরে বাচ্চা, তুমি ক’য়া দেখোগে, আর
স্নায়ু ভি ক’য়া বলুঙ্গা?—ইয়ে তো পরমহংস হো গিয়া।”

গুরুজীর কথা শুনিয়া নবীন সাধক নিগমানন্দের বিষয় সেদিন
চরমে প্রৌঢ়িয়াছিল।

এই পর্য্যটনের সময়ে সচ্চিদানন্দ মহাবাজ শিষ্যকে এক প্রসিদ্ধ
সন্ন্যাসী মোহান্তের সঙ্গে পরিচিত করিয়া দেন। গৌরী মাতাজী
নামে ইনি প্রসিদ্ধ, হিমালয়ের অরণ্যঞ্চল এক নিভৃত স্থানে হাঁহার
আশ্রম। সাধুসন্তদের মধ্যে সে সময়ে এই মাতাজীর খুব প্রতিষ্ঠা
ছিল। নিগমানন্দের দিকে দৃষ্টিপাত করিয়া ইনি সেদিন সচ্চিদানন্দ
সরস্বতীকে বলিয়াছিলেন, “তোমার এ চেলা উচ্চতর সাধনার স্তরে
এসে গেলে, আমার কাছে একবার পাঠিয়ে দিও।”

উত্তরাখণ্ড ভ্রমণের পর সচ্চিদানন্দ মহারাজ পুষ্কর আশ্রমে
ফিরিয়া আসিলেন। পরিত্রাজক নিগমানন্দকে এবার একাকীই
গুরুর নির্দেশে অপর ধামগুলি দর্শনের জন্য যাত্রা করিতে হইল।
এই সময়ে দ্বারকা, রামেশ্বর, ত্রীক্ষেত্র ও আরও বহুতর তীর্থে তিনি
উপনীত হন এবং এই পরিভ্রমণের সময়ে জীবনের বহুতর অভিজ্ঞতা
তাঁহার লাভ হয়। উত্তরকালে এ সময়কার নানা বিচিত্র ঘটনার
উল্লেখ তিনি শিষ্যদের নিকট করিতেন।

একবার তিনি কিছুদিনের জন্য দ্বারকার সারদা মঠে অবস্থান
করিতেছেন। এই মঠে সে সময়ে কোন মোহান্ত নাই, এক প্রাচীনা

সন্ন্যাসিনীর উপর পরিচালনার সমস্ত কিছু তার পতিত হইয়াছে। এ বৃদ্ধা কিন্তু অল্পকাল মধ্যে নিগমানন্দকে বড় স্নেহের চক্ষে দেখিয়া ফেলিলেন। তিনিও তাঁহাকে মা বলিয়া সম্বোধন করিতেছেন।

এ ঘনিষ্ঠতা বৃদ্ধি পাইবার সঙ্গে সঙ্গে বৃদ্ধা স্থির করিলেন, সাধন-নিষ্ঠ ও প্রিয়দর্শন এই তরুণ সন্ন্যাসীকেই তাঁহার সকলে মিলিয়া মঠের মোহান্ত পদে বসাইয়া দিবেন। আদরযত্নে নিগমানন্দের দিনগুলি এখানে তখন বেশ আরামেই কাটিতেছে।

ইতিমধ্যে হঠাৎ একদিন এই মঠে ত্রিশূলধারিণী এক ভৈরবীর আবির্ভাব হয়, রমণী পরমাসুন্দরী ও পূর্ণযৌবনা, শাস্ত্রাদিতেও তাঁহার পারদর্শিতা যথেষ্ট। তাছাড়া, জানা গেল, তিনি সম্রাস্ত বাঙালী ঘরের কন্যা, পূর্ববাশ্রমের নিবাস যশোহর জেলায়।

প্রিয়দর্শন নিগমানন্দের সহিত প্রথম সাক্ষাতের পরই তিনি তাঁহার প্রতি অত্যন্ত বেশী আকৃষ্ট হইয়া পড়িলেন ইহার পর ক্রমেই এ মঠে তাঁহার গত্যাত বাড়িতে থাকে। তাঁহার দিকে নিগমানন্দজীকেও এসময়ে বেশ কিছু ঝুঁকিতে দেখা যায়।

ভৈরবী নিগমানন্দকে প্রায়ই বুঝান, তত্ত্বমন্ত্রে তাহাদের শৈববিবাহ অনায়াসে সম্পন্ন হইতে পারে। এ সম্বন্ধে বারবার নানাভাবে তিনি তাঁহাকে প্রলুব্ধ করিতেও থাকেন।

তরুণ সাধক ইতিমধ্যে অনেকটা নরম হইয়া উঠিয়াছে। মনে মনে ভাবিতে লাগিলেন, এ প্রস্তাব মন্দই বা কি? বৃদ্ধা সন্ন্যাসিনী তো তাঁহাকে মঠের মোহান্ত মনোনীত করিয়াই ফেলিয়াছেন। এবার এই তরুণী ভৈরবীকে বিবাহ করিয়া নূতনভাবে ধর্ম্যাচরণ করাতেই বা ক্ষতি কি? অতঃপর একদিন শৈববিবাহের শুভ দিন পাকাপকিতাবে স্থির হইয়া গেল।

বিবাহের পূর্বদিন গভীর রাত্ৰিতে নিগমানন্দ এক স্বপ্ন দেখিলেন। —ভৈরবীর সহিত তাঁহার বিবাহ মহা আড়ম্বরে অনুষ্ঠিত হইতেছে। এ আনন্দোৎসবের মধ্যে রূপসী তরুণী মনোরম বেশে সজ্জিত হইয়া

তাঁহার পাশে আসিয়া বসিয়াছেন। কিন্তু অকস্মাৎ এক হৃদপতন
ঘটিয়া গেল। স্বপ্নজড়িত অবস্থায়ই তিনি শুনিতে পাইলেন, অদূরে
কাহার এক ভারী চিমটার শব্দ। চমকিয়া উঠিলেন। একি! এ যে
গুরুমহারাজ সচ্চিদানন্দজীর সাড়ে-চার-সের ওজনের সেই চিমটার
চিরপরিচিত শব্দ। সঙ্গে সঙ্গেই তাকাইয়া দেখিলেন, তাঁহার পার্শ্বে
উপবিষ্ট। নববধু ভৈরবীর সারা দেহটি একতাল মাখনের মত গলিয়া
গলিয়া মাটিতে পড়িতেছে। ইহার পর অবশিষ্ট রহিল শুধু তাহার
দেহের কঙ্কাল-করোটি। কিছুক্ষণ পরে দেখা গেল, এই কঙ্কালময়
যুবতীই প্রেমভরে বাহু প্রসারিয়া নিগমানন্দজীকে আলিঙ্গন করিতে
আসিতেছে।

এ কি বীভৎস দৃশ্য! নিগমানন্দের নিদ্রা তৎক্ষণাৎ টুটিয়া গেল।
বলা বাহুল্য, সঙ্গে সঙ্গে তাঁহার জ্ঞাননেত্রও সেদিন উন্মীলিত হয়।
দ্রুতবেগে আপন লোটাকম্বল হাতে নিয়া তিনি মঠের দ্বারের দিকে
ধাবিত হন।

বৃদ্ধা সন্ন্যাসিনী তাঁহাকে কিছুতেই ছাড়িবেন না, ত্রস্তব্যস্তে
আসিয়া তিনি পথরোধ করিয়া দাঁড়ান। কিন্তু বাধা দেওয়া সম্ভব হইল
না, তাঁহাকে ধাক্কা দিয়া সরাইয়া নিগমানন্দ ছুটিয়া বাহির হইলেন।

সন্ন্যাসী জীবনের চরম বিপদটি গুরুকৃপার বলে সেদিন এমনি
অদ্ভুতভাবে কাটিয়া গেল। নিগমানন্দজী বলিতেন, “সদগুরু অনেক
সময়ে স্বপ্নের ভেতর দিয়েই আশ্রিত শিষ্যকে দিক নির্দেশ করে দেন
-- প্রকৃত কল্যাণের পথে চালিত করেন।”

তীর্থ ভ্রমণের পর নিগমানন্দজী গুরুর আশ্রমে ফিরিয়া আসেন।
এসময়ে গুরু সচ্চিদানন্দ মহারাজ একদিন তাঁহাকে সন্মুখে ডাকিয়া
বলেন, “বেটা, আমার কাছ থেকে যা হবার তা তোর হয়ে গিয়েছে।
তোকে এবার যোগসিদ্ধ গুরুর কাছে যেতে হবে, তবে তোর সাধনা
পূর্ণ হয়ে উঠবে।”

শ্রীমতী নিগমানন্দ

নিগমানন্দের নয়ন দুইটি অশ্রুতে ভরিয়া উঠিল। পরমাশ্রয়ী যোগী গুরু সচিদানন্দজীকে আজ ছাড়িয়া যাওয়া বড় মর্শ্বাস্তিক। আবার তাঁহার প্রদত্ত নির্দেশই বা তিনি অমান্য করেন কিরূপে? কে সেই সৈশ্বর-নির্দিষ্ট যোগীগুরু। কোথায় তাঁহার সন্ধান মিলিবে? এসব কথা ভাবিয়া তিনি বড় চঞ্চল হইলেন।

সচিদানন্দ মহারাজ আশ্বাস দিয়া কহিলেন, “ঘাবড়াও মৎ, বেটা, তুম্হারা যোগীগুরু জরুর মিল্ জায়গা, বহৎ তুরন্ত্ মিল্ জায়গা।”

আবার নূতন করিয়া আরম্ভ হইল নিগমানন্দের পরিভ্রমণ। এবার তাঁহার লক্ষ্য—যোগীগুরুব সন্ধান লাভ, আর অধ্যাত্মসাধনার পূর্ণতম চরিতার্থতা সাধন। গহন অরণ্য ও পর্বত প্রান্তর দিয়া দিনের পর দিন তিনি অগ্রসর হইয়া চলিয়াছেন। তীব্র শীতাতপ মাথার উপর দিয়া চলিয়া যায়, অনাহারে অনিদ্রায় চরম কষ্টের মধ্যে তাঁহাকে দিনের পর দিন এ সময়ে কাটাইতে হয়।

একবার বাজপুতনার অন্তর্গত কোটা রাজ্যের এক অরণ্য অঞ্চল দিয়া নিগমানন্দ শ্রীমতী পথ চলিয়াছেন। সন্ধ্যার অন্ধকার ধীরে ধীরে ঘনাইয়া আসিতেছে। ক্ষুৎপিপাসায় তিনি তখন অত্যন্ত কাতর। হঠাৎ এক অপরিচিতা পথচারিণী তাঁহার নাম ধবিয়া ডাকিয়া উঠিল। নিকটে আসিয়া কহিল, “দেখছি, তুমি ক্ষুধাতৃষ্ণায় বড় কাতর হয়েছো। আরও আধ মাইল পথ এগিয়ে যাও, সামনেই একটি ছোট কুটির দেখতে পাবে। সেখানেই আজ বিশ্রাম নাও।”

কিছুদূর অগ্রসর হইবার পর অরণ্যাবাসটি দৃষ্টিগোচর হইল। এক রূপসী রমণী এই বিজন কুটিরে বাস করিতেছেন। নিগমানন্দ পরে জানিয়াছিলেন, ইনি এক যোগসিদ্ধা সাধিকা। এ গভীর ছরধিগম্য বনে তাঁহাকে একাকিনী বাস করিতে দেখিয়া তাঁহার বিস্ময়ের সীমা রহিল না।

আহার ও বিশ্রামের পর কথাপ্রসঙ্গে তিনি জানিলেন, অপরূপ তারুণ্য-শ্রীমতি—এই নারীর বয়স প্রকৃতপক্ষে ষাটেরও অধিক।

শক্তিধর যোগীশ্বর নিকট দীক্ষাগ্রাভ করার পর দীর্ঘকাল ইনি সাধনায় ব্রতী রহিয়াছেন।

যোগিনী তাঁহাকে কহিলেন, “জাখো তুনি আর এখানে সেখানে বেশী ঘুরো না। এখন কোলকাতায় ফিরে যাও। অচিরে তোমার জীবনে আবির্ভূত হবেন আকাঙ্ক্ষিত যোগীশ্বর।”

নিগমানন্দ মনে মনে ভাবিতেছেন, আবার সূদূর কলিকাতায় তাঁহাকে ফিরিতে হইবে? কিন্তু হাতে যে একটি পয়সাও নাই।

যোগিনী যেন সর্বজ্ঞা। তাঁহার মুখের দিকে তাকাইয়া বসিলেন “ওঃ তুমি টিকিটের টাকার কথা ভাবছো? সেজন্তে ছশ্চিন্তার কো-কারণ নেই। সব ঠিক হয়ে যাবে।”

পরদিন দুর্গম অরণ্যের মধ্য দিয়া বমণী তাঁহাকে পথ দেখাইয়া নিয়া চলিলেন। অনতিদূরেই এক রেল স্টেশন। নিগমানন্দের হস্তে টিকিট ক্রয়ের জন্তে কিছু পরিমান টাকা গুঁজিয়া দিয়া তিনি বলিলেন, “ঐ রেল স্টেশন দেখা যাচ্ছে, টিকিট কেটে কোলকাতার দিকে এবার রওনা হয়ে পড়।”

এই বহুমুখী যোগসিদ্ধা নারী সম্বন্ধে নিগমানন্দজী বলিয়াছেন “স্টেশনের কাছে এসে হঠাৎ ফিরে দেখি তিনি আর নেই। তাঁর এই আকস্মিক অন্তর্দানে মন যেন কেমন হয়ে গেল। মনে হলো—কি সর্বনাশ। তাঁর মত যোগসিদ্ধা ভৈরবীকে হাতে পেয়েও ছেড়ে দিলাম। তৎক্ষণাৎ আমি ছুটলাম সেই জঙ্গলের দিকে। গিয়ে দেখি সেই কুটিরও নেই, মেয়েটিও নেই। সবই যেন যাদুমন্ত্রবলে কোথায় উড়ে গিয়েছে! তন্ন তন্ন করে খুঁজলাম, কিন্তু সবই নিষ্ফল। আমি স্তম্ভিত হয়ে গেলাম। কে সেই মেয়ে?”

কলিকাতায় পৌঁছবার পর নিগমানন্দ একদল তীর্থযাত্রীর সঙ্গে আসামের দিকে রওনা হন। এখানে পৌঁছিয়া কামাখ্যা ও পরশুরাম তীর্থ দর্শনের পর তিনি কিছুকাল একাকী পার্বত্য অঞ্চলে পরিভ্রমণ করিতে থাকেন।

পাহাড়ী বস্ত্রী ও অরণ্য অঞ্চল দিয়া স্বামী নিগমানন্দ এবার মনের আনন্দে অগ্রসর হইতে থাকেন। একদিন তিনি তাঁহার পথ হারাইয়া ফেলিলেন। ক্রমে রাত্রি নামিয়া আসিল, ঘন অন্ধকারে পথ চলা কঠিন। অরণ্য মধ্যস্থিত এক বিপুলকায বৃক্ষের কোটরে তরুণ সাধক সে রাত্রির মত আশ্রয় গ্রহণ করিলেন।

ভোরের আলো সবেমাত্র ফুটিয়া উঠিতেছে। বৃক্ষকোটর হইতে নীচে দৃষ্টিপাত করিয়া তাঁহার বিস্ময়ের সীমা বহিল না। দেখিলেন এক গৌরবাস্তি দীর্ঘাকৃতি সন্ন্যাসী বৃক্ষতলে বসিয়া আছেন। একরাশ শুষ্কপত্র তাঁহার সম্মুখে ধূনীর মত জ্বলিতেছে। তিনি তাঁহার গাঁজা সাজিতে তখন নিতান্ত ব্যস্ত। ভয়, বিস্ময় ও কৌতূহল নিয়া নিগমানন্দ নীচে অবতরণ করিলেন।

সম্মুখে আসিয়া দাঁড়ানোর পবও কিন্তু সন্ন্যাসীর কোন ভ্রক্ষেপ নাই। নীরবে গাঁজার কল্কেতে কয়েকটি টান দিলেন, গম্ভীরভাবে হস্ত প্রসাবিত করিয়া নিগমানন্দজীব সম্মুখে ধরিলেন। গাঁজা খাওয়া নিগমানন্দের অভ্যাস নাই, কিন্তু প্রত্যাখ্যান করিতেও সাহস কুলাইল না। কোনমতে দুই-একটি টান দিয়া কল্কেটি আবাব তাঁহার হাতে ফিরাইয়া দিলেন।

সম্মুখে আগুন নিভাইয়া সন্ন্যাসী এবার উঠিয়া দাঁড়াইলেন। ইঙ্গিতে জানাইলেন, 'কোন বাক্যব্যয় না করে এখনি আমায় অনুসরণ কর।' দুর্ব্বার এই অপরিচিত সন্ন্যাসীর আকর্ষণ। মন্ত্রমুগ্ধের মত তাঁহার পশ্চাতে চলা ছাড়া নিগমানন্দের গত্যন্তর রহিল না।

মনে তাঁহার নানা আশঙ্কাও যে না হইতেছে তাহাও নয়। এক একবার ভাবিতেছেন, এটা বন্ধিমচন্দ্রের কপালকুণ্ডলার মত ব্যাপার নয় তো? কাপালিক নবকুমারকে হত্যা করিতে চাহিয়াছিল—এই সন্ন্যাসীর অভিসন্ধিও তেমনি কি না কে জানে? কিন্তু কি আশ্চর্য, নিগমানন্দের দিকে একটিবার চাহিয়াও দেখিতেছেন না। তাঁহার অবস্থান ও পলায়ন দুই-ই যেন সন্ন্যাসীর নিকট সমান।

কিছুক্ষণ পথ চলিবার পর সন্ন্যাসী একটি ক্ষুদ্র পাহাড়ের সম্মুখে গিয়া থামিলেন। উহার নীচেই একটি পার্বত্য ঝরনা কলু কলু রবে বহিয়া যাইতেছে। স্বামী নিগমানন্দ তৎকালীন ঘটনার এক মনোজ্ঞ বর্ণনা দিয়াছেন—

“এখানে এসে সে আমার দিকে তাকাল। কি সুন্দর মূর্তি! উজ্জল গৌরবর্ণ, বিশাল বক্ষঃস্থল, প্রশস্ত ~~মুণ্ড~~, ~~মুণ্ড~~ বাঁকড়া বাঁকড়া চুল, লম্বা আকর্ষণবিশিষ্ট চোখ, চোখেমুখে যেন জ্যোতির ছটা বেরুচ্ছে। দেখে বিস্মিত ও আনন্দিত হলাম।

“মন-প্রাণ ভক্তিতে আগ্নুত হয়ে গেল। কখন জানি না কেমন করে আপনা হতে শরীর তাঁর চরণে লুটিয়ে পড়লো।... তিনি আমায় সম্মুখে হাত ধরে উঠিয়ে, মধুর প্রাণ-গলানো স্বরে বললেন, ‘বৎস, সহসা রাত্রি শেষে আমাকে গাছতলায় দেখে, আর তোমাকে আমার সঙ্গে আসতে বলায়—বোধ হয় আশ্চর্য্যাব্বিত হয়েছ, ভয় পেয়েছ। আমি কিন্তু আগেই জেনেছিলাম তুমি কে, কি জন্ম ঘুরছো, তোমার অভাব কি,—কি জন্ম গাছের ওপরে ছিলে। আমার কাছেই তোমার মনোবাসনা সিদ্ধ হবে। তাই তোমাকে নিয়ে আসবার জন্ম আমি ঐ গাছতলায় গিয়ে বসেছিলাম।”

নিগমানন্দ তখন আনন্দে বিস্ময়ে সন্ন্যাসীর দিকে একদৃষ্টে চাহিয়া আছেন। এই সন্ন্যাসীই তাঁহার ঈশ্বর-নির্দিষ্ট যোগীগুরু--সুমেরদাস মহারাজ।

পাহাড়ের উপরে খানিকটা উঠিয়া গিয়া মহাপুরুষ বৃহৎ একখানা প্রস্তরখণ্ডে ঠেলিয়া দিলেন। এটি ধীরে ধীরে অপমৃত হইলে দেখা গেল এক প্রকাণ্ড গহ্বর। উহার মধ্যে দুইটি প্রকোষ্ঠ, একটিতে দণ্ড-কমণ্ডলু ও আসন রক্ষিত, অপরটিতে সজ্জিত রহিয়াছে ধরে ধরে তালপত্রে লিখিত বহু সংখ্যক পুঁথি। নিগমানন্দ শুনিলেন, সুমেরদাস মহারাজ গুরু পরম্পরায় এগুলি প্রাপ্ত হইয়াছেন।

যোগীবরের পূর্বাশ্রমের বাস পাঞ্জাবে—মহারাজ রণজিৎ সিংহের

ইনি ছিলেন অশ্রুতম সভাসদ। এক সময়ে কার্যব্যাপদেশে প্রিন্স দলীপ সিংহের সহিত ইনি ইংলণ্ডে গমন করেন। কিন্তু কিছুকাল পরে কোন কারণে বিরক্ত হইয়া তাঁহার সঙ্গ ত্যাগ করেন এবং একাকী রাশিয়া, চীন, তিব্বত প্রভৃতি অঞ্চলে ভ্রমণ করিয়া দেশে প্রত্যাবর্তন করেন। তিব্বতে অবস্থান করিবার সময় সৌভাগ্যক্রমে এক মহাযোগীর কৃপাদৃষ্টি তাঁহার উপর পতিত হয় এবং তাঁহার জীবনে এক আমূল পরিবর্তন ঘটিয়া যায়। গুরুকৃপা ও পূর্বজন্মের সাত্ত্বিক সংস্কার, এই দুইয়ের সম্মিলনের ফলে উত্তরকালে তিনি এক মহাসিদ্ধ যোগীতে পরিণত হইয়া উঠেন।

এবার সুমেরদাসজী নিগমানন্দকে প্রকৃত যোগসাধনায় ব্রতী করিলেন। প্রায় তিন মাস ব্যাপিয়া এই তরুণ প্রতিভাধর সাধককে তিনি নানা গুঢ় সাধনপ্রণালী শিক্ষা দিতে থাকেন।

কিছুদিন পর মহাপুরুষ তাঁহাকে কহিলেন, “বেটা, এখন তুমি লোকালয়ে গিয়ে গভীরভাবে এই রাজযোগ সাধনায় রত হয়ে যাও। এ সাধনায় ঘি-দুধ খেতে হয়, পুষ্টিকর আহার্য না হলে চলে না। এর জন্য প্রয়োজন লোকালয় আর ভক্ত গৃহীর সহায়তা। তা না হলে কাজ হবে না। এখানকার জঙ্গলের কচুসেদ্ধ খেয়ে এ যোগসাধন হয় না, বেটা!”

সুমেরদাসজী আরও বলিয়া দিলেন, “তুমি মেদিনীপুরে চলে যাও, তোমার কাজে সাহায্য করার লোক সেখানে রয়েছে।”

গুরুর নির্দেশে নিগমানন্দ আবার বাংলা দেশের দিকে চলিলেন। মেদিনীপুরের অন্তর্গত হরিপুর গ্রাম। ঘুরিতে ঘুরিতে সেদিন উহারই উপকণ্ঠস্থিত এক মন্দিরে আসিয়া তিনি রাত্রে আশ্রয় নেন।

প্রত্যুষেই এক সম্ভ্রান্ত ব্যক্তি ব্যস্তসমস্তভাবে সেখানে আসিয়া উপস্থিত। ইহার নাম সারদাপ্রসাদ মজুমদার, এ গ্রামেরই ইনি জমিদার। নিগমানন্দজীকে দেখিয়াই সারদাবাবু ব্যাকুলভাবে বলিলেন,

“দেখুন, গতরাতে আমি স্বপ্নে দেখেছি, দীর্ঘকায় জটাজুটধারী এক সন্ন্যাসী আমায় বলছেন—‘তোদের দেবালয়ে এক সাধু রাত্রি যাপন করছে। যোগসাধনার জন্য তাঁর সাহায্যের প্রয়োজন। তুমি যথাসম্ভব সে সাহায্য কর, তোর কল্যাণ হবে।’—আপনিই কি সেই সাধু?”

নিগমানন্দ বুঝিলেন, সুরমেরদাসজীরই এই কাণ্ড, শিশুর যোগ-সাধনাকে সহজসাধ্য করিতেই তাঁহার এ অলৌকিক লীলা।

সারদাবাবুর গৃহের পশ্চাদ্ভাগে এক বাগান রহিয়াছে। নবাগত সন্ন্যাসীর জন্য এই নিভৃত স্থানে তিনি নূতন গৃহ তৈয়ারি করাইয়া দেন। নিগমানন্দ এখানে সাধনায় মগ্ন হন।

রাজযোগ অভ্যাসের উপকরণাদি যখন যেরূপ প্রয়োজন হইত এখন হইতে তাহা পাইতে আর তাঁহার কোনই অসুবিধা হইত না। নিষ্ঠাভরে প্রায় এক বৎসর কাল এখানে তিনি যোগসাধনা অনুষ্ঠান করিতে থাকেন। অতঃপর লোকের ভীড় ও অগ্ৰাণ্য অসুবিধার জন্য এস্থান তাঁহাকে ত্যাগ করিতে হয়।

ইহার পর গোহাটিতে যজ্ঞেশ্বর বিশ্বাস মহাশয়ের সঙ্গে নিতাণ্ড আকস্মিকভাবে একদিন তাঁহার পরিচয় ঘটে। এ ভক্তের গৃহে থাকিয়াও তিনি কিছুকাল নিজস্ব যোগাভ্যাসে ব্যাপ্ত থাকেন। এ স্থানে ও কামাখ্যা পাহাড়ে থাকা কালে নিগমানন্দজী বহু উচ্চতর অধ্যাত্ম-অভিজ্ঞতা লাভ করেন।

উজ্জয়িনীতে সে বৎসর কুম্ভমেলা অনুষ্ঠিত হইতেছে। এ মেলায় দীক্ষাগুরু সচ্চিদানন্দ মহারাজের চরণ দর্শন করিতে তিনি বড় ব্যগ্র হইয়া উঠিলেন। মেলাক্ষেত্রে পৌঁছিয়া দেখিলেন, ইহার এক প্রান্তে বৈদান্তিক সাধুদের প্রকাণ্ড এক জমায়েত বসিয়াছে। শৃঙ্গেরী মঠের শঙ্করাচার্য ইহার নেতৃস্থানীয় হইয়া মধ্যস্থলে উপবিষ্ট। স্বামী সচ্চিদানন্দ মহারাজও সেখানে সমাসীন।

গুরুজীকে দর্শন করা মাত্র নিগমানন্দ ছুটিয়া গিয়া তাঁহাকে সাষ্টাঙ্গ

স্বামী নিগমানন্দ

প্রণাম করিলেন। শঙ্করাচার্য্য সর্বোচ্চ আসনে বসিয়া উপস্থিত ব্যক্তিদের সহিত তত্ত্বালাপ করিতেছেন, কিন্তু তরুণ সাধক নিগমানন্দ তাঁহাকে লক্ষ্যই করিলেন না।

একি শিষ্টাচার? একদল সন্ন্যাসী এ আচরণে কষ্ট হইলেন। প্রচলিত রীতি অনুযায়ী জমায়েতের সন্ন্যাসীদের মধ্যে জগদগুরু শঙ্করাচার্য্যকেই সর্বোচ্চ সম্মান দেখানো উচিত। সন্ন্যাসীরা তাই অভিযোগের সুরে কহিলেন, “শঙ্করাচার্য্য জগদগুরু, বৈদান্তিক সমাজের মতে, তিনি তোমার গুরুগুরু গুরু। তাঁকে আগে প্রণাম করলে না, এ আবার কি রকম ব্যবহার?”

“নিগমানন্দ তৎক্ষণাৎ উত্তর দিলেন, “তা কি করে সম্ভব? আমার গুরুর গুরু নেই। যদি গুরুব গুরু স্বীকার করা যায়, তাহলে গুরুতে অনবস্থা দোষ আসে,—মদগুরু শ্রীজগত্তরুঃ।”

শঙ্করাচার্য্য এতক্ষণ নীরবে উভয় পক্ষের কথা শুনিতেছিলেন। এবার স্থিতহাস্তে কহিয়া উঠিলেন, “বাচ্চা কিন্তু ঠিক কথাই বলেছে, গুর সিদ্ধান্ত খণ্ডন করবাব তো যো নেই।” এই তরুণ সাধক যে স্বামী সচ্চিদানন্দ সরস্বতীর শিষ্য এ কথা জানিয়াও তিনি আনন্দিত হইয়া উঠিলেন।

অধ্যাত্ম-অনুভূতি সম্বন্ধে এ সময়ে তিনি নিগমানন্দজীকে কয়েকটি প্রশ্ন করেন। উত্তর শুনিয়া প্রসন্নভাবে স্বামী সচ্চিদানন্দকে কহিলেন, “তোমার এ শিষ্যকে এখনো দণ্ডী বহাচ্ছে কেন? এ তো পরমহংস হবার যোগ্যতা অর্জন করেছে।”

উপস্থিত সাধুমহাত্মাদের সম্মতি নিয়া সকলের আনন্দধ্বনির মধ্যে সচ্চিদানন্দ মহারাজ সেদিন নিগমানন্দ স্বামীকে পরমহংস আখ্যা প্রদান করিলেন।

অতঃপর নিগমানন্দ কাশীধামে আসিয়া উপস্থিত হন। ঘুরিতে ঘুরিতে অত্যন্ত ক্লান্ত ও ক্ষুধার্ত হইয়া সেদিন তিনি দশাশ্বমেধ ঘাটে আসিয়া বসিয়াছেন। নিঃসম্বল সন্ন্যাসীরূপে একাকী পরিব্রাজন

করাই তাঁহার চিরাচরিত রীতি। হাতে অর্থাৎ কোন কিছুই নাই।
তাঁহা, বারাণসী তাঁহার নিত্যস্থাপিত। ক্ষুধিবৃত্তি কি করিয়া
করবেন ইহাই তিনি ভাবিতেছেন। হঠাৎ মনে পড়িল, কাশীতে তো
কেহ অভুক্ত থাকে না—এ যে অন্নপূর্ণার স্থান।

সঙ্কল্প করিলেন, গঙ্গার ঘাটে বসিয়া এবার খুব ধ্যান লাগাইবেন।
ক্ষুধার অন্ন এখানে সত্যসত্যই জুটে কিনা, অন্নপূর্ণার কুপার এ মহিমা
পরীক্ষা করিয়া দেখা যাইবে।

ধ্যাননিমগ্নিত নেত্রে নিগমানন্দ ঘাটের এক প্রান্তে উপবিষ্ট
রহিয়াছেন। সম্মুখে অগণিত নরনারীর ভীড়। স্নানার্থী গৃহস্থ ভক্ত
ও সাধুসন্ত পরিব্রাজকদের আসা-যাওয়ার বিরাম নাই।

ক্রমে বেলা বাড়িয়া উঠিল। ইতিমধ্যে এক স্নানার্থিনী হঠাৎ
তাঁহার সম্মুখে আসিয়া উপস্থিত। স্ত্রীলোকটি দেখিতে বড় কুৎসিৎ,
বার্ককোর ভারে দেহটি শূন্য, পরিধানে বস্ত্র মলিন, ছিন্ন-ভিন্ন। হাতে
তাঁহার একটি বড় শালপাতার ঠোঙা।

নিগমানন্দের পাশে উহা নামাইয়া রাখিয়া বৃদ্ধা সান্ন্যাসিনী বসিল,
“বাবা আমি চট্ করে স্নানটা সেরে আসছি, এ ঠোঙাটা তোমার
কাছেই রইলো।” সন্মতি বা উত্তরের কোন অপেক্ষা না রাখিয়া বৃদ্ধা
সোপান বাহিয়া তখনই নীচে নামিয়া চলিয়া গেল।

এদিকে নিগমানন্দের ধ্যানাবেশ ক্রমে গাঢ়তর হইয়া উঠিয়াছে।
বেলা গড়াইয়া গিয়া কখন যে রাত্রির অন্ধকার ঘনাইয়া আসিয়াছে,
সেদিকে তাঁহার জ্ঞান নাই। বাহ্যজ্ঞান ফিরিয়া আসিলে বুঝিলেন,
রাত্রি তখন নয়টার কম হইবে না। ইতিমধ্যে ক্ষুৎপিপাসাও বড়
তীব্র হইয়া উঠিয়াছে। ভাবিতে লাগিলেন, “রাত্রি তো গভীর হয়ে
এলো। কই, অন্নপূর্ণার কাশীতে আজ আমার খাবারের তো কেউ
সংস্থান করলো না।”

হঠাৎ পার্শ্বস্থিত শালপাতার ঠোঙার উপর দৃষ্টি পড়িতেই তিনি
চমকিয়া উঠিলেন। তাই তো, বেলা দ্বিপ্রহর হইতেই এটি কিন্তু সেই

স্বামী নিগমানন্দ

একভাবেই সেখানে পড়িয়া আছে। যে বৃদ্ধা ইহা গচ্ছিত রাখিয়া যেন, সে তো স্নানের পর আর ফিরিয়া আসে নাই।

ঠোঙাটি খুলিতেই নিগমানন্দ দেখিলেন, একগাদা ~~হুখার~~ মিহিদানা-সীতাভোগ উহাতে রক্ষিত। ধানভজের পর ক্ষুধার ~~আশা~~ সহের সীমা ছাড়াইয়া গিয়াছে। তত্পরি সম্মুখে রহিয়াছে বাংলা দেশের এ বহুবিশ্রুত মিষ্টি। ঠোঙাটি তৎক্ষণাৎ উজাড় করিয়া কেলিতে দেৱী হইল না। ভোজন শেষে অঞ্জলি পুরিয়া গঙ্গাজল পান করিলেন, তারপর ছাড়িলেন তৃপ্তির নিশ্বাস।

সে রাত্রিতে একটি জীর্ণ, মনুষ্য-পরিত্যক্ত গৃহের বারান্দায় স্বামী নিগমানন্দ নিদ্রিত রহিয়াছেন। গভীর রাত্রিতে স্বপ্ন দেখিলেন, জননী অন্নপূর্ণা রূপের ছটায় দশদিক আলো করিয়া তাঁহার সম্মুখে আবির্ভূতা। মধুব কণ্ঠে জননী কহিতে লাগিলেন, “বাবা, এবার তো প্রত্যক্ষ করলে, আমার কাশীতে অভুক্ত কেউ কখনো থাকতে পারে না। উপাদেয় খাবারগুলো আমিই তোমাকে দিয়ে এসেছিলাম।”

নিগমানন্দ উত্তর দিলেন, “কই মা, তুমি তো ওগুলো দাওনি। যে আমাকে দিয়েছে, সে তো এক বৃদ্ধা মানবী।”

“কেন বাবা, যিনি নিগুণ তিনি কি সগুণে নামতে পারেন না? নিরাকারের ক্ষমতা কি সীমিত? যে কোন আকার নিতে তাঁর আবার বাধে কোথায়?”

প্রসিদ্ধ বেদান্তবাদী সন্ন্যাসীর শিষ্য নিগমানন্দ। তখনি তিনি এ তত্ত্বটি মানিয়া নিতে পারিলেন না, মনে নানা সন্দেহের ছায়াপাত হইল। দেবী এবার স্নেহে কহিতে লাগিলেন, “বাবা নিগমানন্দ, তোমার সাধনা কিন্তু এখনো পূর্ণাঙ্গ হয়ে ওঠেনি। তুমি এবার ভাবের সাধনা, প্রেমের সাধনার দিকে অগ্রসর হও, লীলারহস্য আয়ত্ত করতে শুরু কর।”

স্বপ্ন ভাঙ্গিবার সঙ্গে সঙ্গে নিগমানন্দ উঠিয়া বসিলেন। অন্তরের

ভারতের সাধক

ব্যাকুলতা এবার যেন শতগুণ বাড়িয়া গেল। কোথায় সাধনজীবনের পূর্ণতার পথটি খুঁজিয়া পাইবেন, কোথায় তাঁহার পরম প্রাপ্তি মিলিবে—এই চিন্তায় তিনি অস্থির।

ইঠাং স্বরণে আসিল তাঁহার গুরুদেবের কথিত, হিমালয়ের সেই সন্ন্যাসিনী মোহান্তের কথা। সে-বার উত্তরাখণ্ডে ভ্রমণের সময় স্বামী সচ্চিদানন্দ তাঁহাকে মহাসাধিকা গৌরীমাতাজীর সহিত পরিচয় করাইয়া দেন, সাধনার শেষের দিকে নিগমানন্দকে তিনি একবার তাঁহার নিকটে আসিতেও বলিয়াছিলেন। এবার সেই উত্তরাখণ্ডের আশ্রমের দিকে তিনি রওনা হইলেন।

প্রায় আড়াইশত বৎসর বয়স এই গৌরীমার, কিন্তু তবুও বয়সের কিছুমাত্র ছাপ তাঁহার মধ্যে পড়ে নাই। তারুণ্যমণ্ডিত দেহে অপরূপ দিব্যশ্রী বলমল করিতেছে। ইহার তৎকালীন শিক্ষায় ও কৃপাস্পর্শে নিগমানন্দের সাধনসত্যায় এক অপার্থিব আনন্দ ও প্রেমের প্রস্রবণ খুলিয়া গেল।

ইহার পর তিনি চলিয়া আসেন আসামের গোঁহাটি এবং গাবো পাহাড় অঞ্চলে। এখানে একান্তে আপন সাধনার গভীরে বেশ কিছুকাল অবস্থান করিতে থাকেন। এক অপার্থিব আনন্দের স্রোত এই সময়ে সর্বদা তাঁহার অন্তরসত্যায় বহিয়া চলিতে থাকে।

শুধু অন্তর্জীবনের নিগূঢ় সাধনা নিয়াই নিগমানন্দ এ সময়ে দিন অতিবাহিত করেন নাই, তাঁহার প্রকাশিত গ্রন্থত্রয় - যোগীগুরু, জ্ঞানী-গুরু, তান্ত্রিকগুরু প্রভৃতির মাধ্যমে এবার জনসমাজে তাঁহার পরিচয় ঘটিতে থাকে। সারস্বত মঠ, ঋষিকুল শিক্ষায়তন প্রভৃতির মধ্য দিয়াও এই শক্তিমান সাধকের সংগঠন নানা দিকে বিস্তৃত হইয়া উঠে। শুধু আসাম, বাংলা ও উড়িষ্যায়ই নয়, পশ্চিম ও দক্ষিণ ভারতের নানা অঞ্চলেও নিগমানন্দজীর প্রভাব-প্রতিপত্তি বৃদ্ধি পায়।

কর্মময় বহিরঙ্গ জীবনের অন্তরালে তাঁহার প্রেমান্বিত সাধনাটি

বহিয়া চলে,—ধীরে ধীরে ইহা উন্মোচিত করিয়া দেয় নূতনতর অধ্যায়। নিগমানন্দের এখনকার এ সাধন-জীবন অত্যন্ত কৃপালীলা ও যোগৈশ্বর্যের ভরপুর। সহজ প্রেম ও আত্মবিশ্বাস স্পর্শেই সাধারণতঃ তিনি ভক্ত ও শিষ্যদের আকর্ষণ করিতেন, শিষ্যের মাধ্যমে তাঁহাদের করিয়া তুলিতেন রূপান্তরিত। তাঁহার অমৌনিক যোগ-বিভূতি ও শিষ্যদের সহিত আত্মিক যোগাযোগ স্থাপনে, তাঁহাদের ক্রিয়াক্ষমতা সাধনে কম কার্যকরী হইত না।

মধ্যপ্রদেশের বাস্তার বাজার প্রাণে এক সময়ে অধ্যাত্মসাধনার আকাজক্ষা জাগ্রত হয়। যোগসিদ্ধ ঈশ্বরপ্রাপ্ত গুরুর জন্ম তিনি ব্যাকুল হইয়া পড়েন। অবশেষে একদিন তিনি দত্তিকেশ্বরের দেবী-মন্দিরে ধর্না দেন। তাহার চিহ্নিত গুরুদেব কে, কোথায় গেলে তাঁহার সন্ধান মিলিবে—এ তথ্য জানিরাব জন্ম দেবীর চরণে বারবার মিনতি জানাইতে থাকেন।

এ সময়ে একদিন মন্দিরের মধ্যে আচম্বিতে দৈববাণী ধ্বনিত হয়—‘বৎস, তোমার গুরু—বাংলার মহাসাধক নিগমানন্দ সরস্বতী তার আশ্রয় নিলেই তোমার অভীষ্ট সিদ্ধ হবে।’

সুদূর মধ্যপ্রদেশে নিগমানন্দজীর নাম তখনও প্রচারিত হয় নাই। অধ্যাত্ম অজ্ঞাত কে এই মহাপুরুষ? বাংলাদেশে লোক পাঠাইয়া বহু খোঁজ-খবর নিবার পর বাস্তার-রাজ স্বামী নিগমানন্দের সহিত যোগাযোগ স্থাপন করেন ও তাঁহার চরণোপান্তে আসিয়া উপস্থিত হন। তারপর এই সিদ্ধপুরুষের কৃপাস্পর্শে তাঁহার অধ্যাত্মজীবন উজ্জীবিত হইয়া উঠে।

ইন্দোরের শ্রীপাঠক রাজ সরকারের একজন বিশিষ্ট কর্মচারী। সংসারের মায়াবন্ধন কাটাইয়া উঠিতে তিনি সেই সময়ে বড় ব্যগ্র হইয়া পড়িয়াছেন। কোন্ মহাপুরুষ তাঁহাকে আশ্রয় দিবেন, কাহার তত্ত্বনির্দেশে প্রকৃত শান্তি লাভ করিবেন, ইহা নিয়া তাঁহার চিন্তিত্তার তখন অবধি নাই।

তিনি নদীতীরে বসিয়া সখেদে ভাবিতেছেন, তাঁহার
 হৃদয়ে—তদ্বদর্শী মহাপুরুষের শুভাগমন কি হইবে না? অন্তরে
 কান্নায় ভাসিয়া উঠিল এক তীব্র আলোড়ন।

মহলা তাঁহার নয়ন সমক্ষে আকাশের গায়ে এক দিব্য মূর্তি
 ভাসিয়া উঠিল। কিন্তু কে এই মহাপুরুষ? ইঁহাকে তো তিনি
 কোন দিনই দর্শন করেন নাই! অলৌকিক মূর্তিটি অতঃপর ধীরে
 ধীরে অদৃশ্য হইয়া গেল। ইঁহার অন্তর্কানের সঙ্গে সঙ্গে তাঁহার
 ক্র্যাকুলতা আরও বাড়িয়া উঠিল। অলৌকিকভাবে দৃষ্ট এই মহাত্মার
 চিন্তায় তিনি বিভোর হইয়া পড়িলেন।

কয়েক দিনের মধ্যেই পাঠকজী আবার এক অলৌকিক নির্দেশ
 প্রাপ্ত হইলেন। নদীতীরের সেই পূর্বের স্থানটিতেই তিনি সেদিন
 বসিয়া আছেন, হঠাৎ তাঁহার দৃষ্টির সম্মুখে স্বর্ণাক্ষরে তিনটি শব্দ
 রূপায়িত হইয়া উঠিল—স্বামী নিগমানন্দ পরমহংস। অতঃপর ভক্ত ও
 সাধুসন্তদের মহলে অনুসন্ধানের পর এ মুমুকু ব্যক্তি নিগমানন্দজীর
 আশ্রয়লাভে সমর্থ হন।

শুধু অধ্যাত্মসাধনার পথেই নয়, সাংসারিক জীবনের আপদ-
 বিপদেও বহু ভক্ত সাধককে নিগমানন্দ মহারাজের অলৌকিক কুপার
 আশ্রয় লাভ করিতে দেখা গিয়াছে।

ত্রিপুরার একটি ক্ষুদ্র, অখ্যাত গ্রামের যুবক অশ্বিনী। মাতা পত্নী
 ও বালক পুত্র নিয়া তাহার ছোট একটি সংসার। উপার্জন অতি
 সামান্য, কোনমতে দিন অতিকষ্টে চলে। পরিবারটি নিগমানন্দজীর
 আশ্রিত কুটিরের এক কোণে পরম শ্রদ্ধাভরে ঠাকুরের চিত্র স্থাপন
 করা আছে, সকাল সন্ধ্যায় সকলে মিলিয়া প্রণতি জানায়।

আকস্মিক এক হুঃসাধ্য রোগে সেদিন অশ্বিনীর প্রাণবিয়োগ হয়।
 বৃদ্ধা মাতা ও স্ত্রী শোকে উন্মত্তপ্রায় হইয়া পড়ে। শোকাচ্ছন্ন কুটিরের
 এক প্রান্তে গুরুদেবের ছবিটি স্থাপিত রহিয়াছে, সে দিকে দৃষ্টি পড়িতেই
 বৃদ্ধা মহা উত্তেজিত হইয়া উঠিলেন। ভাবিলেন, যে ঠাকুর হৃদৈবের

शायी निग्रहान्न

দিনে এমন নীরব দর্শক হইয়া থাকেন তাঁহাকে কখনো কখনো ভাবি-
লাভ? আজই তিনি এ ছবিটিকে পুকুরের জলে বিসর্জন দিবেন।

ছবিখানি বিসর্জিত হইতে যাইতেছে, এমন সময় গা-
প্রাণ-গমনো আহ্বান আসিল—মা ।

বৃদ্ধা ফিরিয়া চাহিতেই দেখিলেন, গুরুদেব নিগমানন্দ ~~দেখিলেন~~
নেত্রে দণ্ডায়মান। চিত্রটি আর ফেলিয়া দেওয়া গেল না।

নিগমানন্দ করুণকণ্ঠে বলিতে লাগিলেন, “চল মা বয়েসি, আমিই তোমার ছেলে। আমি তোমায় মা বলে ডাকবো। অধিনীত জগৎ চোখের জল ফেলো না, সে যে আমার কাছেই আছে।”

কখন কোথা দিয়া স্বামী নিগমানন্দ ত্রিপুরার এই অখ্যাত পরীতে
আবির্ভূত হইলেন, তাহা সত্যই এক ছদ্ম্বেয় রহস্য । গৃহের সকলকে
নানারূপে সাস্থন। দিয়া, কিছুকণ তাহাদের সহিত কাটাইয়া আবার
হঠাৎ কখনও তিনি অদৃশ্য হইয়া গেলেন ।

অন্তর্দ্বানের পরেই সকলের জঁশ হইল। গুরুদেব যে অলৌকিক শক্তিবলেই তাহাদের মধ্যে হঠাৎ উপস্থিত হইয়াছিলেন, একথা বুঝিতে কাহারও বাকী রহিল না।

আর একবারের কথা। একদল স্থানীয় ছর্ব্বস্ত সেদিন অশ্বিনীর গৃহে প্রবেশ করে, তাহার বিধবা পত্নীর উপর তাহারা অত্যাচার করিতে উদ্ভূত হয়। এই সঙ্কটের দিনেও ঐ অসহায় তরুণীর ভয়ার্ত্ত ক্রন্দনে নিগমানন্দজীর অনুরূপ আবির্ভাব ঘটে। তাঁহার তেজোদৃষ্ট হৃদয় শুনিয়া ছর্ব্বস্তদল সে স্থান হইতে পলায়ন করে। ভয়ার্ত্ত পরিবারটিকে আশ্বস্ত করিয়া স্বামীজী গৃহের বাহিরে একটি গতি অঙ্কিত করিয়া দেন। রাত্রিতে এই গতির ভিতরে অবস্থান করিলে কেহ তাহদের অনিষ্ট করিতে পারিবে না—একথা বলিয়াই মহাপুরুষ হন অন্তর্হিত।

আশ্রিত শিষ্যদের মধ্যে তাঁহার গুরুজীবনের ভূমিকাটির প্রকৃত
স্বরূপ বুঝাইয়া দিতে স্বামী নিগমানন্দের কোনদিনই ভুল হয় নাই।

শক্তিধর বানী ছিল স্পষ্ট ও দ্ব্যর্থহীন। তিনি বলিতেন, “আমি অবতার-টবতার নই—সাধারণ মানুষ। পশু-পক্ষী, কীট-পতঙ্গ ইত্যাদি জীবন অতিক্রম করে জন্ম জন্মান্তরের সাধনার পর এ-জন্মে আগমনকে জেনেছি, সত্য লাভ করেছি, ব্রহ্মজ্ঞান হয়েছে। ব্যক্তিগত স্বাস্থ্য হওয়ায় আমার ভেতর দিয়ে জগদগুরুর ঐচ্ছাই সীলান্বিত হয়ে উঠেছে, আমাকে তোমরা জগদগুরু বলে জেনে রাখো। আমি সাধনা দ্বারা নিজেকে মুক্ত হয়েছি—তোমাদেরও মুক্তির পথ দেখিয়ে দেব, এই আমার কাজ।”

জীবের পরিভ্রাণের জন্তু পরম আশ্বাস জানাইয়া তিনি কহিতেন, “জ্ঞানো, জীবের আকুল ক্রন্দন আর ব্রহ্মাণ্ডপতির নিবেদন এ দুটি একত্র হলে সচ্চিদানন্দধন বিগ্রহ তাঁর অংশকে জীবের দুঃখ দূর করবার জন্তু, দুঃখের দমন আর শিষ্টের পালনের জন্তু পাঠান, আর অশ্রান্ত দেবতাদের তাঁর সহায়তার জন্তু জন্ম নিতে বলেন।... সদগুরুরাও জীবের দুঃখে আকুল হয়ে প্রার্থনা জানান। আমি প্রার্থনা করছি—তিনি আসুন। বর্তমানে চারিদিকে যে বিবোধ আর অসামঞ্জস্য দেখা যাচ্ছে, তাতে তিনি না এলে, কেউ এর সমাধান করতে পারবে না। আর তিনি শীগ্গিরই আসবেন, বেশী দেরী নেই।”

শক্তিধর সাধকের আচার্য্য জীবনের শেষ অধ্যায়টি ক্রমে অগ্রসর হইয়া আসিল। এবার হইতে বাহির ছুয়ারে কপাট লাগাইয়া তিনি অন্তশুধীন হইয়া যাইতে লাগিলেন।

১৩৪২ সালের অপরাহ্নে মহাত্মার লীলা-অঙ্কের উপর যবনিকাটি ধীরে ধীরে নামিয়া আসে। অগণিত শিষ্য ও ভক্তদের শোকসাগরে ভাসাইয়া চির সমাধিতে তিনি মগ্ন হন।

—

ভারতের সাধক

শঙ্করনাথ রায়